

淨土十要
(上下冊)

佛陀教育基金會
印贈

一切佛經及闡揚佛法諸書。無不令人趨吉避凶。改過遷善。明三世之因果。識本具之佛性。出生死之苦海。生極樂之蓮邦。讀者必須生感恩心。作難遭想。淨手潔案。主敬存誠如面佛天。如臨師保。則無邊利益。自可親得。若肆無忌憚。任意褻瀆及固執管見。妄生毀謗。則罪過彌天。苦報無盡。奉勸世人。當遠罪求益。離苦得樂也。

淨土十要（上冊）

佛陀教育基金會

印贈



淨土十要（上冊） 目錄

| | |
|-----------------|-----|
| 淨土十要原文發刊序 | 001 |
| 靈峯藕益大師選定淨土十要重刻序 | 004 |
| 淨土十要杭州重刻序 | 012 |
| 淨土十要揚州重刻序 | 015 |
| ◎淨土十要（一） | |
| 靈峯藕益大師選定淨土十要第一 | 017 |
| 佛說阿彌陀經要解重刻序 | 019 |
| 佛說阿彌陀經要解 | 021 |
| 原跋 | 085 |
| 欽浦講錄跋 | 086 |
| 附錄 | 087 |
| 無量壽經四十八願 | 087 |




◎淨土十要（二）

靈峯蕩益大師選定淨土十要第二

往生淨土懺願儀

| | |
|------------|---|
| 第一嚴淨道場 | 1 |
| 第二明方便法 | 0 |
| 第三明正修意 | 9 |
| 第四燒香散華 | 7 |
| 第五禮請法 | 1 |
| 第六讚歎法 | 1 |
| 第七禮佛法 | 1 |
| 第八懺願法 | 1 |
| 第九旋繞誦經法 | 1 |
| 第十坐禪法 | 2 |
| 自跋 | 1 |
| 往生淨土決疑行願二門 | 3 |
| | 3 |
| | 4 |
| | 3 |
| | 0 |
| | 9 |
| | 3 |
| | 9 |
| | 8 |
| | 4 |
| | 2 |
| | 0 |
| | 0 |
| | 9 |
| | 7 |
| | 4 |



舊跋 1 4 9

附錄 1 5 0

結蓮社普勸文 1 5 0

◎淨土十要 (三)

靈峯蕩益大師選定淨土十要第三 1 5 3

觀無量壽佛經初心三昧門 1 5 6

受持佛說阿彌陀經行願儀 1 6 5

慈雲小懺文 1 7 3

二行合跋 1 7 8

附錄 1 7 9

檀庵法師臨行自饒 1 7 9

◎淨土十要 (四)

靈峯蕩益大師選定淨土十要第四 1 8 1

淨土十疑論序 1 8 2



淨土十疑論

| | | | | |
|------------|-------|---|---|---|
| 第一疑 | | 1 | 8 | 5 |
| 第二疑 | | 1 | 8 | 7 |
| 第三疑 | | 1 | 8 | 9 |
| 第四疑 | | 1 | 9 | 0 |
| 第五疑 | | 1 | 9 | 2 |
| 第六疑 | | 1 | 9 | 4 |
| 第七疑 | | 1 | 9 | 5 |
| 第八疑 | | 1 | 9 | 7 |
| 第九疑 | | 1 | 9 | 9 |
| 第十疑 | | 2 | 0 | 1 |
| 後序 | | 2 | 0 | 5 |
| 附錄 | | 2 | 0 | 7 |
| 唐五臺山竹林寺法照傳 | | 2 | 0 | 7 |
| 唐洛陽岡極寺慧日傳 | | 2 | 1 | 3 |




| | |
|------------|---|
| 宗蹟禪師蓮華勝會錄文 | 2 |
| 大智律師淨業禮懺儀序 | 1 |
| 9 | 5 |

◎淨土十要（五）

| | |
|-------------------|---|
| 靈峯藕益大師選定淨土十要第五 | 2 |
| 念佛三昧寶王論自序 | 2 |
| 念佛三昧寶王論卷上七門（念未來佛） | 2 |
| 念未來佛速成三昧門（一） | 2 |
| 變女群盜皆不可輕門（二） | 2 |
| 持戒破戒但生佛想門（三） | 2 |
| 現處湯獄不妨受記門（四） | 3 |
| 觀空無我擇善而從門（五） | 3 |
| 無善可擇無惡可棄門（六） | 3 |
| 一切眾生肉不可食門（七） | 4 |
| 念佛三昧寶王論卷中六門（念現在佛） | 4 |
| 5 | 5 |



| | | | | |
|-------------------------------|-------|---|---|---|
| 念現在佛專注一境門 (八) | | 2 | 4 | 5 |
| 此生他生一念十念門 (九) | | 2 | 4 | 7 |
| 是心是佛是心作佛門 (十) | | 2 | 5 | 0 |
| 高聲念佛面向西方門 (十一) | | 2 | 5 | 4 |
| 夢覺一心以明三昧門 (十二) | | 2 | 5 | 9 |
| 念三身佛破三種障門 (十三) | | 2 | 6 | 0 |
| 念佛三昧寶王論卷下七門 (通念三世無不是佛) | | 2 | 6 | 3 |
| 念過去佛因果相同門 (十四) | | 2 | 6 | 3 |
| 無心念佛理事雙修門 (十五) | | 2 | 6 | 4 |
| 了心境界妄想不生門 (十六) | | 2 | 6 | 9 |
| 諸佛解脫心行中求門 (十七) | | 2 | 7 | 1 |
| 三業供養真實表敬門 (十八) | | 2 | 7 | 4 |
| 無相獻華信毀交報門 (十九) | | 2 | 7 | 5 |
| 萬善同歸皆成三昧門 (二十) | | 2 | 7 | 7 |
| 舊跋 | | 2 | 8 | 1 |



◎淨土十要（六）

靈峯瀟益大師選定淨土十要第六

淨土或問

跋

◎淨土十要（七）

靈峯瀟益大師選定淨土十要第七

西齋淨土詩卷上

懷淨土詩七十七首（并自序）

評點定懷淨土詩跋

西齋淨土詩卷下

十六觀讚二十二首

化生讚八首

析善導和尚念佛偈八首


懷淨土百韻詩

3 2 2
7 8 8
6 6 3



◎淨土十要（八）

| | | | |
|--------------------|---|---|---|
| 娑婆苦漁家傲十六首 | 3 | 8 | 0 |
| 西方樂漁家傲十六首 | 3 | 8 | 4 |
| 題跋一律 | 3 | 8 | 8 |
| 附錄 | 3 | 8 | 9 |
| 蓮池大師答蘇州曹魯川書（附來書） | 3 | 8 | 9 |
| 蕩益大師答卓左車茶話（原問博山啟附） | 4 | 0 | 8 |
| 蕩益大師開示念佛法門 | 4 | 1 | 0 |
| ◎淨土十要（八） | | | |
| 靈峯蕩益大師選定淨土十要第八 | 4 | 1 | 3 |
| 重刻寶王三昧念佛直指序 | 4 | 1 | 5 |
| 寶王三昧念佛直指卷上 | 4 | 1 | 8 |
| 極樂依正第一 | 4 | 1 | 9 |
| 斥妄顯真第二 | 4 | 2 | 5 |
| 附真妄心境圖說 | 4 | 3 | 3 |
| 呵謬解第三 | 4 | 3 | 5 |




| | |
|-------------------|---|
| 正明心佛觀慧第四 | 4 |
| 道場尊像念佛正觀第五 | 4 |
| 闢斷空邪說第六 | 4 |
| 開示禪佛不二法門第七 | 4 |
| 示諸佛二土折攝法門第八 | 4 |
| 勸修第九 | 4 |
| 寶王三昧念佛直指卷下 | 4 |
| 勸戒殺第十 | 4 |
| 勸持眾戒第十一 | 4 |
| 勉起精進力第十二 | 4 |
| 正行第十三 | 4 |
| 別明客途所修三昧第十四 | 4 |
| 三昧儀式第十五 | 4 |
| 揚佛下化之力第十六 | 5 |
| 十大礙行第十七 | 5 |



◎淨土十要（九）

| | | | |
|----------------|---|---|---|
| 靈峯藕益大師選定淨土十要第九 | 5 | 4 | 5 |
| 淨土生無生論 | 5 | 4 | 6 |
| 一、一真法界門 | 5 | 4 | 7 |
| 二、身土緣起門 | 5 | 5 | 1 |
| 三、心土相即門 | 5 | 5 | 2 |
| 四、生佛不二門 | 5 | 5 | 3 |
| 羅顯眾義第十八 | 5 | 1 | 3 |
| 獨示一願四義之門第十九 | 5 | 2 | 2 |
| 示念佛滅罪義門第二十 | 5 | 2 | 7 |
| 略示列祖行門第二十一 | 5 | 3 | 1 |
| 正示迴向普勸往生第二十二 | 5 | 3 | 4 |
| 附錄 | 5 | 3 | 7 |
| 破妄念佛說 | 5 | 3 | 7 |
| 舊跋 | 5 | 4 | 4 |



| | |
|---------|---|
| 五、法界為念門 | 5 |
| 六、境觀相吞門 | 5 |
| 七、三觀法爾門 | 5 |
| 八、感應任運門 | 5 |
| 九、彼此恆一門 | 5 |
| 十、現未互在門 | 5 |
| 舊跋 | 5 |
| 跋 | 5 |
| 續淨土生無生論 | 5 |
| 一、一真法界門 | 5 |
| 二、性心具造門 | 5 |
| 三、心佛互徧門 | 5 |
| 四、心佛同體門 | 5 |
| 五、唯心即至門 | 5 |
| 六、性德莊嚴門 | 5 |

淨土十要



| | |
|-------------|-----|
| 七、佛佛同體門 | 575 |
| 八、心佛感應門 | 576 |
| 九、三無差別門 | 577 |
| 十、因果互具門 | 579 |
| 跋 | 581 |
| 淨土法語 | 583 |
| 附錄 | 593 |
| 清省庵法師勸發菩提心文 | 593 |
| 附錄無功叟淨土自信錄序 | 617 |




淨土十要原文發刊序

如來一代所說一切法門。雖則大小頓漸不同。權實偏圓各異。無非令一切眾生。就路還家。復本心性而已。然此諸法。皆須自力修持。斷惑證真。了生脫死。絕無他力攝持。令其決于現生。入聖超凡。成就所願也。唯淨土法門。仗佛誓願攝受之力。自己信願念佛之誠。無論證悟與否。乃至煩惑絲毫未斷者。均可仗佛慈力。即於現生。往生西方。既得往生。則已證悟者。直登上品。未斷惑者。亦預聖流。是知淨土法門。廣大無外。如天普蓋。似地均擎。統攝群機。了無遺物。誠可謂十方三世一切諸佛。上成佛道。下化眾生。成始成終之總持法門。三根普被。利鈍全收。上之則等覺菩薩。不能超出其外。下之則逆惡凡夫。亦可預入其



中·暢如來出世之本懷·開眾生歸元之正路。故得九界同歸·十方共讚·千經俱闡·萬論均宣也。而況時值末法·人根陋劣·捨此別修。不但具縛凡夫。莫由出離生死·即十地聖人·亦難圓滿菩提。以故文殊·普賢·馬鳴·龍樹·遠公·智者·清涼·永明·悉皆發金剛心·為之宏贊·以期六道三乘·同得橫超三界·復本心性也。竺震著述·多難勝數。蕩益大師·選其最契時機者九種·併自所著之彌陀要解·名為淨土十要。欲學者由此具識如來度生之要·與一法普攝一切諸法之所以然。大師逝後·其門人成時·欲徧界流通·恐文言繁長·卷帙博大·費鉅而難廣布·遂節略字句·于各要敘述意致·加以評點·實殺費苦心。惜其自恃智能圓照·隨閱隨節·不加復勘·即行付刊·致文多隱晦·兼有口氣錯亂·詞不達意之處。民國七年·徐蔚如居士見訪·以彼經理刻藏經事·因祈彼搜刻原本·彼後即刻彌陀要解·西方合論二種



。今具得原本。李圓淨居士。擬照前十要章程重刊。凡時師所作序述評點。一一照錄。唯補時師之歉缺。不滅時師之苦心。仍作四冊。以所節有多少不同。故卷須重調。西齋詩。念佛直指。昔則前後倒置。今調令適宜。各冊末附各要文。及徹悟語錄。又另以往生論註。蓮華世界詩。合一冊。作附本。共成五冊。均與十要文義宗旨符合。了無差殊。如帝網珠。互相掩映。令諸閱者。深知淨土法門。為一切諸法之歸宿。一切諸法。無不從此法界流。無不還歸此法界也。民國十九年庚午冬。常慚愧僧印光謹撰。



靈峯蕩益大師選定淨土十要重刻序

此序西蜀
潘存評點

淨土法門者。法界緣起也。何謂法界。吾人現前一念之心。不唯非塊然。亦復非倏爾。纔有能起。即屬所緣。非能緣者。不得已強名之曰無相。然虛空兔角。亦受無相之名。而虛空有表顯相。兔角有斷無相。非真無相。又不得已強名此無相曰真。唯其無相而真。故十方三世依正色心自他凡聖等法。皆在我現前一念無相真心中炳然齊現。而皆以自心為體。非別有物。心無相而真。從心所現一切諸法。莫不無相而真。是故於中隨拈一毫末。一一皆具十方三世依正色心自他凡聖等法。而無餘欠。乃至一欸一掉。一名一字。罔非自心之全體大用。而欸掉名字之外。更無一法可得。此所謂法界也。何謂法界緣起。聖凡皆此法界。非麤妙。無



減增。不涉生死。不干迷悟。而悟順法界故。出生二種涅槃。迷逆法界故。妄現二種生死。迷逆生死。法界宛然。無奈眾生從未悟故。終不能了。諸佛菩薩愍之。從一真法界。起種種因緣。世出世間。事類無算。一介螻蛄。萬聖互援。神力既同。慈心亦等。而眾生迷逆妄故。受化不齊。於諸佛菩薩平等光中。有有緣無緣。及緣中淺深久近之異。緣分差等。化辨從違。若或無緣。徒勞引領。此所謂法界緣起也。是故建化門中。只論繫珠一義。下三段引證如法華深密須精研之妙典。廣談宿因。先聖以四釋闡明因緣釋。約教釋。本迹釋。觀心釋。。而必以因緣居首。由緣匪一。故教網弛張。由教無方。故恩德貫徹指本迹。由恩不可窮盡。故得消歸自己。領納家珍指觀心。故知因緣。即第一義。從上列祖。極重時節因緣。良以無法與人。亦無語句。情種熟處。假說心傳。儻其不然。契理益信不從因緣起教反成戲論而不契機。有句盡成非量。空華界裏。無自立宗。華嚴大經。王於三藏。末後一著大義煌煌無敢擬議。歸重願王。夫



眾生情愛牽連。幻成世界。妄執緣影。遂立前塵。觸之則生死浩然。究竟皆歸於業海。然而業繫之內。此引三界六道因緣為喻尚且天經地義。萬邦作孚。況諸佛菩薩悲智無涯。色心俱寂。本真如以起用。稱法性以垂機。觸之則生死銷亡。究竟皆同歸祕藏。大事該乎九界。深恩施也。音異延也。於塵年。無不從此法界流。無不還歸此法界。此與六環業繫為何如。而可反恣睽違。不從標準是旨也。精研藏教。備考群宗。由忍土而遐攬十虛。從末流而曠觀三際。則求生淨土一法。誠法界第一緣起矣。下三段專就淨土明緣第一說者謂阿彌願勝。駕越諸方。然諸佛願等。子等心等。法性海中。那容優劣。而千經萬論。極口指歸樂邦。十方廣長。同聲勸讚光壽者。何哉。緣在故耳。緣何謂在。信也。何謂不在。不信也。信不在處。的的指迷惡業障之。如夜行者滅火而趨險道。如破浪者卷帆而鼓橫橈。事同背馳。寧止紆曲。又諸佛四土。上三土容有橫義。至同居土。秘大都有豎無橫。秘密故唯極樂同居。顯露橫



具四土。故是故有情以凡夫而例一生補處。國土即緣生而顯稱性五塵。佛身因應化而見法身真常。說法從眾鳥而聞梵音深遠。以要言之。法法圓融。塵塵究竟。教海無一名相可筌蹄。從未道破法門無一因果可比擬。然此等希有。十方罕聞。而唯在極樂者。何哉。緣深故耳。緣何謂深。信深也。何謂淺。信淺也。信根淺處。的指迷恆情域之。如朝廷之有資格。高才皓齒而不遷。如麟鳳之於走飛。羽道毛群而一類。何由大方闊步。豁破無明。又諸佛度生。皆窮累劫。從凡階聖。不退為難。今求生極樂。但七日竭誠。十念傾注。雖陷惡逆。悉記往生。纔得往生。便圓踞三不退地。且見阿彌。即見十方諸佛。生極樂。即生一切剎海。乃至阿彌一光。心體全顯極樂一塵。悉能於中頓證十方三世依正色心自他凡聖等法。而不出剎那際三昧。夫諸佛度生如彼難。阿彌度生如此易者。何哉。緣久故耳。緣何謂久。信久也。何謂近。信近也。信緣近處。的指迷時分限之



· 如捨調弓而引弩弣。如放馴駢而服野駝。戰勝之功。當在異日。
· 如上所論專重有緣。緣深則境界難思。非等覺十地所能測。緣
久則神力迅速。非三祇百劫所可倫。要之阿彌下即因緣明心要非有加於吾心也。
吾心一念離絕指凡夫例補處。故聖凡無在。吾心萬法頓融指橫具四土。故四土無在。吾心
不屬時劫指圓三不退。故十世剎那無在。吾心不屬方隅指見十方佛生一切世界。故微塵剎海無在。
吾何歎乎哉。特仗增上因緣一顯發之耳。曾有久習神呪者。一夜
重魔。見獐物持之。置巨石下。其人怖急。憶誦素所習呪。遂見
獐物倒散。裂石而醒。設素未習呪。或習未純熟。緣種不深。斯
時也此際尚可插入戲論否。欲不寤死得乎。然夢中真言。復是何物。倒獐裂石。誰實
使之。皆即我現前一念之心也。自心神呪而非無呪。喚醒自心魔人。淨土
法門亦如是。自心之阿彌而非無佛。還度自心之生死。故知因緣之義。甚
深甚深。抑聞魔之重者。不許持光照。照即死。不許抱令起。抱
多失心。唯就闇中。俾熟識者大呼其名。連聲呼之。無不解者。



淨土法門亦如是。劫濁盛時。眾生魔重。毋以持名雜參話。毋以
麤心習勝觀。雜參話。則濁智騰波。決定論定起邪見。所謂照之即死者
也。習勝觀。則非其境界。決定論定起魔事。所謂抱多失心者也。唯以
現前一念無明業識之心。闡中令其專稱阿彌陀佛名號。大呼熟識其名無間一心。未
有不親證親到者。解法門至此。愈卑而愈不勝仰。愈淺而愈不可俯
。自呼自應。自魔自醒。一心之本元頓彰。法界之體用全揭。無
庸鑽仰。已上雙明事理二持以下專明事持祇麼修行。儻未悟透根源。寧可顛蒙合妙。夫顛蒙念佛
至矣極矣。無復加矣。但恐法門之戲論難忘。生死之天懷不切。二句是病根
或執牟尼而視同瓦礫。此輕易念佛者或以指爪而撮摩虛空。此高擡念佛者或抉瞽而與眼以明
。或傳經而苦舌之鳩。此說不著者如此。則揚之與抑。總莫暢乎本懷。而信
之與疑。皆不成乎三昧。間有大智。知進知退。知存知亡。而未
邁至人。未獲圓悟。未窮極致。未學要詮。欲升永明之堂。入楚
石之室。居五濁之世。約化他言闡難信之宗。殊非聊爾。嗚呼。至人幽矣



· 圓悟皇哉。若無要詮。誰與窮極。昔靈峯老人。以正法眼。選定淨土十要一書。剗厠未全。乙未之後。梨棗四散。迄丁未年。焚失數種。成時。竊念像季久轉。唯此一門。契理契機。而淨土諸書唯此諸要。盡美盡善。爰加點評。稍事節略。又倣慈雲懺儀二門合行之例。會幽谿二要為一要。自以觀經初門。彌陀行儀二種謬附之。其序首要解。尊經也。要之要也。次慈雲。重行也。次新附二種。亦行經也。三者而後。則天台。紫閣。師子林。鄞江。西齋。幽谿。以迄於袁。皆以時也。又天台以論主冠本宗。袁以白衣殿。不盡以時也。訂訖。倡募流通。而大心緇白共成焉。· 修捨沙門成時。推赤心置人腹中合掌稽首。重為告白。淨土持名之法。有三大要焉。一者六字弘名。念念之間。欣厭具足。如出幽獄。奔託王家。步步之間。欣厭具足。是故萬緣之唾不食。令人欣向榮眾苦之忍莫回。高置身於蓮華。便訂盟於芬利。蛆蠅糞壤。可殺驚慙。二者參禪

真語實語



至當不易之論


必不可無淨土。為防退墮。寧不寒心淨土必不可入禪機。意見稍乘。二門俱破。若夫餘宗。在昔之時。不必改絃。但加善巧迴向。在今之世。祇可助行。必須淨業專修。冷煖自知。何容強諍。三者一句彌陀。非大徹不能全提。而最愚亦無少欠。儻有些子分別。便成大法魔殃。只貴一心受持。可謂大哮吼寧羨依稀解悟。乞兒若見小利。急須吐棄無餘。棒打石人頭。曝曝論實事。已上三要。頗切今時。儻能真實指迷。我願捨身供養。十方三世。共聞此言。戊申端陽日。相似菩薩近住男成時。稽首書於華陽度雲精舍之雲氣樓。

樓。清康熙七年



淨土十要杭州重刻序

淨土十要者。乃靈峯大師徹底悲心之所結集也。堅密大師剖心瀝血之所流通也。自古宏淨土者。未有如此直剖心宗。力救時病。可謂將法王最勝寶藏一旦盡開。普施大地眾生現成受用。猶有不肯死心承當者。真是愚之甚癡之極矣。靈峯云。深信發願。的為淨土指南。由此而執持名號。乃為正行。若信願堅固。臨終十念一念。亦決得生。若無信願。縱將名號持至風吹不入。雨打不溼。如銀牆鐵壁相似。亦無得生之理。修淨業者。不可不知。堅密云。六字洪名。念念之間。欣厭具足。如出幽獄。奔託王家。步步之間。欣厭具足。是故萬緣之唾不食。眾苦之忍莫回。又云。一句彌陀。非大徹不能全提。而最愚亦無少欠。儻有些子分別。



便成大法魔殃。此乃二大師。哀憐末世之大慈大悲真語實語。大舌輪之所同說。金色臂之所常垂。皆此意也。願深思之。願深思之。愧哉。吾本屠門之子。地獄之人。賴佛光垂照。善友提攜。乃知厭苦。發心出家。屢蒙師友重重開示。始慕宗乘。愧宿障深厚。參究數年。只解偏空而已。於咸豐辛酉。在明因寺。忽遭兵災。方覺前來學未真實。幸佛恩加被。在大難中。雖傷一足。猶可奔逃。遂隱居於普陀佛頂山慧濟寺。於夏月間。細閱此書。感激之至。如多年閻室。忽遇明燈。可惜從前不肯細讀。空過光陰。悔之不及。自此盡棄舊習。專學持名。欲具欣厭。故然兩指。十念記數。皆從此起。有淨侶妙能大師。與余頗似宿緣。一見歡喜。乃共行之。見十要序云。像季久轉。唯淨土一門。契理契機。而淨土諸書。唯此諸要。盡美盡善。因兵燹之後。此板無存。遂發誠心。勸募重梓。唯願十方三世。共遵此書。同念彌陀。同



生淨土。方慰諸佛廣長。二師願力也哉。同治十一年壬申夏日。
戀西學人玉峯古崐。在明因寺西樓。敬燃臂香四十八炷。供養阿
彌陀佛。稽首謹序。



淨土十要揚州重刻序

甲午年·春王月·望日·吾弟某·不辭勞苦·持古本十要而來。
云及此書·現身說法多謗禪宗。噫·若作謗會·是真謗矣。夫諸宗讚揚者
·皆法也。所呵者·皆弊也。如我禪宗呵斥教律淨土者·尤甚。
豈可竟作門庭人我鬪爭法會耶。其實法法平等·一一皆同出於一
源·我佛豈有自相矛盾之理乎。故楞嚴二十五大士·位位第一。
獨大勢至一章·與其同倫五十二菩薩證入。足驗法門收機普·利
益廣·易於成就者·不言可知。憶我始祖釋迦一代宣揚·處處指
歸。此法乃當機之當機·又第一之第一·可以不必排抑矣。故列
祖弘通修持者·不一而足。但我等多隨流俗知見·出口入耳之學
·未肯曠觀古今·沈思默會其義·謂愚夫愚婦之工夫耳。倘能入



得此門·法法皆不相背·何觸之有。請深思之可也。否則·滿目盡是荊棘泥途·豈能博覽諸宗·徧遊法界·受百城煙水知識之益乎。清光緒二十年甲午。七月佛歡喜日·書成。釋觀如·略序緣起於廣陵藏經禪院之清泰室中。


印光大師讚語：

《淨土十要》乃蕩益大師以金剛眼，于闡揚淨土諸經中，選其契理契機，至極無加者。第一彌陀要解，乃大師自註，文淵深而易知，理圓頓而唯心，妙無以加，宜常研閱！

明·蕩益大師選定

佛說阿彌陀經要解

淨土十要
(一)




靈峯蕩益大師選定淨土十要第一

述曰。佛法之妙。莫要於淨土。淨土之妙。莫要於持名。持名之妙。莫要於小本阿彌陀經。小本之妙。莫要於靈峯要解。儻未讀要解。或讀未精詳。或精詳未貫徹。便謂於小本無不知。無不信。無不悟入。可乎。既於本經有未盡。一行三昧。如何修行。既未善持名。淨土玄關。謂信願如何優入。既未階淨信淨願。十方三世佛祖大道。如何荷擔。然則要解之有關於十方三世佛祖大道也甚矣。今定十要。以要解為上首。厥義有三。一祖佛經。以小本為淨土諸經之最要故。二重持名。以末法修行。總以持名為行本故。三立本經之大宗。以今解精徹確正。堪為要中之要故。讀十要者。請以要解為主。以餘九為伴。能令邪解

正



莫入·能令意見不容^確·能令心宗圓明^徹·能令美善雙盡^精·夫然後
不愧為真學佛者·夫然後不自誤誤人^{國之寶}·夫然後必生淨土^{此句方無戲論}·夫然
後可學一切佛法·夫然後知十方三世佛祖之大道·舉不外乎此
矣。




佛說阿彌陀經要解重刻序

淨土深旨。濫始於觀經之觀佛。滙澤於小本之持名。二經蓋不思議無上心要也。釋妙觀者。有天台聖祖大宗。稱經發明。要矣。釋小本者。振古於斯。諸美畢備。以言心要。似有待焉。歲在丁亥。靈峯大師述成要解。如燈照色。而非光華。文字者不能以義定名。而非義學擬議。不過道屋裏事。以從來未道徹故而聆者若驚。不外布帛菽粟之譚。存門庭知見者不能而未曾有。諸凡橫豎四土事理一心。罔弗精義入神。要歸允當。使學者此是諸佛護念了然知生信發願以起妙行。無縛焉矣爾。小本得是疏。便覺一行三昧。橫吞萬派而卓立孤標。事出非常而道在伊邇。深固幽遠之藏。一旦盡開。吾聞善善之家。機理雙契。是故矢必應絃。藥必應病。今要解逗末世機。能提深警徹悟之人。俾其法界圓昭。盡



杜虛解邪僻之習。又能使中下之輩。信而有勇。至於正譌訂誤。纖巨不遺。渾然德音。方正不割。誠諸祖所密印。諸佛所共加。以為劫外優曇。掌中摩勒。匪阿也。順治十年癸巳歲。大師在歙浦演說。釋義分科。間有不同。尤覺聞所未聞。信所未信。華陽學人性旦錄出。名歙浦本。今重梓十要。遂以此本授鈐。謹序而識之。時戊申端陽後三日也。古歙學人成時和南書。



佛說阿彌陀經要解

姚秦三藏法師鳩摩羅什譯
清西有沙門蕩益智旭解

原夫諸佛憫念群迷。隨機施化。雖歸元無二。而方便多門。然於一切方便之中。求其至直捷即心是佛至圓頓者即佛是心。則莫若念佛求生淨土。又於一切念佛法門之中。求其至簡易不簡機務至穩當者不假方便。則莫若信願專持名號。是故淨土三經並行於世。而古人獨以阿彌陀經列為日課。豈非有見於持名一法。普被三根。攝事理以無遺。統宗教而無外。尤為不可思議也哉。古來註疏。代不乏人。世遠就湮。所存無幾。雲棲和尚著為疏鈔。廣大精微。幽豁師伯述圓中鈔。高深洪博。蓋如日月中天。有目皆覩。特以文富義繁。邊涯莫測。或致初機淺識。信願難階。故復弗揣庸愚。再述要解。不敢與二翁競異。亦不必與二翁強同。譬如側看成峯。橫



看成嶺。縱皆不盡廬山真境。要不失為各各親見廬山而已。將釋經文。五重玄義。

第一釋名。此經以能說所說人為名。佛者。此土能說之教主。即釋迦牟尼。乘大悲願力。生五濁惡世。以先覺覺後覺。無法不知。無法不見者也。說者。悅所懷也。佛以度生為懷。眾生成佛機熟。為說難信法。令究竟脫。故悅也。阿彌陀。所說彼土之導師。以四十八願。接信願念佛眾生極樂世界。永階不退者也。梵語阿彌陀。此云無量壽。亦云無量光。要之功德智慧。神通道力。依正莊嚴。說法化度。一一無量也。一切金口。通名為經。對上五字。是通別合為題也。教行理三。各論通別。廣如台藏所明。

第二辨體。大乘經皆以實相為正體。吾人現前一念心性。不在內。不在外。不在中間。非過去。非現在。非未來。非青黃赤

不可徒落在語言作道理領過

學者須如此深研精撈



白。長短方圓。非香。非味。非觸。非法。覓之了不可得。而不可言其無。具造百界千如。而不可言其有。離一切緣慮分別。語言文字相。而緣慮分別。語言文字。非離此別有自性。要之離一切相。即一切法。離故無相。即故無不相。不得已強名實相。實相之體。非寂非照。而復寂而恆照。照而恆寂。照而寂。強名常寂光土。寂而照。強名清淨法身。又照寂強名法身。寂照強名報身。又性德寂照名法身。修德寂照名報身。又修德照寂名受用身。修德寂照名應化身。寂照不二。身土不二。性修不二。真應不二。無非實相。實相無二。亦無不二。是故舉體作依作正。作法作報。作自作他。乃至能說所說。能度所度。能信所信。能願所願。能持所持。能生所生。能讚所讚。無非實相正印之所印也。

陀依正

心法

欣厭極樂

三業名號

三寶根四淨土

釋迦諸佛彌

釋迦


彌陀

佛生

第三明宗。宗是修行要徑。會體樞機。而萬行之綱領也。提綱



則眾目張。挈領則襟袖至。故體後應須辨宗。此經以信願持名為修行之宗要。非信不足啟願。非願不足導行。非持名妙行。不足滿所願而證所信。經中先陳依正以生信。次勸發願以導行。次示持名以徑登不退。信則信自。信他。信因。信果。信事。信理。願則厭離娑婆。欣求極樂。行則執持名號。一心不亂。信自者。信我現前一念之心。學者須從者裏死盡偷心不可草草本非肉團。亦非緣影。豎無初後。橫絕邊涯。終日隨緣。終日不變。十方虛空微塵國土。元我一念心中所現物。我雖昏迷倒惑。苟一念回心。決定得生自心本具極樂。更無疑慮。以心性為自是名信自。信他者。信釋迦如來決無誑語。彌陀世尊決無虛願。六方諸佛廣長舌決無二言。隨順諸佛真實教誨。決志求生。更無疑惑。以教為他是名信他。信因者。深信散亂稱名。猶為成佛種子。況一心不亂。安得不生淨土。以念佛是名信因。為因信果者。深信淨土。諸善聚會。皆從念佛三昧得生。如



種瓜得瓜。種豆得豆。亦如影必隨形響必應聲。決無虛棄。是以名信果。已生者為果信事者。深信只今現前一念不可盡故。依心所現十方世界亦不可盡。實有極樂國在十萬億土外。最極清淨莊嚴。不同莊生寓言。是名信事。以境為事信理者。深信十萬億土。實不出我今現前介爾一念心外。以吾現前一念心性實無外故。又深信西方依正主伴。皆吾現前一念心中所現影。全事即理。全妄即真。全修即性。全他即自。我心徧故。佛心亦徧。一切眾生心性亦徧。譬如一室千燈。光光互徧。重重交攝。不相妨礙。是名信以法界為理。如此信此已。下明願則娑婆即自心所感之穢。而自心穢。理應厭離。極樂即自心所感之淨。而自心淨。理應欣求。厭穢須捨至究竟。方無可捨。欣淨須取至究竟。方無可取。故妙宗云。取捨若極。與不取捨亦非異轍。設不從事取捨。但尚不取不捨。即是執理廢事。既廢於事。理亦不圓。若達全事信即理。則取亦即願



理。捨亦即理。一取一捨。無非法界。故次信而明願也。言執持名號一心不亂者。名以召德。德信則便信擬議則不堪不可思議。故名號亦不可思議。名號功德不可思議。故使散稱為佛種。執持登不退也。然諸經示淨土行。萬別千差。如觀像觀想禮拜供養五悔六念等。一一行成。皆生淨土。唯持名一法。收機最廣。下手最易。故釋迦慈尊。無問自說。特向大智舍利弗拈出。可謂方便行經中第一方便。了義教經中無上了義。圓頓理經中最極圓頓。故云清珠投於濁水。濁水不得古人圓極不清。佛號投於亂心。亂心不得不佛也。信願持名。以為一乘真因。四種淨土。以為一乘妙果。舉因則果必隨之。故以信願持名為經正宗。其四種淨土之相。詳在妙宗鈔。及梵網玄義。茲不具述。俟後釋依正文中。當略示耳。

第四明力用。此經以往生不退為力用。往生有四土。各論九品。且略明得生四土之相。若執持名號。未斷見思。隨其或散或



定。於同居土分三輩九品。若持至事一心不亂。見思任運先落。則生方便有餘淨土。若至理一心不亂。豁破無明一品。乃至四十一品。則生實報莊嚴淨土。亦分證常寂光土。若無明斷盡。則是上上實報。究竟寂光也。不退有四義。一念不退。破無明。顯佛性。徑生實報。分證寂光。二行不退。見思既落。塵沙亦破。生方便土。進趨極果。三位不退。帶業往生。在同居土。蓮華託質。永離退緣。四畢竟不退。不論至心散心。有心無心。或解不解。但彌陀名號。或六方佛名。此經名字。一經於耳。假使千萬劫後。畢竟因斯度脫。如聞塗毒鼓。遠近皆喪。食少金剛。決定不消也。復次祇帶業生同居淨證位不退者。皆與補處俱。亦皆一生必補佛位。夫上善一處。根據了是生同居。即已橫生上三土。一生補佛。是位不退。即已圓證三不退。如斯從來未經道徹如此力用。乃千經萬論所未曾有。較彼頓悟正因。僅為出塵階漸。



生生不退。始可期於佛階者。不可同日語矣。鐵案宗教之士。如何勿思。

第五教相。此大乘菩薩藏攝。又是無問自說。徹底大慈之所加持。能令末法多障有情。依斯徑登不退。故當來經法滅盡。特留此經住世百年。廣度含識。阿伽陀藥。萬病總持。絕待圓融。不可思議。願王華嚴奧藏。法華祕髓。成佛一切諸佛之心要菩薩萬行之司南。皆不出於此矣。欲廣歎述。窮劫莫盡。智者自當知之。

入文分三。初序分。二正宗分。三流通分。解中判爾時下三十後善。序如首。九字為別序五官具存。六方佛為流通與古不同故科釋之正宗如身。臟腑無闕。流通如手足。運行不滯。故智者釋法華。初一品皆為序。後十一品半皆為流通。又一時迹本二門。各分三段。則法師等五品。皆為迹門流通。蓋序必提一經之綱。流通則法施不壅。關係非



小。後人不達。見經文稍涉義理。便判入正宗。致序及流通。僅存故套。安所稱初語亦善。後語亦善也哉。

(甲) 初序分二。初通序。二別序。

(乙) 初中二。初標法會時處。二引大衆同聞。

(丙) 今初。

如是我聞。一時佛在舍衛國。祇樹給孤獨園。

如是。標信順。我聞。標師承。一時。標機感。佛。標教主。舍衛等。標說經處也。實相妙理古今不變名如。依實相悟此者少理念佛求生淨土。決定無非曰是。實相非我非無我。阿難不壞假名。故仍稱我。耳根發耳識親聆圓音。如空印空名聞。時無實法。以師資道合。說聽周足名一時。自覺。覺他。覺行圓滿。人天大師名佛。舍衛。此云聞物。中印度大國之名。波斯匿王所都。



也。匿王太子名祇陀。此云戰勝。匿王大臣名須達多。此云給孤獨。給孤長者布金買太子園。供佛及僧。祇陀感歎。施餘未布少地。故並名祇樹給孤獨園也。

(丙) 二引大眾同聞三。初聲聞衆。二菩薩衆。三天人衆。

聲聞居首者。出世相故。常隨從故。佛法賴僧傳故。菩薩居中者。相不定故。不常隨故。表中道義故。天人列後者。世間相故。凡聖品雜故。外護職故。

(丁) 初聲聞衆又三。初明類標數。二表位歎德。三列上首名。

(戊) 今初。

與大比丘僧。千二百五十人俱。

大比丘。受具足戒出家人也。比丘梵語。含三義。一乞士。一鉢資身。無所蓄藏。專求出要。二破惡。正慧觀察。破煩惱惡。三怖魔。發心受戒。羯磨成就。魔即怖也。僧者



·具云僧伽·此翻和合眾·同證無為解脫·名理和·身同住·
口無諍·意同悅·見同解·戒同修·利同均·名事和也·千二
百五十人者·三迦葉師資共千人·身子目連師資二百人·耶舍
子等五十人·皆佛成道·先得度脫·感佛深恩·常隨從也。

(戊) 二表位歎德

皆是大阿羅漢_{之位其德為}眾所知識。

阿羅漢亦含三義·一應供·即乞士果·二殺賊·即破惡果·三
無生·即怖魔果·復有慧解脫·俱解脫·無疑解脫·三種不同
·今是無疑解脫·故名大·又本是法身大士·示作聲聞·證此
淨土不思議法·故名大也·從佛轉輪·廣利人天·故為眾所知
識。

(戊) 三列上首名



長老舍利弗

此云身子

摩訶目犍連

大采菽氏

摩訶迦葉

大飲光

摩訶迦旃延

大文飾

。摩訶拘絺羅

大膝

。離婆多

星宿

。周利槃陀伽

繼道

。難陀

喜

。阿難陀

慶喜

。羅睺羅

覆障

。憍梵波提

牛呌

。賓頭盧頗羅墮

不動

。迦留陀夷

黑光

。摩訶劫賓那

房宿

。薄拘羅

善容

。阿菟樓駄

無貧

。如是等諸大弟子。

德臘俱尊。故名長老。身子尊者聲聞眾中。智慧第一。目連尊

者神通第一。飲光尊者身有金光。傳佛心印為初祖。頭陀行第

一。文飾尊者婆羅門種。論議第一。大膝尊者答問第一。星宿

尊者無倒亂第一。繼道尊者因根鈍僅持一偈。辯才無盡。義持

第一。喜尊者佛之親弟。儀容第一。慶喜尊者佛之堂弟。復為

侍者。多聞第一。覆障尊者佛之太子。密行第一。牛呌尊者宿

世惡口。感此餘報。受天供養第一。不動尊者久住世間。應末

世供。福田第一。黑光尊者為佛使者。教化第一。房宿尊者知



星宿第一。善容尊者壽命第一。無貧尊者亦佛堂弟。天眼第一。此等常隨眾。本法身大士。示作聲聞。為影響眾。今聞淨土攝受功德。得第一義悉檀之益。增道損生。自淨佛土。復名當機眾矣。

(丁) 二菩薩眾

并諸菩薩摩訶薩。文殊師利此云妙德法王子。阿逸多此云無能勝菩薩

。乾陀訶提此云不休息菩薩。常精進菩薩。與如是等諸大菩薩。

菩薩摩訶薩。此云大道心成就有情。乃悲智雙運。自他兼利之稱。佛為法王。文殊紹佛家業。名法王子。菩薩眾中。智慧第一。非勇猛實智。不能證解淨土法門。故居初。彌勒當來成佛。現居等覺。以究竟嚴淨佛國為要務。故次列。不休息者。曠劫修行不暫停故。常精進者。自利利他無疲倦故。此等深位菩



薩·必皆求生淨土·以不離見佛·不離聞法·不離親近供養眾事是大因緣理是秘密藏不可忽僧·乃能速疾圓滿菩提故。

(丁) 三天人眾

及釋提桓因等·無量諸天大眾俱。

釋提桓因·此云能為主·即忉利天王·等者·下等四王·上等夜摩·兜率·化樂·他化·色·無色·無量諸天也·大眾俱·謂十方天人八部修羅人非人等無不與會·無非淨土法門所攝之唯廣大故微妙機也·通序竟。

(乙) 二別序·發起序也·

淨土妙門·不可思議·無人能問·佛自唱依正名字為發起·又佛智鑑機無謬·見此大眾應聞淨土妙門而獲四益·故不俟問·便自發起·如梵網下卷自唱位號云·我今盧舍那等·智者判作發起序·例可知也。



爾時佛告長老舍利弗。從是^{娑婆世界}西方。過十萬億佛土。有世界名曰極樂。其土有佛。號阿彌陀。今現在說法。

淨土法門。三根普攝。絕待圓融。不可思議。圓收圓超一切法門。甚深難信。故特告大智慧者。非第一智慧。^{可見正智庸愚兩}也。西方者。橫互直西。標示現處也。十萬億者。千萬曰億。今積億至十萬也。佛土者。三千大千世界。通為一佛所化。且以此土言之。一須彌山。東西南北各一洲。同一日月所照。一鐵圍山所繞。名一四天下。千四天下名小千世界。千小千名中千世界。千中千名大千世界。過如此佛土十萬億之西。是極樂世界也。問。何故極樂在西方。答。此非善問。^{妙答從來答者反添戲論}假使極樂在東。汝又問何故在東。豈非戲論。況自十一萬億佛土視之。又在東矣。何足致疑。有世界名曰極樂。序依報國土之名也。豎約



三際以辨時劫。橫約十方以定疆隅。故稱世界。極樂者。梵語須摩提。亦云安養。安樂。清泰等。乃永離眾苦第一安隱之謂。如下廣釋。然佛土有四。各分淨穢。凡聖同居土。西方是同居淨穢。以凡夫例聖故。五濁輕者淨。方便有餘土。西方是方便淨。以小乘迴心故。證入者淨。實報無障礙土。西方是實報淨。以所證圓頓故。者淨。常寂光土。分證者穢。究竟滿證者淨。今云極樂世界。西方是寂光淨。以受用同佛故。

正指同居淨土。亦即橫具上三淨土也。此論修德。不論性德。性德則一切微塵。彌陀名號不可思議故。能令凡夫所感同居極樂。最極清淨也。此則十方佛土所無。極樂同居獨擅。方是極樂淨土宗旨。下明義處皆然。有佛號阿彌陀。序正報教主之名也。翻譯如下廣釋。佛有三身。各論單複。法身單。指所證理性。報身單。指能證功德智慧。化身單。指所現相好色像。法身複者。自性清淨法身。離垢妙極法身。報身複者。自受用報身。他受用報身。化身複者。示生化身。應現化身。又佛界化身。隨類化身。雖辨單複三身。實非一非三。而



三而一。不縱橫。不並別。離過絕非。不可思議。今云阿彌陀此論修
佛。德以是同居士中所見故。正指同居土中示生化身。仍復即報以佛身隨橫四土現故即法也。復次世界及佛
皆言有者。四悉檀。具四義。的標實境。令欣求故。誠語指示。令專一
故。非魔。簡非乾城陽燄。非權現曲示。非緣影虛妄。非邪。非保真偏但。
破魔邪權小故。非權。破華嚴合論之謬。非邪。破末世積迷之習。此二料簡。尤大有關係。圓彰性具。令深證故。
今現在說法者。簡上依正二有。對此土釋迦。不久住彌勒。未發願往生。生無現佛可依。親覲聽法。速成正覺也。復次二有現在。勸信序也。
· 世界名極樂。勸願序也。佛號阿彌陀。勸持名妙行序也。復
次阿彌序佛。說法序法。現在海會序僧。佛法僧同一實相。序
體。此字指一體三寶。從此起信願行。序宗。信願行成。必得往生見佛聞法。序
用。是真指南。唯一佛界為所緣境。不雜餘事。序教相也。言略意周矣。
初序分竟。



(甲) 二正宗分三。初廣陳彼土依正妙果以啓信。二特勸衆生應求往生以發願。三正示行者執持名號以立行。

信願持名。一經要旨。信願爲慧行。持名爲行行。得生與否。全語如山岳由信願之有無。品位高下。全由持名之深淺。故慧行爲前導。行行爲正修。如目足並運也。

(乙) 初文爲二。初依報妙。二正報妙。

(丙) 初又二。初徵釋。二廣釋。

(丁) 初又二。初徵。二釋。


(戊) 今初。

舍利弗。彼土何故名爲極樂。

(戊) 二釋又二。初約能受用釋。二約所受用釋。

(己) 今初。

其國衆生。無有衆苦。但受諸樂。故名極樂。



眾生是能受用人。等覺以還皆可名。今且約人民言。以下下例議在此。娑婆苦樂雜。其實苦是苦苦。偏身心故。樂是壞苦。不久住故。非苦非樂是行苦。性遷流故。彼土永離眾苦極樂三苦。不同此土對苦之樂。乃名極樂。一往分別。同居五濁輕。無分段八苦。但受不病不老。自在遊行。天食天衣。諸善聚會等樂。方便體觀巧。無沈空滯寂之苦。但受遊戲神通等樂。實報心觀圓。無隔別不融之苦。但受無礙不思議樂。寂光究竟等。無法身滲漏。真常流注之苦。但受稱性圓滿究竟樂。然同居眾生。以持名善根福德同佛故。圓淨方是極樂淨宗四土。圓受諸樂也。復次極樂最勝。不在上三土。而在同居。良以上之。則十方同居。遜其殊特。下又可與此土較量。所以凡夫優入而從容。橫超而度越。佛說苦樂。意在於此。



(己) 二約所受用釋

此亦轉釋上無有眾苦但受諸樂之故。下廣釋一科亦然。

又舍利弗。極樂國土。七重欄楯。以嚴隙畔。七重羅網。以嚴空界。七重行樹

以嚴露地。皆是四寶。周匝圍繞。是故彼國名為極樂。

七重。表七科道品。四寶。表常樂我淨四德。周匝圍繞者。佛

菩薩等無量住處也。皆四寶則自功德深。周匝繞則他賢聖徧。

此極樂真因緣也。內因外緣。此等莊嚴。同居淨土是增上善業所感。亦圓

五品觀所感。以緣生勝妙五塵為體。方便淨土是即空觀智所感

。亦相似三觀所感。以妙真諦無漏五塵為體。實報淨土是妙假

觀智所感。亦分證三觀所感。以妙俗諦無盡五塵為體。常寂光

土是即中觀智所感。亦究竟三觀所感。以妙中諦稱性五塵為體

。欲令易解。作此分別。實四土莊嚴。此性依此起修無非因緣所生法。無不

即空假中。所以極樂同居淨境。此論修全修在性如是方是極樂淨宗真俗圓融。不可限量。下皆倣



此·問·寂光惟理性·何得有此莊嚴·答·一一莊嚴全體理性
·一一理性具足莊嚴·方是諸佛究竟依果·若寂光不具勝妙五
塵·何異偏真法性·

(丁) 二廣釋二·初別釋所受·二合釋能受所受·

(戊) 初又二·初釋生處妙·二結示佛力·

(己) 今初·

又舍利弗。極樂國土有七寶池。八功德水。充滿其中。池底
純以金沙布地。四邊階道。金銀琉璃玻瓈合成。上有樓閣。
亦以金銀琉璃玻瓈磈磈赤珠瑪瑙而嚴飾之。池中蓮華。大如
車輪。青色青光。黃色黃光。赤色赤光。白色白光。微妙香
潔。

上明住處·今明生處·絕待之樂為濁世眾生須對待而論寶池金銀等所成·不同此方土石也·八



功德者。一澄清。異此方渾濁。二清冷。異寒熱。三甘美。異鹹淡劣味。四輕軟。異沉重。五潤澤。異宿腐褪色。六安和。異急暴。七除飢渴。異生冷。八長養諸根。異損壞諸根。及瘡戾增病沒溺等也。充滿其中。異枯竭汎濫。底純金沙。異汗泥。階道四寶。異磚石。陛級名階。坦途名道。重屋名樓。岑樓名閣。七寶樓閣。異此方土木丹青也。樓閣是住處。及法會處。但得寶池蓮胞開敷。便可登四岸。入法會。見佛聞法也。華輪者。輪王金輪大四十里。且舉最小者言。若據觀經及無量壽會。大小實不可量。由同居淨土身相不等故也。青色名優鉢羅。黃色名拘勿頭。赤色名鉢頭摩。白色名芬陀利。由生身有光。故蓮胞亦有光。然極樂蓮華。光色無量。此亦略言耳。微妙香潔。略歎蓮華四德。質而非形曰微。無礙曰妙。非形則非塵。故潔也。蓮胞如此。生身可知^妙。



(己) 二結示佛力

舍利弗。極樂國土。成就如是功德莊嚴。

明上住處生處種種莊嚴。皆是阿彌陀佛^{此義約佛}大願大行稱性功德之所

成就。故能徧嚴四種淨土。普攝十方三世一切凡聖令往生也。

復次佛以大願作眾生多善根之因。以大行作眾生多福德之緣。

令信願持名者。念念成就^{此義約生}如是功德。而皆是已成^{誰解承當}。非今非當。

此則以阿彌種種莊嚴作增上本質。帶起眾生自心種種莊嚴。全

佛即生^會。全他即自^{上二義}。故曰成就^是如是功德莊嚴。

(戊) 二合釋能受所受又二。初約五根五塵明受用。次約耳根聲塵明受用。

(己) 初又二。初正明。二結示。

(庚) 今初。



又舍利弗。彼佛國土。中常作天樂。下黃金爲地。中晝夜六時。
· 雨天曼陀羅華。上嚴空界。下嚴金地。其土眾生。常以清旦。各以衣祴。
盛眾妙華。供養他方十萬億佛。即以食時。還到本國。飯食
經行。

樂是聲塵。地是色塵。華是色香二塵。食是味塵。盛華散華經
行是觸塵。眾生五根對五塵可知。常作者。即六時也。黃金為
地者。七寶所嚴地界。體是黃金也。日分初中後。名晝三時。
夜分初中後。名夜三時。故云晝夜六時。然彼土依正各有光明
可隨此方情見。不假日月。安分晝夜。且順此方假說分際耳。曼陀羅。此云
適意。又云白華。衣祴。是盛華器。眾妙華。明非曼陀羅一種。
· 應如妙經四華。表四因位。供養他方佛。表真因會趨極果。
果德無不徧也。且據娑婆言十萬億佛。意顯生極樂已。還供釋



迦彌勒。皆不難耳。若阿彌神力所加。何遠不到哉。食時。即清旦。故云即以。明其神足不可思議。不離彼土。常徧十方。不假逾時回還也。此文顯極樂一聲。一塵。一剎那。乃至跨步彈指。悉與十方三寶貫徹無礙。又顯在娑婆則濁重惡障。與極樂不隔而隔。生極樂則功德甚深。與娑婆隔而不隔也。飯食經行者。念食食至。不假安排。食畢鉢去。不勞舉拭。但經行金地。華樂娛樂。任運進修而已。

(庚) 二結示

舍利弗。極樂國土。成就如是功德莊嚴。

(己) 二約耳根聲塵明受用。以此方耳根最利。故別就法音廣明。其實極樂攝法界機。五塵一一圓妙。出生一切法門也。又二。初別明。二總結。



(庚) 初中二·初化有情聲·二化無情聲·

(辛) 初又二·初鳥音法利·二徵釋略顯·

(壬) 今初·

復次舍利弗。彼國常有種種奇妙雜色之鳥。白鶴·孔雀·鸚鵡·舍利·迦陵頻伽·共命之鳥。是諸眾鳥·晝夜六時·出和雅音。其音演暢五根·五力·七菩提分·八聖道分·如是等法。其土眾生聞是音已·皆悉念佛念法念僧。

種種奇妙雜色·言多且美也·下略出六種·舍利·舊云鶯鷺·琦禪師云是春鶯·或然·迦陵頻伽·此云妙音·未出殼時·音超眾鳥·共命·一身兩頭·識別報同·此二種西域雪山等處有之·皆寄此間愛賞者言其似而已·六時出音·則知淨土不以鳥棲為夜·良以蓮華託生之身·本無昏睡·不假夜臥也·五根等



者。三十七道品也。所謂四念處。一身念處。二受念處。三心念處。四法念處。四正勤。一已生惡法令斷。二未生惡法不令生。三未生善法令生。四已生善法令增長。四如意足。一欲如意足。二精進如意足。三心如意足。四思惟如意足。五根者。信正道及助道法名信根。行正道及諸助道善法。勤求不息。名精進根。念正道及諸助道善法。更無他念。名念根。攝心在正道及諸助道善法中。相應不散。名定根。為正道及諸助道善法。觀於苦等四諦。名慧根。五力者。信根增長。能破疑惑。破諸邪信。及破煩惱。名信力。精進根增長。破種種身心懈怠。成辦出世大事。名精進力。念根增長。破諸邪念。成就一切出世正念功德。名念力。定根增長。能破亂想。發諸事理禪定。名定力。慧根增長。能遮通別諸惑。發真無漏。名慧力。七菩提分。亦名七覺分。智慧觀諸法時。善能簡別真偽。不謬取諸



虛偽法。名擇法覺分。精進修諸道法時。善能覺了。不謬行於無益苦行。常勤心在真法中行。名精進覺分。若心得法喜。善能覺了此喜。不依顛倒之法而喜。住真法喜。名喜覺分。若斷除諸見煩惱之時。善能覺了。除諸虛偽。不損真正善根。名除覺分。若捨所見念著境時。善能覺了所捨之境虛偽不實。永不追憶。名捨覺分。若發諸禪定之時。善能覺了諸禪虛假。不生愛見妄想。名定覺分。若修出世道時。善能覺了。常使定慧均平。或心沉沒。當念用擇法精進喜三覺分以察起之。或心浮動。當念用除捨定三覺分以攝持之。調和適中。名念覺分。八聖道分。亦名八正道分。修無漏行觀。見四諦分明。名正見。以無漏心相應思惟動發覺知籌量。為令增長入大涅槃。名正思惟。以無漏慧除四邪命。攝諸口業。住一切正語中。名正語。以無漏慧除身一切邪業。住清淨正身業中。名正業。以無漏慧通



除三業中五種邪命。住清淨正命中。名正命。

五邪命皆為利養。一詐現異相奇特。二自說功德。三占相吉

凶為人說法。四高聲現威令人敬畏。五說所得供養以動人心。

以無漏慧相應勤精進修涅槃道。名正精進

。以無漏慧相應念正道及助道法。名正念。以無漏慧相應入定

。名正定。此等道品。皆有訂誦之功依生滅四諦而修。即藏教道品。依無生

四諦而修。即通教道品。依無量四諦而修。即別教道品。依無

作四諦而修。即圓教道品。藏道品名半字法門。淨土濁輕。似

不必用。為小種先熟者或暫用之。通道品名大乘初門。三乘共

稟。同居淨土多說之。別道品名獨菩薩法。同居方便淨土多說

之。圓道品名無上佛法。方是極樂淨宗有利根者。於四淨土皆得聞也。如是

等法者。等前念處正勤如意足。等餘四攝六度十力無畏無量法

門也。三十七品。收法雖盡。而機緣不等。作種種開合名義不

同。隨所欲聞。無不演暢。故令聞者念三寶。發菩提心。伏滅

煩惱也。灼見慈威不可思議。此三句各具四益詳見下釋念三寶中



故念法。同聞共稟。一心修證。故念僧。能念即三觀。所念三寶。有別相。一體。及四教意義。三諦權實之不同。如上料簡道品。應知。

(壬) 二徵釋略顯

舍利弗。汝勿謂此鳥。實是罪報所生。所以者何。彼佛國土。無三惡道。舍利弗。其佛國土。尚無惡道之名。何況有實。是諸眾鳥。皆是阿彌陀佛欲令法音宣流。變化所作。


徵釋可知。問。白鶴等非惡道名耶。答。既非罪報。則一名字法名

字。皆詮界不思議如此如來究竟功德。所謂究竟白鶴等。無非性德美稱。豈

惡名哉。問。化作眾鳥何義。答。有四此經悉檀皆是第一義中悉檀因緣。凡情喜此諸

鳥。順情具下三悉而化。令歡喜故。鳥尚說法。令聞生善故。不於鳥起

下劣想。對治分別心故。鳥即彌陀。令悟法身平等。無不具無



不造故。此中顯微風樹網等音。及一切依正假實。當體即是阿彌陀佛三身四德。毫無差別也。

標指

(辛) 二化無情聲

舍利弗。彼佛國土。微風吹動諸寶行樹。及寶羅網。出微妙音。譬如百千種樂同時俱作。聞是音者。自然皆生念佛念法念僧之心。

情與無情。同宣妙法。四教道品。無量法門。同時演說。隨類各解。能令聞者念三寶也。念三寶是從悉檀獲益。凡夫創聞。大踊徧身。是歡喜益。與三寶氣分交接。必能發菩提心。是生善益。由此伏滅煩惱。是破惡益。證悟一體三寶。是入理益也。

• 初別明竟。

(庚) 二總結



舍利弗。其佛國土。成就如是功德莊嚴。

重重結示。令深信一切莊嚴。皆導師願行所成。種智所現。皆

吾人淨業所感。唯識所變。佛心^{性相圓明}生心。互為影質。如眾燈明。

各徧似一。全理成事。全事即理。全性^{佛性}起修。全修^{修皆是生性修}在性。亦可

深長思矣。奈何離此淨土。別譚唯心^{離土談心}淨土。甘墮鼠^{定是緣影妄想}即鳥空之誚

也哉。初依報妙竟。

(丙) 二正報妙二。初徵釋名號。^{深契佛意}二別釋主伴。


(丁) 初中二。初徵。二釋。

(戊) 今初。

舍利弗。於汝意云何。彼佛何故號阿彌陀。

此經的示持名妙行。故特徵釋名號。欲人深信萬德洪名不可思

議。一心執持。無復疑貳也。



(戊) 二釋二·初約光明釋·二約壽命釋·

阿彌陀·正翻無量·本不可說·本師以光壽微妙二義·收盡一切無量·光則橫徧十方·壽則豎窮三際·橫豎交徹·即法界體·舉此體作彌陀身土·亦即舉此體速須信入作彌陀名號·是故彌陀名號·即衆生本覺理性·持名·即始覺合本·始本不二·生佛不二·故一念相應一念佛·念念相應念念佛也·

(己) 今初·

舍利弗。彼佛光明無量·照十方國·無所障礙·是故號爲阿彌陀·

心一切諸佛之心要性寂而常照·故為光明·今徹證心性無量之體·故光明無量也·諸佛皆徹性體·皆照十方·皆可名無量光·而因中願力不同·隨因緣立別名·彌陀為法藏比丘·發四十八願·有光明恆照十方之願·今果成可悟心佛如願也·法身光明無分際·報身光明稱真



性。此則佛佛道同。應身光明有照一由旬者。十百千由旬者。一世界十百千世界者。唯阿彌普照。方是極樂淨宗故別名無量光。然三身不一不異。為令眾生得四益故。作此分別耳。當知無障礙。例下壽民言。命確極不然佛光皆照十方何勞頌祝。皆照十方何勞頌祝一切世間無不圓見也。

(己) 二約壽命釋

又舍利弗。彼佛壽命。及其人民。皆壽命無量無邊阿僧祇劫。故名阿彌陀。

心性照而常寂。故為壽命。今徹證心性無量之體。故壽命無量也。法身壽命無始無終。報身壽命有始無終。此亦佛佛道同。皆可名無量壽。應身隨願隨機。延促不等。法藏願王。有佛及人壽命皆無量之願。今果成如願。別名無量壽也。阿僧祇。無邊。無量。皆算數名。實有量之無量。然三身不一不異。應身



亦可即是無量之無量矣。及者。併也。人民。指等覺以還。謂佛壽命併其人民壽命。皆無量等也。當知光壽名號。皆本眾生建立。以生佛平等。能令持名者。光明壽命同佛無異也。復次由無量光義。故眾生極樂即生十方。見阿彌陀佛即見十方諸佛。能自度即普利一切。由無量壽義。故極樂人民。即是一生補處。皆定此生成佛。不至異生。當知離卻現前一念無量光壽之心。何處有阿彌陀佛名號。而離卻阿彌陀佛名號。何由徹證現前一念無量光壽之心。願深思之。願深思之。

(丁) 二別釋主伴二。初別釋。二結示。

(戊) 初又二。初主。二伴。

(己) 今初。此亦釋別序中今現在說法句。

舍利弗。阿彌陀佛成佛已來。於今十劫。



此明極樂世界教主成就也。然法身無成無不成。不應論劫。報身因圓果滿名成。應身為物示生名成。皆可論劫。又法身因修德顯。亦可論成論劫。報身別無新得。應身如月印川。亦無成不成。不應論劫。但諸佛成道。各有本迹。本地並不可測。且約極樂示成之迹而言。即是三身一成一切成。亦是非成非不成而論成也。又佛壽無量。今僅十劫。則現在說法。時正未央。普勸三世眾生速求往生。同佛壽命。一生成辦也。又下文無數聲聞菩薩及與補處。皆十劫所成就。正顯十方三世往生不退者。多且易也。

(己) 二伴

又舍利弗。彼佛有無量無邊聲聞弟子。皆阿羅漢。非是算數之所能知。諸菩薩眾。亦復如是。



他方定性二乘。不得生彼。若先習小行。臨終迴向菩提。發大誓願者。生彼國已。佛順機說法。令斷見思。故名羅漢。如別教七住斷見思之類。非實聲聞也。蓋藏通二教。不聞他方佛名。今聞彌陀名號。信願往生。總屬別圓二教所攝機矣。

(戊) 二結示

舍利弗。彼佛國土。成就如是功德莊嚴。

佛及聲聞菩薩。並是彌陀因中願行所成。亦是果上一成一切成。是則佛菩薩聲聞。各各非自非他。自他不二。故云成就如是功德莊嚴。能令信願持名者。念念亦如是成就也。初廣陳彼土依正妙果以啟信竟。

(乙) 二特勸衆生應求往生以發願二。初揭示無上因緣。二特勸淨土殊

勝。



謂帶業往生。橫出三界。同居橫具四土。開顯四教法輪。衆生圓淨四土。圓見三身。圓證三不退。人民皆一生成佛。如是等勝異超絕。全在此二科點示。須諦研之。

(丙) 今初。

又舍利弗。極樂國土。眾生纒生彼土者。皆是三種阿鞞跋致。其三不退中多有一生補處。其數甚多。非是算數所能知之。但可以無量無邊阿僧祇說。

阿鞞跋致。此云不退。一位不退。入聖流。不墮凡地。二行不退。恆度生。不墮二乘地。三念不退。心心流入薩婆若海。若約此土藏初果。通見地。別初住。圓初信。名位不退。通菩薩。別十行。圓十信。名行不退。別初地。圓初住。名念不退。今淨土五逆十惡十念成就帶業往生居下下品者。皆得三不退。然據教道。若是凡夫。則非初果等。若是二乘。則非菩薩等。




若是異生。則非同生性等。又念不退。非復異生。行不退。非
僅見道。位不退。非是人民。躡等則成大妄。進步則捨故稱。
唯極樂同居。一切俱非。一切俱是。十方佛土無此名相。無此
階位。無此法門。非心性之極致。持名之奇勳。彌陀之大願。
何以有此。一生補處者。只一生補佛位。如彌勒觀音等。極樂
人民普皆一生成佛。人人必實證補處。故其中多有此等上善。
不可數知也。復次釋迦一代時教。惟華嚴明一生圓滿。而一生
圓滿之因。則末後普賢行願品中。十大願王導歸安養。且以此
勸進華藏海眾。嗟乎。凡夫例登補處。奇倡極談。不可測度。
華嚴所稟。卻在此經。而天下古今。信渺疑多。辭繁義蝕。余
唯有剖心瀝血而已。

(丙) 二特勸



舍利弗。如上無上大事因緣。眾生幸得聞者。應當發願。願生彼國。所以者何。得與如是不可算數一生補處諸上善人。俱會一處。

前羅漢菩薩。但可云善人。唯補處居因位之極。故云上。其數甚多。故云諸。俱會一處。猶言凡聖同居。尋常由實聖過去有漏業。權聖大慈悲願。故凡夫得與聖人同居。至實聖灰身。權聖機盡。便升沉碩異。苦樂懸殊。乃暫同。石火電光非究竟同也。又天壤之間。見聞者少。幸獲見聞。親近步趨者少。又佛世聖人縱多。如珍如瑞。不能徧滿國土。如眾星微塵。又居雖同。而所作所辦。則迥不同。今同以無漏多善根福德因緣不思議業。感生得俱會一處。為師友。如堦如筮。同盡無明。同登妙覺。是則下凡眾生於念不退中。超盡四十一因位。若謂是凡夫。卻不歷異生。必補佛職。與觀音勢至無別。若謂是一生補處。卻可名凡夫。不可名等



覺菩薩。此皆教網所不能收。方是極樂淨宗。剎網所不能例。當知吾人大事因

緣。同居一關。實話。最難透脫。唯極樂同居。超出十方同居之外。

了此。方能深信彌陀願力。信佛力。方能深信名號功德。信持

名。方能深信吾人心性本不可思議也。具此深信。方能發於大

願。文中應當二字。即指深信。深信發願。即無上菩提。合此

信願。的為淨土指南。由此而執持名號。乃為正行。若信願堅

固。臨終十念一念。亦決得生。若無信願。縱將名號持至風吹

不入。壓捺妄想不知求生故為極力道破。如銀牆鐵壁相似。亦無得生之理。修淨業者

。不可不知也。大本阿彌陀經。亦以發菩提願為要。正與此

同。

(乙) 三正示行者執持名號以立行二。初正示無上因果。二重勸。

(丙) 今初。



舍利弗。不可以少善根福德因緣。得生彼國。舍利弗。若有善男子。善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。其人臨命終時。阿彌陀佛與諸聖眾。現在其前。是人終時。心不顛倒。即得往生阿彌陀佛極樂國土。

菩提正道名善根。即親因。種種助道施戒禪等名福德。即助緣。聲聞緣覺菩提善根少。人天有漏福業福德少。皆不可生淨土。唯以願信執持名號。則一一聲悉具多善根福德。散心稱名。福善亦不可量。況一心不亂哉。故使感應道交。文成印壞。彌陀聖眾。不來而來。親垂接引。行人心識。不往而往。託質寶蓮也。善男女者。不論出家在家。貴賤老少。六趣四生。但聞佛名。即多劫善根成熟。五逆十惡皆名善也。阿彌陀佛是萬德



圓極語

洪名。以名召德。罄無不盡。故即以執持名號為正行。不必更涉觀想參究等行。至簡易。至直捷也。聞而信。信而願。乃肯執持。不信不願。與不聞等。雖為遠因。不名聞慧。執持則念念憶佛名號。故是思慧。然有事持理持。事持者。信有西方阿彌陀佛。而未達是心作佛。是心是佛。但以決志願求生故。如子憶母。無時暫忘。理持者。信西方阿彌陀佛。是我心具。是我心造。即以自心所具所造洪名。為繫心之境。令不暫忘也。仍不廢事

一日至七日者。剋期辦事也。此初學要期之法。下根則有若干

亂。中根七日亦是隨樂剋期之法二三四五六日不定。又利根此久學練習之法能七日不亂。鈍根上根則僅一日不亂。中根有若干七日六五四三二日不定。一心亦二種。不論事持理持。持至伏除煩惱。乃至見思先盡。皆事一心。不論事持理持。持至心開見本性佛。皆理一心。事字字引商刻羽一心不為見思所亂。理一心不為二邊所亂。即修慧也。不為見思亂。故感變化身佛及諸聖眾



現前。心不復起娑婆界中三有顛倒。往生同居方便二種極樂世界。不為二邊亂。故感受用身佛及諸聖眾現前。心不復起生死涅槃二見顛倒。往生實報寂光二種極樂世界。當知執持名號。既簡易直捷。仍至頓至圓。以念念即佛故。不勞觀想。不必參究。當下圓明。無餘無欠。上上根不能踰其闕。下下根亦能臻佛故其域。其所感佛。所生土。方是極樂淨宗往往勝進。亦不一概。可謂橫該八教。以圓超豎徹五時。所以徹底悲心。無問自說。且深歎其難信也。問。觀經專明作觀。何謂不勞觀想。答。此義即出觀經。彼經因勝觀非凡夫心力所及。故於第十三別開劣像之觀。而障重者此念字謂觀想出觀經猶不能念彼佛。故於第十六大開稱名之門。今經因末世障重者多。故專主第十六觀。當知人根雖鈍。而丈六八尺之像身。無量壽佛之名字。未嘗不心作心是。故觀劣者不勞勝觀。而稱名者並不勞觀想也。問。天奇毒峯諸祖。皆主參念佛者是誰。何



謂不必參究。答。此義即出天奇諸祖。前祖因念佛人不契釋迦

徹底悲心。故傍不甘。直下詰問。一猛提醒。何止長夜復旦。

我輩真宗之脫離業臼老作家至今日。猶不肯死心念佛。苦欲執敲門瓦子。向屋裏打親

生爺娘。則於諸祖成惡逆。非善順也。進問。此在肯心者則可

。未肯者何得相應。曰。噫。正唯未肯。所以要你肯心相應。

汝等正信未開。如生牛皮。不可屈折。當知有目者。固無日下平常之

然燈之理。而無目者。亦何必於日中苦覓燈炬。大勢至法王子

云。不假方便。自得心開。此一行三昧中大火聚語也。敢有觸

者。寧不被燒。問。臨終佛現。寧保非魔。答。修心人不作佛

觀而佛忽現。非本所期。故名魔事。念佛見佛。已是相應。況

臨終非致魔時。何須疑慮。問。七日不亂。平時耶。臨終耶。

答。平時也。問。七日不亂之後。復起惑造業。亦得生耶。答

。果得一心不亂之人。無更起寶鑑照妖惑造業之事。問。大本十念。寶



王一念。平時耶。臨終耶。答。十念通二時。晨朝十念屬平時。十念得生。與觀經十念稱名同。屬臨終時。一念則但約臨終時。問。十念一念並得生。何須七日。答。若無平時七日工夫。安有臨終^確十念一念。縱下下品逆惡之人。並是夙因成熟。故感臨終遇善友。聞便信願。此事萬中無一。豈可僥倖。淨土或問斥此最詳。今人不可不讀。問。西方去此十萬億土。何得即生。答。十萬億土。不出我現前一念心性之外。以心性本無外故。又仗自心之佛力接引。何難即生。如鏡中照數十層山水樓閣。層數宛然。實無遠近。一照俱了。見無先後。從是西方過十萬億佛土。有世界名曰極樂亦如是。其土有佛號阿彌陀。今現在說法亦如是。其人臨命終時。阿彌陀佛與諸聖眾現在其前。是人終時心不顛倒。即得往生阿彌陀佛極樂國土亦如是。當知字字皆海印三昧。大圓鏡智之靈文也。問。持名判行行。則



是助行。何名正行。答。依一心說信願行。非先後。非定三。蓋無願行不名真信。無行信不名真願。無信願不名真行。今全由信願持名。故信願行三。聲聲圓具。所以名多善根福德因緣。觀經稱佛名故。念念中除八十億劫生死之罪。此之謂也。若福善不多。安能除罪如此之大。問。臨終猛切。能除多罪。平日至心稱名。亦除罪否。答。如日出。群闇消。稱洪名。萬罪滅。問。散心稱名。亦除罪否。答。名號功德不可思議。寧不除罪。但不定往生。以悠悠散善。難敵無始積罪故。當知積罪假使有體相者。盡虛空界不能容受。雖百年晝夜彌陀十萬。一聲滅八十億劫生死。然所滅罪如爪上土。未滅罪如大地土。唯念至一心不亂。則如健人突圍而出。非復三軍能制耳。然稱名便為成佛種子。如金剛終不可壞。佛世一老人求出家。五百聖眾皆謂無善根。佛言。此人無量劫前為虎徧。失聲稱南無佛



·今此善根成熟·值我得道·非二乘道眼所知也。由此觀之·法華明過去佛所·散亂稱名·皆已成佛·豈不信哉。伏願縉素智愚·於此簡易直捷無上圓頓法門。勿視為難而輒生退諉。勿視為易而漫不策勤。勿視為淺而妄致藐輕。勿視為深而弗敢承任。蓋所持之名號·即心故真實不可思議·能持之心性·即佛故亦真實不可思議·持一聲·讀者當知此優曇鉢羅出現時也則一聲不可思議·持十百千萬無量無數聲·聲聲皆不可思議也。

(丙) 二重勸

舍利弗。我見是利·故說此言。若有眾生聞是說者。應當發願·生彼國土。

我見者·佛眼所見·究盡明了也·是利者·橫出五濁·圓淨四土·直至不退位盡·是為不可思議功德之利也·復次是利·約



此解確甚令人骨寒
命終時心不顛倒而言。蓋穢土自力修行。生死關頭。最難得力

。無論頑修狂慧。懺懼無功。即悟門深遠。操履潛確之人。儻分毫習氣未除。未免隨強偏墜。永明祖師所謂十人九蹉路。陰境若現前。瞥爾隨他去。此誠可寒心者也。初果昧於出胎。菩薩昏於隔陰。者裏豈容強作主宰。僥倖顛預。唯有信願持名。

仗他力故。佛慈悲願。定不唐捐。彌陀聖眾。現前慰導。故得無倒。自在往生。佛見眾生臨終倒亂之苦。切膚刻骨特為保任此事。所

以殷勤再勸發願。以願能導行故也。問。佛既心作心是。何不竟言自佛。而必以他佛為勝。何也。答。此之法門。全在了他

即自。若諱言他佛。則是他見未忘。妙若偏重自佛。卻成我見顛

倒。又悉檀四益。後三益事不孤起。儻不從世界深發慶信。牙慧者能不嗟然則

欣厭二益尚不能生。何況悟入理佛。唯即事持達理持。所以彌陀聖眾現前。即是本性明顯。往生彼土。見佛聞法。即是成就



慧身·不由他悟·法門深妙·破盡一切戲論·斬盡一切意見。
唯馬鳴龍樹智者永明之流·徹底擔荷得去·其餘世智辯聰·通
儒禪客·盡思^{確確}度量·愈推愈遠·又不若愚夫婦老實念佛者·為
能潛通佛智·暗合道妙也·我見是利·故說此言·分明以佛眼
佛音·印定此事·豈敢違抗·不善順入也哉·二正宗分竟。

(甲) 三流通分·

信願持名一法·圓收圓超一切法門·豎與一切法門^明渾^白同·橫與一^極

切法門迥異

諸經論中·亦有橫義·乃隨斷惑淺深·即於同居見上三土·是則約證名橫·約斷仍豎也·


既無問自說·誰堪倡募

流通·唯佛與佛·乃能究盡諸法實相·此經唯佛境界·唯佛佛可
與流通耳·文為二·初普勸·二結勸·

(乙) 初中三·初勸信流通·二勸願流通·三勸行流通·

(丙) 初中二·初略引標題·二徵釋經題·

(丁) 初中六·初東方·^至六上方·唐譯十方·今略攝故·



(戊) 今初。

舍利弗。如我今者。讚歎阿彌陀佛不可思議功德之利。東方亦有阿閼鞞佛。須彌相佛。大須彌佛。須彌光佛。妙音佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等眾生。當信是稱讚不可思議功德一切諸佛所護念經。

不可思議。略有五意。一。橫超三界。不俟斷惑。不退。二。即西方義皆攝第二義中。橫具四土。非由漸證。三。但持名號。大有功於淨土。不假禪觀諸方便。四。一七為期。不藉多劫多生多年月。五。持一佛名。即為諸佛護念。不異持一切佛名。此皆導師大願行之所成就。故曰阿彌陀佛不可思議功德之利。又行人信願持名。全攝佛功德伶俐者少成自功德。故亦曰阿彌陀佛不可思議功德之利。下又曰諸佛不可思議功



德·我不可思議功德·是諸佛釋迦·皆以阿彌為自也·阿閼鞞
·此云無動·佛有無量德·應有無量名·隨機而立·或取因·
或取果·或性·或相·或行願等·雖舉一隅·仍具四悉·隨一
一名·顯所詮德·劫壽說之·不能悉也·東方虛空不可盡·世
界亦不可盡·世界不可盡·住世諸佛亦不可盡·略舉恆河沙耳
·此等諸佛·各出廣長舌勸信此經·而眾生猶不生信·頑冥極
矣·常人三世不妄語·舌能至鼻·藏果頭佛·三大僧祇劫不妄
語·舌薄廣長可覆面·今證大乘淨土妙門·所以徧覆三千·表
理誠稱真·事實非謬也·標出經題·流通之本·什師順此方好
略譯今題·巧合持名妙行·奘師譯云稱讚淨土佛攝受經·文有
詳略·義無增減。

(戊)二南方



舍利弗。南方世界有日月燈佛。名聞光佛。大燄肩佛。須彌燈佛。無量精進佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等眾生。當信是稱讚不可思議功德一切諸佛所護念經。

(戊) 三西方

舍利弗。西方世界有無量壽佛。無量相佛。無量幢佛。大光佛。大明佛。寶相佛。淨光佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等眾生。當信是稱讚不可思議功德一切諸佛所護念經。

無量壽佛。與彌陀同名。十方各方面同名諸佛無量也。然即是導師亦可。為度眾生。不妨轉讚釋迦如來所說。



(戊) 四北方

舍利弗。北方世界有燄肩佛。最勝音佛。難沮佛。日生佛。網明佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等眾生。當信是稱讚不可思議功德一切諸佛所護念經。

(戊) 五下方

舍利弗。下方世界有師子佛。名聞佛。名光佛。達磨佛。法幢佛。持法佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等眾生。當信是稱讚不可思議功德一切諸佛所護念經。

此界水輪金輪風輪之下。復有下界非非想天等。乃至重重無盡也。達磨。此云法。



(戊) 六上方

舍利弗。上方世界有梵音佛。宿王佛。香上佛。香光佛。大
燄肩佛。雜色寶華嚴身佛。娑羅樹王佛。寶華德佛。見一切
義佛。如須彌山佛。如是等恆河沙數諸佛。各於其國。出廣
長舌相。徧覆三千大千世界。說誠實言。汝等眾生。當信是
稱讚不可思議功德一切諸佛所護念經。

此界非非想天之上。復有上界風輪金輪及三界等。重重無盡也

· 問· 諸方必有淨土。何偏讚西方。答· 此亦非善問。妙答假使讚

阿閼佛國。汝又疑偏東方。展轉戲論。細研下答亦非善問問· 何不徧緣法界。答

· 有三義。令初機易標心故。阿彌本願勝故。佛與此土眾生偏

有緣故。蓋佛度生。生受化。其間難易淺深。總在於緣。緣之

所在。恩德弘深。種種教啟。能令歡喜信入。能令觸動宿種。願勝 標心 歡喜 生善



能令魔障難遮。能令體性開發。入理諸佛本從法身垂迹。固結緣種。破惡

· 若世出世。悉不可思議。尊隆於教乘。舉揚於海會。世界沁入於為人

苦海。對治· 慈契於寂光。所以萬德欽承。群靈拱極。當知佛種從緣

起。緣即法界。一念一切念。一生一切生。一香一華。一聲一

色。乃至受懺授記。摩頂垂手。十方三世。莫不徧融。故此增

上緣因。名法界緣起。此正所謂徧緣法界者也。淺位人便本不出法可決

志專求。深位人亦不必捨何以加於法界西方而別求華藏。若謂西方是權。解千餘年華

藏是實。之惑西方小。華藏大者。全墮眾生徧計執情。以不達權實

一體。大小無性故也。

(丁) 二徵釋經題

舍利弗。於汝意云何。稱讚功德之名。上來已詳言矣。何故名爲一切諸佛所護念經

耶。舍利弗。若有善男子善女人。聞是經受持者。及聞諸佛



名者。是諸善男子善女人。皆爲一切諸佛之所護念。皆得不退轉於阿耨多羅三藐三菩提。是故舍利弗。汝等皆當信受我語。及諸佛所說。

此經獨詮無上心要。諸佛名字。並詮無上圓滿究竟萬德。故聞者皆爲諸佛護念。又聞經受持。即執持名號。阿彌名號。諸佛所護念故。問。但聞諸佛名。而未持經。亦得護念不退耶。答。此義有局有通。占察謂雜亂垢心。雖誦我名而不爲聞。以不能生決定信解。但獲世間善報。不得廣大深妙利益。若到一行三昧。則成廣大微妙行心。名得相似無生法忍。乃爲得聞十方佛名。此亦應爾。故須聞已執持至一心不亂。方爲聞諸佛名。蒙諸佛護念。此局義也。通義者。諸佛慈悲。不可思議。名號功德。亦不可思議。故一聞佛名。不論有心無心。若信若否。



皆成緣種。況佛度眾生。不簡怨親。恆無疲倦。苟聞佛名。佛必護念。又何疑焉。然據金剛三論。根熟菩薩為佛護念。位在別地圓住。蓋約自力。必入同生性乃可護念。今仗他力。故相似位即蒙護念。乃至相似位以還。亦皆有通護念之義。下至一聞佛名。於同體法性有資發力。亦得遠因終不退也。阿耨多羅。此云無上。三藐三菩提。此云正等正覺。即大乘果覺也。圓三不退。乃一生成佛異名。故勸身子等皆當信受。聞名功德如此。釋迦及十方諸佛同所宣說。可不信乎。初勸信流通竟。

(丙) 二勸願流通

舍利弗。若有人已發願。今發願。當發願。欲生阿彌陀佛國者。是諸人等。皆得不退轉於阿耨多羅三藐三菩提。於彼國土。若已生。若今生。若當生。是故舍利弗。諸善男子善女



人。若有信者。應當發願。生彼國土。

已願已生。今願今生。當願當生。正顯依信所發之願無虛也。

非信不能發願。非願信亦不生。故云若有信者。應當發願。又

願者。信之券。行之樞。尤為要務。舉願則信行在其中。所以

殷勤三勸也。復次願生彼國。即欣厭二門。厭離娑婆。此皆淨宗與依苦

集指訣世人多夢夢不了所以難修無功二諦所發二種弘誓相應。欣求極樂。與依道滅二諦所發二種

弘誓相應。故得不退轉於大菩提道。問。今發願但可云當生。

何名今生。答。此亦二義。有此義方使一生要期非謬一約一期名今。現生發願持名。臨

終定生淨土。有此義方能深入一行三昧二約剎那名今。一念相應一念生。念念相應念念

生。妙因妙果。不離一心。如稱兩頭。低昂時等。何俟娑婆報

盡。方育珍池。只今信願持名。蓮萼光榮。此即理之事非徒論理金臺影現。便非娑

婆界內人矣。極圓極頓。難議難思。唯有大智。方能諦信。



(丙) 三勸行流通二·初諸佛轉讚·二教主結歎·

(丁) 今初·

舍利弗。如我今者·稱讚諸佛不可思議功德。彼諸佛等·亦稱讚我不可思議功德·而作是言。釋迦牟尼佛·能為甚難希有之事。能於娑婆國土五濁惡世·劫濁見濁煩惱濁眾生濁命濁中·得阿耨多羅三藐三菩提。為諸眾生·說是一切世間難勸行信之法。

此句重在持名故是

諸佛功德智慧·雖皆平等·而施化則有難易·淨土成菩提易·濁世難·為淨土眾生說法易·為濁世眾生難·為濁世眾生說漸法猶易·說頓法難·為濁世眾生說餘頓法猶易·說淨土橫超頓法尤難·為濁世眾生說淨土橫超頓修頓證妙觀·已自不易·說此無藉劬勞修證·但持名號·徑登不退·奇特勝妙超出思議第



一方便。更為難中之難。故十方諸佛。無不推我釋迦。偏為勇猛也。劫濁者。濁法聚會之時。劫濁中。非帶業橫出之行。突圍而出必不能度。見濁者。五利使。邪見增盛。謂身見。邊見。見取。戒取。及諸邪見。昏昧汨沒。故名為濁。見濁中。非不假方便之行。必不能度。煩惱濁者。五鈍使。煩惱增盛。謂貪。瞋。癡。慢。疑。煩惱惱亂。故名為濁。煩惱濁中。非即凡心是佛心之行。必不能度。眾生濁者。見煩惱所感麤弊五陰和合。假名眾生。色心並皆陋劣。故名為濁。眾生濁中。非欣厭之行。取捨熾然必不能度。命濁者。因果並劣。壽命短促。乃至不滿百歲。故名為濁。命濁中。非不費時劫。應量而勉不勞勤苦之行。必不能度。復次祇此信願。莊嚴一聲阿彌陀佛。轉劫濁為清淨海會。轉見濁為無量光。轉煩惱濁為常寂光。轉眾生濁為蓮華化生。轉命濁為無量壽。故一聲阿彌陀佛。淨宗千古之蘊一且發盡希有哉即釋迦本師於五濁惡世。所得之阿



耨多羅三藐三菩提法。今以此果覺。全體授與濁惡眾生。乃諸佛所行境界。唯佛與佛能究盡。非九界自力所能信解也。諸眾生。別指五濁惡人。一切世間。通指四土器世間。九界有情世間也。

(丁) 二教主結歎。

前勸信流通。是諸佛付囑。此本師付囑。囑語略別從通。但云一切世間。猶前諸佛所云汝等眾生。當知文殊迦葉等。皆在所囑也。

舍利弗。當知我於五濁惡世。行此難事。得阿耨多羅三藐三菩提。為一切世間說此難信之法。是為甚難。

信願持名一行。不涉施為。圓轉五濁。唯信乃入。非思議所行境界。設非本師來入惡世。示得菩提。以大智大悲。見此行此說此。眾生何由稟此也哉。然吾人處劫濁中。決定為時所困。

此五段應與五必不能度之



訓合觀

為苦所逼。處見濁中。決定為邪智所纏。邪師所惑。處煩惱濁中。決定為貪欲所陷。惡業所螫。處眾生濁中。決定安於臭穢而不能洞覺。甘於劣弱而不能奮飛。處命濁中。決定為無常所吞。石火電光。措手不及。若不深知其甚難之旨。從未經道破。確然出五濁。烽焯宅裏。戲論紛然。唯深知其甚難。方肯死盡偷心。功在萬世

· 寶此一行。此本師所以極口說其難甚。而深囑我等當知也。

初普勸竟。

(乙) 二結勸

佛說此經已。舍利弗。及諸比丘。一切世間天人阿修羅等。聞佛所說。歡喜信受。作禮而去。

法門不可思議。難信難知。無一人能發問者。佛智鑑機。知眾生成佛緣熟。無問自說。令得四益。如時雨化。故歡喜信受也。



。身心怡悅名歡喜。毫無疑惑名信。領納不忘名受。感大恩德。投身歸命。名作禮。依教修持。一往不退。名而去。

經云。末法億億人修行。罕一得道。唯依念佛得度。嗚呼。今

正是其時矣。吐心捨此吐膈不思議法門。其何能淑。旭出家時。宗乘自

負。藐視教典。妄謂持名。曲為中下。現身說法後因大病。發意西歸。

復研妙宗圓中二鈔。及雲棲疏鈔等書。始知念佛三昧。實無上

寶王。方肯死心執持名號。萬牛莫挽也。吾友去病。久事淨業

。欲令此經大旨。辭不繁而炳著。請余為述要解。余欲普與法

界有情同生極樂。言有不獲已者理不可卻。舉筆於丁亥九月二十順治四年有七。脫稿

於十月初五。凡九日告成。所願一句一字。咸作字字道實資糧。一見一

聞。果然同階不退。信疑皆植道種。讚謗等歸解脫。仰唯諸佛菩薩

攝受證明。同學友人隨喜加被。西有道人蕩益智旭閣筆故跋。

時年四十有九。



佛說阿彌陀經要解



原跋

經云·三界唯心·萬法唯識·古人云·念自性彌陀·生唯心淨土·合觀之·是心作佛·是心是佛·心外無佛·佛外無心之義明矣·後人不達·捨西方極樂·別言唯心淨土·捨萬德慈尊·別言自性彌陀·不幾心外有佛·佛外有心耶·靈峯大師深悟心性無外之體·特為此經·拈出要解·一展讀時·信願持名·人可自操其券·不唯言簡意周·且使希有甚難之宗·如聲鼓鐸·盡開經藏·無復匱藏·誠古今所未有也·名曰要解·其斯為無上心要矣乎。

古吳淨業弟子正知去病氏謹識



❖

歙浦講錄跋

此本係性旦癸巳歲·在歙浦栖雲院所聽錄者·於時隨允持循·
蒼暉晟·堅密時·諸公之後·獲聞法要·覺老人此翻·心膽盡
吐·蓋祕密之藏·會當大啟於今時·非偶然也·因退而紀之·
甲午冬·老人病中口授數處令改正·此本遂稱允當·及老人西順治十
逝·性旦以病拙藪逋·薄福多障·無緣流通闡播·聊識其後·
以誌不忘云·庚子夏華陽學人性旦拭涕跋。



附錄



無量壽經四十八願

照隋慧遠疏·願願
標題·以便醒目·

阿彌陀佛。於世自在王佛時。作大國王。聞佛說法。心懷悅豫。尋發道意。棄國捐王。行作沙門。號曰法藏。復詣佛前。禮足右繞。長跪合掌。以頌讚佛。頌讚已畢。而白佛言。我發無上正覺之心。願佛為我敷演諸佛如來淨土之行。我聞此已。當如說修行。成滿所願。時世自在王佛。知其高明。志願廣大。即為廣說二百一十億諸佛剎土。天人善惡。國土粗妙。應其心願。悉現與之。法藏即一其心。具足五劫。思惟修習。如是修已。復白佛言。我已攝取莊嚴佛土清淨之行。佛告比丘。汝今可說。悅可大眾。比丘白佛。唯垂聽察。如我所願。當具說之。于是發此四十八願。




。此一願。皆為阿彌陀佛西方淨土之最初緣起。念佛求生之士。不可不知。故為附錄於此。

此下正說之文。於中合有四十八願。義要唯三。文別有七。義要三者。一攝法身願。二攝淨土願。三攝眾生願。四十八中。十二。十三。及第十七。是攝法身。第三十一。第三十二。是攝淨土。餘四十三。是攝眾生。文別七者。初十一願。為攝眾生。次有兩願。是其第二。為攝法身。次有三願。是其第三。重攝眾生。次有一願。是其第四。重攝法身。次有十三。是其第五。為攝眾生。次有兩願。是其第六。為攝淨土。下有十六。是其第七。重攝眾生。

第一 國無惡道願

設我得佛。國有地獄餓鬼畜生者。不取正覺。



第二 不更惡道願

設我得佛・國中天人壽終之後・復更三惡道者・不取正覺。

第三 身真金色願

設我得佛・國中天人不悉真金色者・不取正覺。

第四 形色相同願

設我得佛・國中天人形色不同有好醜者・不取正覺。

第五 宿命智通願

設我得佛・國中天人不識宿命・下至知百千億那由他諸劫事者・不取正覺。

第六 天眼普見願

設我得佛・國中天人不得天眼・下至見百千億那由他諸佛國者・不取正覺。



第七 天耳普聞願

設我得佛·國中天人不得天耳·下至聞百千億那由他諸佛所說·
不悉受持者·不取正覺。

第八 他心悉知願

設我得佛·國中天人不得見他心智·下至知百千億那由他諸佛國
中眾生心念者·不取正覺。

第九 神足無礙願

設我得佛·國中天人不得神足·於一念頃·下至不能超過百千億
那由他諸佛國者·不取正覺。

第十 不貪計身願

設我得佛·國中天人若起想念貪計身者·不取正覺。

第十一 住定證滅願



設我得佛。國中天人不住定聚必至滅度者。不取正覺。

就初段中。初有兩願。願生無苦。後之九願。願生得樂。無苦中。初一願其自國無苦。設我得佛。國有地獄餓鬼畜生。不取正覺。不取正覺者。諸願不滿。終不成佛。假設所願不滿得成。誓終不取。是故說言。設我得佛。國有地獄畜生餓鬼。不取正覺。餘亦如是。言地獄者。地下牢獄。是其苦處。故云地獄。言餓鬼者。饑渴名餓。恐怯多畏。故名為鬼。言畜生者。此乃從生畜養為名。一切世人。或為噉食。或為驅使。畜養此生。故云畜生。後之一願。願己國中有眾生生命終。不向他國受苦。此之兩願。願生無苦。後九願生得樂之中。初之兩願。願生身樂。後之七願。願生心樂。心中五通各別為一。漏盡分二。故有七願。



第十二 光明無量願

設我得佛·光明有能限量·下至不照百千億那由他諸佛國者·不取正覺。

第十三 壽命無量願

設我得佛·壽命有能限量·下至百千億那由他劫者·不取正覺。


第二段中·明攝法身·文相易知。

第十四 聲聞無數願

設我得佛·國中聲聞有能計量·乃至三千大千世界眾生悉成緣覺·於百千劫悉共計校·知其數者·不取正覺。

第十五 隨願修短願

設我得佛·國中天人壽命·無能限量·除其本願修短自在。若不爾者·不取正覺。



第十六 不聞惡名願

設我得佛。國中天人。乃至聞有不善名者。不取正覺。

第三段中。明攝眾生。文相易知。

第十七 諸佛稱歎願

設我得佛。十方世界無量諸佛。不悉咨嗟稱我名者。不取正覺。

第四段中。明攝法身。文相易知。

第十八 十念必生願

設我得佛。十方眾生。至心信樂。欲生我國。乃至十念。若不生者。不取正覺。唯除五逆。誹謗正法。

第十九 臨終接引願

設我得佛。十方眾生。發菩提心。修諸功德。至心發願。欲生我國。臨壽終時。假令不與大眾圍繞現其人前者。不取正覺。



第二十 欲生果遂願

設我得佛·眾生聞我名號·繫念我國·植眾德本·至心迴向·欲生我國·不果遂者·不取正覺。

第二十一 三十二相願

設我得佛·國中天人·不悉成滿三十二大人相者·不取正覺。

第二十二 一生補處願

設我得佛·他方佛土諸菩薩眾·來生我國·究竟必至一生補處·除其本願自在所化·為眾生故·被弘誓鎧·積累德本·度脫一切·遊諸佛國·修菩薩行·供養十方諸佛如來·開化恆沙無量眾生·使立無上正真之道·超出常倫諸地之行·現前修習普賢之德·若不爾者·不取正覺。

第二十三 供養諸佛願



設我得佛・國中菩薩・承佛神力・供養諸佛。一食之頃・不能徧至無量無數億那由他諸佛國者・不取正覺。

第二十四 供具隨意願

設我得佛・國中菩薩・在諸佛前・現其德本。諸所求欲供養之具・若不如意者・不取正覺。

第二十五 演說妙智願

設我得佛・國中菩薩・不能演說一切智者・不取正覺。

第二十六 那羅延身願

設我得佛・國中菩薩・不得金剛那羅延身者・不取正覺。

第二十七 一切嚴淨願

設我得佛・國中天人・一切萬物・嚴淨光麗・形色殊特・窮微極妙・無能稱量。其諸眾生・乃至逮得天眼・有能明了辨其名數者



• 不取正覺。

第二十八 道樹高顯願

設我得佛·國中菩薩·乃至少功德者·不能知見其道場樹無量光色高四百萬里者·不取正覺。

第二十九 誦經得慧願

設我得佛·國中菩薩·若受讀經法·諷誦持說·而不得辯才智慧者·不取正覺。

第三十 慧辯無限願

設我得佛·國中菩薩·智慧辯才·若可限量者·不取正覺。

第五段中·初三願·攝他國眾生。次一願·攝自國眾生。次一還攝他國眾生。後八還攝自國眾生。

第三十一 照見十方願



設我得佛。國土清淨。皆悉照見十方一切無量無數不可思議諸佛世界。猶如明鏡。覩其面像。若不爾者。不取正覺。

第三十二 寶香妙嚴願

設我得佛。自地已上。至於虛空。宮殿樓觀。池流華樹。國中所有的一切萬物。皆以無量雜寶。百千種香。而共合成。嚴飾奇妙。超諸天人。其香普熏十方世界。菩薩聞者。皆修佛行。若不爾者。不取正覺。

第六段中。明攝淨土。文顯可知。

第三十三 蒙光柔軟願

設我得佛。十方無量不可思議諸佛世界眾生之類。蒙我光明觸其體者。身心柔軟。超過天人。若不爾者。不取正覺。

第三十四 聞名得忍願



設我得佛。十方無量不可思議諸佛世界眾生之類。聞我名字。不得菩薩無生法忍。諸深總持者。不取正覺。

第三十五 脫離女身願

設我得佛。十方無量不可思議諸佛世界。其有女人聞我名字。歡喜信樂。發菩提心。厭惡女身。壽終之後。復為女像者。不取正覺。

第三十六 常修梵行願

設我得佛。十方無量不可思議諸佛世界諸菩薩眾。聞我名字。壽終之後。常修梵行。至成佛道。若不爾者。不取正覺。

第三十七 天人致敬願

設我得佛。十方無量不可思議諸佛世界諸天人。聞我名字。五體投地。稽首作禮。歡喜信樂。修菩薩行。諸天世人。莫不致敬。



。若不爾者。不取正覺。

第三十八 衣服隨念願

設我得佛。國中天人。欲得衣服。隨念即至。如佛所讚應法妙服。自然在身。若有裁縫染治浣濯者。不取正覺。

第三十九 樂如漏盡願

設我得佛。國中天人所受快樂。不如漏盡比丘者。不取正覺。

第四十 樹中現刹願

設我得佛。國中菩薩。隨意欲見十方無量嚴淨佛土。應時如意。於寶樹中。皆悉照見。猶如明鏡。覩其面像。若不爾者。不取正覺。

第四十一 諸根無缺願

設我得佛。他方國土諸菩薩眾。聞我名字。至於得佛。諸根缺漏



不具足者。不取正覺。

第四十二 清淨解脫願

設我得佛。他方國土諸菩薩眾。聞我名字。皆悉逮得清淨解脫三昧。住是三昧。一發意頃。供養無量不可思議諸佛世尊。而不失定意。若不爾者。不取正覺。

第四十三 聞名得福願

設我得佛。他方國土諸菩薩眾。聞我名字。壽終之後。生尊貴家。若不爾者。不取正覺。

第四十四 修行具德願

設我得佛。他方國土諸菩薩眾。聞我名字。歡喜踊躍。修菩薩行。具足德本。若不爾者。不取正覺。

第四十五 普等三昧願



設我得佛·他方國土諸菩薩眾·聞我名字·皆悉逮得普等三昧·住是三昧·至於成佛·常見無量不可思議一切如來·若不爾者·不取正覺。

第四十六 隨願聞法願

設我得佛·國中菩薩·隨其志願所欲聞法·自然得聞·若不爾者·不取正覺。

第四十七 聞名不退願

設我得佛·他方國土諸菩薩眾·聞我名字·不即得至不退轉者·不取正覺。

第四十八 得三法忍願

設我得佛·他方國土諸菩薩眾·聞我名字·不即得至第一第二第三法忍·於諸佛法·不能即得不退轉者·不取正覺。



第七段中。初五攝取他國眾生。次三攝取自國眾生。次五還攝他國眾生。次一還攝自國眾生。後二復攝他國眾生。

佛告阿難。爾時法藏比丘說此願已。以偈頌曰。我建超世願。必至無上道。斯願不滿足。誓不成等覺。我於無量劫。不為大施主。普濟諸貧苦。誓不成等覺。我至成佛道。名聲超十方。究竟靡所聞。誓不成等覺。離欲深正念。淨慧修梵行。志求無上尊。為諸天人師。神力演大光。普照無際土。消除三垢冥。明濟眾厄難。開彼智慧眼。滅此昏盲暗。閉塞諸惡道。通達善趣門。功祚成滿足。威曜朗十方。日月戢重暉。天光隱不現。為眾開法藏。廣施功德寶。常於大眾中。說法師子吼。供養一切佛。具足眾德本。願慧悉成滿。得為三界雄。如佛無礙智。通達靡不照。願我功德力。等此最勝尊。斯願若剋果。大千應感動。虛空諸天神。當雨珍妙華。佛語阿難。法藏比丘說此願已。應時普地六種震動。



天雨妙華以散其上。自然音樂空中讚言。決定必成無上正覺。

淨土十要第一

淨土十要



明・蕩益大師選定

往生淨土懺願儀

淨土十要(二)




靈峯蕩益大師選定淨土十要第二

述曰。聞夫有行無教。必有墮坑落壑之虞。有教無行。還同說食數寶之誚。是故教即行也。行即教也。教行無乖。至理乃顯。故教行理三。皆名為經。三經具足。是為佛說。反是則波旬說。非佛說也。今稟斯義。謹奉慈雲懺主遵式所製往生淨土懺願儀。及決疑行願二門。繼彌陀要解而列。行者得要之後。更能於此盡心焉。則不思議經王。不唯無剩語。亦復非義塗。而微妙要詮。不在佛。不在知識。卻在當人自己矣。隨自己教行所詣。分契理之淺深。隨契理淺深。立果位之差別。而此差別果位。要皆圓證三不退。一生同趣薩婆若海。是故差即無差。位次即非位次。誰謂一行三昧之外。別有法身向上事哉。此行



佛祖指南在此
最廣大。餘行則局。此行最神速。餘行則滯。滯。替膩二音。困滯也。此行最
不思議。餘行則可擬。其斯以為三昧寶王也歟。行願儀。世傳
為大淨土懺。二門中行法。世傳為小淨土懺。及晨朝十念。繫
緣眾福二行。皆修淨業者必不可離。聖者作之於前。明者述之
於後。我等如何肯自棄也。



往生淨土懺願儀

宗者山沙門遵式撰

沙門遵式·輒采大本無量壽經·及稱讚淨土等諸大乘經·集此方法·流布諸後
·普結淨緣。

原其諸佛憫物迷盲·設多方便而引取之·但唯安養淨業·捷直可
修。諸大乘經·皆啟斯要。十方諸佛·無不稱美者也·若比丘四
眾·及善男女·諸根缺具者·欲得速破無明諸闇·欲得永滅以此五逆
為急十惡·犯禁重罪·及餘輕過·當修此法·欲得還復清淨以此為要大小戒律
·現前得念佛三昧·及能具足一切菩薩諸波羅蜜門者·當學此法
·欲得臨終離諸怖畏·身心安快·喜悅如歸·光照室宅·異香音
以此為切樂·阿彌陀佛·觀音勢至·現在其前·送紫金臺·授手接引·五
道橫截·九品長驚·謝去熱惱·安息清涼·初離塵勞·便至不退
·不歷長劫·即得無生者·當學是法·欲修以此為大少法·而感妙報·十



方諸佛俱時稱讚_{下皆}·現前授記_{妙報}·一念供養無央數佛·即還本國·與彌陀坐食·觀音議論·勢至行步·眼耳洞視徹聞·身量無際·飛空自在·宿命了了·徧見五道·如鏡面像_{他心}·念念證入無盡_{漏盡}三昧·如是稱述·不可窮盡·應當修習此之勝法。如所說者·皆實不虛·十方諸佛出廣長舌·稱美此事·以示不妄·我等云何敢不信佛·今取淨土眾經·立此行法·若欲廣知·尋經補益·且聊為十科說之。

- | | | | |
|-------|-------|-------|-------|
| 一嚴淨道場 | 二明方便法 | 三明正修意 | 四燒香散華 |
| 五禮請法 | 六讚歎法 | 七禮佛法 | 八懺願法 |
| 九旋誦法 | 十坐禪法 | | |



第一嚴淨道場

當選一處所閒靜堂室。先去二壇基舊土。後於淨處取新土。須地無瓦石。及先

非穢染。用填其地。以香和塗。極令清淨。次於其上懸新寶蓋。

蓋中懸五雜幡。及徧室懸諸繒綵幡華別無戲具之供。取好莊嚴。安佛像西

坐東向。觀音侍左。勢至侍右。像前列眾好華。及蓮華等。若安

九往生像最好。無亦無妨。餘者嚴事。隨力安之須如法雅重。次周設薦

席。下莊嚴慮地卑溼無黷穢之文。以佛頂經遮止故也。行人須新淨衣。如絕無新淨。即浣染身

中上者。浴後披著。方入道場。應從門八出淨頰左右出入。靴履齊正。

不得雜亂。其所往時所往謂登廁。須換故衣。沐浴後。卻著淨衣沐是浴後。洗頭面頸臂。

· 日日如是。次於道場。當自傾竭種種九供養。供養三寶。若不盡其所

有供養。行法不專。必無感降。如絕無己物。方可外求或果無己物。又果無可求。

則乏種種供養。亦無過。行者十伴侶十人已還。多則不可。宜於十一建首六齋日建首。



第二明方便法

行者欲入道場·更有方便前之預應知身心散亂·須豫行方便。當於七日營理別房·不得與道場同處·如無別屋·亦許共室·應日夜調習案試·及豫誦下五悔等文·極令精熟·即通染浣紉縫·及中辦事·餘治生雜務·即時併息·但念不久定生淨土·一心求懺·無有留難·各自剋期·不惜身命·定取淨業即時成就。不得一念思憶五塵。訶去愛欲·至虛至明至精勤息恚癡。行人各有無始惡習·速求捨離·不為正懺障礙。自當觀察何習偏重·至虛至明至精訶棄調停·取令平復。勿使行法唐喪其功。可以意解。

第三明正修意

大集·明七七日。鼓音王·及大彌陀經·十日十夜·十六觀經·



及小彌陀經·明七日七夜·取此三等為期·決不可減·言正修意者·天親論曰·明何義·觀安樂世界·見阿彌陀佛·願生彼國土·云何觀·云何生信心·修五念門成就者·畢竟得生安樂國土·見阿彌陀佛·何等為五·一者禮拜門·二者讚歎門·三者作願門·四者觀察門·五者迴向門·乃至菩薩巧方便迴向者·謂說禮拜等五種修行所集一切功德善根·不求自身住持之樂·欲拔一切眾生苦故·作願攝取一切眾生·共生彼安樂佛國·是名菩薩巧方便迴向·如是善知迴向·得三種順菩提門·一者無染清淨心·不為自身求諸樂故·二者安清淨心·以拔一切眾生苦故·三者樂清淨心·令一切眾生得大菩提·以攝取眾生生彼國土故·故全用論文·為今正意·但加懺悔者·為令除滅往生障故·為順佛慈·速度生故·當須一心一意·滿七七·乃至七日·晝夜六時禮十方佛·及彌陀世尊·若坐若行·皆勿散亂·不得如彈指頃·念世五欲



。及接對外人。語論戲笑。亦不得託事延緩。放逸睡眠。當於瞬息俯仰。繫念不斷。為求往生。一心精進。問。行法既多。云何一心。答。有理有事。一者理一心。謂出入道場。乃至畢竟。雖涉眾事。皆是無性。不生不滅。法界一相。如法界緣。名理一心。二者事一心。謂若禮佛時。不念餘事。但專禮佛。誦經行道。亦復如是。是名事一心也。

◎
第四燒香散華

此亦名三業供養。行者已淨三業。初入道場時。拈香訖。當正立。作如是思惟。『我為眾生。發菩提心。願求淨土。故總禮三寶。廣修供養。三寶受供。必當念我。隨我請求。證知我願。』首者先當唱云。

一切恭敬。

一心敬禮十方世界常住佛。



總禮未須一一隨方想念・拜下。作如是想云・『己身及十方諸佛・實相理體・本無能所・故無能禮所禮・想無能所・名法界海・願諸眾生・同見同入・』

一心敬禮十方法界常住法。

想同上。

一心敬禮十方法界常住僧。

想時・改諸佛為賢聖・禮已・胡跪捧華・首者白。

是諸眾等・各各胡跪・嚴持香華・如法供養・各散華・和云・供養十方法界三寶。

各執手爐・廣運供養・想云。

『願此香華徧十方・以為微妙光明臺・諸天音樂天寶香・諸天銷餽天寶衣・不可思議妙法塵・一一塵出一切塵・一一塵出一切法・旋轉無礙互莊嚴・徧至十方三寶前・十方法界三寶前・皆有我身修供養・一一皆悉徧法界・彼彼無雜無障礙・盡未來際作佛事・普熏法界諸眾生・蒙熏皆發菩提心・同入無生證佛智・』想已・大眾仍執手爐・口發是言。



願此香華雲·徧滿十方界·供養一切佛·尊法諸菩薩·
無量聲聞眾·以起光明臺·過於無邊界·無邊佛土中·
受用作佛事·普熏諸眾生·皆發菩提心·

皆發下一句接和·供養下獨唱·

供養已·一切恭敬·


拜·如前總禮作想·下讚歎五悔·三歸·共九拜·皆如前作想·

第五禮請法

當更添香·如前胡跪·執香鑪·端意勤重·徧請三寶來入道場·不可輕率·延
屈至尊·當須三業併切·一心奉請·若不爾者·虛請無益·各想一一如來·隨
其方面·領諸眷屬入我道場·如住目前·爰塞虛空·不得剎那起於雜念·但初
入日迎請·餘時不用·首人唱云·

一心奉請·南無本師釋迦牟尼佛·

釋迦是我等師·說諸大乘·令我修淨土業·故須初請·當各運心感此恩德·如



是三請。每一徧請時。想云。

『我三業性如虛空。釋迦如來亦如是。不起實際為眾生。與眾俱來受供養。』
下去例為三請。

一心奉請。南無過去久遠劫中定光佛。光遠佛。龍音佛等。五十
三佛。

五十三佛。即法藏比丘未出世前。次第有此諸佛。五十四方是世自在王佛。為
法藏師。請時應知之。想偈同前。但改佛名。

一心奉請。南無過去久滅世自在王佛。

世王佛即法藏本師。依彼佛所。發四十八願。請時須知之。偈同前。改云自在
王佛亦如是。此佛并前五十三佛。出大本無量壽經。

一心奉請。南無十方現在不動佛等。盡十方河沙淨土一切諸佛。

此十方諸佛。皆出廣長舌相。徧覆大千。稱讚極樂。是故須請。求護念故。出
稱讚淨土經。請時應想從彼十方來。改偈云十方諸佛亦如是。餘皆同前。

一心奉請。南無往世七佛。現在賢劫千佛。三世一切諸佛。



一心奉請・南無極樂世界阿彌陀佛。

彌陀是願攝之主・應想領無邊眷屬・至我道場・攝受護念・各各兩淚勤重三請
・決定須來・正坐道場・餘佛菩薩・悉是證明・改偈如前・此最後請者・準普
賢懺法・應知・

一心奉請・南無大乘四十八願無量壽經・稱讚經等・及彼淨土所
有經法・十方一切尊經・十二部真淨法寶。

應想二處法寶・一・十方法寶・二・淨土法寶・想淨土法時・徧想佛菩薩水鳥
樂樹皆說妙法・隨我請來・顯現道場・令我道場・如彼淨土無異・
想云・『法性如空無所見・二處法寶難思議・

我今三業如法請・俱時顯現受供養・』

一心奉請・南無文殊師利菩薩・普賢菩薩・無能勝菩薩・不休息
菩薩等・一切菩薩摩訶薩。

偈同請佛・但改云諸大菩薩亦如是・當請時・想文殊普賢等・皆在淨土・如願
王經說・○此中一切二字・該十方三世・



一心奉請·南無極樂世界觀世音菩薩摩訶薩。

想此菩薩坐蓮華座·侍佛左邊·威德光明·悉皆無量·偈改觀音菩薩·

一心奉請·南無極樂世界大勢至菩薩摩訶薩。

想此菩薩坐蓮華座·侍佛右邊·亦如觀音不異·偈改勢至菩薩·

一心奉請·南無過去阿僧祇劫法藏比丘菩薩摩訶薩。

即彌陀因身·修行四十八願·攝化眾生·當念此恩德·偈改法藏比丘·

一心奉請·南無極樂世界新發道意·無生不退·一生補處·諸大

菩薩摩訶薩。

經云不退及一生補處諸大菩薩·請時應如是想·偈如前·

一心奉請·南無此土舍利弗等一切聲聞緣覺得道賢聖僧。

想徧法界·請賢聖僧·○一切二字·亦該十方三世·下禮拜中·亦同·

一心奉請·此土梵釋四王一切天眾·摩羅天主·龍鬼諸王·閻羅




五道。主善罰惡。守護正法護伽藍神。一切賢聖。

例皆三請。來此守護。唯除禮拜。應知。

上所奉請彌陀世尊。觀世音菩薩。大勢至菩薩。清淨海眾。一切賢聖。唯願不捨大慈大悲。他心道眼。無礙見聞。身通自在。降來道場。安住法座。光明徧照。攝取我等。哀憐覆護。令得成就菩提願行。釋迦文佛。定光佛等。世自在王佛。十方三世一切正覺。及文殊師利菩薩。普賢菩薩。三乘聖眾。唯願悉來。慈悲攝護。諸天魔梵龍鬼等眾。護法諸神。一切賢聖。悉到道場。安慰堅守。同成淨行。三說。

第六讚歎法

當起立恭敬合掌。想此身正對彌陀。及一一佛前。說偈讚願云。



色如閻浮金·面逾淨滿月·身光智慧明·所照無邊際·降伏魔怨
眾·善化諸人天·乘彼八正船·能度難度者·聞名得不退·是故
歸命禮。禮起復云·

以此歎佛功德·修行大乘無上善根·奉福上界天龍八部·大梵天
王·三十三天·閻羅五道·六齋八王·行病鬼王·各及眷屬·此
土神祇·僧伽藍內護正法者·又為國王帝主·土境萬民·師僧父
母·善惡知識·造寺檀越·十方信施·廣及法界眾生·願藉此善
根·平等熏修·功德智慧·二種莊嚴·臨命終時·俱生樂國。

第七禮佛法

讚歎竟·應禮諸佛·當禮佛時·須想一切諸佛·是我慈父·能令我生諸佛淨土
故·

一心敬禮本師釋迦牟尼佛。



唱竟一禮·想云·

『能禮所禮性空寂·感應道交難思議·我此道場如帝珠·釋迦如來影現中·
我身影現釋迦前·頭面接足歸命禮·』 下去同用·

一心敬禮過去久遠劫中定光佛·光遠佛·龍音佛等·五十三佛。

五十三佛·如禮請中說·當想此身如幻如化·自見對彼佛前作禮·偈同上·但
改云五十三佛影現中·我身影現諸佛前·下去做此·

一心敬禮過去久滅世自在王佛。

法藏本師·應知·

一心敬禮東方不動佛等·盡東方河沙淨土一切諸佛。

此下十方佛·皆出廣長舌相·稱讚極樂·當想此身對河沙淨土佛前·

一心敬禮東南方最上廣大雲雷音王佛等·盡東南方河沙淨土一切

諸佛。

一心敬禮南方日月光佛等·盡南方河沙淨土一切諸佛。



一心敬禮西南方最上日光名稱功德佛等。盡西南方河沙淨土一切諸佛。

一心敬禮西方放光佛等。盡西方河沙淨土一切諸佛。

一心敬禮西北方無量功德火王光明佛等。盡西北方河沙淨土一切諸佛。

一心敬禮北方無量光嚴通達覺慧佛等。盡北方河沙淨土一切諸佛。

一心敬禮東北方無數百千俱胝廣慧佛等。盡東北方河沙淨土一切諸佛。

一心敬禮上方梵音佛等。盡上方河沙淨土一切諸佛。

一心敬禮下方示現一切妙法正理常放火王勝德光明佛等。盡下方河沙淨土一切諸佛。

一心敬禮往古來今三世諸佛。七佛世尊。賢劫千佛。

一心敬禮極樂世界阿彌陀佛。



應三禮。但改偈云。為求往生接足禮。

一心敬禮極樂世界佛菩薩等所說經法。乃至水鳥樂樹一切法音。

清淨法藏。

想彼淨土法寶顯現道場。

偈云。『真空法性如虛空。常住法寶難思議。

我身影現法寶前。一一皆悉歸命禮。』

一心敬禮大乘四十八願無量壽經。稱讚經等。十方一切尊經。十

二部真淨法藏。

此土法寶。偈如前。

一心敬禮極樂世界觀世音菩薩摩訶薩。

想此菩薩侍彌陀左邊。坐蓮華座。偈同禮佛。但改善薩為異。

一心敬禮極樂世界大勢至菩薩摩訶薩。

想侍佛右邊。如觀音不異。



一心敬禮過去阿僧祇劫·法藏比丘菩薩摩訶薩。
一心敬禮極樂世界一生補處諸大菩薩摩訶薩。
一心敬禮極樂世界無生不退諸大菩薩摩訶薩。
一心敬禮極樂世界新發道意菩薩·及十方來生淨土一切菩薩摩訶薩。

一心敬禮文殊師利菩薩·普賢菩薩·彌勒菩薩·常精進菩薩等·
盡十方一切諸大菩薩摩訶薩。

一心敬禮大智舍利弗·阿難持法者·諸大聲聞緣覺·一切得道賢
聖僧。

想偈已·不起於地·運下懺悔·

第八懺願法

總有五法·今舉初後·故云懺願·




一 明懺悔法

悔有事理·應須並運·事則竭其三業·不惜身命·流血雨淚·披露罪根·不敢覆諱·理則觀罪實相·能懺所懺·皆悉寂滅·如餘文廣說·知事理已·當須等心普為一切懺悔·想云·『我及眾生·無始常為三業六根重罪所障·不見諸佛·不知出要·但順生死·不知妙理·我今雖知·猶與一切眾生·同為一切重罪所障·今對彌陀十方佛前·普為眾生歸命懺悔·唯願加護·令障消滅·』想已·唱云·

普為法界·一切眾生·悉願斷除三障·至誠懺悔。

唱已一禮·各執手鑪·先運逆順十心·始則背真逐妄·名順十心·今則背妄向真·名逆十心·有事有理·應細思之·從初至撥無因果是順·故於今日深信下去是逆·至正陳懺悔時·亦須扶此逆順之意·想云·『一、我與眾生·無始來今·由愛見故·內計我人·二、外加惡友·三、不隨喜他一毫之善·四、唯偏三業·廣造眾罪·五、事雖不廣·惡心徧布·六、晝夜相續·無有間斷·七、覆諱過失·不欲人知·八、不畏惡道·九、無慙無愧·十、撥無因果·一、故於今日·深信因果·二、生重慙愧·三、生大怖畏·四、發露懺悔·五、斷相續心·六、發菩提心·斷惡修善·七、勤策三業·翻昔重過·八、隨喜凡聖一毫之善·九、念十方佛·有大福慧·能救拔我·及諸眾生·從二死海·置三



德岸·十、從無始來·不知諸法本性空寂·廣造眾惡·今知空寂·為求菩提·
為眾生故·廣修諸善·徧斷眾惡·唯願十方諸佛·彌陀世尊·慈悲攝受·聽我
懺悔·」

我弟子某甲·至心懺悔·十方諸佛·真實見知·我及眾生·本性清
淨·諸佛住處·名常寂光·徧在剎那·及一切法·而我不了·妄
計我人·於平等法中·而起分別·於清淨心中·而生染著·以是
顛倒五欲因緣·生死循環·經歷三界·坐此相續·不念出期·而
復於中·造極惡業·四重五逆·及一闡提·非毀大乘·謗破三寶
·謗無諸佛·斷學般若·用十方僧物·用佛塔物·汙梵行人·習
近惡法·於破戒者·更相讚護·三乘道人·種種毀罵·內覆過失
·外現威儀·常以五邪·招納四事·不淨說法·非律教人·因佛
出家·反破佛法·違逆師長如法教誨·恣行貪恚·無慚恥心·以
是因緣·諸惡業力·命終當墮阿鼻地獄·猛火熾然·受無量苦·
千萬億劫·無解脫期·今始覺知·生大慚愧·生大怖畏·十方世



尊·阿彌陀佛·久已於我生大悲心·無數劫來·為度我故·修菩提道·不惜身命·今已得佛·大悲滿足·真實能為一切救護·我今造惡·必墮三途·願起哀憐·受我懺悔·重罪得滅·諸惡消除·乃至娑婆生因永盡·諸佛淨土·如願往生·當命終時·悉無障礙·起云·懺悔已·歸命禮阿彌陀佛·及一切三寶。

禮已·以頭三叩於地·表三處作禮·一謂彌陀世尊·二淨土三寶·三十方三寶·應三說懺悔等文·自看時早晚·若時促·略云第二第三·亦如是說·下四悔準此·

二 明勸請法

想對十方一切佛前·長跪勸請·請有二義·一從初至轉於無上妙法輪·名請說法·二諸佛下請久住世·意亦在說法·十方諸佛以道眼力·知我勸請·唯願久住·轉正法輪·所在生處·常能勸請·

我弟子某甲·至心勸請·十方所有世間燈·最初成就菩提者·我今一切皆勸請·轉於無上妙法輪·諸佛若欲示涅槃·我悉至誠而勸



請·唯願久住剎塵劫·利樂一切諸眾生·
勸請已·歸命禮阿彌陀佛·及一切三寶。

三 明隨喜法

十方凡聖一毫之善·我亦隨喜·善根福德·能令見者生喜·我隨彼喜·

我弟子某甲·至心隨喜·十方一切諸眾生·二乘有學及無學·一切如來與菩薩·所有功德皆隨喜·
隨喜已·歸命禮阿彌陀佛·及一切三寶。

四 明迴向法

無始時來·乃至今日·一毫之善·迴向三有·故今悔之·誓求菩提·


我弟子某甲·至心迴向·所有禮讚供養福·請佛住世轉法輪·隨喜懺悔諸善根·迴向眾生及佛道·
迴向已·歸命禮阿彌陀佛·及一切三寶。



五明發願法

大體須存滅罪除障·扶四弘誓·隨順菩提·求生淨土·唱時想的對彌陀·餘佛菩薩·悉為證明·

我弟子某甲·至心發願·願共修淨行人·三業所生一切諸善·莊嚴淨願·福智現前·願得彌陀世尊·觀音勢至·慈悲攝受·為我現身·放淨光明·照觸我等·諸根寂靜·三障消除·樂修淨行·身心潤澤·念念不失淨土善根·及於夢中·常見彼國眾妙莊嚴·慰悅我心·令生精進·願得臨命終時·預知時至·盡除障礙·慧念增明·身無痛苦·心不顛倒·面奉彌陀·及諸眷屬·歡喜快樂·於一剎那·即得往生極樂世界·到已·自見生蓮華中·蒙佛授記·得授記已·自在化身微塵佛剎·隨順眾生·而為利益·能令佛剎塵數眾生發菩提心·俱時離苦·皆共往生阿彌陀佛極樂世界·如是行願·念念現前·盡未來時·相續不斷·身語意業·常作佛



事。發願。乃往生正行。須具足三說。不同前四悔。隨時廣略。應知。

發願已。歸命禮阿彌陀佛。及一切三

第九旋繞誦經法

禮竟當起。各整衣服定立少頃。當想三寶賢聖。罽塞道場。各坐法座。見身一一繞旋法座。安詳而轉。然後口稱念云。

南無佛

南無法

南無僧

南無釋迦牟尼佛

南無世自在王佛

南無阿彌陀佛

南無觀世音菩薩

南無大勢至菩薩

南無文殊師利菩薩

南無普賢菩薩

南無清淨大海眾菩薩摩訶薩

如是三稱。當誦阿彌陀經。或十六觀經。誦畢復三稱前名號。當稱誦時。聲名句文。空無所得。猶空鳥迹。豈可取著。身語意三。如影響皎。雖皆不實。感



應具在。自見其身。各旋法座。或多或少。經畢為期。旋已唱云。

自歸於佛。當願眾生。體解大道。發無上心。一拜

自歸於法。當願眾生。深入經藏。智慧如海。一拜

自歸於僧。當願眾生。統理大眾。一切無礙。和南聖眾。一拜。首者跪唱云。

白眾等聽說。經中如來偈。何不力為善。念道之自然。宜各勤精

進。努力自求之。必得超絕去。往生安養國。橫截五惡道。惡趣

自然閉。升道無窮極。易往而無人。何不棄世事。勤行求道德。

各得極長生。壽樂無窮極。

第十坐禪法


如上事畢。當於一處。繩牀西向。易觀想故。表正向故。加跏端坐。項脊相對。不昂不偃。調和氣息。定住其心。然所修觀門。經論甚多。初心凡夫。那曾徧習。今從要易想。略示二種。於二



種中。仍逐所宜。未必併用。其有於餘觀想熟者。任便。但得不離淨土法門。皆應修習。所言二種。一者扶普觀意。坐已自想。即時所修。計功合生極樂世界。當便起心生於彼想。於蓮華中。結加趺坐。作蓮華合想。作華開想。當華開時。有五百色光來照身想。作眼目開想。見佛菩薩及國土想。即於佛前。坐聽妙法。及聞一切音聲。皆說所樂聞法。所聞要與十二部經合。作此想時。大須堅固。令心不散。心想明了。如眼所見。經久乃起。二者直想阿彌陀佛丈六金軀。坐於華上。專繫眉間白毫一相。其毫長一丈五尺。周圍五寸。外有八棱。其毫中空。右旋宛轉。在眉中間。瑩淨明徹。不可具說。顯映金顏。分齊分明。作此想時。停心注想。堅固勿移。然復應觀想念所見。若成未成。皆想念因緣。無實性相。所有皆空。一。如鏡中面像。如水現月影。如夢如幻。雖空而亦可見。二。皆心性所現。所有者即是自心。心不自知心。



心不自見心。心有想即癡。無想即泥洹。心有心無。皆名有想。盡名為癡。不見法性三。因緣生法。即空假中。不一不異。非縱非橫。不可思議。心想寂靜。則能成就念佛三昧。久而乃起。廣如別說。問。念佛三昧。久習方成。十日七日修懺之者。云何卒學。答。緣有生熟。習有久近。若過去曾習。及今生豫修。至行懺時。薄修即得。若宿未經懷。近懺方學。此必難成。然雖不成。亦須依此繫心。為坐禪觀境。經云。若成不成。皆滅無量生死之罪。生諸佛前。又云。但聞白毫名字。滅無量罪。何況繫念。凡欲修者。勿生疑怖。自謂無分。彼佛有宿願力。令修此三昧者。皆得成就。般舟依三力成就。一佛威力。二三昧力。三己功德力。觀經但聞無量壽佛二菩薩名。能滅無量生死之罪。況憶念者乎。若有樂修餘觀。當自隨情。坐已即起。隨意佛事。或要修觀。更坐無妨。若不慣習坐。乃行道稱念。亦得於夜夢中。見彌陀佛。



。具如經說。

往生淨土懺願儀

自跋

此法自撰集于今。凡二改治。前本越僧契凝已刊刻廣行。其後序首云。予自濫沾祖教等是也。聖位既廣。比見行者拜起易勞。懺悔禪法皆事攻削。餘悉存舊。今之廣略既允。似可傳行。後賢無惑其二三焉。刊詳刪補。何嫌精措。時大中祥符八年太

歲乙卯二月日序。

即宋真宗十八年。真宗凡五改元。大中祥符。乃其第三。



往生淨土決疑行願二門

宗者山沙門蓮式撰

維安養寶剎。大覺攸讚。三輩高升。夕孕金華。列宿猶慚於海滴

。晨遊玉沼。世鐙彊喻於河沙。良以十方爰來。四生利往。雖騰

光而普示。終稽首而偏求。故其竺國皇州。自今觀古。彼則鉅賢

至聖。咸舒藻以為盟。文殊普賢天親龍樹聖賢之儔。或別譯顯文。或著在經論。非此備載。此則覺德鴻儒。盡摘

毫而作誓。且首從晉世東林淨社劉雷等十八賢。泊一百二十三人同誓。遺民屬詞。其後冠蓋之士。德望之僧。潔志之俗。富於編簡。自茲迴向絲續。

唱和相尋。誠為道德之通衢。常樂之直濟者也。古今同概但世多創染割截


。未識方隅。忽遇問津。靡慚濫吹。或攘臂排為小教。或大笑斥

作權乘。以其言既反經。謂反疑經人惑常典。易不云乎。居其室。出其言

不善。則千里之外違之。況其邇者乎。遂輒述往生淨土決疑行願

二門。詞愧不文。理存或當。視菽麥而且辨。挹涇渭而永分。翦

伊蘭之臭林。植梅檀之香榦。信解行願。原始要終。不數千言而



能備舉者·實茲二門矣。

第一決疑門

一疑師·二疑法·三疑自·

第二行願門

一禮懺門·二十念門·三繫緣門·四眾福門·

第一決疑門者·疑為信障·世間小善尚不能成·況菩提大道乎·或曰·天台智者已有釋十疑論·何須此文·然略由三意·一者上為王臣宰官生信樂者·幾務少暇·難尋廣文·今舉大綱·及略出行相·易披覽故·易修行故·二者論中多隨事釋難·唯第二第三·略附理立·且事既無盡·疑亦叵窮·今直明一理·為諸法源·指源則流可識矣·三者正對說者反經乖理·自損損他·故於第二疑法中·簡小取大·明白權實·使來者不惑·至於道安和尚往生論六卷·懷感法師群疑論七卷·道綽禪師安樂集三卷·慈敏三藏淨土慈悲集三卷·源信禪師淨土集二卷·古今諸師歸心淨域者·或製疏解經·或宗經造論·或隨情釋難·或伽陀讚揚·雖殊途同歸·而



各陳所見。動盈編帙。尋究良難。今統彼百家。以三疑收盡。然文出天台止觀。非敢臆說。一者疑師。二者疑法。三者疑自。

一疑師者。師有二種。一邪外等師。倒惑化人。非所承也。二正法之師。復有凡聖因果。凡及因位。容有未了。猶清辨謂今彌勒未是徧知。俟龍華道後。方復問津。即其事也。今顯示西方令迴向者。唯果佛聖師。釋迦如來。及十方諸佛。出廣長舌。說誠實言。讚勸往生。更何所惑。

二疑法者。佛法有二。一者小乘不了義法。二者大乘了義法。大乘中復有了不了義。今談淨土。唯是大乘了義中之義之法也。且小乘經部。括盡貝書。曾無一字讚勸往生他方淨土。故天親論云。女人及根缺。二乘種不生。此即明據也。問。小彌陀經等。皆說彼國有聲聞弟子。及鼓音王經云。佛母名殊勝妙顏。亦應復有女人。答。佛母恐指初降生時。成正覺已。國土隨淨。必無女人。



·其母或轉成男子。如此方龍女。或復命終如悉達母。有人注論引此經文。而云彼土亦有女人者。非也。聲聞如觀經疏及十疑論和會。今明大乘復有三種。一者三乘通教。此則門雖通大。類狎二乘。又當教菩薩。雖復化他淨佛國土。化畢。還同二乘歸於永滅。淨土深理。非彼所知。非了義也。二者大乘別教。此明大乘獨菩薩法。雖談實理。道後方證。因果不融。淨土則理外修成。萬法乃不由心具。雖塵劫修道。廣遊佛剎。指彼淨土因果。但是體外方便。斯亦未了。三者佛乘圓教。此教詮旨圓融。因果頓足。佛法之妙。過此以往。不知所裁也。經曰。十方諦求。更無餘乘。唯一佛乘。斯之謂歟。是則大乘中大乘。了義中了義。十方自心淨穢。故取捨即非取捨。卷懷同在於剎那。一念色心。羅列徧收於法界。並天真本具。非緣起新成。一念既然。一塵亦爾。故能一一塵中一切剎。一一心中一切心。一一心塵復互周。重重無盡無障礙。一時頓現。



非隱顯。一切圓成無勝劣。若神珠之頓含眾寶。猶帝網之交映千光。我心既然。生佛體等。如此則方了迴神億刹。實生乎自己心中。孕質九蓮。豈逃乎刹那際內。苟或事理攸隔。淨穢相妨。安令五逆凡夫。十念便登於寶土。二乘賢輩。迴心即達於金池也哉。


· 信此圓談。則事無不達。昧斯至理。則觸類皆迷。故華嚴經云

· 心如工畫師。造種種五陰。一切世間中。無不從心造。造通二種。一者理具名造。一者依正。一念頓足。二者變起名造。全理緣起。知無不為。

· 如心佛亦爾。如佛眾生然。心佛及眾生。是三無差別。實由三無差別。方得感應道交。悲願相攝。共變各變。因果方成。若但知一理無差。不曉諸法互具。則未善圓旨。

· 又起信論云。所言法者。謂眾生心。直指凡心。是心即攝一切世間。六凡法界。出世間法。四聖法界也。攝義亦二種。一理具。二事造。並攝十界。十界之內。身上淨穢。何法不在。依於此心。顯示摩訶衍義。摩訶衍。大乘也。若非此心。安堪乘運。

· 十六觀云。諸佛如來。是法界身。入一切眾生心想中。乃至是心作佛。是心是佛。又般舟三昧經云。佛是我心。是我心見佛。是我心作佛等。談斯旨者。大乘卷中。粲然可舉。至若法華妙部。如來



親記往生·華嚴頓談·普賢躬陳迴向。是知彌陀因地·觀此理而大誓普收·釋迦果成·稱此理而廣舌深讚·十方三世·莫不成然·問·如上所明·妙理圓極·為世人盡須觀行·然始生耶·答·此不然也。今但直決疑情·令知淨土百寶莊嚴·九品因果·並在眾生介爾心中·理性具足·方得今日往生事用·隨願自然·是則旁羅十方·不離當念·往來法界·正協唯心·免信常流·執此非彼·其行願之相·正在次門·非此所問·況九品生相·各有行類·上輩三品·須解須行·故文云·汝行大乘·解第一義·即其人矣·若今之學者·見賢思齊·企金座而高升·唯妙觀而是託·若其中下之流·六品生因·只是精持禁戒·行世仁慈·乃至下下品生·本是惡逆·十念精誠·便生彼國·但能知有淨土·盡可迴心·苟不然者·寧容九品之差降也。

世人縱云淨土出大乘教·不能如上約教甄簡·寧逃混濫·未足決疑·

三疑自者·問曰·我是博地凡夫·世緣纏蓋·云何此身生諸淨土




·入賢聖海·同正定聚耶·釋曰·若了如上法性虛通·及信彌陀本願攝受·但勤功福·寧俟問津·況十念者得生·唯除五逆及謗正法·又定心十念·逆謗亦生·今幸無此惡·而正願志求·夫何惑矣。

第二正修行願門者。略開四門。一者禮懺門。二者十念門。三者繫緣門。四者眾福門。所以但四門者。修行整足。唯須此四。何者。先禮佛懺悔。淨除業障。身心皎潔。故第一門如淨良田。次修十念。定心成行。立願要期。植往生正因。故第二門如下種子。次使繫心。愛護長養。滋發芽莖。故第三門如灌以膏雨。次假眾福。助令繁茂。使速成華果。故第四門如灌以肥膩。是知能具修此四行者。最上最勝。然相由雖爾。若或少暇。但隨修三二一者。皆生彼國。以四門中各有行願。皆是正因故也。又亦可於六齋日修禮懺法。於日中修十念法。以十念是淨因要切。必不可廢。後二門任力所能。若不然者。但隨所欲。任意行之。四門今

扼要

中根

此為



當說。

第一禮懺門者。應日日早晨。於常供養道場中。冠帶服飾。端莊
謹肅。於佛像前。手自燒香。合掌定心。作是唱云。

一切恭敬。一心頂禮常住三寶。存心徧禮十方三世一切佛法僧寶。拜起。兩膝著地。手執香爐。燒取名香。唱云。

願此香煙雲。徧滿十方界。無邊佛土中。無量香莊嚴。具足菩薩
道。成就如來香。唱已。冥心少頃。徧運香雲。供養三寶。普熏眾生。咸生淨土。想已。置香
爐起。作一禮。起已合掌。曲躬懇切。想面對彌陀。及一切佛。而讚歎曰。

如來妙色身。世間無與等。無比不思議。是故今頂禮。如來色無
盡。智慧亦復然。一切法常住。是故我歸依。大智大願力。普度
於群生。令捨熱惱身。生彼清涼國。我今淨三業。歸依及禮讚。
願共諸眾生。同生安樂剎。讚願已。即便禮佛。一一存心專對唱云。

一心頂禮常寂光淨土。阿彌陀如來。清淨妙法身。徧法界諸佛。
一心頂禮實報莊嚴土。阿彌陀如來。微塵相海身。徧法界諸佛。
一心頂禮方便聖居士。阿彌陀如來。解脫相嚴身。徧法界諸佛。



一心頂禮西方安樂土。阿彌陀如來。大乘根界身。徧法界諸佛。
一心頂禮西方安樂土。阿彌陀如來。十方化往身。徧法界諸佛。
一心頂禮西方安樂土。教行理三經。極依正宣揚。徧法界尊法。

靈峯大師註云。此禮舊本無。今依幽溪大師添入。使三寶具足。


一心頂禮西方安樂土。觀世音菩薩。萬億紫金身。徧法界菩薩摩訶薩。

一心頂禮西方安樂土。大勢至菩薩。無邊光智身。徧法界菩薩摩訶薩。

一心頂禮西方安樂土。清淨大海眾。滿分二嚴身。徧法界聖眾。
即以兩膝跪地。手執香鑪。燒香至誠。而唱是言。

我今普為四恩三有法界眾生。悉願斷除三障。歸命懺悔。

起禮。復跪地。執手鑪。唱云。



此文最妙
至心懺悔叩

我弟子某甲。及法界眾生。從無始世來。無明所覆。顛倒迷惑。而由六根三業。習不善法。廣造十惡。及五無間。一切眾罪。無量無邊。說不可盡。十方諸佛。常在世間。法音不絕。妙香充塞。法味盈空。放淨光明。照觸一切。常住妙理。徧滿虛空。我無始來。六根內盲。三業昏闇。不見不聞。不覺不知。以是因緣。長流生死。經歷惡道。百千萬劫。永無出期。經云。毗盧遮那。徧一切處。其佛所住。名常寂光。是故當知。一切諸法。無非佛法。而我不了。隨無明流。是則於菩提中。見不清淨。於解脫中。而起纏縛。今始覺悟。今始改悔。奉對叩諸佛彌陀世尊。發露懺悔。當令我與法界眾生。三業六根。無始所作。現作當作。自作教他。見聞隨喜。若憶不憶。若識不識。若疑不疑。若覆若露。一切重罪。畢竟清淨。我懺悔已。六根三業。淨無瑕累。所修善根。悉亦清淨。皆悉迴向。莊嚴淨土。普與眾生。



同生安養。願叩阿彌陀佛。常來護持。令我善根。現前增進。不
 失淨因。臨命終時。身心正念。視聽分明。面奉叩彌陀。與諸聖
 眾。手執華臺。接引於我。一剎那頃。生在佛前。具菩薩道。廣
 度眾生。同成種智。應具三說。若時促及事
 迫。一說亦得。起云。懺悔發願已。歸命禮阿彌陀
 佛。及一切三寶。一拜。次旋繞法。或三市。或
 七市。乃至多市。口稱云。

南無阿彌陀佛

南無觀世音菩薩

南無大勢至菩薩

南無清淨大海眾菩薩摩訶薩

或三或七或多。如是稱念。隨意所欲。不拘偏數。次至佛前。三自歸。唱云。

自歸於佛 當願眾生 體解大道 發無上心（拜）

自歸於法 當願眾生 深入經藏 智慧如海（拜）

自歸於僧 當願眾生 統理大眾 一切無礙 和南聖眾（拜）

次至別座誦經。誦彌陀經。或十六觀經。若都不誦得經文。即一心
 稱阿彌陀佛名。量時而止。或更迴向結攝亦得。

第二十念門者。每日清晨服飾已後。面西正立。合掌。連聲稱阿



彌陀佛。盡一氣為一念。如是十氣。名為十念。但隨氣長短。不限佛數。唯長唯久。氣極為度。其佛聲不高不低。不緩不急。調停得中。如此十氣。連屬不斷。意在令心不散。專精為功故。名此為十念者。顯是藉氣束心也。作此念已。發願迴向云。

我弟子

此文但直聲作白
某甲

一心歸命極樂世界阿彌陀佛。願以淨光照我。慈誓攝

我。我今正念。稱如來名。經十念頃。為菩提道。求生淨土。佛昔本誓。若有眾生。欲生我國。至心信樂。乃至十念。若不生者。不取正覺。唯除五逆。誹謗正法。我今自憶。此生已來。不造逆罪。不謗大乘。願此十念。得入如來大誓海中。承佛慈力。眾罪消滅。淨因增長。若臨欲命終。自知時至。身不病苦。心無貪戀。亦不倒散。如入禪定。佛及聖眾。手持金臺。來迎接我。如一念頃。生極樂國。華開見佛。即聞佛乘。頓開佛慧。廣度眾生。

· 滿菩提願。

作此願已便止。不必禮拜。要盡此一生。不得一日暫廢。唯將不廢。自要其心。得生彼國。



第三繫緣門者。凡公臨私養。歷涉緣務。雖造次而常內心不忘於佛。及憶淨土。譬如世人切事繫心。雖經歷語言去來坐臥種種作務。而不妨密憶。前事宛然念佛之心。亦應如是。或若失念。數數攝還。久久成性。任運常憶。楞嚴經云。譬如有人。一專為憶譬佛常念眾生。一人專忘念不切即是忘譬眾生不念佛。如是二人。若逢不逢。或見非見。二人相憶。二憶念深。如是乃至從生至生。同於形影。不相乖異。十方如來憐念眾生。如母憶子。若子逃逝。雖憶何為。子若憶母。如母憶時。母子歷生不相違遠。若眾生心憶佛念佛。現前當來。必定見佛。去佛不遠。不假方便。自得心開。如染香人。身有香氣。如此繫心。任運常遮一切惡念。上根設欲作惡。憶佛之故。惡不能成。中根縱使隨惡作惡業時。心常下輒。下根如身有香。自然離臭又復覺心微起惡念。此三根共由之路即便憶佛以佛力故。惡念自息。如人遇難。求彼彊援。必得免脫。又若見他受苦時。以念佛心。憐憫於彼。願其離



苦。若斷刑獄。以念佛故。生憫念心。雖依王法。當密作願云。我行王法。非我本心。願生淨土。誓相救濟。凡歷一切境界。若善若惡。由心憶佛。皆心念作願。故普賢願王云。作一切惡。皆不成就。若作善業。皆悉和合。即此意爾。如是相續念佛在心。能辦一切淨因功德。恐煩披覽。不復具說。誠哉此門。為益最大。

第四明眾福門者。普賢觀經云。若國王大臣。欲懺悔重罪者。當修行五事。一者但當正心不謗三寶。不障出家。不為梵行人作惡留難。於持戒四眾。勿行汙行。二者孝養父母。奉事師長。三者正法治國。不邪枉人民。四者於六齋日。敕諸境內力所及處。令行不殺。嚴禁漁捕。及誠姦闖。六齋

日者。白月初八日。四天王使者巡世。十四日四王太子巡。十五日四天王親巡。黑月二十三日。二十九日。三十日巡世。準上白月次第。終而復始。若四王親下。一切諸天星宿鬼神俱時隨從。若遇修福齋戒者。諸天相慶。即為此人注祿添算。護持福業。令其成就。五者當深信因果。信一實道。知佛不滅。此與十六觀經三福大同。但普賢觀正為王臣。故特引用。此亦是三世諸佛淨業正因。若出家四眾。應具依觀經三福為行。當自檢文。



但隨作一福。並須即時若心念若口言。作意迴向。方成淨因爾。勸修者於此四種法門。必須繫日專持修習。方可自期定生淨土。此之四行。即是學習念佛三昧往生正因。經云。行此三昧者。現身得見阿彌陀佛。及二菩薩。若人但聞佛名二菩薩名。除無量劫生死之罪。何況憶念。若念佛者。當知此人是人中芬陀利華。觀音勢至為其勝友。當坐道場。生諸佛家。此人現世。彼佛常遣無數化佛。無數化觀世音。化大勢至。及娑婆世界常有二十五菩薩。晝夜擁護。若行住坐臥。若一切時處。不令惡鬼得便。不受一切災難。常為國王大臣一切人民之所宗奉。所得功德。一念之間。不可算數。如佛之辯。不能稱揚。除彼不肖人。孰聞不信樂。

往生淨土決疑行願二門



❖

舊跋

慈雲大師既集往生淨土懺願儀·復為在家人述決疑行願二門·然出家人亦可修此行願·幽溪大師暮年·奉行願為日課。臨終跌坐·以指書空·作妙法蓮華經五字而化·法門之妙·於斯驗矣。順治四年丁亥仲冬淨土弟子正知謹識。

淨土十要第二



附錄



結蓮社普勸文

如是我聞。西方有佛。名阿彌陀。亦名無量光。亦名無量壽。又有觀音勢至二菩薩。助佛揚化。皆以大願力。濟度諸眾生。其國以七寶莊嚴。清淨自然。無諸雜穢。故名淨土。其人皆蓮華化生。壽命無量。衣食受用。隨念而至。更無諸苦。亦無輪轉。故又名極樂世界。以此返觀我等現今所受之身。所處之世。較彼國土。淨穢壽量。苦樂生死。豈止天地之相遠耶。而昧者不知。或知而不信。自作障礙。顛倒執迷。不思解脫。捨此生彼。豈不哀哉。故我今者。勸諸有緣。結此蓮社。假使難知難辦。猶當勉力精勤。况佛號甚易持。淨土甚易往。八萬四千



法門·無如是之捷徑。但能輟清晨俛仰之暇·遂可為永劫不壞之資。是則用力甚微·而收功乃無有盡。眾生亦何苦自棄而不為乎。噫·夢幻非真·壽夭難保。呼吸之頃·即是來生。一失人身·萬劫不復·此時不悟·佛如眾生何。願深念於無常·勿徒貽於後悔。淨樂居士張掄勸緣。


淨土十要



明·蕩益大師選定

觀無量壽佛經初心三昧門

淨土十要(三)



靈峯蕩益大師選定淨土十要第三附

述曰。淨要一書。皆歷代善知識吹大法螺。擊大法鼓。摧邪顯正之大閑也。靈峯銓衡。一字不濫。成時何物。敢浪參耶。竊以十六觀經。淨土勝典。以非凡夫境界。屬想無從。論者非妄勸修持。便概杜措意。然妄修則墮落阬壑。概杜則壅塞源流。進退兩乖。均失佛旨。不知經為利鈍二性。平分勝劣兩門。利者修前十二觀。感三輩生。鈍者唯修第十三一觀。亦分三輩九品。是則人雖鈍。觀雖劣。而作是一心之宗。如來夙願之力。原無鈍劣。故名此為雜想觀者。指雜亂垢心。即是阿彌陀佛不思議身土也。敬宗此義。述觀經初心三昧門。既無妄修之虞。又免概杜之過。覺韋提哀請。再啟今時。而王宮法流。重通末

前人未發



運。關係匪小。避忌未遑。又以小本彌陀。字字是行人真歸。字字是行人妙觀。歸觀會一。即是行經。謬輯受持行儀。自作往生左券。同學修之。僉謂有四利焉。持名行人。二障均重。一行三昧。未可要期。今即持名具破謂事理二行二障因緣。令其速成一心不亂。一利也。人多謂大本是廣文。觀經是深境。不知小本文雖約而義甚廣。境雖近而觀甚深。深廣祇在一心。以此弘通寶王。庶幾允可。二利也。淨土依正。皆不思議境。慈雲懺法。略於觀境。且宗唐譯。未盡秦本之致。今宗秦本。專就觀境。具修事理二行。身居忍土。而瞻依禮覲。如已生樂邦。法巧趣幽。人懷悅慕。塵塵皆趣阿彌法身真體。將見往生品位必高。而華開見佛亦易。三利也。六方諸佛。恩德無涯。護念保綏。神力莫測。二大士及海眾。皆我現在加持。臨終救濟。當來教授之師。今悉併切投誠。革除慢易。使無障礙而有感通。無忝



受持之軌。四利也。四利匪虛。并出請益。已上二種。初門續觀經已斷之慧命。行儀立持名妙行之準繩。皆前古未揚。實叔季甘露。述而非作。附入淨要。或者其有當乎。本擬寄西方合論前以行。而二皆行經。與大小懺法同一部類。遂竊附慈雲後。為第三冊。兼申法門旨趣。略闡芻言。而語涉游揚。倍增醜拙。前修同學。其尚愍而教之也哉。成時和南識。



觀無量壽佛經初心三昧門

清古歛後學沙門成時依經錄輯

觀經境勝。卒難受持。經謂若欲至心生西方者。先當觀於一丈

六像在池水上

先當二字。對前勝觀而言。非對後二侍。

。如先所說無量壽佛。身量無邊。非

凡夫心力所及。然彼如來夙願力故。

指劣觀

。有憶想者。必得成就。

則知捨勝觀劣。正是佛力所加。縱根鈍。修必成。像觀若成。具

相亦現。故鈔謂觀佛入門要術也。又經前明勝相毫量。千六百

五十萬里。疏僅取一丈五尺。蓋勝劣佛觀。皆發軔白毫。故疏


勝相毫量。豫取後劣相文而釋。良以忍界末流。縱大機勝種。

皆當創歸池像。決無頓契一切色身相者。韋提希等。於前見佛

。經中盛明佛加。非通途修證教意。復次。雖觀劣身。亦圓符

勝觀。鈔云。境有勝劣。觀皆頓照。即空假中。勝身心作心是

。丈六非作是耶。經云。阿彌陀佛神通如意。於十方國變現自



在・或現大身滿虛空中・或現小身丈六八尺・明示人大身小身
・無先無後・非所及・非所不及也・依第十三雜想觀・述初心
三昧門・下筆故序。

行者面西・如三昧法治室・但供觀經一卷・專令心想現像・稱阿彌陀佛出入・
入時投地・默白云・

「南無釋迦牟尼佛・無憂惱處・我當往生・不樂閻浮提濁惡世也・此濁惡處・
地獄餓鬼畜生盈滿・多不善聚・願我未來・不聞惡聲・不見惡人。」○白已・
起・於問訊時・復想云・「釋迦牟尼佛・身紫金色・坐百寶蓮華・佛頂有金臺
・狀如須彌・極樂世界・及十方淨土主伴・悉於中現。」想已・次互跪拈香・
復想云・

「阿彌陀佛・從金臺出・住立空中・觀音侍左・勢至侍右・皆熾盛金色・佛相
八尺・大士不及八尺。」○起・至心唱和云・

一切恭敬・一心頂禮・十方常住三寶。

想云・「三寶三德如虛空・眾生三障亦如是・是故平等普歸敬・願速同入法界
海。」○應歸命三處三寶・謂導師・本師・及金臺中十方諸佛・下除別禮・餘
通禮・供養・讚歎・懺悔・三歸・共六拜・同此運想・同用上偈・想已起・主



者白云。

是諸眾等。各各互跪。嚴持香華。如法供養。眾散華。和云。供養十方法界

三寶。執鐘。想我此香華。偏十方云云。想已。復云。

願此香華雲。徧滿十方界。供養無量壽。金臺百寶蓮。如是佛世

尊。佛法及佛子。普熏諸眾生。皆發菩提心。起。唱。和云。供養已。一切

恭敬。拜起。置鐘。合掌。正立。讚云。

諸佛如來。是法界身。入一切眾生心想中。心想佛時。是心即是

三十二相。八十隨形好。諸佛正徧知海。從心想生。是故一心繫


念諦觀。多陀阿伽度。阿羅訶。三藐三佛陀。

拜。心想生之上。徧緣三三寶。是故下。徧緣阿彌陀佛。次起立。復云。

以此歎佛功德。修行淨業正因。奉感拈香釋梵。護世諸天。普雨天

花。持供養者。又感問訊南無逆順起教。五百思惟主伴。娑羅闍世

月光耆婆。天授惡友。及步虛以來。好持是語。無忘失者。咸



降密室。大慈受熏。願一切世間。增長增損。大興末法。息諍揚宗。禪教律三。會歸秘藏。次拈香云。

一心頂禮。身紫金色。坐百寶蓮華。本師釋迦牟尼佛。

想云。「能禮所禮性空寂。感應道交難思議。我此道場如帝珠。

釋迦如來影現中。我身影現如來前。頭面接足歸命禮。」

一心頂禮。佛頂妙高臺中。十方無量諸佛。淨業正因。過去未來

現在三世諸佛。前偈改釋迦為諸佛。此中應想無量主伴。次拈香云。

一心頂禮。住立空中。觀世音。大勢至。二大士侍立左右。無量

壽佛。應極懇切。求哀救接。偈改阿彌陀佛影現中。想偈已。次即就地默想云。「室內淨池。涌三金蓮。佛同二侍。下立華上。垂手接引。復對佛前。涌一金華。自身住其上。對佛作禮。」

一心頂禮。西方極樂世界。在池水上。住寶蓮華。現八尺身。形

真金色。圓光映徹。圓光中無量化佛菩薩。阿彌陀佛。

圓光化佛。及寶蓮華。悉從八尺像身而觀。

一心頂禮。西方極樂世界。在池水上。阿彌陀佛。



一心頂禮·西方極樂世界·在池水上·住寶蓮華·阿彌陀佛。

一心頂禮·西方極樂世界·在池水上·住寶蓮華·現八尺身·阿

彌陀佛。

丈六之文·姑且莫禮
·令八尺之觀成就·

一心頂禮·西方極樂世界·在池水上·住寶蓮華·現八尺身·形

真金色·阿彌陀佛。

一心頂禮·西方極樂世界·在池水上·住寶蓮華·現八尺身·形

真金色·圓光映徹·阿彌陀佛。

一心頂禮·西方極樂世界·在池水上·住寶蓮華·現八尺身·形

真金色·圓光映徹·圓光中無量化佛菩薩·阿彌陀佛。次拈香
云·

一心頂禮·西方極樂世界·在池水上·身同眾生·觀世音菩薩·

大勢至菩薩摩訶薩。

偈改二大菩薩影現中
·我身影現菩薩前·

一心頂禮·西方極樂世界·在池水上·天冠立佛·觀世音菩薩摩

訶薩。

偈改二大
為觀音·



一心頂禮·西方極樂世界·在池水上·肉髻寶瓶·大勢至菩薩摩訶薩。

訶薩。

偈改二大
為勢至。

一心頂禮·西方極樂世界·在池水上·於一切處身同眾生·助佛
普化·觀世音菩薩·大勢至菩薩摩訶薩。

前身同眾生·謂同凡夫人中之身·七尺有零·此身同眾生·謂一切處身·乃九
法界身也·次拈香云·

一心頂禮·無量壽佛經。

想云·「真空法性如虛空·常住法寶難思議·

我皆影現法寶前·一心如法歸命禮·」

一心頂禮·淨除業障·得生佛前經。

偈如上·
下同·

一心頂禮·第十三雜想觀·及十方三世一切尊經。

若非此章·則忍界未流·妙觀絕分·故應頂禮·又此中重在順扶觀道·故法寶
結歸末位·次長跪叩云·

南無極樂世界·阿彌陀佛·無憂惱處·我當往生·不樂閻浮提·



濁惡世也。此濁惡處。地獄餓鬼畜生盈滿。多不善聚。願我未來
· 不聞惡聲。不見惡人。卽今向世尊。五體投地。求哀懺悔。我
等愚人。多造惡法。無有慚愧。毀犯五戒八戒。及具足戒。偷僧
祇物。現前僧物。不淨說法。以諸惡業。而自莊嚴。乃至五逆十
惡。具諸不善。應墮惡道。受苦無窮。卽唯願觀世音。及大勢至
· 以大悲音聲。為我廣說。諸法實相。除滅罪法。令我聞已。發
菩提心。應時即見。極樂世界。廣長之相。得見佛身。及二菩薩
· 豁然大悟。逮無生忍。臨命終時。卽阿彌陀佛。授手迎接。不
離金臺。徧十方界。於諸佛前。次第受記。還至本國。觀百寶蓮
· 廣為多眾。宣說佛語。僧那大悲。盡未來際。三說。次起云。
懺悔發願已。歸命禮三寶。

拜·次起·拈香執鑪·如三昧法·至心行道·想降蓮華·行池水面·舉足下足
·蓮華出沒·三像肩背·及天衣痕等·一一諦想·極令明了·稱云·



南無阿彌陀佛 南無觀世音菩薩 南無大勢至菩薩摩訶薩

七稱·或多稱·次誦雜觀章七徧·或多徧·次復如上三稱·想歸本位華上·結三歸·

自歸於佛·當願眾生·體解大道·發無上心。

自歸於法·當願眾生·深入經藏·智慧如海。

自歸於僧·當願眾生·統理大眾·一切無礙·和南聖眾。

次習坐·即觀立佛白毫·毫中空·周圍二寸五分·外八棱·右

旋宛轉在眉間·瑩淨明徹·顯映金顏·分齊分明·復想舒毫下

垂·長不及華臺一尺·顯映金軀·及與華足·耀琉璃水·照觸

自身·此觀久久堅住·或將前行儀·端坐想禮一徧亦妙·問·

所禮佛位·何故重繫·答·為鍊觀道·令開目閉目·了了現前


·當知習觀不出總別二法·初則總不如別·以總略別詳故·久

則別不如總·以別漸總頓故·問·入壇已白釋迦·懺時何又白



彌陀·答·欣厭綿切·方得往生。故意業白本師·又口業白導師·文以重而表專·能白之業·所白之佛·以不重而無過·問·何故亦觀白毫·答·勝劣兩觀·皆以白毫為初步。所以智者於勝相毫中·詳劣相毫狀·疏忽正在此章。後世慈雲懺主等·皆扶此觀·以妙契經旨故。又末世根鈍·雖劣觀或有難習之者·故將本觀事境·詳在行儀·令行者不覺其難·而自純熟。其白毫觀·以經中前文義通故·專令坐時修習。且恐不善觀白毫者·又令坐中默然想禮行儀。既甫行行儀·想禮尤易成就是法也·動靜綿拶·事理互研。儀觀等熏。通別巧鍛白毫為通·本觀為別·以斯應末世·庶可稱善順機宜也歟·其一心三觀·詳在妙宗·茲不贅。

觀無量壽佛經初心三昧門



受持佛說阿彌陀經行願儀

清古歛後學沙門成時依經錄輯

行者西向治室·稱阿彌陀佛出入·入時·想云·

「佛告舍利弗·聞是經受持者·及聞諸佛名者·皆為一切諸佛之所護念·皆得不退轉於阿耨多羅三藐三菩提·是故舍利弗·汝等皆當信受我語·及諸佛所說·」○想已·即對本師·導師·十方一切三寶·至心唱和云·

一切恭敬·一心頂禮·十方常住三寶。

想云·「三寶三德如虛空·眾生三障亦如是·是故平等普歸敬·願速同入法界海。」

○次起·主者白云·

是諸眾等·各各互跪·嚴持香華·如法供養·眾散華和云·供養十方法界

三寶。

執轡想·我此香華徧十方云云·想已·復云·

願此香花雲·徧滿十方界·供養一切佛·世間難信法·及諸上善人·普熏諸眾生·皆發菩提心。法寶·僧寶·語局義通·次起云·



供養已。一切恭敬。

拜。用前總觀偈。下讚歎懺悔三歸拜處。皆用上偈。次起置鐘讚云。

身光不思議。徧照於十方。無量光如來。西方大慈父。

壽命不思議。無邊阿僧祇。無量壽如來。西方大導師。

國土純清淨。功德所莊嚴。一切諸群生。悉登不退地。

十方恆沙佛。共讚於此邦。故我與眾生。願生極樂國。

拜。想已。次起拈香云。

一心頂禮。娑婆世界。五濁惡世。本師釋迦牟尼佛。

想身及眾生。業重生惡世。本師大慈。入惡世中。說難信之法。應極慙傷。感此恩德。

想云。「能禮所禮性空寂。感應道交難思議。我此道場如帝珠。

釋迦如來影現中。我身影現如來前。為求往生接足禮。」

一心頂禮。東方世界。阿閼鞞佛。須彌相佛。大須彌佛。須彌光

佛。妙音佛。如是等恆河沙數諸佛。

下偈皆同上。但逐位改名號。想諸佛出廣長舌。覆大千界。說誠實言。勸發往生。應極信受。不敢疑貳。下六拜。悉同。



一心頂禮·南方世界·日月燈佛·名聞光佛·大斂肩佛·須彌燈佛·無量精進佛·如是等恆河沙數諸佛。

一心頂禮·西方世界·無量壽佛·無量相佛·無量幢佛·大光佛·大明佛·寶相佛·淨光佛·如是等恆河沙數諸佛。

一心頂禮·北方世界·斂肩佛·最勝音佛·難沮佛·日生佛·網明佛·如是等恆河沙數諸佛。

一心頂禮·四維世界·最上廣大雲雷音王佛·最上日光名稱功德佛·無量功德火王光明佛·無數百千俱胝廣慧佛·如是等恆河

沙數諸佛。

略準唐譯及淨土
懺·總補一禮·

一心頂禮·下方世界·師子佛·名聞佛·名光佛·達磨佛·法幢佛·持法佛·如是等恆河沙數諸佛。

一心頂禮·上方世界·梵音佛·宿王佛·香上佛·香光佛·大斂肩佛·雜色寶華嚴身佛·娑羅樹王佛·寶華德佛·見一切義佛



· 如須彌山佛。如是等恆河沙數諸佛。

一心頂禮。西方極樂世界。清旦所供十萬億佛。及一切時中所供

十方三世一切諸佛。

想西方一切眾生。豎窮橫徧而作佛事。如是重重無盡功德。我皆隨喜。等修供養。次拈香云。

一心頂禮。西方極樂世界。壽命無量無邊阿僧祇劫。阿彌陀佛。

一往作即報即法之想。我及眾生。心性照而常寂。本與彌陀。契同一體。

一心頂禮。西方極樂世界。光明無量。照十方國。阿彌陀佛。

一往作即法即報之想。普與眾生。拔九界苦。得佛界樂。等蒙光照。

一心頂禮。西方極樂世界。臨命終時。現前導引。阿彌陀佛。

一往作即真即應之想。願一切處。乃至臨終。分明覩見。親聆法音。倍應雨淚哀切。又拈香云。

一心頂禮。佛說阿彌陀經。

此一切世間難信之法。今得信受。應極敬重。想云。「真空法性如虛空。常住法寶難思議。我皆影現法寶前。一心如法歸命禮。」○下二拜同。



一心頂禮·稱讚不可思議功德·一切諸佛所護念經。

一心頂禮·西方極樂世界·阿彌陀佛所說·及十方三世一切尊經

·想導師·本師·及諸
佛法寶·炳現道場·

一心頂禮·西方極樂世界·光明眾寶·無量真淨色塵。

應預觀成·令禮想時頓現·下五塵·皆阿彌陀佛從我淨心中變化所作·一一即
導師全體法性·想云·「如來法身如虛空·化事住世難思議·我皆影現化事前
·一心如法歸命禮·」○下四拜·偈同上·

一心頂禮·西方極樂世界·和雅微妙·無量真淨聲塵。

想天樂眾鳥·行樹羅網·無量妙音·及佛菩薩等·所有一切法音·悉現道場·

一心頂禮·西方極樂世界·身雲華雨·無量真淨香塵。

想依報正報·一切眾香·悉現道場·

一心頂禮·西方極樂世界·飯食禪法·無量真淨味塵。

想今道場·如在西方·飯食行坐·念佛念法念僧時·不異·



一心頂禮·西方極樂世界·德水微風·無量真淨觸塵。

想今道場·如在西方·澡浴經行·盛華衣食禪觸等時·不異·次拈香云·

一心頂禮·西方極樂世界·同佛授手·觀世音菩薩·大勢至菩薩
·及諸聖眾菩薩摩訶薩。

願一切時·及臨命終·分明覩見·

一心頂禮·西方極樂世界·諸上善人·一生補處菩薩摩訶薩。


想無量無邊阿僧祇等覺大士·同時安慰授手·

一心頂禮·西方極樂世界·無量無邊諸大菩薩摩訶薩。

一心頂禮·西方極樂世界·阿鞞跋致·同佛壽命·十方往生菩薩
摩訶薩。

一心頂禮·西方極樂世界·無量無邊聲聞弟子·諸大菩薩摩訶薩。

雖證小果·實似位菩薩·



一心頂禮。極樂世界。欄楯行樹中。諸菩薩摩訶薩。

想無量欄楯行樹。炳現道場。我同在其中。頂禮受法。已下悉同此意。

一心頂禮。極樂世界。寶池蓮華中。諸菩薩摩訶薩。

一心頂禮。極樂世界。階道樓閣中。諸菩薩摩訶薩。

一心頂禮。極樂世界。黃金地上。娛天華樂。諸菩薩摩訶薩。

一心頂禮。極樂世界。盛眾妙華。廣修佛事。諸菩薩摩訶薩。

一心頂禮。極樂世界。飯食經行。諸菩薩摩訶薩。

一心頂禮。極樂世界。聞音正念。諸菩薩摩訶薩。

一心頂禮。極樂世界。無有眾苦。但受諸樂。一切菩薩摩訶薩。

一心頂禮。文殊師利法王子。阿逸多菩薩。乾陀訶提菩薩。常精

進菩薩。如是等諸大菩薩。及十方三世一切菩薩摩訶薩。

諸菩薩同受佛語。同生西方。同垂接引。下同。

一心頂禮。舍利弗尊者。迦葉尊者。阿難陀尊者。如是等諸大弟




子·及十方三世一切聖僧。

想偈已·復想云·「我及眾生·無始常為三業六根重罪所障·不見諸佛·不知出要·但順生死·不知妙理·我今雖知·猶與一切眾生·同為一切重罪所障·今對彌陀·十方佛前·普為眾生·歸命懺悔·唯願加護·令障消滅·」○想已·跪云·

普為法界·一切眾生·悉願斷除三障·歸命懺悔。

叩·想云·「我與眾生·無始來今·由愛見故·內計我人·外加惡友·不隨喜他一毫之善·唯徧三業·廣造眾罪·事雖不廣·惡心徧布·晝夜相續·無有間斷·覆諱過失·不欲人知·不畏惡道·無慚無愧·撥無因果·故於今日·深信因果·生重慚愧·生大怖畏·發露懺悔·斷相續心·發菩提心·斷惡修善·勤策三業·翻昔重過·隨喜凡聖一毫之善·念十方佛·有大福慧·能救拔我·及諸眾生·從二死海·置三德岸·從無始來·不知諸法本性空寂·廣造眾惡·今知空寂·為求菩提·為眾生故·廣修諸善·徧斷眾惡·唯願十方諸佛·彌陀世尊·慈悲攝受·聽我懺悔·」想已·仍跪於地·復叩云·



◎慈雲小懺文

至心懺悔懺悔之辭經無明文可採故敬用慈雲小懺文。我弟子某甲。及法界眾生。從無始世來。無明所覆。顛

倒迷惑。而由六根三業。習不善法。廣造十惡。及五無間。一切

眾罪。無量無邊。說不可盡。十方諸佛。常在世間。依正莊嚴增四字顯。

法音不絕色塵故。妙香充塞。法味盈空。放淨光明。照觸一切。常住妙

理。徧滿虛空。我無始來。六根內盲。三業昏闇。不見不聞。不

覺不知。以是因緣。長流生死。經歷惡道。百千萬劫。永無出期

。經云。毗盧遮那。徧一切處。其佛所住。名常寂光。是故當知

。一切諸法。無非佛法。而我不了。隨無明流。是則於菩提中。

見不清淨。於解脫中。而起纏縛。今始覺悟。今始改悔。奉對叩

諸佛。彌陀世尊。發露懺悔。當令我與法界眾生。三業六根。無

始所作。現作當作。自作教他。見聞隨喜。若憶不憶。若識不識



·若疑不疑·若覆若露·一切重罪·畢竟清淨·我懺悔已·六根
三業·淨無瑕累·所修善根·悉亦清淨·皆悉迴向·莊嚴淨土·
普與眾生·同生安養·叩願阿彌陀佛·常來護持·令我善根·現
前增進·不失淨因·臨命終時·身心正念·視聽分明·叩面奉彌
陀·與諸聖眾·手執華臺·接引於我·一剎那頃·生在佛前·具
菩薩道·廣度眾生·同成種智。
懺悔發願已·歸命禮阿彌陀佛·及一切三寶。

應三說·次
起唱和云·

想導師處中·為我作懺悔主·一切三寶·同為證明·想偈已·次起立執鑪·想
上三寶罌塞道場·我身語意·如影響鼓·若一若多·無雜無障·旋繞法座·安
詳而轉·稱云·

南無十方佛


悉稱讚淨
土者·

南無十方

一切世間難信之法·即法界海·十方
法門·無不從此法界流·無不還歸此法界·

南無十方僧

此土西方·十方一切僧
寶·悉趨向淨土者·



南無本師釋迦牟尼佛

南無極樂世界阿彌陀佛

南無一切諸佛所護念經

南無觀世音菩薩

南無大勢至菩薩摩訶薩

三稱。誦彌陀經。誦畢復三稱。稱誦時。隨文入觀。歷歷分明。然名句文。猶空鳥迹。不可思議。故能徧十方界而作佛事。次歸位置鐘云。

自歸於佛。當願眾生。體解大道。發無上心。

自歸於法。當願眾生。深入經藏。智慧如海。

自歸於僧。當願眾生。統理大眾。一切無礙。和南聖眾。

次別處西向。如法端坐。執持名號。一心不亂。其觀道。略引要解於下。

經云。不可以少善根福德因緣。得生彼國。

菩提正道名善根。即親因。種種道。施戒禪等名福德。即助緣。聲聞

獨覺菩提。名少善根。人天有漏福業。名少福德。唯以信願持名。則一一聲悉具多善因福緣也。

若有善男子善女人。聞說阿彌

陀佛

聞慧

。執持名號

思慧

。若一日。若二日。若三日。若四日。若

五日。若六日。若七日。一心不亂

修慧

。其人臨命終時。阿彌陀



佛與諸聖眾。現在其前。是人終時。心不顛倒。即得往生阿彌

陀佛極樂國土。要解云。阿彌陀佛。是萬德洪名。以名召德。

不可忽過

罄無不盡。故即以執持名號為正行。不必更涉觀想參究等行。

確極不可違

至簡易。至直捷也。聞而信。信而願。乃肯執持。不信不願。

與不聞等。雖為遠因。不名聞慧。執持。則念念憶佛名號。故

是思慧。然有事持理持。事持者。信有西方阿彌陀佛。而未達

是心作佛。是心是佛。但以決志願求生故。如子憶母。無時暫

忘。理持者。信西方阿彌陀佛。是我心具。是我心造。即以自

心所具所造洪名為繫心之境。令不暫忘也。利根一日。鈍根七

日。中根二三四五六日。而得不亂。

此初學要期法。亦是隨樂剋期之法。


。又利根七日。

鈍根一日。中根六五四三二日。而能不亂。

此久學練習法。上二種。若七日未辦。乃至多七。一一七中。咸分利

鈍。此長期剋辦之法。。一心亦二種。不論事持理持。持至伏除煩惱。乃至見

思先盡。皆事一心。又不論事持理持。持至心開見本性佛。皆



理一心

一心是所顯·非所生·蓋不論雜亂垢心·從來是一心·本不可亂·但迷強不顯耳·

·事一心不為見思所亂·理一

心不為二邊所亂·即修慧也。不為見思亂·故感變化身佛及諸

聖眾現前。心不復起娑婆界中三有顛倒·往生同居方便二種極

樂世界。不為二邊亂·故感受用身佛及諸聖眾現前。心不復起

生死涅槃二見顛倒·往生實報寂光二種極樂世界。當知執持名

號·既簡易直捷·仍至頓至圓·以念念圓極語即佛故·不勞觀想·不

必參究·當下圓明·無餘無欠·上上根不能踰其闕·下下根亦念念

可臻其闕·即佛故可謂橫該八教·豎徹五時·所以徹底悲心·無問自

說·且深歎其難信也·蓋所持之名號·即我心性真實不可思議·能持之

心性·亦真實不可思議·持一聲·一聲不可思議·持十百千萬

無量無數聲·即佛聲聲皆不可思議也·餘如要解所明·須悉研之。

受持佛說阿彌陀經行願儀



一一行合跋

余向於觀經妙典。蘊四疑焉。機收三輩九品。逆惡不遮。而境細觀深。唯收勝種。一疑也。經既有先當觀之觀文。解亦判為初入門之要術。而觀道卻在第十有三。二疑也。利人日觀成就。僅齊下品下生。亦是凡夫。諸觀中細境廣高。凡夫如何注想。三疑也。利人已成十二勝想。復令作於雜想。何異壓良為賤。雖為曲解。終未恰然。且本觀經文。何又專屬心劣凡夫。四疑也。堅師初門一出。頓釋四疑。而修此初門。勝觀決可成就。然後妙典。不付空言。如昏夜中。落日重出。興成破闇。有大功勳。至於彌陀行儀。只就小本具足若觀若行。隨文入觀。是真受持。隨觀歸誠。是真信受。述而不作。厥旨愈彰。末世弘經。罕有其匹。因手錄二行。為跋其後云。戊申夏。同邑弟子胡淨睿謹識。

淨土十要第三



附錄

檀庵法師臨行自錄

吾聞西方有無上正徧知。壽命無量阿僧祇。光明徧照沙界兮無邊際。慈悲普覆群生兮無盡期。聞名稱念者皆不退轉。歸命發願者眾苦皆脫離。黃金為地或琉璃。晝夜六時天華飛。樓閣幢幡千萬兮徧空界。寶林珠網音樂兮微風吹。莊嚴美妙不思議。土無日月常光輝。是故繫念者神魂西馳。父母之邦兮常思歸。性無苦域兮今順性而捨其。性有樂邦兮今順性而取之。去去。過十萬億佛土不是遠路歧。內憑願力。外仗佛威。一剎那間便到七寶蓮池。

淨土十要



明・蕩益大師選定

淨土十疑論

淨土十要
(四)



靈峯蕩益大師選定淨土十要第四

述曰。列次淨土十要。以教經居初。以行經居次二。次三。皆尊經以明道也。若夫作論通經。闡揚淨土。則當以天台智者大師十疑論。奉為頌弁。厥義有三。一智者乃釋迦後身。人是大聖故。二陳隋之世。接踵遠祖。時亦在先故。三此十問答。統淨宗一切疑問。振菩提大道之綱。斷疑生信。厥功最巨故。雖後世種種異見。像季未生。其間破立。未能盡應末法邪僻之病。而綱宗所被。何疑不遣。故次教行二經。列當論部之首。



淨土十疑論序

宗無爲子楊傑述

愛不重不生娑婆。念不一不生極樂。娑婆穢土也。極樂淨土也。

娑婆之壽有量。彼土之壽則無量矣。娑婆備諸苦。彼土則安養無

苦矣。娑婆隨業輪轉生死。彼土一往則永證無生法忍。若願度生

。則任意自在。不為諸業縛矣。其淨穢。壽量。苦樂。生死。如

是差別。而眾生冥然不知。可不哀哉。阿彌陀佛。淨土攝受之主

也。釋迦如來。指導淨土之師也。觀音勢至。助佛揚化者也。是

以如來一代教典。處處叮嚀勸往生也。阿彌陀佛與觀音勢至。乘

大願船。泛生死海。不著此岸。不留彼岸。不止中流。唯以濟度

為佛事。是故阿彌陀經云。若有善男子善女人。聞說阿彌陀佛。

執持名號。若一日。乃至若七日。一心不亂。其人臨命終時。阿

彌陀佛與諸聖眾。現在其前。是人終時。心不顛倒。即得往生極



樂國土。又經云。十方眾生聞我名號。憶念我國。植諸德本。至心迴向。欲生我國。不果遂者。不取正覺。所以祇桓精舍無常院。令病者面西。作往生淨土想。蓋彌陀光明。徧照法界念佛眾生。攝受不捨。聖凡一體。機感相應。諸佛心內眾生。塵塵極樂。眾生心中淨土。念念彌陀。指上三無差吾以是觀之。智慧者易生。以此句為首領能斷疑故。禪定者易生。不散亂故。持戒者易生。遠諸染故。布施者易生。不我有故。忍辱者易生。不瞋恚故。此上約具眾善而言精進者易生。不退轉故。不造善不作惡者易生。念能一故。諸惡已作業報已現者易生。實慚懼故。此承上不造善二段反顯雖有眾善。若無誠信心無深心無迴向發願心者。則不得上上品生矣。噫。彌陀佛說甚難甚易持。正欲明其甚易淨土甚易往。眾生不能持。不能往。佛如眾生何。夫造惡業。入苦趣。念彌陀。生極樂。二者皆佛言也。世人憂墮地獄而疑往生者。不亦惑哉。晉慧遠法師與當時高士劉遺民等。結白蓮社於廬山。總結三心三無差蓋致精誠於此爾。其後七百



年·僧俗修持·獲感應者非一。咸見於淨土傳記·豈誣也哉·然贊輔彌陀教觀者·其書山積·唯天台智者大師淨土十疑論·最為首冠。援引聖言·開決群惑·萬年闇室·日至而頓有餘光。千里水程·舟具而不勞自力。非法藏後身·不能至於是也。傑頃於都下·嘗獲斯文·讀示所知·無不生信。自遭酷罰·感悟益深。將廣其傳·因為序引。



淨土十疑論

隋天台智者大師說


第一疑

問·諸佛菩薩以大悲為業·若欲救度眾生·祇應願生欲速反遲三界·又云於五恰是濁三途中救苦眾生·因何求生淨土·自安其生·捨離眾生·則是無大慈悲·專為自利·障菩提道。

答·菩薩有二種·一者·久修行菩薩道·得無生忍者·實當所責。二者·未得已還·及初發心凡夫·凡夫菩薩者·要須常不離佛。忍力成就·方堪處三界內。於惡世中·救苦眾生。故智度論云·具縛凡夫·有大悲心·願生惡世·救苦眾生者·無有是處。何以故·惡世界·煩惱強·自無忍力·心隨境轉·聲色所縛·自墮三途·焉能救眾生。假令得生人中·聖道難得。或因施戒修福·



得生人中。得作國王大臣。富貴自在。縱遇善知識。不肯信用。貪迷放逸。廣造眾罪。乘此惡業。一入三途。經無量劫。從地獄出。受貧賤身。若不逢善知識。還墮地獄。如此輪迴。邊城霜月聽胡笳至於今日。人人皆如是。此名難行道也。故維摩經云。自疾不能救。而能救諸疾人。又智度論云。譬如二人。各有親眷為水所溺。一人情急。直入水救。為無方便力故。彼此俱沒。一人有方便。往取船筏。乘之救接。悉皆得脫水溺之難。新發意菩薩。亦復如是。如是未得忍力。不能救眾生。為此常須近佛。得無生忍已。方能救眾生。如得船者。又論云。譬如嬰兒。不得離母。若也離母。或墮坑井。渴乳而死。又如鳥子。翅羽未成。祇得依樹傳枝。不能遠去。翅翮成就。方能飛空。自在無礙。凡夫無力。唯得專念阿彌陀佛。使成三昧。以業成故。臨終斂念得生。決定不疑。見彌陀佛。證無生忍已。還來三界。乘無生忍船。救苦眾生。廣施佛



事。任意自在。故論云。遊戲地獄行者。生彼國得無生忍已。還入生死國。教化地獄受苦眾生。以是因緣。求生淨土。願識其教。故十住婆沙論名易行道也。

第二疑

問。諸法體空。本來無生。廉語又云恰是平等寂滅。今乃捨此求彼。生西方彌陀淨土。豈不乖理哉。又經云。若求淨土。先淨其心。心淨故。即佛土淨。此云何通。

答。釋有二義。一者總答。二者別答。總答者。汝若言求生西方彌陀淨土。則是捨此求彼。不中理者。汝執住此不求西方。則是捨彼著此。此還成病。不中理也。又轉計云。我亦不求生彼。亦不求生此者。則斷滅見。故金剛般若經云。須菩提。汝若作是念。發阿耨菩提者。說諸法斷滅相。莫作是念。何以故。發菩提心



者。於法不說斷滅相。二別答者。夫不生不滅者。於生緣中。諸法和合。不守自性。求於生體。亦不可得。此生生時。無所從來。故名不生。不滅者。諸法散時。不守自性。言我散滅。此散滅時。去無所至。故言不滅。非謂因緣生外。別有不生不滅。亦非不求生淨土。喚作無生。為此中論偈云。因緣所生法。我說即是空。亦名為假名。亦名中道義。又云。諸法不自生。亦不從他生。不共不無因。是故知無生。又維摩經云。雖知諸佛國。及與眾生空。而常修淨土。教化諸群生。又云。譬如有人造立宮室。若依空地。隨意無礙。若依虛空。終不能成。諸佛說法。常依二諦。不壞假名。而說諸法實相。智者熾然求生淨土。達生體不可得。即是真無生。此謂心淨故。即佛土淨。愚者為生所縛。聞生即作生解。聞無生即作無生解。不知生即是無生。無生即是生。不達此理。橫相是非。瞋他求生淨土。幾許誤哉。此則是謗法罪人

前聖定論如此



· 邪見外道也。

第三疑

問· 十方諸佛一切淨土· 法性平等· 功德亦等· 行者普念一切功德· 生^龍一切淨土。何又云恰是今乃偏求一佛淨土· 與平等性乖· 云何生淨土。

答· 一切諸佛土· 實皆平等· 但眾生根鈍· 濁亂者多· 若不專繫一心一境· 三昧難成· 專念阿彌陀佛· 即是一相三昧· 以心專至· 得生彼國· 如隨願往生經云· 普廣菩薩問佛· 十方悉有淨土· 世尊何故偏讚西方彌陀淨土· 專念往生· 佛告普廣· 閻浮提眾生· 心多濁亂· 為此偏讚西方一佛淨土· 使諸眾生專心一境· 即易得往生· 若總念一切佛者· 念佛境寬· 則心散漫· 三昧難成· 故不得往生· 又求一佛功德· 與一切佛功德無異· 以同一佛法性故· 為此念阿彌陀佛· 即念一切佛· 生一淨土· 即生一切淨土· 故



華嚴經云。一切諸佛身。即是一佛身。一心一智慧。力無畏亦然。又云。譬如淨滿月。普應一切水。影像雖無量。本月未曾二。如是無礙智。成就等正覺。應現一切刹。佛身無有二。智者以譬喻得解。智者若能達一切月影即一月影。一月影即一切月影。月影無二故。一佛即一切佛。一切佛即一佛。法身無二故。熾然念一佛時。即是念一切佛也。

第四疑

問。等是念求生一佛淨土。何不十方佛土中。隨念一佛淨土。隨得往生。何須偏念彌陀佛耶。

答。凡夫無智。不敢自專。專用佛語。故能偏念阿彌陀佛。云何用佛語。釋迦大師一代說法。處處此通義聖教。唯勸眾生專心偏念阿彌陀佛。求生西方極樂世界如無量壽經。觀經。往生論等。數十餘



部經論文等。殷勤指授勸生西方。故偏念也。又彌陀佛別有大悲已上舉教。四十八願。接引眾生。又觀經云。阿彌陀佛有八萬四千相。一一相有八萬四千好。一一好放八萬四千光明。徧照法界念佛眾生。攝取不捨。若有念者。機感相應。決定得生。又阿彌陀經。大無量壽經。鼓音王陀羅尼經等云。釋迦佛說經時。皆有十方恆沙諸佛。舒其舌相。徧覆三千大千世界。證成一切眾生念阿彌陀佛。乘佛大悲本願力故。決定得生極樂世界。當知阿彌陀佛。與此世此通義界。偏有因緣。何以得知。無量壽經云。末世法滅之時。特駐此經百年在世。接引眾生。往生彼國。故知阿彌陀佛。與此世界極此別義惡眾生。偏有因緣。其餘諸佛一切淨土。雖一經兩經略勸往生。不如彌陀佛國。處處經論。殷勤叮嚀勸往生也。結因緣於聖教



第五疑

問·具縛凡夫·惡業厚重·一切煩惱·一毫未斷。西方淨土出過三界·具縛凡夫云何得生。

答·有二種緣·一者自力·二者他力·自力者·此世界修道·實未得生淨土。是故瓔珞經云·始從具縛凡夫未識三寶·不知善惡因之與果。初發菩提心·以信為本·住在佛家·以戒為本·受菩薩戒·身身相續·戒行不闕·經一劫二劫三劫·始至初發心住·如是修行十信十波羅蜜等·無量行願·相續無間·滿一萬劫·方始至第六正心住·若更增進至第七不退住·即種性位。此約自力·卒未得生淨土。他力者·若信阿彌陀佛大悲願力·攝取念佛眾生·即能發菩提心·行念佛三昧。厭離三界身·起行施戒修福·於一一行中·迴願生彼彌陀淨土。乘佛願力·機感相應·即得往



生。是故十住婆沙論云。於此世界修道。有二種。一者難行道。二者易行道。難行者。在於五濁惡世。於無量佛時求阿鞞跋致。甚難可得。此難無數塵沙。說不可盡。略陳有五。一者。外道邪種相善。亂菩薩法。二者。無賴三惡種惡人。破他勝德。三者。顛倒三善種善果。能壞梵行。四者。聲聞小乘種自利。障於大慈。五者。唯有指大乘自力。無他修餘法力持。譬如跛人步行。一日不過數里。極大辛苦。謂自力也。易行道者。謂信佛語。教念佛三昧行。願生淨土。乘彌陀佛願力攝持。決定往生不疑也。如人水路行藉船力。故須臾即至千里。謂他力也。譬如劣夫從轉輪王。一日一夜周行四天下。非是自力。轉輪王力也。若言有漏凡夫不得生淨土者。亦可有漏以正例依凡夫應不得見佛身。然念佛三昧。並無漏善根所起。有漏凡夫。隨分得見佛身麤相也。菩薩見微細相。淨土亦爾。雖是無漏善根所起。有漏凡夫發無上信願菩提心。求生淨土。常念佛故行。伏滅煩惱。得生淨土。



隨分得見麤相。謂依報菩薩見微妙相。此何所疑。故華嚴經說。一切諸佛刹。平等普嚴淨。眾生業行異。所見各不同。即其義也。

第六疑


問。設令具縛凡夫。得生彼國。邪見三毒等常起。錯云何得生彼國。即得不退。超過三界。

答。得生彼國。有五因緣不退。云何為五。一者。阿彌陀佛大悲願力攝持。故得不退。二者。佛光常照。故菩提心常增進不退。

三者。水鳥樹林風聲樂響。皆說苦空。聞者常起念佛念法念僧之心。故不退。淨宗殊勝全由念佛伏惑力深能圓淨四土圓證三不退四者。彼國純諸菩薩以為良友。無惡緣境。邪歸外無神

受薰見薰鬼魔邪。內無三毒等。煩惱畢竟不起。故不退。五者。生彼國即

壽命永劫。共菩薩佛齊等。故不退也。在此惡世。日月短促。經彼土阿僧祇劫。復不起煩惱。長時修道。云何不得無生忍也。此理顯



然·不須疑也。

第七疑

問·彌勒菩薩·一生補處·即得成佛·上品十善·得生彼處·見彌勒菩薩·隨從下生·三會之中·自然而得聖果·何須求生西方淨土耶。

答·求生兜率·亦曰聞道見佛·勢欲相似·若細比較·大有優劣·且論二種·一者·縱持十善·恐不得生·何以得知·彌勒上生經云·行眾三昧·深入正定·方始得生·更無方便接引之義·不如阿彌陀佛本願力·光明力·但有念佛眾生·攝取不捨·又釋迦佛說九品教門·方便接引·殷勤發遣·生彼淨土·但眾生能念彌陀佛者·機感相應·必得生也·如世間慕人·能受慕者機會相投·必成其事·二者·兜率天宮是欲界·退位者多·無有水鳥樹林



。風聲樂響。眾生聞者。悉念佛發菩提心。伏滅煩惱。又有女人。皆長諸天愛著五欲之心。又天女微妙。諸天耽玩。不能自勉。不如彌陀淨土。水鳥樹林。風聲樂響。眾生聞者。皆生念佛發菩提心。伏滅煩惱。又無女人二乘之心。純一大乘清淨良伴。為此煩惱惡業畢竟不起。遂至無生之位。如此比較。優劣顯然。何須致疑也。如釋迦佛在世之時。大有眾生見佛不得聖果者。如恆沙。彌勒出世亦爾。大有不得聖果者。未如彌陀淨土。但生彼國已。悉得無生法忍。未有一人退落三界。為生死業縛也。又聞西國傳云。有三菩薩。一名無著。二名世親。三名師子覺。此三人契志同生兜率。願見彌勒。若先亡者。得見彌勒。誓來相報。師子覺前亡。一去數年不來。後世親無常。臨終之時。無著語云。汝見彌勒。即來相報。世親去已。三年始來。無著問曰。何意如許多時始來。世親報云。至彼天中。聽彌勒菩薩一座說法。旋繞即



來相報。為彼天日長。故此處已經三年。又問。師子覺今在何處。世親報云。師子覺為受天樂。五欲自娛。在外眷屬。從去已來。總不見彌勒。諸小菩薩生彼。尚著五欲。何況凡夫。為此願生西方。定得不退。不求生兜率也。

第八疑

問。眾生無始以來。造無量業。今生一形不逢善知識。又復作一切罪業。無惡不造。云何臨終十念成就。即得往生。出過三界結業之事。云何可通。

答。眾生無始以來。善惡業種多少強弱。並不得知。但能臨終遇善知識。十念成就者。皆是宿善業強。始得遇善知識。十念成就。若惡業多者。善知識尚不可逢。何可論十念成就。又汝以無始以來惡業為重。臨終十念為輕者。此三段發明念佛三昧深切著今以道理三種較量。輕重不定。



明真大法鼓也不在時節久近多少。云何為三。一者在心。二者在緣。三者在決定。在心者。造罪之時。從自虛妄顛倒生。念佛者。從善知識由實境而生實心即始覺也。聞說阿彌陀佛真實功德名號生。一虛一實。豈得相比。譬如萬年閻室。剎心日光暫至。而閻頓滅。豈以久來之閻。不肯滅耶。在緣者。造罪之時。從虛妄癡闇心。緣虛妄境界顛倒生。念佛之心。從聞佛清淨真實功德名號。緣無上菩提心生。一真一偽。豈得相比。譬如有人被毒箭中。箭深毒慘。傷肌破骨。喻妄境一聞滅除藥鼓。即箭出毒除。豈以箭深毒慘而不肯出也。在決定者。造罪之時。以有間心。有後心也。念佛之時。以無間心。無後心。遂即捨命。善心猛利。是以即生。譬如十圍之索。千夫不制。童子揮劍。須臾兩分。又如千年積柴。以一豆火焚。少時即盡。又如有人。一生以來。修十善業。應得生天。臨終之時。起一念決定邪見。即墮阿鼻地獄。惡業虛妄。以猛利故。尚能排一生之善業。令墮



惡道。豈況臨終猛心念佛。真實無間善業。不能排無始惡業。得生淨土。無有是處。又云。一念念佛。滅八十億劫生死之罪。為念佛時心真指訣猛利故。伏滅惡業。決定得生。不須疑也。上古相傳。判十念成就作別時謂夙世意者。此定不可。何以得知。攝論云。由唯發願故。全無有行。雜集論云。若願生安樂國土即得往生。若聞無垢佛名即得阿耨菩提者。並是別時之因。全無有行。若將臨終無間十念猛利善行是別時意者。幾許誤哉。願諸行者深思此理。自牢其心。莫信異見。自墜陷也。

第九疑

問。西方去此十萬億佛剎。凡夫劣弱。云何可到。又往生論云。女人及根缺。二乘種不生。既有此教。當知女人及以根缺者。必定不得往生。



答·為對凡夫肉眼生死心量說耳·西方去此十萬億佛剎·但使眾生淨土業成者·遠祇在自心遠即非遠臨終在定之心·即是淨土受生之心·動念即是生淨土時·為此·觀經云·彌陀佛國·去此不遠·又業力不可思議·一念即得生彼·不須愁遠·又如人夢·身雖在牀·而心意識·徧至他方一切世界·如平生不異也·生淨土亦爾·動念即至·不須疑也·女人及根缺·二乘種不生者·但論生彼國無女人·及無盲聾瘖瘂人·不道此間女人根缺人不得生彼·若如此說者·愚癡全不識經意·即如韋提夫人·是請生淨土主·及五百侍女·佛授記悉得往生彼國·但此處女人·及盲聾瘖瘂人·心念彌陀佛·悉生彼國已·更不受女身·亦不受根缺身·二乘人但迴心願生淨土·至彼更無二乘執心·為此故云·女人及根缺·二乘種不生·非謂此處女人·及根缺人·不得生也·故無量壽經四十八願云·設我得佛·十方世界一切女人·稱我名號·厭惡女身·捨命之後·



更受女身者。不取正覺。況生彼國。更受女身。根缺者亦爾。

第十疑


問。今欲決定求生西方。末後方為正問未知作何行業。以何為種子。得生彼國。

。又凡夫俗人皆有妻子。未知不斷淫欲。得生彼否。

答。欲決定生西方者。具有二種行。定得生彼。一者厭離行。二者欣願行。言厭離行者。凡夫無始已來。為五欲纏縛。輪迴五道。備受眾苦。不起心厭離五欲。未有出期。為此常觀此身。膿血屎尿。一切惡露。不淨臭穢。故涅槃經云。如是身城。愚癡羅剎。止住其中。誰有智者。當樂此身。又經云。此身眾苦所集。一切皆不淨。扼縛癰瘡等。根本無義利。上至諸天身。皆亦如是。行者若行若坐。若睡若覺。常觀此身。唯苦無樂。深生厭離。縱使妻房不能頓斷。漸漸生厭。作七種不淨觀。一者觀此淫欲身。



從貪愛煩惱生。即是種子不淨。二者父母交會之時。赤白和合。即是受生不淨。三者母胎中在生臟下居熟臟上。即是住處不淨。四者在母胎時。唯食母血。即是食噉不淨。五者日月滿足。頭向產門。膿血俱出。臭穢狼藉。即是初生不淨。六者薄皮覆上。其內膿血徧一切處。即是舉體不淨。七者乃至死後降脹爛壞。骨肉縱橫。狐狼食噉。即是究竟不淨。自身既爾。他身亦然。所愛境界。男女身等。深生厭離。常觀不淨。若能如此觀身不淨之者。淫欲煩惱。漸漸減少。又作十想等觀。廣如經說。又發願。願我永離三界雜食臭穢膿血不淨耽荒五欲男女等身。願得淨土法性生身。此為厭離行。二明欣願行者。復有二種。一者先明求往生之意。二者觀彼淨土莊嚴等事。欣心願求。明往生意者。所以求生淨土。為欲救拔一切眾生苦故。即自思忖。我今無力。若在惡世。煩惱境強。自為業縛。淪溺三途。動經劫數。如此輪轉。無始



已來。未曾休息。何時能得救苦眾生。為此求生淨土。親近諸佛。痛哉

· 若證無生忍。方能於惡世中救苦眾生。故往生論云。言發菩提心者。正是願作佛心。願作佛心者。則是度眾生心。法界實理

· 則是攝眾生生佛國心。又願生淨土。須具二行。一者必須遠離實事此句方無戲論

三種障菩提門法。二者須得三種順菩提門法。何者為遠離三種障菩提法。一者依智慧門。不求自樂。遠離我心貪著自身故。二者依慈悲門。拔一切眾生苦。遠離無安眾生心故。三者依方便門。當憐憫一切眾生。欲與其樂。遠離恭敬供養自身心故。若能遠三種菩提障。則得三種順菩提法。一者無染清淨心。不為自身求諸樂故。菩提是無染清淨處。若為自身求樂。即染身心障菩提門。是故無染清淨心。是順菩提門。二者安清淨心。為拔眾生苦故。菩提心是安隱一切眾生清淨處。若不作心拔一切眾生。令離生死苦。即違菩提門。是故安清淨心是順菩提門。三者樂清淨心。欲令



一切眾生得大菩提涅槃故。菩提涅槃是畢竟常樂處。若不作心令一切眾生得畢竟常樂。即遮菩提門。此菩提因何而得。要因生淨設無土。常此法則一切不離佛。得都無實義無生忍已。於生死國中。救苦眾生。悲智內融。定而常用。自在無礙。即菩提心。此是願生之意。二明欣心願求者。希心起想。緣彌陀佛。若法身。若報身等。金色光明。八萬四千相。一一相中八萬四千好。一一好放八萬四千光明。常照法界。攝取念佛眾生。又觀彼淨土七寶莊嚴妙樂等。備如無量壽經觀經十六觀等。常行念佛三昧。及施戒修等一切善行。悉以迴施一切眾生。同生彼國。決定得生。此謂欣願門也。

淨土十疑論



後序

宗左宣義郎陳確述

人心無常。法亦無定。心法萬差。機感不一其本在此。信此則徧信。華嚴所以說十信。疑此則徧疑。智者所以說十疑。出疑入信。一入永入。了百當之法不離於此。得究竟處。淨土者。究竟處也。此處有說法之主。名無量壽。此佛說法。未嘗間斷。疑障其耳。則聾而不聞。疑障其心。則昧而不覺。不聞不覺。安住惡習。讚歎不念。隨喜通病心。妄指蓮胞。以為虛誕。終不自念此分段身。從何而得。自何而來。胎獄穢濁。真實安在。信憑苦苦業識。自隔真際於一幻境。非彼執此。生生不靈。永絕聖路。以如是故。釋迦如來起大慈愍。於穢濁中。發大音聲。讚彼淨土上妙之樂。於生死中。為大船師。載以法船。令趨彼岸。晝夜度生。無有休息。然而彌陀之岸。本無彼此。釋迦之船。實非往來。譬如一燈。分照八鏡。鏡有東



西·光影無二·彌陀說法·徧光影中·而釋迦方便·獨指西鏡·故已到彼岸者·乃可以忘彼此。未入法界者·何自而泯東西·於此法中·若未究竟·勿滯方隅·勿分彼此·但當正念諦信而已·此二聖之意·而智者之所以信也·信者萬善之母·疑者眾惡之根·能順其母·能鋤其根·則向之所謂障緣眾生·聾可復聞·昧可復覺·未出生死·得出生死·未生淨土·得生淨土·順釋迦之誨·往面彌陀·隨彌陀之願·來助釋迦·在此而徧歷十方·即西而普入諸鏡·自二聖建立以來·如是之人·如河沙數·云何不信·云何而疑·能自信已·又作方便·令諸未信無不信者·此則智者之所以為悲也·明智大師中立·學智者之道·不順其文·而順其悲·所以又印此論·冠以次公之序·予乃申廣其說·以助其傳·



附錄 (四篇)

唐五臺山竹林寺法照傳

釋法照·不知何許人也。大曆二年·棲止衡州雲峯寺·勤修不懈。於僧堂內粥鉢中·忽睹五彩祥雲·雲內現山寺。寺之東北五十里已來·有山。山下有澗。澗北有石門。入可五里·有寺·金榜題云·大聖竹林寺。雖目擊分明·而心懷隕穫。他日齋時·還於鉢中五色雲內·現其五臺諸寺。盡是金地·無有山林穢惡·純是池臺樓觀·眾寶莊嚴。文殊一萬聖眾而處其中。又現諸佛淨國。食畢方滅。心疑未決·歸院問僧·還有曾遊五臺山已否。時有嘉延曇暉二師言曾到。言與鉢內所見·一皆符合。然尚未得臺山消息。暨四年夏·於衡州湖東寺內有高樓臺。



九旬起五會念佛道場。六月二日未時。遙見祥雲彌覆臺寺。雲中有諸樓閣。閣中有數梵僧。各長丈許。執錫行道。衡州舉郭咸見彌陀佛。與文殊普賢一萬菩薩。俱在此會。其身高大。見之者皆深泣血設禮。至西方滅。照其日晚。於道場外。遇一老人告照云。師先發願往金色世界。奉觀大聖。今何不去。照怪而答曰。時難路艱。何可往也。老人言。但亟去。道路固無留難。言訖不見。照驚入道場。重發誠願。夏滿約前往。任是火聚冰河。終無退衄。至八月十三日。於南嶽與同志數人。惠然肯來。果無沮礙。則五年四月五日到五臺縣。遙見佛光寺南。數道白光。六日到佛光寺。果如鉢中所見。略無差脫。其夜四更。見一道光。從北山下來射照。照忙入堂內。乃問眾云。此何祥也。吉凶焉在。有僧答言。此大聖不思議光。常答有緣。照聞已。即具威儀。尋光至寺東北五十里間。果有山。山下有



澗。澗北有一石門。見二青衣。可年八九歲。顏貌端正。立於門首。一稱善財。二曰難陀。相見歡喜。問訊設禮。引照入門。向北行五里已來。見一金門樓。漸至門所。乃是一寺。寺前有大金榜題曰。大聖竹林寺。一如鉢中所見者。方圓可二十里。一百二十院。皆有寶塔莊嚴。其地純是黃金。流渠華樹。充滿其中。照入寺。至講堂中。見文殊在西。普賢在東。各據師子之座。說法之音。歷歷可聽。文殊左右菩薩萬餘。普賢亦無數菩薩圍繞。照至二聖前作禮問言。末代凡夫。去聖時遙。知識轉劣。垢障尤深。佛性無由顯現。佛法浩瀚。未審修行於何法門。最為其要。唯願大聖。斷我疑網。文殊報言。汝今念佛。今正是時。諸修行門。無過念佛。供養三寶。福慧雙修。此之二門。最為徑要。所以者何。我於過去劫中。因觀佛故。因念佛故。因供養故。今得一切種智。是故一切諸法。般若波羅



蜜。甚深禪定。乃至諸佛。皆從念佛而生。故知念佛。諸法之王。汝當常念無上法王。令無休息。照又問。當云何念。文殊言。此世界西。有阿彌陀佛。彼佛願力不可思議。汝當繼念。令無間斷。命終之後。決定往生。永不退轉。說是語已。時二大聖。各舒金手摩照頂。為授記別。汝以念佛故。不久證無上正等菩提。若善男女等。願疾成佛者。無過念佛。則能速證無上菩提。語已。時二大聖。互說伽陀。照聞已。歡喜踊躍。疑網悉除。又更作禮。禮已合掌。文殊言。汝可往詣諸菩薩院。次第巡禮。授教已。次第瞻禮。遂至七寶果園。其果纔熟。其大如盃。便取食之。食已。身意泰然。造大聖前。作禮辭退。還見二青衣。送至門外。禮已。舉頭遂失所在。倍增悲感。乃立石記。至今存焉。復至四月八日。於華嚴寺西樓下安止。泊十三日。照與五十餘僧。同往金剛窟。到無著見大聖處。虔心



禮三十五佛名。照禮纔十徧。忽見其處廣博嚴淨。琉璃宮殿。文殊普賢一萬菩薩。及佛陀波利。居在一處。照見已。惟自慶喜。隨眾歸寺。其夜三更。於華嚴院西樓上。忽見寺東山半有五聖燈。其大方尺餘。照呪言。請分百燈歸一畔。便分如願。重謂分為千炬。言訖便分千數。行行相對。徧於山半。又更獨詣金剛窟所。願見大聖。三更盡到。見梵僧。稱是佛陀波利。引之入聖寺。語在覺護傳即佛陀波利傳。至十二月初。遂於華嚴寺華嚴院。入念佛道場。絕粒要期。誓生淨土。至於七月初夜。正念佛時。又見一梵僧入乎道場。告云。汝所見臺山境界。何故不說。言訖不見。照疑此僧。亦擬不說。翌日申時。正念誦次。又見一梵僧。年可八十。乃語照曰。師所見臺山靈異。胡不流布。普示眾生。令使見聞。發菩提心。獲大利樂乎。照曰實無心祕蔽聖道。恐生疑謗故。所以不說。僧云。大聖文殊。現在



此山。尚招人謗。況汝所見境界。但使眾生見聞之者。發菩提心。作毒鼓緣耳。照聞斯語。便隨憶念錄之。時江東釋慧從。以大曆六年正月內。與華嚴寺崇暉明謙等三十餘人。隨照至金剛窟所。親示般若院立石標記。於時徒眾。誠心瞻仰。悲喜未已。遂聞鐘聲。其音雅亮。節解分明。眾皆聞之。驚異尤甚。驗乎所見不虛。故書於屋壁。普使見聞。同發勝心。共期佛慧。自後照又依所見化竹林寺題額處。建寺一區。莊嚴精麗。便號竹林焉。又大曆十二年九月十三日。照與弟子八人。於東臺觀白光數四。次有異雲靉靄。雲開見五色通身光。光內有圓光紅色。文殊乘青毛師子。眾皆明見。乃霏微下雪。及五色圓光。徧於山谷。其同見弟子純一。惟秀。歸政。智遠。沙彌惟英。優婆塞張希俊等。照後篤鞏其心。修鍊無曠。不知其終。絳州兵掾王士詹。述聖寺記云。

高僧傳三
集感通篇




唐洛陽罔極寺慧日傳

釋慧日·俗姓辛氏·東萊人也。中宗朝得度·及登具足。後遇義淨三藏·造一乘之極·躬詣竺乾·心恆羨慕·日遂誓遊西域。始者泛舶渡海·自經三載·東南海中諸國崑崙佛誓師子洲等·經過略徧。乃達天竺·禮謁聖迹·尋求梵本·訪善知識·一十三年·咨稟法訓。思欲利人·振錫還鄉·獨影孤征。雪嶺胡鄉·又涉四載。既經多苦·深厭閻浮。何國何方·有樂無苦。何法何行·能速見佛。徧問天竺三藏學者·所說皆讚淨土。復合金口·極於速疾·是一生路·盡此報身·必得往生極樂世界·親得奉事阿彌陀佛。聞已頂受·漸至北印度·健馱羅國·王城東北·有一大山。山有觀音像·有志誠祈請·多得現身。日遂七日叩頭·又斷食·畢命為期。至七日夜且未央·觀音空中



現紫金色相。長一丈餘。坐寶蓮華。垂右手摩日頂曰。汝欲傳法自利利他。西方淨土。極樂世界。彌陀佛國。勸令念佛誦經。迴願往生。到彼國已。見佛及我。得大利益。汝自當知淨土法門。勝過諸行。說已忽滅。日斷食既困。聞此強壯。及登嶺東歸。計行七十餘國。總一十八年。開元七年。方達長安。進帝佛真容梵夾等。開悟帝心。賜號曰慈愍三藏。生常勤修淨土之業。著往生淨土集行於世。其道與善導少康。異時同化也。又以僧徒。多迷五辛中興渠。興渠人多說不同。或云薑薑胡荽。或云阿魏。唯淨土集中別行書出云。五辛。此土唯有四。一蒜。二韭。三葱。四薤。關於興渠。梵語稍譌。正云形具。餘國不見。迴至于闐。方得見也。根粗如細蔓菁根而白。其臭如蒜。彼國人種取根食也。於時冬天。到彼不見枝葉。薑荽非五辛。所食無罪。日親見為驗歟。以天寶七年。卒於住寺。報齡



六十九·葬於白鹿原·成小塔焉。高僧傳三
集聲德篇

◎
宗曠禪師蓮華勝會錄文

夫以念為念·以生為生者·常見之所失也。以無念為無念·以無生為無生者·邪見之所惑也。念而無念·生而無生者·第一義諦也。是以實際理地·不受一塵·則上無諸佛之可念·下無淨土之可生。佛事門中·不捨一法·則總攝諸根·蓋有念佛三昧·還源要術·示開往生一門。所以終日念佛·而不乖於無念。熾然往生·而不乖於無生。故能凡聖各住自位·而感應道交。東西不相往來·而神遷淨刹。此不可得而致詰也。故經云·若人聞說阿彌陀佛·執持名號·乃至是人終時·心不顛倒·即得往生阿彌陀佛極樂國土。夫如來世尊·雖分折攝二門·現居淨穢兩土。然本聖之意·豈直以娑婆國土·丘陵坑坎·五趣雜



居·土石諸山·穢惡充滿·以是為可厭。極樂世界·黃金為地·行樹參空·樓聳七珍·華敷四色·以是為可忻。蓋以初心入道·忍力未淳·須託淨緣·以為增上。何則·娑婆國土·釋迦已滅·彌勒未生。極樂世界·阿彌陀佛·現在說法。娑婆國土·觀音勢至·徒仰嘉名。極樂世界·彼二上人·親為勝友。娑婆國土·諸魔競作·惱亂行人。極樂世界·大光明中·決無魔事。娑婆國土·邪聲擾亂·女色妖淫。極樂世界·水鳥樹林·咸宣妙法·正報清淨·實無女人。然則修行緣具·無若西方。淺信之人·橫生疑謗。竊嘗論之·此方之人·無不厭俗舍之喧煩·慕蘭若之寂靜·故有捨家出家·則殷勤讚歎。而娑婆眾苦·何止俗舍之喧煩。極樂優游·豈直蘭若之寂靜。知出家為美·而不願往生·其惑一也。萬里辛勤·遠求知識者·蓋以發明大事·決擇死生。而彌陀世尊·色心業勝·願力洪深·一演圓



音。無不明契。願參知識。而不欲見佛。其惑二也。叢林廣眾。皆樂棲遲。少眾道場。不欲依附。而極樂世界。一生補處。其數甚多。諸上善人。俱會一處。既欲親近叢林。而不慕清淨海眾。其惑三也。此方之人。上壽不過百歲。而童癡老耄。疾病相仍。昏沉睡眠。常居大半。菩薩猶昏隔陰。聲聞尚昧出胎。則尺璧寸陰。十喪其九。而未登不退。可為寒心。西方之人。壽命無量。一託蓮苞。更無死苦。相續無間。直至菩提。所以便獲阿惟越致。佛階決定可期。流轉娑婆促景。而迷於淨土長年。其惑四也。若乃位居不退。果證無生。在欲無欲。居塵不塵。方能興無緣慈。運同體悲。迴入塵勞。和光五濁。其有淺聞單慧。或與少善相應。便謂永出四流。高超十地。詆訶淨土。耽戀娑婆。掩目空歸。宛然流浪。並肩牛馬。接武泥犁。不知自是何人。擬比大權菩薩。其惑五也。故經云。應當發願



· 願生彼國。則不信諸佛誠言。不願往生淨土。豈不甚迷哉。
若夫信佛言而生淨土。則界繫之所不能拘。劫波之所不能害。
謝人間之八苦。無天上之五衰。尚無惡道之名。何況有實。唯
顯一乘之法。決定無三。歸依一體三寶。奉事十方如來。佛光
照體。萬惑潛消。法味資神。六通具足。三十七品助道法。應
念圓成。三十二應隨類身。徧塵剎土。周旋五趣。普被諸根。
不動一心。徧行三昧。灑定水於三千。引眾生於火宅。自利利
他。皆悉圓滿。然則唯心淨土。自性彌陀。蓋解脫之要門。乃
修行之捷徑。是以了義大乘。無不指歸淨土。前賢後聖。自他
皆願往生。凡以欲得度人。先須自度。故也。嗚呼。人無遠慮
· 必有近憂。一失人身。萬劫深悔。故率大海眾。各念彌陀佛
· 百聲千聲。乃至萬聲。迴向同緣。願生彼國。竊冀蓮池勝會
· 金地法明。綺互相資。必諧斯願。操舟順水。更加櫓棹之功



則十萬之遙。可不勞而至也。元祐四年冬。宗蹟夜夢一男子。烏巾白衣。可三十許。風貌清美。舉措閒雅。揖謂宗蹟曰。欲入公彌陀會。告書一名。宗蹟乃取蓮華勝會錄。秉筆問曰。公何名。白衣者云。名普慧。宗蹟書已。白衣者云。家兄亦曾上名。宗蹟問曰。令兄何名。白衣云。家兄名普賢。白衣者遂隱。宗蹟覺而詢諸耆宿。皆云華嚴離世間品。有二大菩薩名。宗蹟以為佛子行佛事。助佛揚化。必有賢聖幽贊。然預此會者。亦豈小緣。普賢變名易號。不知誰何。今更以二大菩薩為首云。

❖ 大智律師淨業禮懺儀序

元照。自下壇來。便知學律。但稟性庸薄。為行不肖。後遇天台神悟法師。苦口提誨。始知改迹。遂乃深求祖教。博究佛乘。



。而於佛祖微言。薄有所領。竊自思曰。初心晚學。寧無夙善。但不遇良導。作惡無恥。虛喪一生。受苦長劫。於是發大誓願。常生娑婆五濁惡世。通達佛理。作大導師。提誘群生。令入佛道。復見高僧傳慧布法師云。方土雖淨。非吾所願。若使十二劫蓮華中受樂。何如三途極苦處救眾生也。由是堅持所見。歷涉歲年。於淨土門。略無歸向。見修淨業。復生輕謗。後遭重病。色力痿羸。神識迷茫。莫知趣向。既而病差。頓覺前非。悲泣感傷。深自克責。志雖洪大。力未堪任。仍覽天台十疑論。初心菩薩。未得無生忍。要須常不離佛。又引智度論云。具縛凡夫。有大悲心。願生惡世。救苦眾生。無有是處。譬如嬰兒。不得離母。又如弱羽。祇可傳枝。自是盡棄平生所學。專尋淨土教門。二十餘年。未嘗暫捨。研詳理教。披括古今。頓釋群疑。愈加深信。復見善導和尚專雜二修。若專修者。



百即百生。若雜修者。萬千一二。心識散亂。觀行難成。一志專持四字名號。幾生逃逝。今始知歸。仍以所修。展轉化導。盡未來際。洪贊何窮。方便多門。以信得入。如大勢至。以念佛心。獲悟圓通。入三摩地。復自思念。已前所造無量罪業。不信淨土。謗法毀人。業因既成。苦果必克。縱百千劫。所作不亡。業性雖空。果報不失。內懷慚恥。曉夕兢惶。於是躬對聖前。吐露肝膽。五體投地。苦倒懺悔。仍發大願。普攝眾生。同修念佛。盡生淨土。欲常修習。須立軌儀。故集諸文。布成此法。從始至末。第列十門。並準聖言。咸遵古式。事從簡要。法在精專。所貴自備修持。豈敢貽諸先達。後賢披覽。知我志焉。

淨土十要第四

淨土十要



明・蕩益大師選定

念佛三昧寶王論

淨土十要
(五)



靈峯滿益大師選定淨土十要第五

述曰。昔雲棲宏祖在日。深慕飛錫法師寶王論。及妙叶禪師念佛直指二書。往往博諏。未獲遵止。神廟末年。古吳萬融老宿某。偶於亂楮中獲一遺編。蓋二書合刻也。磨滅之餘。僅存墨影。韓朝集居士正知。與靈峯旭老人。後先梓而行之。及老人流通淨要時。遂將二書。雙珎並薦。而直指前序。略載此緣。且若深惜其未入宏祖之慧照也。今刻十要。奉寶王次十疑之後。其論所云念未來佛。即信願二種資糧。故最為得要云。




念佛三昧寶王論



自序

客有高信。至吾禪居。前禮致問。辭甚清逸。問吾曰。修心之人。成道捷徑。法華三昧并舉有眼目。不輕之行。念佛三昧。般舟之宗。僉為無上深妙禪門者。願聞其致。對曰。吾拱默九峯。與世異營。天書曲臨。自紫閣山草堂寺。令典千福法華勝場。向三十年矣。希高扣寂。未有若君之所問者也。子將涉無生之龍津。欲圖南以鵬舉。吾不敏也。嘗試論之。今則略開二十門。以明斯旨耳。



念佛三昧寶王論卷上

唐紫閣山草堂寺沙門飛錫撰



念未來佛速成三昧門第一

·速成念阿彌陀佛
·一行三昧·

夫心之二也。生於群妄。群妄雖虛。惑者猶滯。滯之不釋。聖以之憂。天今。玄韻暢而無說。皆不可得。是以。法身空而具相。無不是佛。相之不明。說之不圓。則具。一味之旨。無說。絕言之路。詎可知其所歸歟。三昧之宗者。欲令弱喪知不二法門。存乎語默。匪唯淨名杜口。文殊興讚而已矣。何則。夫帝網未張。千璣焉覲。不念過現佛。豈知未來佛。宏綱忽舉。萬目齊開。既念過現佛。則知未來無不是佛矣。浴大海者。已用於百川。念佛名者。必成於之一相三昧。一言以蔽。其在茲焉。亦猶清珠下於濁水。濁水不得不清。佛想投於亂心。亂心不得不佛。何眾生非佛耶。既契之後。心佛雙亡。雙亡定也。雙照慧也。即定慧齊均。亦何心而不佛。何佛而不心。



。心佛既然。則萬境萬緣無非三昧者也。而世上之人。多念過去釋迦之月面。想現在彌陀之海目。如拔毒箭矣。如登快樂宮矣。吾亦以之為至教矣。獨未聞念未來諸佛之聚日者。何耶。蓋謂不了如來對眾生之麤。說諸佛之妙。遂隔眾生於諸佛之外。故不聞焉。孰肯念焉。淨名經中。有麝薝蔔不麝餘香。花有著身不著身者。此是抑揚大乘也。抑小則置鉢茫然。揚大則大小同遊於不二。法華經決了聲聞法。是諸經之王。則一切香薝蔔俱不著之旨明矣。苟非其人。則以諸佛為至尊也。眾生為至卑也。高下出焉。群妄興矣。敬傲立焉。一真隱矣。夫如是。必草芥萬有。鎔銖天下。慢幢已設。高倨稜層。目送飛鴻。斥謬立向心遊青漢。上妙不可屈也。則阻維摩一切見敬為供養中最之文矣。又不信楞伽經說。如來藏自性清淨。轉三十二相入於一切眾生心中。如大無價寶珠。垢衣所纏。豈觀城中最下乞人。與難勝如來。等無有異。若圓念三世佛。普



觀十方尊。則合夫理趣般若。一切有情皆如來藏。普賢菩薩自體。徧故之文矣。貧女懷王。米在糠糶之旨。鏡然可觀。豈可罹此八慢之責哉。人皆侮未來玉毫。不敢侮過現金色。殊不知起罪之源。皆在於當來佛上。非已今佛上也。眾生苟非并答有眼目當佛焉在。吾知母因子貴。米以糠全。有叶法華不輕之心。則念佛三昧。不速而成矣。

問曰。法華者法也。念佛者佛也。安得以法為佛。以佛為法。浩浩亂哉。

對曰。不亂也。元是一門。而誰為亂。夫芝朮之藥。列仙之子。昔各在天涯。則都無仙號。為人服其藥。羽化雲行。故藥受仙藥之名。人得仙人之稱。人藥異也。其仙一也。若無聖人。誰與道游。法無佛悟。豈令自悟。法非佛不悟。念佛三昧生焉。佛非法不明。法華三昧起矣。一仙兩稱。俱得仙名。念佛法華。同名佛



慧·佛慧既同·則不輕般舟無上深妙禪門·於茲悟矣·未始異也
·復何亂哉·

雙女群盜皆不可輕門第二

問曰·一切眾生·即未來諸佛·謹聞命矣·雙女群盜·惡之至者
·安得求敬於念佛之寶歟·

對曰·如佛所演·有其二種·一對待門·二決了門·言對待門者
·謂女子之虛偽·說如來之至真·則佛可尊崇·女可厭離·厭離
有二·一者訶欲·二者放心·初訶欲者·如菩薩訶色欲經云·女
色者·世間之枷鎖·凡夫戀著·不能自拔·女色者·世間之重患
·凡夫困之·至死不免·女色者·世間之衰禍·凡夫遭之·無危
不至·行者既得捨之·若復顧念·是為從獄得出·還復思入·從
狂得止·而復樂之·從病得差·復思得病·智者愍之·知其狂而



顛蹶。死無日矣。凡夫重女。甘為僕使。終身馳驟。為之辛苦。雖復鐵鎖千刃。鋒鏑交至。甘心受之。不以為患。狂人樂狂。不是過也。行者若能棄之不顧。是則破枷脫鎖。惡狂厭病。離於衰禍。既安且吉。得出牢獄。永無患難。女人之相。其言如蜜。其心如毒。譬如停泉澄波。而蛟龍居之。金山寶窟。而師子處之。當知此害。不可近也。室家不和。婦人之由。毀宗敗族。婦人之罪。實為陰賊。滅人慧明。亦如獵圍。鮮得出者。譬如高羅。群鳥落之。不能奮飛。又如密網。眾魚投之。則剝腸俎肌。亦如闇坑。無目投之。如蛾赴火。是以智者知而遠之。不受其害。惡而穢之。其心不為此物之所惑也。大寶積經。佛為優陀延王說是偈曰。

鋒刃刀山。毒箭諸苦。女人能集。眾多苦事。

假以香華。而為嚴好。愚人於此。妄起貪求。

如海疲鳥。迷於彼岸。死必當墮。阿鼻地獄。



現見眾苦。皆來集身。善友乖離。天宮永失。

寧投鐵獄。馳走刀山。眠臥炎鑪。不親女色。

如鳥為求食。不知避網羅。貪愛於女人。被害亦如是。

譬如水中魚。游泳網者前。便為他所執。豈非自傷損。

女若捕魚人。諂誑猶如網。男子同於魚。被網亦如是。

次放心者。如大寶積經云。文殊師利告善住天子言。若人一心。

專精自守。貪欲心發。即應覺知。方便散除。還令寂靜。云何散

除。應作是念。須剋的精研方有實益此是空。此是不淨。求此欲心生處滅處。從何所

來。去至何所。是中誰染。誰受染者。誰為染法。如是觀時。不

見能染。不見所染。不見染事。以不見故。則無有取。以不取故

。則無有捨。以不捨故。則無有愛。不捨不愛。則名離欲寂靜涅

槃也。若又恣心入諸塵勞生死之內。而亦不患貪恚癡等煩惱過患

。是謂放心。已上明第一對待門竟。第二決了門者。若究竟離諸



妄。無染如虛空。則為過現諸佛也。非未來佛也。汝不聞夫求無此論觀
價寶。道必下於滄海。今觀嬖盜如佛。采智慧寶。必先於煩惱中求。五逆相即解脫
相。魔界如即佛界如。若聆佛音而喜。聞魔聲而恚。不入音聲法
門。不住音聲實際。不覺於諸法者。斯乃北轅適越之士也。安得
與之而論道哉。更為子明之。經不云夫。昔列仙名鹿蹄。地滑倒
仆。以仙呪令旱。國人患之。王募嬖女。誘而得之。騎頸入城。
油雲四起。霈然洪霖。彼仙雖有御長風之通。陵太清之術。無能
施也。僊人者。釋迦爾。女者。耶輸也。法華會上。未來成佛。
號具足千萬光相如來。而又念佛之人。但覩嬖女之玉容。不念光
相之金好。而失不輕之旨也。念佛三昧。安得不誣哉。又阿那律
。昔為盜首。入寺盜佛額珠。箭挑佛燈。令清光不滅。阿那律者
。此翻無滅。良在茲焉。當來作佛。號普明如來。皆此例也。念
佛之人。尚不輕於群盜。況於不盜者乎。未來兩佛。猶如皎日。



何慮三昧而不成焉。

持戒破戒但生佛想門第三

問曰。兩難釋矣。梵網經云。若人受佛戒。即入諸佛位。而緇服之流。佩明月之戒。懸瓔珞之珠。參位三尊。範圍七眾。宜其敬矣。苟非精持。動行顛沛。慢何過焉。捶何罪焉。望為剖之。

對曰。如來嘗於三昧海經。為父王說。昔有^{今人能如此乎又云}四比丘。犯律為恥。將無所怙。^{般若習氣}忽聞空中聲曰。汝之所犯。謂無救者。不然也。空王

如來。雖復涅槃。形像尚在。汝可入塔。一觀寶像眉間白毫。比丘隨之泣淚言曰。佛像尚爾。況佛真容乎。舉身投地。如大^{字如}山

崩。今於四方。皆成正覺。東方阿閼佛。南方寶相佛。西方無量壽佛。北方微妙聲佛。是四破戒比丘也。所以如來名此觀佛三昧。為大寶王戒品海者。可以滌破戒之罪垢。得塵累之清淨也。此^{今之}



四私誓海納淵含比丘有由來也。一觀寶像。僉為世雄。念佛之人。豈得惑於破戒之僧歟。

故大集經云。若諸王臣打罵出家持戒破戒。罪同出百億佛身血。若見被袈裟者。無論持犯。但生佛想。佛想者。念佛三昧也。斯之金口。明不輕之深旨也。安得恣行打罵。而不懼哉。經云。寧為心師。不師於心。見慳貪人作施想。見破戒人作持戒想。夫然。則不為六蔽境界之所纏。蓋成六度彼岸之觀門焉。若住分別之心。自取冥司之罰。不亦哀哉。若能翻此見心。則念佛三昧。如川之流矣。

現處湯獄不妨受記門第四

問曰。若破戒觀佛。皆成正覺。固不可輕。可信矣。如現處湯獄。或嬰鬼趣。菩提難發。河清未期。安得求敬同於念佛之士歟。對曰。豈不聞夫采良藥者。必在山險。非華堂所出。集法藥者。



必在於險有。非無為自出。則首楞嚴經說四種記。一未發心記。二初發心記。三密與授記。四現前授記。今雖現處鬼獄。即未發心。佛記當來必發大志。遇真善友。行菩薩行。還成正覺。故不可輕。即是未發心之記也。佛說四種記時。迦葉白佛。我等從今。當於一切眾生。生世尊想。若生輕心。則為自傷。佛言。善哉快說。人皆不應稱量眾生。唯有如來。乃能量爾。以是因緣。故我勅諸聲聞。及餘菩薩。於諸眾生。應生佛想。華嚴經普賢行願品。破百萬障門。亦用此想。夫如是。則現居惡趣。蒙佛與記者。亦猶宅寶未開。不妨寶在於宅內。額珠鬪沒。何廢珠隱於額中。若不念眾生為當來佛。必以六塵為寇賊。則猶防魔軍。通自壞其壁壘。自存敵國。使常起於怨仇。金革所以未寧。鞀鼓於焉尚振。安得高枕於其間哉。若使不降者來降。不服者咸服。則使天下。一統矣。獵獵旌旗而焉用。翩翩飛將而奚適。吾將卻馬以冀田。



日出而作。日入而息。雖帝堯之聖。於我何力哉。百姓日用而不知。方明聖化之廣被矣。若能悟色聲而為佛者。念眾生為當來佛者。必不立心前之凡境也。或想自身為本尊也。瑜伽真言深妙觀門。不謀而會。夫因想而有者。豈得不空哉。則大鵬將尺鷃以齊。泰山與秋毫而一。無夷岳之僻。續鳧之憂矣。

問曰。湯獄之子。殊未發心。如來法王。宥過與記。千光散射。十號圓明。誠如佛言。孰敢不信。原夫未悟。從何得醒耶。

對曰。言未悟者。亦有義焉。夫長江之源。濫乎一觴。大迷之本。存乎二見。若謂念外立無念。生外立無生。則生死異於涅槃也。萬佛洪音。莫之能訓矣。若了念而無念。觀生而不生。煩惱即菩提也。一相莊嚴。斯之能悟矣。亦猶巖上群蜂。已房純蜜。井中七寶。何廢稱珍。皆本有之。非適今也。念未來佛。罪從何生。吾放其心。徧一切所緣之處。皆見如來。道從恚等生。於是乎



在。如來藏經。佛告金剛慧菩薩言。善男子。我以佛眼觀一切眾生。貪欲恚癡諸煩惱中。有如來智。如來眼。如來身。結加趺坐。儼然不動。乃至德相備足。如我無異。廣說一切眾生有如來藏。以九喻況之。寶性論釋。而結頌言。

萎華中諸佛。糞穢中真金。地中珍寶藏。諸果子中芽。
朽故弊壞衣。纏裹真金像。貧賤醜陋女。懷轉輪聖王。
焦黑泥模中。有上妙寶像。眾生貪瞋癡。妄想煩惱等。
塵勞諸境中。皆有如來藏。下至阿鼻獄。皆有如來身。
真如清淨法。名為如來體。

此文證。湯獄之記。頓覺明焉。三昧之門。自然洞啟。
問曰。至人用心。澹然清淨。攀緣永絕。今說放心。徧緣一切。
所緣之處。皆見如來。教何在焉。

對曰。亦有教說。起心徧緣六塵三業。仍發妙願。入佛境界。一

斯其攀緣永絕



一緣起。不離如來。名悉皆見矣。此是圓見。非由眼也。故涅槃經云。聲聞人雖有天眼。名為肉眼。學大乘者。雖有肉眼。名為佛眼。何以故。曉了己身。有佛性故。又如勝天王經中。佛告天王。菩薩摩訶薩。以方便力。行般若波羅蜜。於一切法。心緣自在。緣一切色。願得佛色。攀緣永絕無所得故。心緣眾聲。願得如來微妙音聲。心緣眾香。願得如來清淨戒香。心緣諸味。願得如來味中第一大丈夫相。心緣諸觸。願得如來柔軟手掌。心緣諸法。願得如來寂靜之心。心緣自身。願得佛身。心緣自口。願得佛口。心緣自意。願得如來平等之意。天王。菩薩摩訶薩。行般若波羅蜜。無有一心一行空過。不向薩婆若者。徧緣諸法。攀緣永絕而能不著。觀見諸法。無不趣向菩提之道。菩薩修習諸行。皆因外緣而得成立。又如大地。住在水上。若鑿池井。即得水用。其不鑿者。無由見之。如是聖智境界。徧一切法。若有勤修般若方便。則便得之。



· 其不修者 · 云何能得 · 心緣之理 · 豈不大哉 ·

觀空無我擇善而從門第五

問曰 · 即動而靜 · 靜為躁君 · 即凡而聖 · 聖隱凡內 · 謹聞遐旨 · 又三教無我 · 理既不殊 · 擇善而從 · 其義焉在 ·

對曰 · 三教之理也 · 破盡從來三教一家龍何之謬如是簡別 名未始異 · 理未始同 · 且夫子四絕中一無我

者 · 不濫然後以至善收之如下門所明 謙光之義 · 為無我也 · 道無我者 · 長而不宰 · 為無我也 · 佛

無我者 · 觀五蘊空 · 為無我也 · 上二教門 · 簡而至明 都不明五蘊 · 孰辨其

四諦六度萬行 · 賢聖階級 · 蔑然無聞 · 但和光同塵 · 保雌守靜 ·

既慈且儉 · 不敢為天下先 · 各一聖也 · 安用商榷其淺深歟 · 三教

無我明矣 · 擇善而從者 · 謂三性之理 · 理無不在 · 修心之士 · 擇

善而從 · 蓋謂不善無益於至真 · 非真則皆為不善 無記雙亡於善惡 · 妨亂佛理 · 何

莫由斯 · 故聖人簡之而不取也 · 故涅槃經云 · 一闡提者 · 心不攀



緣一切善法。乃至不生一念之善。是知念佛三昧。善之最上。萬行元首。故曰三昧王焉。

◎
無善可擇無惡可棄門第六

問曰。若擇善而從者。何不擇諸佛之善。棄眾生之惡。乃念未來諸佛。而同過現正覺耶。

對曰。不易來問。自成我答焉。何者。擇善而從者。蓋不得已而言之。為力微任重。不能即惡而善。^{至善}即妄而真。故以明之。苟能念未來之佛。叶不輕之行。天地一指。萬物一馬。眾生皆佛。此土常淨。異鷲子之土石沙礫。同梵王之珍寶莊嚴。擇善之至矣。無惡可棄矣。即天台智者釋法華經。明絕待之妙。引證云。

眾生見劫盡。大火所燒時。我此土安隱。天人常充滿。
園林諸堂閣。種種寶莊嚴。



又勝天王經曰。佛所住處。實無穢土。眾生薄福。而見不淨。良在此焉。梵云南無。唐言歸命。梵云阿彌陀。唐言無量壽。三世諸佛。豈祇一佛而壽無量耶。今與子同念于三世彌陀。同生于十方極樂。有何不可。而欲鷓路退飛哉。夫然。則烈三昧之猛燄也。不居於纖妄蚊蚋。謂不復存纖妄之見。鏗十念之洪鐘也。不間於散亂稱佛。明矣。謂數不異定。此四句。約色心二法。明眾生皆佛。念彌陀通三世既爾。念諸佛菩薩。不亦然歟。

問曰。念未來佛。即與過現諸佛等者。願聞其理也。
對曰。華嚴經云。一切諸如來。同共一法身。一心一智慧。力無畏亦然。楞伽偈云。迦葉拘留孫。拘那含我是。以此四種等。我為佛子說。言四等者。一字等。同名佛也。二語等。皆具迦陵頻伽梵音聲相。三法等。盡得菩提分法無障礙智也。四身等。法身色聲相好無差也。起信論云。依方故轉。方實不轉。夫如是。則



悟者悟於一方。群方自正。念者念於一佛。諸佛現前。經所謂水不上升。月不下降。光淨因緣。虛空皓月。現於清水。彼佛不來。我身不往。念佛因緣。如來寶月。現於心水。如說頌曰。菩薩清涼月。游於畢竟空。眾生心水淨。菩提影現中。



一切眾生肉不可食門第七

此等皆是法界事理

問曰。肉者人之所食。而念佛之家絕之。何耶。

對曰。夫尸毘救鵠。上稱方平者。王禽異也。保命一也。安得故食其肉。用資敗軀。而兀兀然不知其懼哉。苟能悟之為未來諸佛者。孰肯飛白刃於赤鱗。放蒼鷹於狡兔。如夕蛾投火。自取其斃歟。故楞伽寶經佛語心品偈云。

為利殺眾生。以財網諸肉。二俱是惡業。死墮叫喚獄。

以斯聖旨。若不施如此財。則網者屠者自息矣。且龍樹不輕於鵠



雀·高僧不跨於蟲蟻·或問其故。答曰·斯之與吾·同在生死。彼或將先成正覺·安可妄輕耶·輕尚不可·豈得奪食其血肉哉。令人懷息起粟寶性論云·如來藏經中·告舍利弗言·眾生者·即是第一義諦·即是如來藏·即是法身·即是菩提·吾謂犬唯逐塊·不知逐人·塊終不息。唯念過現·不念未來·慢終不息。若如師子而逐於人·其塊自息。聞夫敬慢之道·一以貫之·則移敬就慢·均父母於平人·逆之甚也。通人弘曠之論移慢就敬·均平人於父母·孝之大也。故梵網經云·六道眾生·皆是我父母。孝名為戒·良在茲焉。觀六道為當來佛者·父母之談·猶近言耳。若能等沙彌之救蟻·促壽更延。同流水之濟魚·天華雨積·革曠劫眾生之見·念未來善逝之身。糞穢之內·知有真金·重雲之間·信有明月·則食肉之昏霧·生死之煙霾·慧風掃之於三昧長空矣。梵網經云·我是已成佛。汝是當成佛。常作如是信·戒品已具足。良知惕厲豈得不念之哉。



問曰。肉不可食。信之矣。五辛如何。

辛酒雖非有情皆與淨業相違故并問答釋疑
對曰。聖教明之。大佛頂經云。佛告阿難。是五種辛。熟食發淫

。生噉增恚。如是世界食辛之人。縱能宣說十二部經。十方天仙

嫌其臭穢。咸皆遠離。諸餓鬼等。因彼食次。舐其脣吻。常與鬼

住。福德日消。長無利益。是食辛人修三摩地。菩薩天仙。十方

善神。不來守護。大力魔王。得其方便。佛告阿難。修菩提者。

永斷五辛。是則名為第一增進修行漸次。斯金口也。不亦誠哉。

酒固不待言矣。謂上五辛酒肉等戒皆稱性實修所謂說得百喻經云。昔有貧人。在路而行。遇得一囊金錢

。一文不如一行取尺寸故引經深證心大喜躍。即便數之。數未能周。錢主忽至。盡還奪去。其人

當時悔不疾去。懊惱之情。甚為苦極。遇佛法者。亦復如是。雖

得值遇三寶福田。不勤方便修行。謂不如聞行而好多聞。忽爾命終。墮三惡

道。如彼愚人。還為其主奪錢而去。偈曰。

今日營此事。明日營彼事。

此不但是世法。即汎汎營福慧業。無一相三昧妙觀。綿密之修。皆所謂今日三。明日四。如隔日瘧也。




樂著不觀苦·不覺死賊至。

忽忽營眾務·凡人無不爾。

汎汎營福慧業·終歸世諦流布·
無益真修·凡人亦無不爾也。

如彼數錢人·其事亦如是。

已上七門·盡是念未來諸佛·以通三世之意也。若欲念於彌勒佛者·必得上生兜率天宮·見慈氏之尊·則彌天釋道安·為其倡首耳。



念佛三昧寶王論卷中



念現在佛專注一境門第八

問·念未來佛·即眾生是。已聞玄義·事廣理幽也·又恐心散難檢·今欲一以貫之·專西方此一問是前七門所啟·念一佛·踐不退地·祛有漏心·乘扁舟於黃金之池·禮彌陀於白玉之殿·以通三世·希露九品·不亦可乎。

對曰·十住婆沙論·并龍樹菩薩造釋華嚴經論易行行品云·菩薩道有難行行·如陸地乘舟也。有易行行·如水路乘舟也·阿彌陀佛本願之力·若人聞名稱念·自歸彼國。如舟得水·又遇便風·一舉千里·不亦易哉·則釋迦如來父王眷屬·六萬釋種·皆生極樂土。蓋佛與此法界宗旨界眾生緣深也·專注一境·圓通三世·不亦良



哉。

問曰·專注一境·圓通三世·誠哉·然稱念自歸·往生彼國者·有為虛偽·風多浪鼓·曷若不馳想於外·但攝心於內·協無為之旨乎。

對曰·有為雖偽·捨之則道業不成·無為雖實·取之則慧心不朗·經云·厭離有為功德·是為魔業·樂著無為功德·亦為魔業·子今厭樂交爭·得不入於魔罣也·又若聖賢攝心謂之內·凡夫馳想謂之外·苟以馳外為亂·住內為定·復是內外所馳·非所以念佛三昧攝心之意也·注維摩經·羅什法師云·外國有一女·身體金色·有長者子·名達暮多羅·以千兩金邀入竹林·同載而去·文殊於道中變身為白衣士·身著寶衣·衣甚嚴好·女人見之·貪心內發·文殊言·汝欲得衣者·當發菩提心·女曰·何等為菩提心·文殊言·汝身是·問曰·云何是·答曰·菩提性空·汝身亦



空。故是。此女曾於迦葉佛所。多植善本。廣修智慧。聞是說已。即得無生法忍。得是忍已。而將示欲之過。還與長者子入林。既入林已。自現身死。脛脹爛臭。長者子見已。甚大怖畏。往詣佛所。佛為說法。亦得法忍。大覺未成。未暇間任。故名為忍。如自觀身實相。觀佛亦然。女身空。佛身空。未始異也。菩提之義。豈得異乎。夫如是。則一切有為。即無為矣。一切內外。非內外矣。然在有而未嘗有。有而常無。居無而未嘗無。無而恆有。何患之於佛有相。心有念哉。



此生他生一念十念門第九

問曰。易行難行之談。身即菩提之觀。其旨鏡焉。人生在世。石火電光。一念蹉跎。悔無所及。修道之人。尚不親心。況親於身。尚不親於身。況身外歟。常恐出息不還。屬於後世。狂風飄蓬。

後哉此問



· 茫茫何之。信而有勇願示一念十念之門。此生他生之計。

答曰· 夫淨土之會。大事因緣非真信勇弗克擔荷功業之大者。二乘乃澄神虛無。耽空怖相。

不念眾生。故無淨土。而大乘有之。按悲華經云。阿彌陀佛。昔

為轉輪王。法界緣起事大理深不可草草放過七寶千子悉皆具足。因寶海大臣為善知識

· 於寶藏佛所發菩提心。取於西方極樂淨土。則諸經中知名諸佛

菩薩當日所化聲聞等。皆昔之千子也。其長太子名不瞬。觀世音也。次子

名摩尼。大勢至也。次子名王眾。文殊師利也。次子名能伽奴。

即金剛智慧光明菩薩。次子名無畏。即蓮華尊如來。次子名菴婆

羅。即虛空光明菩薩。次子名善臂。即師子香菩薩。次子名泯圖

· 即普賢也。次子名蜜蘇。即阿閼佛也。蜜蘇王子。一自發心已

來。行時步步心心數法。常念諸佛。今登正覺。生妙樂剎焉。吾

謂經行廣陌。徒步幽林。則不異蜜蘇之見。若鳴珂入仗。動珮朝

天。肅肅羽儀。駉駉車馬。安得不用心於步步之間哉。今則例之



· 亦不移於前操矣。夫含齒戴髮· 死生交際· 未有無出入息焉。
又一息不還· 即屬後世者· 亦誠如所問。世上之人· 多以寶玉水
精金剛菩提木槌為數珠矣· 吾則以出入息正好用數珠為念珠焉。稱佛名號·
隨之於息· 有大恃怙。生能止散死得正念安懼於息不還屬後世者哉。余行住坐臥·
常用此珠。縱令昏寐· 含佛而寢· 覺即續之。然不在此著脚必於夢中得見彼佛
。如鑽燧煙飛· 火之前相。夢之不已· 三昧成焉· 面覩玉毫親蒙
授記· 則萬無一失也。子宜勉之。又問· 一念十念· 往生淨土·
何者為正· 對曰· 但一念往生· 住不退地· 此為正也· 如佛所說
· 謗佛毀經· 打僧罵尊· 五逆四重· 皆一念惡業成· 墮無間獄·
猶如箭射· 今之念佛生於淨土· 亦一念善業成· 即登極樂· 猶如
屈臂· 前一念五陰滅· 後一念五陰生· 如蠟印印泥· 印壞文成·
尚不須兩念· 豈要至十念哉· 打僧罵尊· 雖非正逆· 是五逆之類
也。又一念者· 如經云· 愛酪沙彌· 生一念愛心· 後生酪中作蟲



。又大薩婆長者妻。坐對明鏡。自愛其身。海風破船。生故屍中作蟲。嬉戲往來。不離其所。斯皆一念。非十念也。又大無量壽經。明一念念佛。皆得往生。觀經十念。良有以也。蓋為遘疾尪羸。力微心劣。故須十稱彌陀。以助其念。若心盛不昧。一念生焉。亦猶栽植絲髮。其茂百圍也。



是心是佛是心作佛門第十

問曰。經明是心是佛。是心作佛。何用遠稱彌陀。存想於極樂之國。近念諸佛。興敬於未來之尊。此皆自外而求。豈曰是心是佛耶。

對曰。子問非也。子但引經。不知經之所趣。經者。觀無量壽佛經也。正明念阿彌陀之文矣。以念佛故。佛從想生。故云是心是佛。安得竊取彌陀之觀。反噬彌陀之心者哉。若爾都不念佛而言

末世盡然



是心以作佛釋是佛妙是佛者。亦應都不想惡而言是心是惡耶。彼既不然。此亦焉

可。況彼極樂之國。彌陀至尊。十萬億之須彌山王。是甚麼不與眼根為

障礙者。恆河沙之光明相好。是甚麼由佛願力而想成。故也。由佛願力者。謂佛身是佛。自願力所成。而我現前心想顯現。而想成者。謂彼佛

自願力所成之身。由我現前心想顯現。屈臂即得於往生。寧計彼方之遠近也。

問曰。是心是佛。敬聞其理也。然此經所明十六妙觀。韋提得之

。則冰日可想。金山晃然。魔光佛光。自觀他觀。邪正混雜。若

為澄淨。願一一示之。令念佛人。離師獨坐。心安若海也。

對曰。冰想者。為琉璃地之張本也。日想者。作白毫光之由漸也

。依想而現。曰自曰正。不依想現。則曰他曰邪。本則想白毫。

白毫不現。而未想紺目。紺目現。此乖其本心。豈不邪也。況諸

想歟。又魔光乃有影耀眼。佛光乃無影不耀眼。故楞伽偈曰。

佛地名最勝。清淨妙莊嚴。照耀如盛火。光明悉徧至。

熾燄不壞目。周輪化三有。



問·今之光現者·熾燄壞目·非魔如何·光而不耀·非佛如何·答·又光之真也·令念佛人身心澄淨清淨·光之偽也·令念佛人心躁動恍惚·故涅槃經云·澄淨清淨·即真解脫·真解脫者·即是如來明矣。

又問曰·至人無思·而今用想·豈不謬哉。

對曰·不謬也·如大威德陀羅尼經云·超過有結·應發欲心·想無欲事·今則例之·欲修念佛·應發想心·想無想事·故方等賢護經云·惡欲想女·夢見於女·善欲想佛·夢見於佛·吾謂二想名同·善惡天隔·不可聞想·一概厭之·若苟厭之·雖不毀經不謗佛·則必生於無想天宮矣·若固執無想·而噬想佛者·則名謗法·以謗法故·遽入十方無擇之囹圄·未知出日·豈有天宮之望乎·縱令得生·名外道天·非解脫路·涅槃經云·隨聞毒鼓·遠近俱死·此亦如是·隨其撥想·遠近俱墮·經所謂或時離地一尺



二尺。往返游行。斯之謂矣。豈出於三界之流轉焉。豈同於九品往生焉。况覆舟載舟。水也。因倒因起。地也。想妄即眾生。想真即諸佛。離想之外。更用何焉。

問曰。事解已竟。理何在耶。如般舟三昧經云。心起想即癡。無想即涅槃。今之用想。不亦然乎。

對曰。不然也。若存所想之佛。能想之心。或避此癡尤不可救想佛。則以惡取

空為無想者。則癡之甚也。吾今了佛皆從想生。無佛是佛無想。何癡

之有。此乃觀空三昧。無邪見也。子又問理何在者。夫至人冥真

體寂。虛空其懷。雖復萬法並照。而心未嘗有。則真智無緣。故

無念可名。俗智有緣。故念想以生。又想不異空。空不異想。名

第一義中道之理也。此顯法身矣。空即是想。名俗諦之理也。恆

沙萬德。皆依俗諦。此顯報身矣。想即是空。名真諦之理也。破

二十五有。得二十五三昧。常空常化。和光利物。此顯化身矣。



是則以三觀觀三諦。證三德。成三身。乃至十種三法。有何不可。而欲擯於清淨之想。取無想之想耶。塞於禪定之門。而取成佛之闕耶。楞伽密嚴經。皆曰。寧起有見如須彌者。謂信有因果。存想念佛。生極樂淨國。故曰寧起有也。不起空見如芥子者。謂撥無因果。謗于念佛。生阿鼻地獄。故云不起空也。吁。可畏者。其在茲焉。



高聲念佛面向西方門第十一

問曰。想即無想。謹聞之矣。然方等經中。修無上深妙禪定。令繼想白毫。兼稱佛號。以祈勝定。經意甚深擬議即乖既契之後。心佛兩忘。信有之矣。但默念泉澄。即三昧自至。亦何必聲喧里巷。響震山林。然後為道哉。

對曰。誠如所問。聲亦無爽。試為明之。何者。夫辟散之要。要



存於聲。聲之不屬。心竊竊然飄飄然無定。聲之屬也。拔茅連茹。乘策其後。畢命一對。長謝百憂。其義一也。近而取之。聲光所及。萬禍冰消。功德叢林。千山松茂。其義二也。遠而說之。金容煒煌以散彩。寶華浙瀝而雨空。若指諸掌。皆聲致焉。其義三也。如牽木石。重而不前。洪音發號。飄然輕舉。其義四也。與魔軍相戰。旗鼓相望。用聲律於戎軒。以定破於強敵。其義五也。具斯眾義。復何厭哉。未若喧靜兩全。止觀雙運。叶夫佛意。觀冷然便是兩全雙運

念佛三昧序云。功高易進。念佛為先。察夫玄音之扣。心聽則塵累每銷。滯情融朗。非天下之至妙。其孰能與於此歟。言明證者。未若華嚴經偈云。

寧受無量苦。得聞佛音聲。不受一切樂。而不聞佛名。
夫然。則佛聲遠震。開善萌芽。猶春雷之動百草。安得輕誣哉。




問曰。高聲下聲稱佛名號。敬承其義。十方淨土。皆有如來。面之西方。何滯之甚耶。

對曰。子問非也。此是方等佛經作如是說。非人師之意也。豈可謗於方等經歟。

問曰。謹聞教矣。理在何焉。

對曰。亦有其理。如說癡人見觀世音有十一面。即設難云。何不
安十二面耶。及隨其語。又設難云。何不安十一面耶。子欲將東
難西。其義若此。猶迷未醒者。即以此身令其安置。不背一方。
則其自悟矣。如其不悟。誠不可化。但可悲矣。又勝天王經二行
品。明如來八十種好。中有一隨好光明功德。名一切向不背他矣。
然佛不可背。常面向於一切眾生。非如怨讎。不欲相見。慈之
至矣。是其義也。智者大師。爰自撫塵之歲。終于耳順。臥便合
掌。坐必面西。大漸之際。令讀四十八願。九品往生。光明滿山



· 天樂遺奏· 生于淨土。面西之義· 不亦弘哉。

問曰· 面向西方· 敬聞教理· 般舟之義· 義在何耶。

對曰· 梵云般舟· 此云現前· 謂思惟不已· 佛現定中· 凡九十日
常行道者· 助般舟之緣· 非正釋其義也。

問曰· 淨土妙門· 般舟之義· 具聞剖析· 然近代已來· 誰得登于
安養之國· 既無相報· 焉知所詣。望為明之。

對曰· 晉朝廬山遠法師· 為其首倡· 遠公從佛陀跋陀羅三藏· 授

念佛三昧

考遠公於晉孝武帝太元十五年庚寅· 與緇素一百廿三人結社念佛· 歷十七年· 至安帝義熙二年丙午· 佛陀跋陀羅方至長安· 後以小故· 往廬山· 紫閣謂佛陀授遠公念佛三昧方結社· 係

未詳考·與弟慧持· 高僧慧永· 朝賢貴士· 隱逸清信· 宗炳· 張野·

劉遺民· 雷次宗· 周續之· 闕公則等· 一百二十三人。鑿山為銘
· 誓生淨土。劉遺民著文· 大略云· 推交臂之潛淪· 悟無常之期
切。審三報之相催· 知險趣之難拔· 如其同志諸賢· 所以夕惕宵
勤· 仰思攸濟者也。然復妙觀大儀· 啟心正照· 識以悟新· 形由



化革·藉芙蓉於中流·蔭瓊柯以詠言·飄雲衣於八極·泛香風以窮年·體忘安而彌穆·心超樂以自怡·臨三途而緬謝·傲天宮以長辭·紹眾靈以繼軌·指大息以為期·究茲道也·豈不弘哉·遠公製念佛三昧序云·夫稱三昧者何·思專想寂之謂也·思專則志一不移·想寂則氣虛神朗·氣虛則智恬其照·神朗則無幽不徹·斯二乃是自然之玄符·會一而致用也·又諸三昧·其名甚眾·居高易進·念佛為先·若以匹夫眾定之所緣·故不得語其優劣·居可知也·謝靈運淨土詠云·法藏長王宮·懷道出國城·願言四十八·弘誓拯群生·淨土一何妙·來者皆菁英·頽年安可寄·乘化必晨征·子問未見往生相報者·有晉朝闕公則·願生而來報·後同誓友人·在東京白馬寺·其夜為公則追忌轉經·于時林殿·皆作金色·空中有聲曰·我是闕公·則也·所祈往生極樂寶國·今已果矣·故來相報·言訖不現·支道林讚曰·



大哉闕公。歆虛納靈。神化西域。迹驗東京。
徘徊霄虛。流響耀形。豈欽一讚。借結妙示以非冥。
又虞孝敬讚曰。

猗歟公則。先甘法味。知我者希。其道乃貴。
金光夜朗。玉顏朝暉。不捨有緣。雙結妙言告其類。

❖ 夢覺一心以明三昧門第十二

問曰。闕公往生。金光相報。敬諾之矣。佛說一切法如夢者。未
知所念之佛。所生淨土。亦如夢否。若非其夢。則佛在戶外。若
是其夢。則佛在夢中。如夢中得金。覺無所獲。慈悲之至誠恐虛念於三身
。故有此問終歸於一妄。請為辨之。

對曰。非妄也。何以知然。若修念佛三昧之人。如夢得金。覺無
所獲者。則同於妄也。究竟因念佛而生淨土。豈曰妄哉。如習天



眼法。先想珠火等光。想之不已。實發一解天眼。孰曰妄焉。豈同夢金。畢竟無有。莫以遠事近見舉夢為喻。不得將念佛往生全同於夢。明矣。又華嚴經云。心佛與眾生。是三無差別。心迷也如夢。則九法界眾生是矣。二解心悟也如覺。則一法界即諸佛是也。迷悟祇在於一心。夢覺曾無於兩轍。經所謂了妄本自真。則見盧舍那。縱是夢妄。三解亦何爽焉。唯心察之。匪石其志。



念三身佛破三種障門第十三

問曰。佛有三身。如何憶念。願示方便。令無所失。
對曰。夫佛之三身。法報化也。法身者。如月之體。報身者。如月之光。化身者。如月之影。萬水之內。皆有月焉。此月為多為一耶。不可言一。萬水之月常差矣。不可言多。虛空之月常一也。如梵書伊字。摩醯三目。縱橫並別。皆不可議也。經云。或現



小身丈六八尺者。皆眾生心水中佛也。佛尚無形。豈有二哉。淨國穢土。亦自彼耳。若欲將念三身。破三種障。今試明之。爾佛身之生。從止觀生。止觀不均。其障必起。念佛之人。修止心沉。昏闇障起。而障化身佛。又須以觀心策之。念白毫光。破昏闇障也。修觀心浮。無惡不造。乃妄念紛紜之謂。而障報身佛。還修於止。止一切惡。念諸佛昔因。恒沙功德。智慧圓滿。酬因曰報。破惡念障也。若二邊障動。詭狀殊形。萬相紛綸。兩賊強乘。障法身佛也。以中道第一義空破之。偈曰。


無色無形相。無根無住處。不生不滅故。敬禮無所觀。

所觀之理。如毗嵐猛風。吹散重雲。顯明法身清淨寶月。破逼惱障也。應病與藥。不其然歟。自注。此是天台智者大師所解。披尋未廣。實未曾見諸師有斯妙釋也。止觀意前已略辨。俟在口談。非文字能徵也。

我既化人。人亦化物。物我俱成。三昧彌興。眾生無盡。三昧不絕也。已上六門。盡是念現在阿彌陀佛以通三世之意也。廣如



安樂集·天台十疑論·感法師釋群疑論·往生傳·稠禪師法寶義
論所解·亦如飛錫先撰無上深妙禪門傳集法寶一卷廣明也。



念佛三昧寶王論卷下

念過去佛因果相同門第十四

問曰·念現在佛·專注一境·已聞奧義·所念之佛·窮玄極聖·尊號如來可矣·而能念佛人·俯闕真門·尚在凡位·安得叨竊·言同正覺哉。

對曰·三昧海經云·所念之佛·如出胎師子王·喻佛果也·能念佛人·如在胎師子王·喻佛子也·因果雖殊·威神相繼·論其佛也·更何異焉·欲令在胎師子·便能哮吼飛落走伏者·未之有也··出胎之後·可翹足而待·曾何闕矣·而因果相同·其義一也·又法鼓經云·如波斯匿王與敵國戰·有中毒箭·苦不可堪·聞有良藥·名消毒王·以藥塗鼓·以桴擊之·能令毒箭聲下跳出·平




復如故。若聞釋迦牟尼佛名。及聞信方廣比丘名。能令身中三毒之箭。聲下跳出。是故此經名大法鼓。釋迦即過去佛。果也。比丘即方廣人。因也。彼丈夫兮我丈夫滅罪相同。其義一也。斯兩經雖未階極聖。聞名獲益。與佛不異。故法華三昧師資傳五卷中。說隋朝南嶽思大禪師。有弟子大善禪師。得慈悲三昧。時衡陽內史鄭僧杲。素非深信。嘗會出獵。圍鹿數十頭。謂縣令陳正業曰。公常稱大善禪師有慈悲之力。其如此鹿何。正業即率左右數人齊稱曰。南無大善禪師一聲。于時群鹿飛空而出。舜何人也余何人則與觀音神力。復何異哉。大善與智者齊名於時矣。若不侮聖人之言。則念佛三昧。殄滅魔息災。猶金之在冶矣。鎔因鑄果豈得推移矐曉。而不息哉。



無心念佛理事雙修門第十五

問曰。圓念三世。或專面一方。深固幽遠無人能到謹聞幽義也。皆有念有思。有生



有滅。安得與勝天王所問經以無所念心而修念佛之旨同焉。

對曰。無念之說。人多泣歧。果然。不細精研。猶恐迷徑。果然。今以理事門

辨之。言理門者。真無念也。釋曰。有之與無。即此念而本無矣。正法眼藏

。何者。佛從念生。心即是佛。如刀不自割。指不自觸。佛不自

佛。心不自心。無心。安得佛外立心。心外立佛。佛既不有。心豈有哉

。無心念佛。其義明矣。故世人謂念佛。有念也。吾則謂念佛。

快無念也。更何惑焉。又念即是空。焉得有念。非念滅空。焉得無

念。本不生故無滅念性自空。焉得生滅。又無所念心者。應無所住也。而修念

佛者。而生其心也。無所念心者。從無住本也。而修念佛者。立

一切法也。無所念心者。念即是空也。而修念佛者。空即是念也

。不異之旨。此明中道矣。雙寂曰止也。雙照曰觀也。定慧不均

。非正受也。豈得三昧之名歟。今則照而常寂。無所念心矣。寂

而常照。而修念佛焉。如來證寂照三摩地。念佛三昧究竟之位也



· 故此三昧· 能生首楞嚴王師子吼定· 明矣· 如菩薩念佛三昧經
破相偈曰·

念佛真金色· 安住無著心· 觀法何名佛· 攝心恒相續·

金色非如來· 四陰亦如是· 離色非如來· 想色應當知·

此是佛世尊· 最勝寂靜處· 善能滅一切· 外道諸邪見·

如龍王降雨· 澤及於一切·

此經明六度萬行· 未有一法不是念佛三昧者也·

問曰· 理門已竟· 願示事門· 令其學者得真無念· 叶般若波羅蜜

· 開無相大乘甚深禪定· 不亦博哉·

對曰· 夫理之與事· 相去若何· 前明即事之理· 今明即理之事·

大品經云· 佛為鈍根人說諸法空寂· 以其動生執見也· 為利根人

說諸佛相好· 如其蓮不染塵也· 則須菩提小乘解空第一· 無名無

相· 及夫得記· 當來成佛· 號曰名相如來· 苟非大乘· 當恐聲香




味觸得其便耳。逃遁未暇。安敢盤游名相之園苑歟。既達名相。故獲佛記也。言事門者。夫佛生於心。般舟無念而已至。境出於我。法華不速而自來。無所念心者。絕諸亂想也。而修念佛者。善想一佛也。則文殊所說摩訶般若經云。若人學射。久習則巧。後雖無心。箭發皆中。若人欲入一行三昧。隨佛方所。專稱名字。實智焉能了此念念相續。即於念中見三世佛。如彼習射。既熟之後。無心皆中。非無念也。何耶。是以方等曰。直心直口擬議即禡生矻矻念。勿休息。佛當現也。瓔珞經云。道名一心。多想非道。坐禪三昧經云。菩薩坐禪。不念一切。唯念一佛。如清冷海中。金須彌山王。乃至功德法身。亦如是念。

問曰。若言無念是三昧者。直超無念。更何迂迴而用於念哉。

對曰。楞伽經云。用楔出楔。俗諺云。使賊捉賊。今則以念止念。有何不可。況念之熟也。不謀而自成。不用力矣。如劍客舞劍。



· 忽揮之青雲。以鞞背承。未嘗或失。庖丁解牛。投刃皆虛。音合桑林之舞。此念之熟也。不亦明焉。故起信論云。若知雖說。無有能說可說。雖念亦無能念可念。名為隨順。若離於念。名為得入。得入者。真如三昧也。況乎無念之位。在於妙覺。蓋以了心初生之相也。而言之初相者。所謂無念。非菩薩十地所知。而今之人。尚未階十信。即不依馬鳴大士。從說入於無說。從念入於無念。實恐慕崇臺而輕累土。倒裳索領。其可得哉。大佛頂諸菩薩萬行首楞嚴經云。大勢至法王子。與其同倫五十二菩薩。即從座起。頂禮佛足。而白佛言。我憶往昔恒河沙劫。有佛出世。名無量光。十二如來相繼一劫。其最後佛。名超日月光。彼佛教我念佛三昧。譬如有人。一專為憶。一人專忘。如是二人。若逢不逢。或見非見。二人相憶。二憶念深。如是乃至從生至生。同於形影。不相乖異。十方如來憐念眾生。如母憶子。若子逃逝。



雖憶何為。子若憶母。如母憶時。母子歷生不相違遠。若眾生心。憶佛念佛。現前當來。必定見佛。去佛不遠。不假方便。自得心開。如染香人。身有香氣。此則名曰香光莊嚴。我本因地。以念佛心。入無生忍。今於此界。攝念佛人。歸於淨土。佛問圓通。我無選擇。都攝六根。淨念相繼。得三摩地。斯為第一。




了心境界妄想不生門第十六

問曰。不了心及緣。即起二妄想。今存所念之佛。能念之心。豈非二妄想耶。

對曰。楞伽經云。了心及境界。妄想即不生。不生心者。即種種遠離能相所相。吾今念千輪卍字。紺目白毫種種之相。皆吾自心。無佛可得。緣既不有。心豈有哉。則能相之念。所相之佛。自遠離矣。安得住於二妄想耶。前聖所知。轉相傳授。妄想無性。



於茲悟矣。又如觀佛實相。觀身亦然。遇境皆真。無心不佛。中道之理徧於一切。豈存於所緣之佛歟。又解云。如鼻有墨點。對之明鏡。人惡其墨。但揩于鏡。其可得耶。好惡二字皆如字是非。對之前境。不了自心。但尤於境。其可得耶。未若洗分別之鼻墨。則一鏡圓淨矣。萬境咸真矣。執石成寶矣。眾生即佛矣。故續高僧傳云。齊朝有向居士。致書通好於慧可禪師曰。影由形起。響逐聲來。弄影勞形。不知形是影本。揚聲止響。不識聲是響根。除煩惱而求涅槃者。喻避形而覓影。離眾生而求佛性者。喻默聲而尋響。故知迷悟一途。愚智非別。謂名外別立無名無名作名。因其名。是非生矣。無理作理。因其理。諍論起矣。幻化非真。誰是誰非。虛妄無實。何空何有。將知得無所得。失無所失矣。未及造談。聊申此意。想為答之。慧可禪師命筆述意。答居士曰。說此真法皆如實。契真幽理竟不殊。本迷摩尼謂瓦礫。豁然自覺是真珠。無明智慧



等無異。當知萬法即皆如。破此二見之徒輩。申辭措意作斯書。觀身與佛無差別。何須更覓彼無餘。此二上士。依達摩大師稱法之行。理觀用心。皆是念中道第一義諦法身佛也。必不離念存於無念。離生立於無生。若謂離之而別立者。斯不了煩惱即涅槃。眾生即諸佛。安得悟彼瓦礫如真珠哉。既離之不可。即念佛。而端拱真無念也。即往生。而真無生也。夫如是。則其義煥然。若秋天澄霽。明月出雲矣。豈同愚人觀指而不觀月哉。

⑤

諸佛解脫心中求門第十七

問曰。念佛名真無念。往生名真無生。信矣。維摩經云。諸佛解脫。當於何求。當於一切眾生心中求。既曰一切心中求。何不求於自心。而乃求於外佛耶。

對曰。子謂念佛三昧無上妙禪。非心中求者。不然也。為子明



之。夫心之為行者。行於三境也。一行善境。即念佛三昧。善中之善。天中之天。二行不善境。謂貪瞋癡等。諸惡境界。三行無記境。謂其心不住。善惡不緣。若論夫理性。理徧前三。語其順理。係唯留善境。經云。所謂取我是垢。不取我是淨者。謂不了法性體無慳貪。達於法性舉檀為例而不行施。縱施住施。不能捨施。非垢如何。若能了知隨順法性。行檀波羅蜜。無慳施相。善順於理。非淨如何。不善無記。乖於法性。不可與善聯鑣也。故勝天王問佛。云何菩薩通達禪波羅蜜。佛告天王。菩薩摩訶薩。學般若波羅蜜。行禪波羅蜜。當觀此心。行於何境。若善。不善。無記境界。此專論禪觀若行善境。則勤修習。譬如蓮華。喻至善不停水滴。一不善法。不得暫住。據斯金口。豈有不善無記而不擯之哉。是則順理善心。行於善境。熾然念佛。解脫在行中。若謂念佛心行而非解脫者。不善無記二種心行豈得有哉。念佛三昧微底道破如斯解脫。迷之則滯於浩劫。悟之



則證如反掌。習禪明鏡。允茲在茲。如來世雄。考彼群定。以念
佛三昧為禪中王。諸餘三昧有待有對者。皆匹夫之定耳。然寶王
三昧。此段承上對待而明絕待不住尊相。不住卑相。邪相。正相。生死相。涅槃相。煩
惱相。菩提相。靜相。亂相。成正覺相。度眾生相。坐道場相。
無所得相。以是等相。皆悉不住。猶如夢覺。廓無來去。故大品
云。無去無來是佛。夫如是。則尚遺乎中道。豈住於邊徼哉。如
諸法無行經偈云。

譬如人。於夢中。得佛道。度眾生。此無道。無眾生。
佛法性。亦復然。坐道場。無所得。若不得。則不有。
明無明。同一相。知如是。為世尊。眾生性。即菩提。
菩提性。即眾生。菩薩眾。亦不二。知如是。為世尊。



❖

三業供養真實表敬門第十八

問曰。三昧觀門。已聞奇唱。三業供養。佛在滅後。獻福何多。

對曰。夫論供養法界海者。萬行之中。能淨三業。皆名供養也。

況浪思真境而非供養哉。理趣曰。觀一切法。四句謂稱性修供不廢事行若常若無常。皆不

可得。於諸如來。廣設供養。不亦明焉。又如來在世。嚴薦表誠

。皆言華雲香海。徧微塵刹。猶恨其少。大士所以入觀。用想須

彌為燈炷。大海為油盞。未展殷敬。故焚金色之臂。獻淨明之塔

。金身火燄。洞照十方。則喜見菩薩其例矣。而今之人。但推於邪見

自心。或遙指華樹。乖奉獻之儀。何慢之深也。子問佛在滅後。

獻福何多者。試為明之。且丁蘭刻木於堂。溫清如在。名光青史

。人到于今稱之為真孝子也。若如來在世。金山晃耀。嚴相赫然

。誰有此時不作滅想甚易覩之。不發道意。獻華伸懇。不亦易哉。洎世雄晦迹。月



隱重山。不奉真儀。但傳貝葉。對之形像。此時悟常住佛修常住發無上意。能獻一華

· 此志供甚難此心。足可嘉尚。有如是者。不亦難哉。涅槃云。乃至獻

一華。則生不動國。是則一香一華。一燈一樂。及以飲食。盡心

樂得奉薦三世諸佛者。淨土此學佛基本非此不名正信妙因。成聖元始。安得輕易其事。而

不遵之哉。若離於此行。而聽無稽之言。獻心華。點心燈。焚心

香。禮心佛。而欲求於正覺者。亦何異騁猿猴之巧。守梅林之望

歟。及令妙辯如晨鐘夜炬彼衣心衣。飯心飯。則困拒不已。至於六度萬行。何乃

排於空見之心哉。指心望空之言。其過若此。不可不慎也。真言

門中。瑜伽觀行。亦約事門表相。不一向推心。常嚴薦香華。六


時無廢也。

無相獻華信毀交報門第十九

問曰。華者事也。理在何焉。信之與毀。交報在何。



對曰·華即理也·色即空也·信之報者·悲華經云·昔有王子·名無所畏·手持蓮華·上寶藏佛·佛言·汝以蓮華印於虛空·今與汝號名虛空印·當來成佛·世界名蓮華·佛號蓮華尊·汝是也·國土及佛·皆約昔日所獻蓮華而為號者·欲令明識行因感果之義也·何乃沮檀度之獻華·而欲別遵之無相哉·毀之報者·大方廣總持經說·昔有一比丘佛以不廢事行為正見·住於正見·持華供養·又一比丘·名法行·住於邪見佛以專尚般若廢事行為邪見·坐得四禪·常說空宗般若最勝·謗淨命法師云·淨命所受諸華·不持供養·而自受用·坐此一言·於六萬世·常無舌根·乃至成佛·猶居五濁·彼何人耶·即釋迦是也·佛言·少聞之人病根·於我法中作二說者謂是第一卻成二說可妄論哉·命終之後·墮於地獄·多百千劫·若以惡眼視發菩提心人·得無眼報·以惡口謗發菩提心人·得無舌報·若唯修一般若波羅蜜得菩薩者·往昔迦尸迦王·行菩薩行時·捨所愛身·頭目髓腦·爾時此王·豈無智慧哉



。則知六波羅蜜。應具足修。執一非餘。是為魔業。安得棄獻華之檀波羅蜜。而以惡取空。僭易於般若真無相哉。無舌之報。自貽伊咎。如來所以自引昔非。欲令眾生不覆車於前轍耳。一華若此。一切土木形像。竹帛諸經。剃髮僧尼。住持三寶。戒定慧學。無論福田。及非福田。供養亦通三世悉可敬之。一切皆入真實三業供法界海中。有何不可。而欲略之哉。法華偈云。

若人於塔廟。寶像及畫像。以華香幡蓋。敬心而供養。乃至一小音。皆已成佛道。

◎ 萬善同歸皆成三昧門第二十

問曰。夫施燈長明。生日月宮。華香幡蓋。與燈未異。盡生天之福也。而云皆已成佛道者。何酬報之深哉。

對曰。如帝王行幸。萬乘千官。步卒已來。皆帶御字。犯之天仗



· 死在斯須。若鑿輅還宮。步卒放散。歸乎村墅。苟稱於御宇。亦死在斯須。且步卒是同。而生死有異。蓋為緣起之殊。有茲寵辱也。向若華蓋香燈。不過法華經王命之天仗。實亦報在天宮。今逢三昧寶王。猶當扈從。乃至獻一華。皆已成佛道。斯則佛種從緣起。理教然耳。亦猶鳥向須彌。皆同一色。川朝巨海。無復異名。故大寶積經。文殊普門會。會天龍八部地獄畜生色聲香等。一切萬法。皆三昧者。亦猶毛容巨海。芥納須彌。豈毛芥之神乎。蓋神者神之耳。緣了二因則知解猶於目。行類於足。解正即行正。解邪即行邪。魔佛淺深。俱憑於解。故涅槃曰。於戒緩者。不名為緩。於乘緩者。乃名為緩。乘者即慧解之稱也。一行既爾。萬行皆然。法華三昧者。即念佛三昧也。是以如來名此勝定。為三昧寶王。為光明藏。為除罪珠。為邪見燈。迷衢者導。王子金印。貧夫寶藏。空三昧。聖三昧陀羅尼。真思惟。最勝觀。如意珠。



佛性·法性·僧性·無盡藏·勝方便·大慧光明·消惡觀法三昧
等·故知教理行果·八萬四千波羅蜜門·皆是念佛三昧之異名也
此名萬行皆即佛故皆成佛
·夫如是·則獻一華·徧奉於三世塵刹·念一佛·體通於未來世
雄·如大地而為射的·豈有箭發而不中者哉·不然·則為思益經
畏空捨空行空索空之誚耳·客曰·醫去留藥·商行寄金·前賢所
藏·非其人不可·弟子味道惜學·輒窺三昧之門·尚期無生·每
希一實之唱·如王奧旨·法之寶印·動寂雙照·理事圓融·舉心
咸真·觸類而長·稱於南無·皆成於佛道·散華彈指·盡超於菩
提·經王所在而自尊·目翳金錕而抉膜·二十義門·未嘗聞諸·
欣澡雪輕眾生之愆·得優游寶莊嚴之土·何其幸也·願不易此身
·獲醍醐之妙記·悟當來諸佛即眾生是焉·遂稽首多寶塔·對之
蓮華僧·與吾普觀十方尊·圓念三世佛·長跪叉手·而說頌曰·
一心憶念過去佛·亦憶未來諸世尊·



現在一切人中雄·亦學於其所說法·
無有一佛在過去·亦無現世及當來·
唯此清淨微妙禪·彼不可言證能說。

念佛三昧寶王論



◎◎

舊跋

比丘正知·向見雲棲大師淨土代言·有唐朝寶王論·列在名存
書不存中·心甚慕之。生年三十·萬融師得此古本相贈·喜出
望外·梓版於姑蘇慧慶寺·丙戌·重梓於祖堂幽栖寺·伏願法
界有情·同生極樂世界。

淨土十要第五



明・蕩益大師選定

淨土或問

淨土十要
(六)



靈峯蕩益大師選定淨土十要第六

述曰。吾觀古今法運盛衰之故。而後知禪淨共為隆替者也。人唯未悟。故不了生死利害。豈有悟而猶輕一生不退者乎。人唯未悟。故不了諸佛甚深境界。豈有悟而猶見等流俗者乎。永明諸老。料揀禪淨。如道自家屋裏事。由其徹悟確自宗故耳。末世禪道大壞。食唾者多。於是淨土一宗。異見茁長。由唐至宋。荆棘叢生。天如為中峯最勝子。故能繼永明諸老。力扶淨土之衰。今觀或問一書。較諸天台紫閣。其間邪幟徧樹。見網交羅。作者推陷廓清。其劬勞亦未免倍甚。蓋禪淨俱衰使然。讀者亦可以觀時變矣。然諸老匡扶淨土。實救確本宗。或問開章。謂永明深有功於宗教。此等語。偷心未盡者。未肯遽以為然。然



使宗教上流。能參破第一則淆譌公案。能講透第一箇差別名相。趙州說的
 超然於凡外權小路歧。一去不復更入。又能普於十方。為諸
 迷者徧破徧透徧超。而謂宗教之能事不畢於此。吾不信也。序
 次十要。由十疑寶王而至或問。深有感於法運盛衰之故。因為
 弄引。請益後賢。

評點淨土或問感賦（有小引）

余讀淨土或問。有懷於天如老人深有功於宗教一語。遂謬為評
 點。時度夏華陽度雲精舍。谿樓山影。雲物靜好。漫賦古興一
 篇。賦成。三歎而感之。謹錄於首。聊當題詞。

窗外青山如列屏。山下清流朱絃聲。窗中有人拭几塵。
 熟讀天如六字經。世人皆悟向上竅。又能悟得心王妙。
 須彌芥子都躡跳。露柱燈籠齊廝鬧。獨有一箇佛名號。



千悟萬悟悟不到。是為甚難天如兩眼爍如火。滑譎公案直下剖。

不從門外循牆走。真法身向上恰恰自家屋裏坐。真主中主愚夫愚婦閒活計。

恰恰自家屋裏事。清淨海眾恆沙沙數諸通明。恰恰自家屋裏人。

空中迅鳥迹如畫。三不退位恰恰自家屋裏話。窗外青山如鏡裏。

山下清流鏡中水。鏡中有人逐雲起。寶王三昧應如是。

奇哉一句阿彌陀。勘破宗教諸禪和。就中也有無奈何。

曾聽城邊霜月歌。

戊申仲夏白月孟齋日。私淑後學成時。題於度雲庵雲氣樓之

谿窗左个。



淨土或問

元師子林天如維則述

天如老人。方宴默於臥雲之室。有客排闥而入者。禪上人也。因命之坐。坐久。夕陽在窗。篆煙將滅。客乃整衣起立。從容而問

曰。竊聞永明壽和尚。稟單傳之學於天台韶國師。是為法眼的孫

。匡徒於杭之淨慈。座下常數千指。其機辯才智。雷厲風飛。海

內禪林。推之為大宗匠。奈何說禪之外。自修淨土之業。而且以


教人。復撰揀示西方等文。廣傳於世。及作四料揀偈。其略曰。

有禪無淨土。十人九蹉路。無禪有淨土。萬修萬人去。看他此等

語言。主張淨土。無少寬容。無乃自屈其禪。而過讚淨土耶。此

放過則不可疑非小。師其為我辯之。

答曰。大哉問也。當知永明非過讚也。深此話文長有功於宗教者也。惜永



明但舉其綱。而發明未盡。故未能盡遣禪者之疑也。余忝學禪。

四料揀亦不略人未精研耳

宗龍

未諳淨土。然亦嘗涉獵淨土諸書。稍知其概。本是易行易入之方

二句說盡

。亦是難說難信之法。所以釋迦慈父現在世時。為諸弟子說彌陀

經。預知末法眾生。少能信向。故引六方諸佛出廣長舌說誠實言

。以起其信。以破其疑。及於經末。因諸佛所讚。乃復自言。當

知我於五濁惡世。行此難事為一切世間說此難信之法。是為甚難

。此皆苦口叮嚀。勸人信向矣。且大悲世尊垂救末劫。凡金口所

宣。一偈一句。而人非人等。莫不信受奉行。獨於淨土之說。則

間有疑者。何哉。良由淨土教門。至廣至大。淨土修法。至簡至

易。以其廣大而簡易。故聞者不能不疑焉。所謂廣大者。一切機

麼道理

根。攝收都盡。上而至於等覺位中。一生補處菩薩。亦生淨土。

下而至於愚夫愚婦。與夫五逆十惡無知之徒。臨終但能念佛悔過

。歸心淨土者。悉獲往生也。所謂簡易者。初無艱難勞苦之行。

是甚麼



又無迷誤差別之緣。但持阿彌陀佛四字名號。由此得離娑婆。得

生極樂。得不退轉。直至成佛而後已也。其廣大既如彼。其簡易

又如此。故雖智者。亦不能無疑焉。汝如知此。則知永明之讚。

深有意焉。而非過也。

問曰。廣大簡易。既聞命矣。如禪宗悟達之士。既曰見性成佛。

其肯復求淨土之生乎。

答曰。汝未之知耳。悟達之士。政願求生。古人云。不生淨土。

何土可生。汝但未悟。使汝既悟。則汝淨土之趨。萬牛不能挽矣。

上二答皆略。詳在下第三答。

問曰。佛祖出世。為度眾生。學者但患大事不明。大事既明。當

行佛教。隨類化身。入泥入水。不避生死。廣度生靈。今悟達之

士。求生淨土。則厭苦趨樂。不顧他人。此非吾所願也。

答曰。見卵而求時夜。何太早計耶。汝將謂一悟之後。習漏永除



· 便得不退轉耶。汝將謂一悟之後，更無徧學佛法修行證果等事耶。汝將謂一悟之後，便可上齊諸佛。入生入死，不受障緣之所撓耶。審如是，則諸大菩薩修六度萬行，動經恆河沙數劫者，反有愧於汝矣。古教有云。聲聞尚有出胎之昧。菩薩亦有隔陰之昏。況近時薄解淺悟，而自救不了者乎。縱有悟處深遠，見地高明，行解相應，志在度人者，奈何未登不退，力用未充，居此濁惡，化此剛強，此亦先聖之所未許。如以未完不固之舟，濟多人於惡海，自他俱溺，其理必然。故往生論云。欲遊戲地獄門者，必生彼土。得無生忍已，還入生死，救苦眾生，以此因緣，求生淨土。又先聖有云。未得不退轉位，不可混俗度生。未得無生法忍，要須常不離佛。譬如嬰兒，常不離母。又如弱羽，只可傳枝。今此國中，釋迦已滅，彌勒未生。而況四惡苦趣，因果牽纏。外道邪魔，是非扇亂。美色淫聲之相惑。惡緣穢觸之交侵。既無現



佛可依。又被境緣所撓。初心悟達之人。少有不遭其退敗者。所

果然險難

以世尊殷勤指歸極樂者。良有以也。蓋彼彌陀。現在說法。樂土

小本一經此六句釋盡

境緣。種種清淨。倘依彼佛。忍力易成。高證佛階。親蒙授記。

然後出化眾生。去來無礙也。以是之故。雖上根利器。猶願託生

。況汝中下之輩。初得發明者乎。豈不見觀佛三昧經中。文殊自

敘宿因。謂得念佛三昧。常生淨土。世尊復記之曰。汝當往生極

樂世界。又不見華嚴經中。普賢勸進善財童子。海會大眾。以十

大願王。導歸極樂。其偈云。願我臨欲命終時。盡除一切諸障礙

。面見彼佛阿彌陀。即得往生安樂刹。又云。彼佛眾會咸清淨。

彼欲速反遲者何不思此

我時於勝蓮華生。親覩如來無量光。現前授我菩提記。蒙彼如來

授記已。化身無數百俱胝。智力廣大徧十方。普利一切眾生界。

又不見入楞伽經中。授記龍樹偈云。南天竺國中。大名德比丘。


厥號為龍樹。能破有無宗。世間中顯我。無上大乘法。得初歡喜



地。往生安樂國。又不見起信論中。馬鳴菩薩有求生之願。無量壽論。天親菩薩有願往之心。又不見大寶積經中。印許淨飯王。及七萬釋種。同生安養。十六觀經中。指示韋提夫人。及五百侍女。同覲彌陀。且淨飯韋提等。皆是現得無生法忍。西竺似此之流。不可得而勝數矣。東土如廬山遠公。合社高人。天台賢首。諸宗尊者。自行化他。曰僧曰俗。同生淨土者。又可得而勝數耶。只如文殊普賢。大菩薩也。善財海眾。徧參知識。悟同諸聖者也。馬鳴龍樹等。亦菩薩也。亦禪宗以為大祖師也。此諸聖人所悟所證。比今悟達之士。為何如哉。彼尚願生樂國。親近彌陀。而汝一悟之後。并蛙夏蟲更不求生。則龍樹馬鳴普賢文殊等。反不若汝。汝何不自揣其心。自量其力。至公至明至虛至平所修所證。誠有過於二菩薩。二禪祖者乎。所參知識。所悟佛性。誠有過於善財海眾者乎。所得無生法忍。受佛印證。誠有過於淨飯韋提者乎。淨飯國王。佛之



父也。七萬釋種。佛之親屬也。淨土之生。倘無利益。佛忍自誤。家常話屋
其父與親屬乎。向謂得無生法忍者。可許混俗度生。今其父王親屬既得此忍。而尚記往生。則如來護持保養之意。豈不深且遠乎。
多見今之禪者。不究如來之了義。不知達摩之玄機。空腹高心。病根
習為狂妄。見修淨土。則笑之曰。彼學愚夫愚婦之所為。何其鄙哉。余嘗論其非鄙愚夫愚婦也。乃鄙文殊普賢龍樹馬鳴等也。非大智必以為鄙
非特自迷正道。自失善根。自喪慧身。自亡佛種。且成謗法之業。
又招鄙聖之殃。佛祖視為可哀憐者。於是永明和尚。深憐而痛哀之。剖出心肝。主張淨土。既以自修。又以化世。故其臨終。預知時至。乃有種種殊勝相現。舍利鱗砌於身。嘗有撫州一僧。經年旋繞其塔。人問其故。僧曰。因病入冥。閻王以陽數未艾。得放還生。乃見殿左供養畫僧一幀。閻王禮拜殷勤。遂扣主吏。吏曰。此永明壽禪師也。其修行精進。徑生極樂上品。王故圖像



而禮敬之。夫永明既悟達摩直指之禪。又能致身於極樂上品。以聲和形直

此解禪者之執情。以此為末法之勸信。故余謂其深有功於宗教者指云何費力至此

。此也。豈特永明為然。如死心新禪師作勸修淨土之文。有云。

彌陀甚易念。淨土甚易生。又云。參禪人最好念佛。根機或鈍。

恐今生未能大悟。且假彌陀願力。接引往生。又云。汝若念佛不正知見癡人反以

生淨土。老僧當墮拔舌地獄。又如真歇了禪師作淨土說。有云。

洞下一宗。皆務密修。其故何哉。良以念佛法門。徑路修行。正真不欺之宗

按大藏接上上根器。傍引中下之機。又云。宗門大匠。已悟不空

不有之法。秉志孜孜於淨業者。得非淨業之見佛。尤簡易於宗門

乎。又云。乃佛乃祖。在教在禪。皆修淨業。同歸重門洞開一源。入得此

門。無量法門。悉皆能入。至如天衣懷禪師。圓照本禪師。慈受

深禪師。南嶽思禪師。法照禪師。淨靄禪師。淨慈大通禪師。天

台懷玉禪師。梁道珍禪師。唐道綽禪師。毘陵法真禪師。姑蘇守



訥禪師。北礪簡禪師。天目禮禪師等。諸大老。皆是禪門宗匠。
究其密修顯化。何嘗忌顯說發揚淨土之旨。則不約而同。豈特諸大老為然。再轉如迴風生紫淵
余嘗聞一老宿言曰。合五家之宗派。盡天下之禪僧。悟與未悟。
無有一人不歸淨土者。因問其故。乃曰。如百丈大智海禪師。是
江西馬祖傳道之的。天下叢林。依他建立。從古至今。無一人
敢議其非。天下清規。依他舉行。從始至末。無一事敢違其法。
看他為病僧念誦之規云。集眾同聲。舉揚一偈。稱讚阿彌陀佛。
復同聲稱念南無阿彌陀佛。或百聲。或千聲。回向伏願云。諸緣
未盡。早遂輕安。大命難逃。徑歸安養。此非淨土之指歸乎。又
看他津送亡僧。大眾念誦回向伏願云。神超淨域。業謝塵勞。蓮
開上品之華。佛授一生之記。此非淨土之指歸乎。至於茶毘之際
。別無所為。但令維那引聲高唱南無西方極樂世界大慈大悲阿彌
陀佛。如是十唱。而大眾十和。總名之曰十念也。唱畢。復回向



云·上來稱揚十念·資助往生。此非淨土之指歸乎。自百丈以來
·凡所以津送亡僧·皆依此法。然則所謂合五家之宗派·盡天下
之禪僧·無有一人不歸淨土者·豈不然乎。以余觀老宿所引之言
·誠有所據而不容辯矣。又因其言·遂悟百丈祖師立法之意·亦
豈無所據而然耶·汝在叢林津送亡僧·不知其幾矣·此等回向十
念·口裏唱過·耳裏聽過·又不知其幾矣。後生嫌老口汝既不會祖師之意·
又自不發省覺之心。成群逐隊去也妄謂悟達之士不願往生·則天下禪者之執·
莫汝若矣。

第四問曰·淨土攝機·誠乎其廣矣·愚不敢復議矣·然亦嘗聞有唯心

淨土·本性彌陀之說·愚竊喜之。滿肝及觀淨土經論·所謂淨土者·

十萬億土外之極樂也·所謂彌陀者·極樂國中之教主也。是則彼

我條然·遠在唯心擬議不來遭一擲本性之外矣。果何謂耶。

答曰·汝言局矣·不識汝心之廣大而明妙者矣·楞嚴云·色身外



洎山河虛空大地。咸是妙明真心中物。又云。諸法所生。唯心所現。安有佛土而不在吾心者哉。當知淨土唯心。心外無土。如大海之現群漚。無一漚能外海也。唯心淨土。土外無心。猶眾塵之依大地。無一塵不名地也。又當知先聖有云。唯此仍當尋台藏及重一心。具四種峰梵網玄義或彌陀要解土。一曰凡聖同居。二曰方便有餘。三曰實報無障礙。四曰常寂光也。一凡聖同居土者。自分二類。初曰同居穢。次曰同居淨。初同居穢土者。娑婆亦未明淨穢之所以之類是也。居其中者。有凡有聖。而凡聖各二。凡居二者。一惡眾生。即四趣也。二善眾生。即人天也。聖居二者。一實聖。即四果辟支。通教七地。別十住。圓十信後心。通惑雖盡。報身猶在。皆名實也。二權聖。謂方便實報寂光土中法身菩薩及妙覺佛。為利有緣。應生同居。皆是權也。是等與凡共住。故云凡聖同居。四趣共住。故云穢土也。次同居淨土者。且如極樂國。雖果報殊勝。非餘可比。然亦凡聖同居。何以故



· 雖無四趣· 而有人天· 以生彼土者· 未必悉是得道之人· 如經云· 犯重罪者· 臨終懺悔念佛· 即得往生· 故知雖具感染亦得居也· 聖居權實· 類前可知· 但以無四惡趣· 故名為淨· 或曰· 具明土相· 復多不同· 如無動界· 雖是淨土· 猶有男女及須彌等· 淨土既其不同· 穢土亦應不等也· 二方便有餘土者· 二乘· 三種菩薩· 證方便道者之所居也· 何則· 若修二觀· 斷通惑· 盡塵沙· 別惑無明未斷· 捨分段身而生界外· 受法性身· 即有變易· 所居之土· 名有餘者· 無明未斷也· 名方便者· 方便行人之所居也· 故釋論云· 出三界外有淨土· 聲聞辟支佛出生其中· 受法性身· 非分段生也· 三實報無障礙土者· 無有二乘· 純諸法身菩薩所居· 破無明· 顯法性· 得真實果· 而無明未盡· 潤無漏業· 受法性報身· 亦名果報國· 仁王經云· 三賢十聖住果報是也· 以觀實相· 發真無漏· 所得果報· 故名為實· 修因無定· 色心無礙· 故



名實報無障礙土。華嚴明因陀羅網世界是也。四常寂光土者。妙覺極智所照如如法界之理。名之為國。亦名法性土。但真如佛性。非身非土。而說身土。離身無土。離土無身。名身土者。一法二義。普賢觀。毘盧遮那住處。名常寂光。前二土是應。即應佛所居。第三亦應亦報。即報佛所居。第四但是真淨。非應非報。法身所居。又云。常即法身。寂即解脫。光即般若。如世伊三點。不縱橫並別。名秘密藏。諸佛如來所遊居處。真常究竟。極為淨土。上皆約惑業智斷機感而論故一切唯心由是觀之。所謂十方微塵國土者。唯吾心中之土也。三世恆沙諸佛者。唯吾心中之佛也。知此。則知無一土不依吾心而建立。無一佛不由吾性而發現。然則十萬億外之極樂。獨非唯心之淨土乎。極樂國中之教主。獨非本性之彌陀乎。又當知唯此一心。具含十界。身土融通。重重無礙。又當知心佛眾生。三無差別。生佛互現。念念交參。所以云。諸佛心內眾生。塵塵極樂。眾



生心中諸佛。念念彌陀。又云。十方淨穢。卷懷同在於剎那。一念色心。羅列徧收於法界。並天真本具。非緣起新成。一念既然。一塵亦爾。故能一一塵中一切剎。一一心中一切心。一一心塵復互周。重重無盡無障礙。一時頓現非隱顯。一切圓成非勝劣。若神珠之頓含眾寶。猶帝網之交映千光。我心既然。生佛體等。如此。則方了遷神億剎。實生乎自己心中。孕質九蓮。豈逃乎剎那際內。又云。極樂徧在一切處。舉一而全收也。如帝釋殿上。千珠寶網。千珠光影咸入一珠。一珠光影徧入千珠。雖珠珠互徧。此珠不可為彼。彼珠不可為此。參而不雜。離而不分。一一徧彰。亦無所在。極樂淨土。即千珠之一。十萬億國。亦各千珠之一。至若三乘人天。下至地獄餓鬼畜生修羅。一一無非千珠之一。阿彌陀佛。亦千珠直示一珠。見一佛。即見十方諸佛。亦見十方九界眾生。微塵剎海。十世古今。一印頓圓。還自肯塵無餘法矣。如上



所引。皆佛祖聖賢遞相發揚之明訓也。知此。則知諸刹諸塵。淨宗究竟之塵

塵皆唯心之極樂也。論豈擬議得來耶一塵一佛。佛佛皆本性之彌陀也。復何疑哉。

第五 問曰。既謂淨穢融通。塵塵極樂。何娑婆獨不免於穢耶。

答曰。凡夫業感。即淨而穢。佛眼所觀。即穢皆淨。豈釋迦報境

而果穢哉。

第六 問曰。含攝無餘。吾信唯心之大矣。圓融無礙。吾信唯心之妙矣。

奈何尚滯迷情。要問未離穢業。則吾唯心之土。何由淨耶。

答曰。心垢土垢。心淨土淨。故維摩經云。欲得淨土。當淨其心


。隨其心淨。則佛土淨。夫欲淨其心者。捨淨土之修法。確起他無能

焉。

第七 問曰。淨土修法。其詳可得聞乎。

答曰。淨土無修。修因迷有。法無高下。法各自分高下高下由根。根有多殊。

修分多類。攝其多類。總有三門。一曰觀想。二曰憶念。三曰眾



行。皆依極樂彌陀以為之主也。一曰觀想者。如觀經云。諸佛如
亦為憶念取行之本不獨觀想為然
來是法界身。入一切眾生心想中。是故汝等心想佛時。是心即是
三十二相。八十隨形好。是心作佛。是心是佛。諸佛正徧知海。
從心想生。是故應當一心繫念諦觀彼佛。天台疏曰。諸佛如來下
。泛明諸佛。是故應當下。徧觀彌陀。法界身者。報佛法性身也
。眾生心淨。法身自在。故云入。如白日昇天。影現百川。明佛
身自在。能隨物現也。又法界身是佛身無所不徧。法界為體。得
此觀佛三昧。解入相應。故云入心想也。是心作佛者。佛本是無
。心淨故有。是心是佛者。向聞佛本是無。心淨故有。便謂條然
。故云即是。始學名作。終成即是。妙宗釋曰。欲想佛身。當明
最要
觀體。體是本覺。起成能觀。本覺乃是諸佛法界之身。以諸佛無
別所證。全證眾生本性故也。若始覺有功。本覺乃顯。故云法身
從心想生。又彌陀與一切佛。一身一智。應用亦然。彌陀身顯。



即諸佛身。諸佛相明。即彌陀體。故泛明諸佛。以為彌陀觀體。從法界身下。是約感應道交釋。從又法界身下。約解入相應釋。融心解云。若無初釋。則觀非觀佛。若無次釋。則生佛體殊。二釋相成。是今觀法。妙宗又曰。今之心觀。非直於陰觀本性佛。乃託他佛顯乎本性。故先明應佛入我想心。次明佛身全是本覺。故應佛顯。知本性明。託外義成。唯心觀立。若論作是。即不思議三觀也。以若破若立名作。空假二觀也。不破不立名是。中道觀也。全是而作。則三諦俱破俱立。全作而是。則三諦俱非破立。即中之空假名作。能破三惑。能立三法。故感他佛三身圓應。能成我心三身當果。即空假之中名是。則全惑即智。全障即德。故心是應佛。心是果佛。故知作是一心。修此三觀。乃諸觀之總體。一經之妙宗也。又曰。此觀能令四佛土淨。具橫豎二義如是方為此經宗致。乃至云。此經本為韋提希厭同居穢。求同居淨。故談妙觀。




觀彼依正。三觀若成。麤垢先落。非有餘淨。更生何處。須知正為生同居淨。故立三觀。良由觀妙。能破三惑。不獨感於同居淨土。隨其惑斷淺深之處。自然感得有餘等三土。如病須藥。本為身安。求得仙方。修合服之。不但身安。兼能輕骨。身安可喻生同居淨。輕骨可喻感上三土。只是一藥。效乃深勝。如一妙觀。能淨四土。解云。韋提本欲捨穢取淨。而佛示觀法。捨穢必盡。顯淨無遺。如月蓋為免舍離果報之病。故請觀音。及乎宣呪。乃能消伏三毒之根。具足五眼之果。故一心三觀求生淨土者。以三惑為穢土之因。以三諦為淨土之果。故別惑盡。則寂光淨。究竟三諦也。別惑未盡。則實報淨。分證三諦也云云。如上所明一心三觀。能破三惑。能淨四土。其惑未破而生安養同居者。託勝增修。則有餘等三淨可待矣。且教有云。五濁輕重。同居淨穢。而圓觀輕濁所感同居。依正最淨。比修戒善及餘經眾善感安養土。

此橫義

此豎義



其相天殊。故天台宗以圓觀為定善也。二曰憶念者。或緣相好。或持名號。皆名憶念。而有理有事。此下理事學者更須精研如華嚴解脫長者云。我若欲見安樂世界無量壽如來。隨意即見。如是十方一切世界所有如來。要解我若欲見。隨意即見。我能了知一切如來。國土莊嚴。神通等事。無所從來。亦無所至。無有處所。亦無住處。亦如己身。無來無去。無行住處。然彼如來不來至此。我不往彼。知一切佛。及與我心。皆如夢故。如夢所見。從分別生。見一切佛。從自心起。又知自心如器中水。悟解諸法如水中影。又知自心猶如幻術。知一切佛如幻所作。又知自心諸佛菩薩。悉皆如響。譬如空谷。隨聲發響。悟解自心。隨念見佛。我如是知。如是憶念。所見諸佛。皆由自心。貞元疏曰。無所從來下。正辨唯心。即心無心。便入真如。了彼相虛。唯心現故。既了唯心。了心即佛。故隨所念。無非佛矣。下例四喻。通顯唯心。喻無來往。別喻兼明不



出入等。四喻皆具四觀。一正是唯心。二唯心故空。三唯心故假。四唯心故中。融而無礙。即華嚴意。夢喻不來不去。影喻不入。幻喻非有非無。響喻非合非散。又如般舟經。教修佛立三昧。專念彌陀。其略云。常念彼佛。譬如夢見金寶親屬。相與娛樂等。永明曰。此喻唯心所作。即有而空。故無來去。又如幻非實。則心佛兩忘。而不無幻相。則不壞心佛。空有無礙。即無去來。不妨普見。見即無見。常契中道。是以佛實不來。心亦不去。感應道交。唯心自見。又如楞嚴大勢至云。子若憶母。如母憶時。母子歷生不相違遠。至我本因地。以念佛心。入無生忍。誓川以理事判之曰。觀其母子相憶之喻。則是同居事相而已。觀其自證無生法忍。則念佛心不可單約事相而解。念存三觀。佛具三身。心破三惑。無生忍位。乃可入焉。又如彌陀經云。執持名號。至一心不亂。淨覺曰。一心不亂。例前妙觀。同名正受。即定。



心定善也。據往人之論。則有理應先明事持事。若達此心四次明事四性不生。與空一心理慧相應。是理如要解所明一心。若用心存念。念念不間。名事一心也。真歇亦曰。一心不亂。兼含理事。若事一心。人皆可以行之。由持名號。心不亂故。如龍得水。似虎靠山。此即楞嚴憶佛念佛。現前當來必定見佛。去佛不遠。不假方便。自得心開。連攝中下二根之義也。若理一心。亦非他法。但將阿彌陀佛四字。做箇話頭。二六時中。直下提撕。不以有心念。不以無心念。不以亦有亦無心念。不以非有非無心念。前後際斷。一念不生。不涉階梯。徑超佛地。余嘗評之。不以有心念等。文有四節。可配三觀。初節配空。次節配假。第三雙離。第四雙即。雙離雙即。可配中觀。蓋彼中觀。亦含遮照之義也。合而言之。無非以修契性。顯其當處。即空。全體即有。亦非空有。亦是空有。不可湊泊。不可擬議。心路絕處。即名為佛。如上略舉數條。通名憶念。而各分理事。



其理念者·與圓觀同·能破三惑·能淨四土·此攝上上根也·若其事相念者·近則感同居淨·遠則可為上三土之因耳·降此以下·事相不等·如諸經所說·或一生繫念·或三月繫念·或晨朝十念·或七七日念·或十日十夜六時中念·或一日一夜不斷專念·加以深信之力·淨願之力·佛加被力·皆生極樂·又下而至於逆惡凡夫·臨終十念·亦許得生·此攝中根及下下根也·三曰眾行者·如華嚴經·普賢菩薩勸進善財童子海會大眾·發十大願·一者禮敬諸佛·二者稱讚如來·三者廣修供養·四者懺悔業障·五者隨喜功德·六者請轉法輪·七者請佛住世·八者常隨佛學·九者恆順眾生·十者普皆回向·其一願皆云·虛空界盡·眾生界盡·眾生業盡·眾生煩惱盡·我願乃盡·而虛空界乃至眾生業煩惱不可盡故·我此願王無有窮盡·念念相續·無有間斷·身語意業·無有疲厭·至最險難時臨命終時·偷心戲論最後剎那·悉用不著一切諸根·悉皆散壞·



一切威勢。悉皆退失。輔相大臣。宮殿內外。象馬車乘。珍寶伏藏。無復相隨。唯此願王。者裏是甚麼所在不相捨離。於一切時。引導其前。一神速有過此者乎剎那間。即得往生極樂世界。到已。即見阿彌陀佛。其人自見生蓮華中。蒙佛授記。得授記已。經無數劫。豎窮橫徧有過此者乎普於十方不可說不可說世界。以智慧力。隨眾生心。而為利益。乃至能於煩惱大苦海中。拔濟眾生。令其出離。無不還歸此法界皆得往生極樂世界。又如法華經云。聞是經典。如說修行。於此命終。即往極樂世界阿彌陀佛大菩薩眾圍繞住處。生蓮華中。寶座之上。不復為貪欲所惱。亦復不為瞋恚愚癡所惱。亦復不為憍慢嫉妒諸垢所惱。得菩薩神通。無生法忍。又如大寶積經。發十種心。往生極樂。佛告彌勒。如是十心。非諸凡愚不善丈夫具煩惱者之所能發。何者為十。一者。於諸眾生。起於大慈。無損害心。二者。於諸眾生。起於大悲。無逼惱心。三者。於佛正法。不惜身命。樂守護心。四者。於一切



法·發生勝忍·無執著心·五者·不貪利養恭敬尊重·淨意樂心·六者·求佛種智·於一切時·無忘失心·七者·於諸眾生·尊重恭敬·無下劣心·八者·不著世論·於菩提分·生決定心·九者·種諸善根·無有雜染·清淨之心·十者·於諸如來·捨離諸相·起隨念心·是名菩薩發十種心·由是心故·當得往生·若人於此十心·隨成一心·樂欲往生彼佛世界·若不得生·無有是處·又如觀經云·欲生彼國者·當修三福·一者·孝養父母·奉事師長·慈心不殺·修十善業·二者·受持三歸·具足眾戒·不犯威儀·三者·發菩提心·深信因果·讀誦大乘·勸進行者·此三種業·過去未來現在諸佛淨業正因·疏曰·初業共凡夫·次業共二乘·後業乃大乘不共之法也·又如大本·三輩發菩提心及諸經論所明誦經持呪·建塔造像·禮拜讚頌·奉持齋戒·燒香散花·懸繒幡蓋·凡一行一事·足以求生者·資之以信願回向之力·無

此是行本



不生也。如上泛引。通名眾行。然願行既有大小之不等。而又各有理事之不同。且如華嚴十願。寶積十心之類。生於極樂者。其所感依正之勝。及所見之佛。所聞之法。較諸小行常流。應必懸異也。

第八問曰。吾聞善財童子。圓頓利根。一生取辦。正是一生今乃不生華藏。而勸生極樂。此何意耶。

答曰。華嚴疏中。自有此問。彼所答云。有緣故。歸憑情一故。

不離華藏故。互為主伴即本師故。謂華藏中所有佛刹。皆微塵數。極樂去

此十萬億土。並未出於刹種之中。故不離也。經云。或有見佛無量壽。觀自在等共圍繞。此讚遮那隨名異化。故即本師也。又曰

。普賢為善財海眾。結歸極樂者。蓋為信解圓宗之人。入文殊智。修普賢行。然則極樂非華藏彌陀非毘盧耶福慧事理皆稱法界。此大心人。雖妙悟本明。頓同

諸聖。然猶力用未充。未及如來出世普利眾生。所以暫依淨土。情一



親近彌陀^{有緣}。直至成佛。意在此也。

問曰^{第九}。眾行門中。既云大小不等。理事有殊。所感生相。亦乃懸

異。然則觀想憶念二門。修各不等。其所感相。同耶異耶。

答曰。皆不同也。故永明曰。九品往生。事非一等。或遊化國。

見佛應身。或生報土。見佛真體。或一夕。而便登上地。或經劫

。而方證小乘。或利根鈍根。或定意散意。或道悟遲速。而機器

不同。或花開早晚。而時限有異。又慈雲曰。雖分九品。猶是略

分。若更細分。亦應無量。

問曰^{第十}。極樂只是同居。本非實報。何謂或生報土。見佛真體耶。

答曰。你將謂同居之外。別有實報耶。當知三土。不離同居。特

身境受用。遞遞不相同耳。如經云。彌陀佛身高六十萬億那由他

恆河沙由旬等。古師曰。此實報身也。又誓川曰。極樂國土。四

土不同。豈但極樂為然。荊溪云。直觀此土。四土具足。如當時



四土兼約修德所以最勝如下條
華嚴海會。不離逝多林。而諸大聲聞。不知不見。即此類也。
答問是也

十一問曰。既云此土四土具足。只消就此展轉修行。反欲捨此而生彼國。何耶。

答曰。此方雖具四土。奈何穢業難除。夫欲捨穢取淨。勢須彼國求生。四明云。此土濁重。十信方出苦輪。彼土境勝。九品悉皆不退。豈不聞大通佛世。受教之徒。已經塵點劫來。尚在聲聞之地。皆因退轉。故涉長時。如身子已證六心。猶自退落五道。況悠悠修行者乎。蓋由此土。難難多值退緣。故云。魚子菴羅華。菩薩初發心。三事因中多。及其結果少。苦苦若生極樂。藉彼勝緣。博地

凡夫。便皆不退。以是之故。求生彼國也。

十二問曰。同居淨土。其類甚多。今偏指極樂。而又偏讚其境勝緣勝。何耶。

答曰。經云。彼國眾生。無有眾苦。但受諸樂。故名極樂。今以

對比今



生欣厭又極樂殊勝非界內心量可知唯就娑婆對比
娑婆對而比之。此則血肉形軀。有生皆苦。彼則蓮華化生。無生
苦也。論耳此則時序代謝。衰老日侵。彼則寒暑不遷。無老苦也。此
則四大難調。多生病患。彼則化體香潔。無病苦也。此則七十者
稀。無常迅速。彼則壽命無量。無死苦也。此則親情愛戀。有愛
必離。彼無父母妻子。無愛別離苦也。此則仇敵怨讎。有怨必會
。彼則上善聚會。無怨憎會苦也。此或因苦饑寒。貪求不足。彼
皆衣食珍寶。受用現成。此或醜穢形骸。根多缺陋。彼則端嚴相
貌。體有光明。此則輪轉生死。彼則永證無生。此有四趣之苦。
彼無三惡之名。此則丘陵坑坎。荊棘為林。土石諸山。穢惡充滿
。彼則黃金為地。寶樹參天。樓聳七珍。花敷四色。此則雙林已
滅。龍華未來。彼則無量壽尊。現在說法。此則觀音勢至。徒仰
嘉名。彼則與二上人。親為勝友。此則群魔外道。惱亂正修。彼
則佛化一統。魔外絕蹤。此則媚色妖淫。迷惑行者。彼則正報清



淨·實無女人。此則惡獸魑魅·交扇邪聲。彼則水鳥樹林·咸宣妙法。二土較量·境緣迥別·而樂邦之勝·其數無窮·未暇悉舉也·其境勝者·可以攝眾生取淨之情。依報其緣勝者·可以助生者修行之力。雖同居淨類甚多·唯極樂修行緣具·故偏指也。

十三問曰·十方如來·皆可親近·今獨推彌陀者·何耶。

答曰·獨推彌陀·其故有三·一誓願深重·二娑婆有緣·三化道緣故相關也·願重者·經云·彌陀往昔因中·嘗發種種廣大誓願·其

略曰·若我成佛已來·其有眾生願生我國·或聞我名·修諸善本稱我名號·乃至十念·若不生者·誓不取正覺·既生我國·若有

退轉·不決定成佛者·誓不取正覺·故華嚴鈔曰·彌陀願重·偏

亦結到有緣接娑婆眾生也·有緣者·我佛釋迦現在世時·眾生聞佛所教·歸

向彌陀·固已多矣。觀佛滅後·末世眾生·無問僧俗男女·貴賤貧富·稍聞佛教者·無不信向。未聞佛教者·亦會稱名。縱是頑



愚暴惡。無信之徒。或遭厄難危險之處。或發讚歎怨嗟之聲。不覺信口。便叫阿彌陀佛。至於兒童女子戲弄之際。聚沙搏泥。圖牆畫壁。便作彌陀佛像。甚至於學行未穩。學語未成者。自然能唱阿彌陀佛。此皆不勸而發。不教而能。非有緣而何。又如無量壽經云。吾說此經。令見無量壽佛。及其國土。所當為者。皆可求之。無得以我滅度之後。復生疑惑。當來之世。經道滅盡。我以慈愍。特留此經。更住百歲。其有眾生。值此經者。隨意所願。皆可得度。又經云。此經滅後。佛法全無。但留阿彌陀佛四字名號。救度眾生。其有不信而謗毀者。當墮地獄。具受眾苦。故天台云。當知彼佛於此惡世。偏有緣耳。相關者。先覺謂兩土聖人。示居淨穢。以折攝二門。調伏眾生。此以穢以苦以促以多魔惱而折之。俾知所厭。彼以淨以樂以延以不退轉而攝之。俾知所欣。既厭且欣。則化道行矣。又我釋迦於三乘授道之外。其有度



未盡者。亦結到有緣度在彌陀。故於諸大乘經。叮嚀反覆。稱讚勸往者。蓋

化道之相關也。以是三者之故。乃獨推焉。

問曰。十四偏指獨推之說。旨哉言乎。欣厭取捨之方。至哉教矣。敢

問欣厭取捨。得無愛憎能所之過乎。

答曰。汝不知言也。此非世間之愛憎能所也。此乃十方如來轉凡

成聖之通法也。如此若非厭捨。何以轉凡。若非欣取。何以成聖。故

自凡夫預乎聖位。由聖位以至等覺。其間等而上之。無非欣厭。

極乎妙覺。取捨始亡。四明大師語故先德云。取捨之極。大法師與不取捨。宗眼無有異

也。如此況此淨土之法。只一化機。而釋迦彌陀之所共立者也。此指

其往。彼受其來。倘非厭捨。離此無由。倘非欣取。生彼無分。

既捨此矣。又生彼矣。藉彼勝緣。直至成佛。然則愛憎能所。功

莫大矣。何過之有哉。

問曰。十五取捨之談。無敢議矣。但往生之說。能不乖於無生之理乎。



答曰。天台云。智者熾然求生淨土。達生體不可得。即是真無生。

此謂心淨故佛土淨。愚者為生所縛。此是病根。聞生即作生解。二句是病證。聞無生即

作無生解。多不可治。不知生即無生。無生即生也。長蘆曰。以生為生者。

常見之所失也。以無生為無生者。斷見之所惑也。生而無生無生

而生者。第一義諦也。天衣曰。生則決定生。去則實不去。三家

之說。其旨甚明。今余復以性相二字釋之。大宗匠性相圓明彼性分門戶者可悟矣。妙真如性。本自無生

。因緣和合。乃有生相。以其性能現相。故曰無生即生。以其相

由性現。故曰生即無生也。知此。則知淨土之生。唯心所生。無

生而生。理何乖焉。

十六問曰。往生之說。其旨昭然。但今之學者。不能曉了。千人萬人

。皆疑極樂遠隔十萬億國。臨命終時。恐難得到。復何策以曉之。


答曰。是可笑也。說了許多心外無土。土外無心。到這裏猶道不

曉。此無他。只是眾生妄認自心在色身之內。方寸之間。不知自

如此指出病根非大祖師不能



家心量。元自廣大。豈不聞讚佛偈云。心包太虛。量周沙界。且十方虛空無量無邊。被我心量都盧包了。恆沙世界。無量無數。我之心量。一一周徧。如此看來。十萬億國在我心中。其實甚近。何遠之有。命終生時。生我心中。其實甚易。何難之有。豈不見十疑論云。十萬億剎。為對凡夫肉眼生死心量說耳。但使眾生淨土業成者。臨終在定之心。即是淨土受生之心。動念即是生淨土時。為此觀經云。彌陀佛國。去此不遠。又業力不可思議。一念即生。不須愁遠。又如人夢。身雖在牀。而意識徧至他方。生淨土亦爾。不須疑也。經云。一彈指頃。即得往生。又云。屈伸臂頃。又云。頃刻之間。故自信錄云。十萬億剎頃刻至者。自心本妙耳。此等重重喻說。只是言其生在自己廣大心中。甚近而甚易者也。我如今且莫說廣大心量。且只就汝色身之內。方寸之間。說箇譬喻。譬如方到西天竺。動經十萬餘里。一路之間。



多經國土。有一人雖未親到。曾聞他人講說一徧。記憶在心。其人後時坐臥之間。忽動一念思量彼國。思量千里。便到千里。思量萬里。便到萬里。思量天竺。便到天竺。以此比之生淨土。便是這箇道理。豈不是彈指之頃。一念便到。何難到之有哉。汝若不修淨業。要到極難。淨業若成。要到極易。但辦肯心。決不相賺。

十七

問曰。不修淨業。要生極難。此誠言也。何故前舉逆惡凡夫。臨終亦生。吾未聞其詳。而且有疑。幸詳示而釋之。

答曰。觀經云。下品下生者。或有眾生作不善業。五逆十惡。具

諸不善。如此愚人。以惡業故。應墮惡道。經歷多劫。受苦無窮

。如此愚人。臨命終時。遇善知識。種種安慰。為說妙法。教令

念佛。此人苦逼。不遑念佛。善友告言。汝若不能念者。應稱無

量壽佛。如是至心。令聲不絕。具足十念。稱南無阿彌陀佛。稱佛



名故。於念念中。除八十億劫生死之罪。念佛之時。見金蓮華。猶如日輪。住其人前。如一念頃。即得往生極樂世界。於蓮華中。滿十二大劫。蓮華方開。觀世音大勢至。以大悲音聲。為其廣說諸法實相。除滅罪法。聞已歡喜。應時即發菩提之心。此其詳也。雖十二劫處蓮華中。而其受用快樂如忉利天。故古者云。華中快樂如忉利。不比人間父母胎。逆惡得生者。觀經疏曰。以念佛除滅罪障。故即以念佛為勝緣也。余詳經意。即是念佛滅罪而生。然以疏論參而明之。則有三義。一者。或問如何以少時心力觀經疏十疑論。而能勝終身造惡耶。曰。心雖少時。而其力猛利。是心勇決。名為大心。以捨身事急故。如人入陣。不惜身命。名為健人也。二者。此雖造惡。或現世曾修三昧。故臨終勸念。定心易成。亦是乘急戒緩人也。乘急即是宿種。縱現世不修三昧。亦是宿種今熟。以宿善業強故。臨終得遇知識。十念功成也。三者。若非宿種。又非現修。



念佛三昧

則其念佛之時。必有重悔。故永明曰。善惡無定。因緣體空。迹有升沉。事分優劣。真金一兩。勝百兩之疊華。燭火微光。蒸萬仞之積草。

問曰。五濁惡世。人皆有罪。縱未造五逆重罪。其餘罪業。孰能

無之。苟不懺悔消滅。但只臨終念佛。能往生乎。

答曰。亦得生也。此乃全藉彌陀不思議之大願力也。那先經云。如持百枚大石置於船上。藉船力故。石不沒水。若無其船。小石亦沒。喻彼世人。一生造惡。臨終念佛。不入泥犁。若非念佛。雖作小惡。亦入泥犁。況大惡乎。船喻佛力。石喻惡業。故昔人有帶業往生之說。四土文中。亦云具惑染者。亦得生同居淨也。又如僧雄俊。臨入鑊湯。并汾州人。屠牛為業。臨終見群牛逼觸其身。苦痛切己。及張鍾馗。殺雞為業。臨終見神人驅群雞。啄破兩目。流血盈牀。稱佛名號。俱生淨土。此非佛力而何。請復



以喻明之。如人現犯官法。應入官囚。以投託國王。承王宣召。

則官不能拘。而復達帝京也。所以西資鈔云。得生淨土。是假他此即成就慧身不

力。彌陀願攝。釋迦勸贊。諸佛護念。如渡大海。既得巨舟。仍彌陀

有良導。加以便風。必能速到彼岸也。若其不肯登舟。遲留惡國喻中輟

者。誰之過歟。

問曰。前云博地凡夫。便階不退。此必已無惡業者也。今此帶業十九

而生。能不退乎。

答曰。例皆不退也。經云。其有生者。悉住正定之聚。又云。眾

生生者。皆是阿鞞跋致。又十疑論云。有五因緣。能令不退。一

者。阿彌陀佛大悲願力攝持。故不退。二者。佛光常照。菩提心

常增長。故不退。三者。水鳥樹林。風聲樂響。皆說苦空。聞者

常起念佛念法念僧之心。故不退。四者。彼國純諸菩薩以為良友

。無惡緣境。外無鬼神邪魔。內無謂不起現行三毒等。煩惱畢竟不起。故不



退。五者。但生彼國。即壽命永劫。共菩薩佛等故不退也。又古人云。不願生淨土則已。願生則無不得生。不生則已。生則永不退轉也。

問曰。一生造惡。臨終念佛。帶業得生。又無退轉。此彌陀願力


。誠乎不可思議矣。然則我於生前且做世間事業。直待臨終。然

後念佛。可乎。

答曰。苦哉苦哉。何等愚謬之言也。砒霜酖酒。毒中之毒。今汝此言。毒於砒霜酖酒者也。非特誤賺自己。又且誤賺天下若僧若俗善男信女。皆此言也。向所謂逆惡凡夫臨終念佛者。乃是宿有善根福德因緣。方遇知識。方得念佛。此等僥倖。萬萬人中。無一箇半箇。汝將謂人人臨終。有此僥倖哉。豈不見群疑論云。世間有十種人臨終不得念佛。一者。善友未必相遇。故無勸念之理。二者。業苦纏身。不遑念佛。三者。或偏風失語。不能稱佛。



四者·狂亂失心·注想難成·五者·或遭水火·不暇至誠·六者
·遭遇豺狼·無復善友·七者·臨終惡友壞彼信心·八者·飽食
過度·昏迷致死·九者·軍陣鬪戰·奄忽而亡·十者·忽墜高巖
·傷壞性命·如此等十種之事·皆是尋常耳聞眼見·不論僧俗男
女·人皆有之·或宿業所招·現業所感·忽爾現前·不容迴避·
你又不是神通聖人·有宿命通·能知臨終有業無業·又不是有他
心天眼·能知臨終好死惡死·如上十種惡緣·忽然遭著一種·便
休了也·便做手腳不得了也·便有知識活佛圍繞·救你不得了也
·便須隨業受報·向三途八難中受苦受罪·到那時要聞佛名·不
聞了也·直饒你無此惡緣·只是好病而死·亦未免風刀解體·四
大分離·如生龜脫筒·螃蟹落湯·痛苦逼迫·怕怖悼惶·念佛不
得了也·更饒你無病而死·又或世緣未了·世念未休·貪生怖死
·擾亂胸懷·若是俗人·又兼家私未明·後事未辦·妻啼子哭·



百種憂煎。念佛不得了也。更饒你未死以前。只有些少病痛在身。忍疼忍苦。叫喚呻吟。問藥求醫。祈禱懺悔。雜念紛飛。念佛不得了也。更饒你未病以前。只是年紀老大。衰相現前。困頓龍鍾。愁歎憂惱。只向箇衰老身上左安右排。念佛不得了也。更饒你未老以前。正是少壯之日。正好念佛之時。稍或狂心未歇。俗務相關。東攀西緣。雜思亂想。業識茫茫。念佛不得了也。更饒你清閒自在。有志修行。稍於世相之中。此貼肉臭鵝汗最難脫體照不破。放不下。把不定。坐不斷。忽遭些子境界現前。一箇主人。隨他顛倒。念佛不得了也。你看他老病之時。少壯清閒之日。稍有一事挂心。早是念佛不得。況待臨終時哉。何況你更道且做世間事業。你真癡人。說此癡話。敢保你錯用身心了也。且世間事業。以上總誠僧俗以下誠僧如夢如幻。如影如響。那一件有實效。那一件替得生死。縱饒廣造伽藍。多增常住。攀求名位。交結官豪。你將謂多做好事。殊不知犯了如來



不體道本。廣造伽藍等戒。豈不見道。有為之功。多諸過咎。天堂未就。地獄先成。生死未明。皆成苦本。眼光落地。受苦之時。方知平生所作。盡是枷上添枷。鎖上添鎖。鑊湯下增柴炭。劍樹上助刀鎗。袈裟下失卻人身。萬劫難復。鐵漢聞之。也須淚落。祖師如此苦口勸人。曾許你且做事業。待臨終方念佛乎。又不見死心禪師道。世間之人。財寶如山。以下誠俗妻妾滿前。日夜歡樂。他豈不要長生在世。爭奈前程有限。暗裏相催。符到奉行。不容住滯。閻羅老子。不順人情。無常鬼王。有何面目。且據諸人眼裏親見。耳裏親聞。前街後巷。親情眷屬。朋友兄弟。強壯後生。死卻多少。世人多云。待老來方念佛。好教你知。黃泉路上無老少。能有幾人待得老到。少年夭死者多矣。古人云。莫待老來方念佛。孤墳多是少年人。又云。自從早年。索妻養兒。經營家計。受盡萬千辛苦。忽然三寸氣斷。未免一旦皆休。若是孝順兒孫。此雖誠俗然



僧亦有之凡僧有眷屬財產房舍營運者皆須於此痛省
·齋得幾僧·看得部經·燒得陌紙·春三秋九·做得碗羹飯·哭

得幾聲·猶是記憶爺娘·若是不肖之子·父母方死·骨頭未冷·

作打財產·出賣田園·恣意作樂·以此較之·著甚麼急·兒孫自

有兒孫福·莫與兒孫作馬牛·復引古德云·冷笑富家翁·營生忙

似箭·園內米生蟲·庫中錢爛貫·日裏把稱稱·夜間點燈算·形

骸如傀儡·莫教繩索斷·死心如此苦口勸人·曾許你且做事業·

待臨終方念佛乎·當思下僧俗總結人生在世·能有幾時·石火電光·眨眼便

過·趁此未老未病之前·抖擻身心·撥棄世事·得一日光陰·念

一日佛名·得一時工夫·修一時淨業·由他臨命終時好死惡死·

我之盤纏預辦了也·我之前程穩穩當當了也·若不如此後悔難追

·思之思之·

問曰·吾之言過矣·駟不及舌矣·承師之教·誰不寒心·奈何人

心易進易退·一聞警策·勇猛精勤·忽於目前逢一障難·便轉念



頭。別求方便。都道淨業只是身後之事。於今目前無所利濟。從此身心一時放退。是亦無怪其然耶。

答曰。汝之所見未廣也。豈不見經中道。受持佛名者。現世當獲十種勝利。一者。晝夜常得一切諸天。大力神將。河沙眷屬。隱形守護。二者。常得二十五大菩薩。如觀世音等。及一切菩薩。常隨守護。三者。常得諸佛晝夜護念。阿彌陀佛常放光明。攝受此人。四者。一切惡鬼。若夜叉。若羅剎。皆不能害。一切毒蛇。毒龍毒藥。悉不能中。五者。火難水難。怨賊刀箭。牢獄枷鎖。橫死枉生。悉皆不受。六者。先所作業。悉皆消滅。所殺怨命。彼蒙解脫。更無執對。七者。夜夢正直。或復夢見阿彌陀佛勝妙色像。八者。心常歡喜。顏色光澤。氣力充盛。所作吉利。九者。常為一切世間人民恭敬供養。歡喜禮拜。猶如敬佛。十者。命終之時。心無怖畏。正念現前。得見阿彌陀佛。及諸聖眾。持金



蓮華。接引往生西方淨土。盡未來際。受勝妙樂。如上十種利益。經文具載。乃佛口之所宣也。既是現生來世。皆有利益。然則世出世間要緊法門。無如念佛者矣。但當精進。不用懷疑。

問曰。念佛之門。多承開導。群疑盡釋。正信現前矣。但上文所謂抖擻身心。撥棄世事。今世網中人。間有境緣順便。身意安閒者。則可依此而行。其有世事不容撥棄者。又當何以教之。

答曰。世網中人。若是痛念無常。念佛三昧第一要義行者須力勉之用心真切者。不論苦樂逆順。

靜鬧閒忙。一任公私幹辦。迎賓待客。萬緣交擾。八面應酬。與他念佛。兩不相妨。不見古人道。朝也阿彌陀。暮也阿彌陀。假饒忙似箭。不離阿彌陀。又云。竹密不妨流水過。山高豈礙白雲飛。其有世緣稍重。力量稍輕者。亦須忙裏偷閒。鬧中取靜。每日或念三萬聲。一萬聲。三千聲。一千聲。定為日課。不容一日放過。此淨業必不可少之行即課佛多者亦當行之頃刻無閒者。每日晨朝。必須十念。積久



功成。亦不虛棄。念佛之外。或念經禮佛。懺悔發願。種種結緣。種種作福。隨力布施。修諸善功以助之。凡一毫之善。皆須回向西方。如此用功。非惟決定往生。亦且增高品位矣。

問曰。泛言念佛。未有其方。且十念回向之法。亦所未喻。幸詳以示之。

答曰。念佛者。或專緣三十二相。繫心得定。開目閉目。常得見佛。或但專稱名號。執持不散。亦於現身。而得見佛。此間現見多是稱佛名號為上。稱佛之法。必須制心。此在欣厭上著力不在念處不令散亂。念念相續。

把捺切須知之繫緣佛號。口中聲聲喚阿彌陀佛。以心緣歷。字字分明。稱佛

名時。無管多少。並須一心一意。心心相續。如此。方得一念滅八十億劫生死之罪。若不然者。滅罪良難。十念者。每日清晨。面西。正立合掌。連聲稱阿彌陀佛。盡一氣為一念。如是十氣。名為十念。但隨氣長短。不限佛數多少。唯長唯久。氣極為度。



其佛聲不高不低。不緩不急。調停得中。如是十氣。連屬不斷。意在令心不散。專精為功故。名此為十念者。顯是藉氣束心也。盡此一生。不得一日暫廢。回向發願者。念佛既畢。即云。弟子某。一心皈命極樂世界阿彌陀佛。願以淨光照我。慈誓攝我。我今正念。稱如來名。為菩提道。求生淨土。佛昔本誓。若有眾生。欲生我國。至心信樂。乃至十念。若不生者。不取正覺。願此念佛因緣。得入如來。大誓海中。承佛慈力。眾罪消滅。淨因增長。若臨命終。自知時至。身無病苦。心不貪戀。意不顛倒。如入禪定。佛及眾聖。手持金臺。來迎接我。如一念頃。生極樂國。華開見佛。即聞佛乘。頓開佛慧。廣度眾生。滿菩提願。如上述念佛之法。至於回向。乃先德垂訓切要之方。盛傳於世久矣。當遵而行之。

二四問曰。世網中人。隨量指授微細方法。靡不詳明矣。然則我輩世



外之人。又當何以加其功焉。

答曰。前不云乎。修有多類。攝成三門。如是三門。門門可入。

或單或兼。隨意之所取耳。

二五問曰。圓觀之修。唯心之念。指理持似乎上器之行門。華嚴十願。指具足寶積

十心。亦乃大根之功用。倘根器之不對。則功行之難成。今吾自

揣其根。觀吾自好。惟在專持名號。暇則或加禮拜懺悔而已。師

以為如何。

此問答歸重持名而非必廢諸行答曰。善哉善哉。汝知量矣。觀汝之言。政合善導專修無間之說

矣。專修者。謂眾生障重。境細心麤。指十六觀識颺神飛。觀難成就。是

以大聖悲憐。直勸專稱名號。政由稱名易故。相續即生。若能念

念相續。畢命為期。十即十生。百即百生。何以故。無外雜緣。置心一處

得正念故。與佛本願相應故。信願不違教故。順佛語故。行若捨專修。

而修雜業。以求生者。百中希得一二。千中希得三四。乃由雜緣



亂動。失正念故。與佛本願不相應故。與教相違故。不順佛語故。
繫念不相續故。心不相續報佛恩故。雖有業行。常與名利相應。
故。樂近雜緣。自障障他生淨土故。無間修者。身須專禮阿彌陀
佛。不雜餘禮。口須專稱阿彌陀佛。不稱餘號。不誦餘經。意須
專想阿彌陀佛。不雜餘想。又若貪瞋癡來間者。隨犯隨懺。不令
隔日隔夜隔時。常使清淨。亦名無間修也。善導和尚者。天竺傳
中。稱為彌陀化身也。觀其專修無間之說。要緊只在念念相續。
故孤山亦云。不可等閒發願。散亂稱名。永明亦云。直須一心歸
命。盡報精修。坐臥之間。常面西向。當行道禮敬之際。念佛發
願之時。懇苦翹誠。無諸異念。如就刑戮。若在狴牢。怨賊所追。
水火所逼。一心求救。願脫苦輪。速證無生。廣度含識。紹隆
三寶。誓報四恩。如斯至誠。方不虛棄。如或言行不稱。信願輕
微。無念念相續之心。有數數間斷之意。恃其懈怠。臨終望生。

此四句次第

倒應上四句

一切行但許於此生信不許於他生疑

此圓人一行攝

必須爾

此四喻真念

佛三昧之指訣也

事理二持皆以此為本

上四喻喻厭此四句謂

欣也

恃字微骨之痛



但為業障所遮。恐難值其善友。風火逼迫。正念不成。何以故。

如今是因。臨終是果。應須因實。果則不虛。聲和則響順。形直

則影端故也。

問曰。念念相續之修。豈非余所願也。奈何定力未成。念頭無主

。或舊學未忘。或邪思亂起。或境緣相觸。照顧不牢。或情想紛

飛。過捺不住。不覺念頭東走西走。眨得眼來。千里萬里去了。

又或惹著一毫世事。便是五日十日。半月一月。擺脫不去。豈特

間斷而已哉。言之可慚。思之可慟。又當何策以治之。


答曰。嗚呼。此天下學者之通病也。汝當間斷之時。若不痛加鞭

策。則專修無間之念。永無成就之期。余聞古人有^{三鞭應置座}三種痛鞭之策

。今復為汝獻之。汝當諦而聽之。一曰報恩。二曰決志。三曰求

驗。第一報恩者。既修淨土。當念報恩。佛恩國恩。固未暇論。

只如父母養育之恩。豈非重恩。師長作成之德。豈非重德。你最



初出家。便說要報重恩。後來行腳。又說要報重德。離鄉別井。二三十年。父母師長艱難困苦。你總不顧。父母老病。你又不看。及聞其死。你也不歸。如今或在三途受罪受苦。望你救他。望你度他。你卻念念間斷。淨土不成。淨土不成。自救不了。自救不了。如何救他。既不能相救。你是忘恩負義。大不孝人。經云。不孝之罪。當墮地獄。然則一念間斷之心。便是地獄業也。又不蠶而衣。不耕而食。僧房臥具。受用現成。你當勤修淨業。圖報信施之恩。祖師道。此是施主妻子分上。減刻將來。道眼未明。滴水寸絲。也須牽犁拽耙償他始得。你卻念念間斷。淨土不成。淨土不成。酬償有分。然則一念間斷之心。便是畜生業也。第二決志者。若學專修。志須決定。你一生參禪。禪既不悟。及乎看教。教又不明。弄到如今。念頭未死。又要說幾句禪。可恥又要說幾句教。可痛又要寫幾箇字。又要做幾首詩。情挂兩頭。念分四路。



· 祖師道。毫釐繫念。三途業因。瞥爾情生。萬劫羈鎖。你卻志無決定。情念多端。因此多端。間斷正念。然則一念間斷之心。便是三途羈鎖業也。又且守護戒根。志不決定。或因身口。念念馳求。教中道。寧以洋銅灌口。不可以破戒之口。受人飲食。寧以熱鐵纏身。不可以破戒之身。受人衣服。況因諸戒不嚴。邪心妄動。因此妄動。間斷專修。然則一念間斷之心。何止熱鐵洋銅業也。又且斷除憎愛。志不決定。每於虛名浮利。自照不破。名利屬我。便生貪愛。名利屬他。便生憎妒。古人云。貪名貪利。同趨鬼類。逐愛逐憎。同入火坑。你卻因此愛憎。間斷淨土。然則一念間斷之心。便是餓鬼火坑業也。第三取驗者。既學專修。當求靈驗。你如今髮白面皺。死相現前。知道臨終。更有幾日。此在須在目前。便要見佛。念佛處著力不在見佛處著力只如廬山遠法師。一生之中。三度蒙佛摩頂。又如懷感法師。稱念佛名。便得見佛。又如少康法師。唱佛



一聲。眾見一佛從口飛出。唱佛十聲。則有十佛從口飛出。如貫珠焉。此等靈驗。萬萬千千。你若心無間斷。可見只在念處着力見佛不難。間斷心生。決不見佛。既不見佛。與佛無緣。既無佛緣。難生淨土。淨土不生。必墮惡道。然則一念間斷之心。便是三途惡道業也。戒之戒之。如上三策。當自痛鞭。使其念不離佛。佛不離念。感應道交。現前見佛。既見樂邦之佛。即見十方諸佛。既見十方諸佛。即見自性天真之佛。既見自性天真之佛。即得大用現前。然後推其悲願。廣化一切眾生。此名淨土禪。結角羅文亦名禪淨土也。然則永明所謂有禪有淨土。猶如戴角虎。現世為人師。來生作佛祖。豈不驗於此哉。勉之勉之。於是禪上人者。不愧為禪上人既喜且驚。矍然久之。如有所失。天如老人乃復告之曰。禪與淨土。將謂別有了即俱了。心外無法。莫錯會好。上人乃稽顙再拜曰。吾多幸矣。今吾知所歸矣。謝而退。



淨土或問



跋

天如則公·以不求生淨土為未悟·悟則淨土之生·萬牛莫挽·破的語·精卓明快·且種種邪疑·肺肝盡燭·種種照燭·吐出肺肝·皆由徹悟故耳·掃盡門庭知見·闊步大方·此瞎驢隊中人也·小師善遇·集祖別錄·不廢此冊·沙門時·評點明妙·傾出一栲栳明珠·西蜀潘存·錄而跋之·皆非小緣也·戊申夏。

淨土十要第六

明・蕩益大師選定

西齋淨土詩

淨土十要
(七)



靈峯滿益大師選定淨土十要第七


此要時師原列第八，故述云編為第八要。今改作第七，後按語說明。

述曰·靈峯老人有懷於淨土要典·隨緣會·取次流通·癸巳後
·尚名九要·成時白老人云·西齋詩·千古絕倡·請以十要行
·庶可稱觀止矣·老人撫掌稱善·甲午·成時從金陵入山·老
人曰·西齋湯頭·而今亦有忌味·為作甲乙黠矣·成時竊訝·
老人笑而示曰·者話最忌涉理·淨土塵塵不思議·說淨土·須
還他本不思議·儻涉理稍未圓·一輩愚人·遂謂別有·成時聞
之·瞠乎大駭·因思中峯懷淨土詩·非不入妙·然可置之禪宗
·不可置諸淨土·淺人愛其提掇·恐有欲立反破之弊·西齋一
味闡揚不思議身土·而奇才妙悟·字字與不思議之白毫赤珠相
當·如蘭亭字·少陵詩·人不能學·然後知別提掇者·皆偏也



· 愛偏鋒者· 皆淺也· 此話甚難說· 得西齋公案· 話乃大行· 乙未老人西逝· 丁未余適金陵· 見九要板燬散· 爰有重刻之舉· 謹奉靈峯西齋詩選本· 編為第八要· 刻老人所製讚於簡端· 顏全書為十要云。

○按成時大師訂淨土十要次序· 首尊經· 二三重行· 從四至十· 皆以時為前後· 而楚石大師· 於洪武三年七月示寂· 妙叶大師· 於二十八年九月· 尚作破妄念佛說· 附於念佛直指之後· 由是言之· 妙師晚於楚師多矣· 時師未加深考· 以直指為七要· 以西齋詩為八要· 今以直指原文· 比刪本多四十餘頁· 為調卷冊厚薄適均之故· 移西齋詩於直指之前· 而改八為七· 改七為八· 則古德之前後不亂· 書冊之厚薄相宜· 若質之成時大師· 當亦為之首肯· 恐不知者· 謂為妄改舊章· 故為略述其所以云· 民國辛未春· 釋印光識。



靈峯滿益大師西齋淨土詩讚

稽首楚石大導師。即是阿彌陀正覺。

末法能如此高提祖印者。其難其難。

以茲微妙勝伽陀。令我讀誦當參學。

此為後來讀此詩者。指示榜樣。即二有。參入妙三觀。令四悉泠然。

一讀二讀塵念消。三讀四讀染情薄。

讀至十百千萬徧。此身已向蓮華託。

亦願後來讀誦者。同予畢竟生極樂。

畢竟亦有事理。事則決定趣向。理則不在別處。

還攝無邊念佛人。永破事理分張惡。

此楚石大師賦懷淨土宗旨。亦是靈峯老人選詩本旨。

同居淨故四俱淨。圓融直捷超方略。

二句和盤托出。卻深固幽遠。無人能到。

成時曰。事理分張惡者。謂捨西方功德莊嚴之阿彌陀佛。而別

計自性彌陀。捨西方功德莊嚴之極樂世界。而別取唯心淨土。

此則事理乖張。成大邪見。自他俱賊。墮正法輪。的是惡見惡

業。當來必受十方阿鼻大惡報也。同居淨故四俱淨者。謂西方



極樂世界。超勝十方一切淨土。然其故不在上三淨土。而在同居。良以博地凡夫。圓證三不退。下品人民。與一生補處之上善人。俱會一處。正報既爾。依報亦然。緣生勝妙五塵。與妙中諦稱性五塵。非一非異。非遠非近。所以橫豎俱超。橫豎俱即。最為不可思議。信則當下便是。擬議則乖。乖則賢智不可以為道。是則愚夫愚婦與知與能。故曰圓融直捷超方略也。



西齋淨土詩卷上



懷淨土詩七十七首

(并自序)

儒者之詩云。伐柯伐柯。其則不遠。說者曰。執柯以伐柯。睨而視之。猶以為遠。信斯言也。吾宗念佛。唯我自心。心欲見佛。佛從心現。阿彌陀佛。三十二相。八十種好。性本具足。不假外求。神通光明。極未來際。名無量壽。至於華池寶座。瓊樓玉宇。一一淨境。皆自我心發之。真宗匠妙喜有云。若見自性之彌陀。即了唯心之淨土。如楞嚴會上。佛敕阿難。一切浮塵諸幻化相。當處出生。隨處滅盡。因緣和合。虛妄有生。因緣別離。虛妄名滅。殊不知生滅去來。本如來藏。常住妙明。性真常中。求於去來迷悟生死。了無所得。既無所得。但是一心。

明四明梵琦楚石著
清西有沙門智旭點定



若淨土緣生。穢土緣滅。則娑婆印壞。壞亦幻也。若穢土行絕。淨土行興。則極樂文成。成亦幻也。然此生滅淨穢。不離自心。心不見心。無相可得。雖終日取捨。未嘗取捨。終日想念。未嘗想念。在彼不妨幻證。在此不妨幻修。一發心時。已成正覺。何礙幻除結習。幻坐道場。幻化有情。幻臻極果。豈不了世出世間之幻法。調御丈夫之事乎。昔天衣懷禪師。親見明覺。盡佛祖不傳之妙。常修淨土。垂問學者曰。若言捨穢取淨。厭此欣彼。則是取捨之情。眾生妄想。若言無淨土。又違佛語。修淨土者。當云何修。乃自答云。生則決定生。二句交互語也去則實不去。無過此語也。余謝事閒居。作懷淨土詩若干首。勸同袍之士。及同社之人。大宗匠凡有心者。悉令念佛。前所謂唯心淨土。自性彌陀。不出戶庭。夫何遠之有。



◎我佛真身不可量。大人陪從有輝光。食時並是天肴饌。

行處無非聖道場。庭下碧流微吐韻。殿前瑤草細吹香。

十方一等莊嚴刹。終說西方出異方。
依正總結
註一：此世界悉檀中之第一義也。

◎萬劫修行相好身。身光知是幾由旬。消磨歲月無窮壽。

含裏虛空不老春。四色蕩華香氣遠。諸天童子性情真。

況兼善友皆招我。來作逍遙快樂人。
註一：此是主。下是伴。

◎要觀無量壽慈容。只在而今心想中。坐斷死生來去路。

包含地水火風空。頂分肉髻光千道。座壓蓮華錦一叢。
註一

處處登臨寶樓閣。真珠璀璨玉玲瓏。
註二：心容如此。

◎每為娑婆苦所縈。誰聞淨土不求生。天人皆是大乘器。

草木亦稱三寶名。處處園林如繡出。重重樓閣似生成。
註二

諸賢莫怪歸來晚。見說芙蕖始發榮。
慶怒雙流
註一：所聞淨土如此。
註二：結歸誰不求生。



◎ 卻望^{註一}金蓮寶界遙。樓臺一一倚雲霄。黃鶯韻美春長在。

玉樹枝柔歲不凋。流水有聲隨岸轉。好華無數逐風飄。

野人自選歸來日。何待諸賢折簡招。^{註二}

註一：二字貫下六句。
註二：豪傑之士。

◎ 此邦瀟灑樂無厭。遙羨^{註一}諸人智養恬。座用真珠為映飾。

臺將妙寶作莊嚴。純金細礫鋪渠底。輦玉新梢出樹尖。

眉相^{倒映纖月}古今描不盡。晚來天際月纖纖。^{註二}

註一：二字貫到底。
註二：上皆智養恬也。

◎ 參差寶構倚層虛。縱有丹青畫不如。林影交飛金孔雀。

水光倒浸玉芙蕖。分明池上佛身現。宛轉眉間毫相舒。

百億三千大千界。盡令方寸攝無餘。^{註二}


註一：為甚不如。
註二：果然描不成。畫不就。

◎ 放下身心佛現前。^{註一}尋常盈耳法音宣。風柯但奏無生曲。

日觀長開不夜天。行趁玉階雲冉冉。坐依珠樹^{樹光}月娟娟。

凡夫到此皆成聖。不歷僧祇道果圓。^{結歸放下身心}

註一：提起。下七句。皆佛現前也。



◎妙明覺體不借即如來。暫借蓮華養聖胎。指自身。瑞相且分三十二。兩聯皆

流光何止百千垓。華開時事。莊嚴寶具相隨到。細軟天衣不假裁。註一

上品上生入同生性生死絕。塵塵剎剎紫金臺。分身作佛。註一：垓，借作數目字用。註二：皆不離覺體。

◎未歸極樂尚閻浮。漂泊風塵更幾秋。註一。殘夢頻驚蕉葉雨。厭

故鄉只在蕩華洲。註二。屈伸臂頃無多地。高占人群最上頭。註三

二大士心憐老病。結歸起句。何妨攜手上層樓。謂不戀餘生。註一：自痛餘生。註二：念佛三昧。註三：兩聯皆串。

◎紙畫木雕泥塑成。現成真佛甚分明。註一。皈依不是他家事。

福德還從自己生。萬樹華開因地暖。千江月現為波清。

朝參暮禮常禮如是事常如此。祖師修行如此。在處皆通極樂城。註二。註一：此圓妙觀智。即地暖波清也。

◎念佛功深罪自除。身歸極樂國中居。註三。叢林草木瑤瑤接。

大地山河錦繡舒。香界來從移步後。註四。寶蓮結自放華初。註五

玉毫炳煥黃金面。天上人間總不如。註一：惑業淨。註二：苦果亡。

註三：承極樂國中來。映上身字。謂苦果亡。而法身現。註四：應第一句。註五：應第二句。



◎天人莫不證神通。一一黃金色相同。散眾妙華為佛事。此天人無

盡塵沙界起香風。身光觸體成柔輓。樂具流音說苦空。作通 註一

卻倚雕欄望寶樹。無邊佛國在其中。註二：天人所聞。註一：天人所見。

◎經行地上盡奇珍。異草靈苗步步春。國界初無三惡道。

莊嚴自有眾天人。長空落日如懸鼓。常在西方徧一切處

從曠劫來今始悟。故鄉曾不隔纖塵。註一：悟其常徧。

◎滿目池臺錦繡橫。祥光瑞靄滅還生。二鳥雙遊了無酒色離煩惱。

雖有天魔絕鬪爭。渴飲醴泉多舞鳳。高樓瑤樹足流鶯。

待吾託質蓮華後。卻向琉璃地上行。註一：親證前六句。滌盡影響之見。

◎池上蕩華華上人。佛光來照紫金身。見佛更聞妙法除心垢。開法

盡救迷情出苦輪。舉步徧遊塵點國。上求利生終滿涅槃因。下化

娑婆界上光陰短。極樂知經幾劫春。註一：上六事。一盡未來際。



◎淨土真信為不死鄉。雲霞影裏望殘陽。願珠樓玉殿空為體。

翠樹金華密作行。款款好風搖菡萏。依依流水帶鴛鴦。註一

分明記得無生曲。便請知音和一場。行註二
註一：四句皆殘陽中所望。註二：趙州說的。

◎一箇浮泡夢幻身。如何只是縱貪瞋。好尋徑直修行路。兩聯串

休學愚癡放逸人。護戒還同冰雪淨。操心四念處觀要與聖賢親。註一

明明指出西飛日。第一清謁公案有識還令達本真。註一：淨土真因。

◎幾回夢到法王家。來去分明路不差。出水珠幢如日月。

排空寶蓋似雲霞。鴛鴦對浴金池水。鸚鵡雙銜玉樹華。註一

睡美不知誰喚醒。一鑪香散夕陽斜。註一：皆夢中景。

◎風滿瑤臺水滿池。華開菡萏一枝枝。細聽華中坐聽鳧鴛鴦語。

正是身心解脫時。註一瓔珞自然成寶玉。華中袈裟全不假機絲。

如來相好瞻無盡。所得明門誓憶持。瞻中所證刻骨入髓註二
註一：不是文字阿師。註二：華開見佛。



◎遙指家鄉落日邊。一條歸路直如弦。註一空中韻奏般般樂。

水上華開朵朵蓮。雜樹枝莖成百寶。群居服食勝諸天。註二

吾師有願當垂接。不枉翹勤五十年。註一
末世龜鑑
註二：皆歸家真受用。

◎一朵蓮含一聖胎。註一一生功就一華開。註二稱身瓔珞隨心現。註三

盈器酥陀逐念來。註四金殿有光吞日月。玉樓無地著塵埃。註五

法王為我談真諦。直得虛空笑滿腮。註六
註一：託質。註二：華開。
註三：蓮華化生之身。

註四：化身所受正味。註五：化身所履道場。
註六：道場中所聞所證如此。又云：何處得者一落索來。

◎珠王宮殿玉園林。坐臥經行地是金。舍利時時宣妙響。

頻伽歷歷奏仙音。返聞頓悟無生理。承上常住周圓不動心。此所悟無生理註一

觸目皆為清淨土。來從曠劫到如今。自己的
註一：上一根反元
下六根齊脫。

◎曾於淨土結因緣。二六時中現在前。註一每到黃昏增善念。註二

遙隨白日下長天。如來寶手親摩頂。得記大士金軀擬拍肩。俱會一處

不借胞胎成幻質。吾家自有玉池蓮。
註一：六時。總。
註二：後日分。別。



◎蓮臺得坐最高層。我許凡夫願力能。頃刻人心翻作佛。

斯須水觀化為冰。註一玉抽瑪瑙階前樹。金帀琉璃地上繩。註二

無限天華滿衣袂。十方佛國任飛騰。凡夫願力
註一：能字注脚。
註二：即作佛化冰也。

◎濁惡眾生也可憐。菩提道果幾時圓。總云國土隨心淨。

爭奈形神被業牽。正劍揮來藤落樹。迷雲散盡日流天。

虛空畢竟無遮障。形神淨土滔滔在目前。業

◎一國巍巍一寶王。無朝無暮起祥光。註一尼拘律樹真金果。

優鉢羅華輓玉房。見體自明非日月。知春長在不冰霜。

又遊佛剎歸來也。註二贏得天葩滿袖香。註一：振起下六句。
註二：收放一時。

◎將參法會禮金仙。註一漸逐香風出寶蓮。註二紅肉髻光流不盡。

紫金身相照無邊。註三重重樹網垂平地。一一華臺接遠天。註四

諸佛界中希有事。了如明鏡現吾前。註五
註一：往生。註二：華開。註三：見佛。

註四：見極樂世界廣長之相。
註五：見十方世界。○此指樹網華臺中所見。



◎土淨令人道果圓。同居淨土不思議娑婆性習一時遷。魚離密網遊滄海。

鴈避虛弓入遠天。註一來往輪迴從此息。死生煩惱莫能纏。註二

無心即是真清泰。性習有染如何望寶蓮。註一：喻習不起。映結句。註二：遷習功能。

◎無限風光賦詠難。註一樂邦初不厭遊觀。十虛捲入秋毫末。

一粟藏來天地寬。瑪瑙殿中金釘鉞。註三珊瑚樓上玉闌干。註四

妙音歷歷聞人耳。註五何處飛鳴五色鸞。

註一：口門窄。註二：眼界寬。○下兩聯皆不厭遊觀之旨。註三：應第四句。謂殿中釘鉞。藏千界也。註四：應第三句。謂樓上闌干。捲十虛也。註五：即類伽鳥。

◎金銀宮闕彩雲端。念佛人居眼界寬。寶樹交加非一色。

靈禽倡和有千般。酥醅自注琉璃盃。甘露長凝翡翠盤。

不似雪山多藥味。眾生無福變成酸。

◎不向娑婆界上行。寫欣厭妙要來安養國中生。註一此非念佛工夫到。

安得超凡願力成。註二香霧入天浮蓋影。暖風吹樹作琴聲。

分明識得真如意。肯認摩尼作水晶。以信結

註一：振起願力二字。註二：以行填願。



◎釋迦設教在娑婆。無奈眾生濁惡何。註一欲向涅槃開秘藏。

須從淨土指彌陀。註二白雲半掩青山色。真俗融紅日初生碧海波。始本合

曠大劫來曾未悟。東西誰道沒清譎。註三
註一：非異方便不可。
註二：異中之異。

註三：結歸起句。讀此可悟大師
末後一喝。龍洞者應奪魄矣。

◎麤境現前猶未識。法身法身向上幾曾知。念佛可憐轉腦回頭處。

錯認拈香擇火時。口耳相傳六箇字。聖凡不隔一條絲。註一

堂堂日用天真佛。註二火急回光也是遲。註三
註一：拈出法身向上事。註二：出
口入耳。註三：切忌回頭轉腦。

◎念念念時無所念。註一廓如雲散月流天。此人造罪令除罪。註二

與佛無緣作有緣。仙樂送歸清泰國。好風吹上紫金蓮。註二

遙聞妙偈琅琅說。不是聲塵到耳邊。註三
註一：念體本來如此。註二：
念念念時。註三：無所念。

◎日夜思歸未得歸。天涯客子夢魂飛。覺來何處鴈聲過。

望斷故鄉書信稀。註一幾度開窗看落月。一生倚檻送斜暉。

黃金沼內如船蕩。想見華開數十圍。從厥出欣

註一：斬盡娑婆根蒂。



◎曾聞白鶴是仙禽。日日飛來送好音。便欲寄書諸善友。

定應知我一生心。生心長思樂土終歸去。肯執蓮臺遠訪臨。註二

百歲真成彈指頃。娑婆只恐世緣深。生心註二

註一：二句所寄書也。
註二：西來意。

◎一寸光陰一寸金。勸君念佛早回心。直饒鳳閣龍樓貴。

難免雞皮鶴髮侵。註一鼎內香烟初未散。空中法駕已遙臨。註二

塵塵剎剎雖清淨。獨有彌陀願力深。結歸有緣註一：遲則不堪。
註二：早則當下。

◎尺天真金容白玉毫。單稱名號豈徒勞。晨持萬徧烏輪上。

夜課千聲免魄高。歲閱炎涼終不倦。天真父子會相遭。豈徒勞

如何說得娑婆苦。苦事紛紛等蠟毛。註二

註一：單傳直指。
註二：味天真。

◎故鄉別早話歸遲。何待君言我自教與知識知。客路玲自知峴無一好。

人生惆悵不多時。蒼顏歷歷悲明鏡。白髮自知毵毵愧黑絲。註一

載讀南屏安養賦。屋梁落月見丰姿。

註一：二句再寫遲字。



◎娑婆苦海概指一切法門汎慈舟。此岸能超彼岸不。直指迷源須念佛。註一

橫波徑度能超免隨流。千生萬劫長安泰。彼岸五趣三途盡罷休。此岸

縱使身沾下下品。也勝豪貴王閻浮。註三
註一：問親。註二：答確。
註三：盡偷心。免俗氣。

◎人生百歲七旬稀。往事回觀盡覺非。每哭同流何處去。幾許獅座

閒拋淨土不思歸。香雲瑪瑙階前結。靈鳥珊瑚樹裏飛。

從證法身無煩惱。況餐禪悅永忘饑。註一：倒串。

◎人間苦樂事縱橫。達者須尋徑路行。福報天宮猶有死。註一

神棲佛國永無生。風前鸚鵡琴三疊。水面芙蓉錦一緝。註三

作計欲歸歸未遂。他鄉又見物華更。註一：應第一句。註二：應第二句。註三：無生聲色。

◎說著無常事事輕。饑餐渴飲懶經營。一心不退思安養。信願

萬善同修憶永明。淨洗念珠重換線。堅持佛號莫停聲。

妄緣盡逐空華落。閒向風前月下行。註一：根起句來。註二：結歸正行。



◎馬鳴龍樹是吾師。念佛參禪駕並馳。五色雲橫日沒處。

一枝華拆眼開時。註二玉音了了流仙偈。金采煌煌發令姿。註三

曠劫相逢真父子。欲將何物報恩慈。註四
註一：如何說並馳的道理。
註二：看他串對處。方知並馳宗旨。

註三：收歸上科。註四：半邊漢。將謂有多少奇特。○此首應與後吾身念佛又修禪參看。

◎即心即佛斷千差。名教名禪共一家。果證無邊身相好。

光流不可說河沙。餘方妙麗終難並。本願精深豈易誇。註一

大抵熏修須及早。臨終免被業緣遮。註二
註一：果然同居第一。
註二：鳥鳴哀。

◎一自飄蓬瞻部南。倚樓長歎月纖纖。遙知法會諸天繞。註二

正想華臺百寶嚴。註一此界猶如魚少水。微生只似燕巢檐。註二

同居善友應懷我。註三已築浮圖欠合尖。註一：欣極。註二：厭極。註三：結歸頂聯。

◎少年頃刻老還衰。須信無常日夜催。九十六家邪智慧。

百千萬劫受輪迴。不存寶界華池想。爭得刀山劍樹摧。註一

但自淨心生願樂。此中賢聖許追陪。註二
註一：深為邪智者告。
註二：邪倒不能壞。



◎西行三十二河沙。映第四句彼國莊嚴是我家。映第三句但用一真為種子。註二

全將七寶作蓮華。註一娑婆極厭今生苦。懈慢無令後世差。註二

寶月頓從心水現。如今光影正交加。註一：體用串。
註二：勤怠串。

◎勞生能有幾光陰。健只須臾病又侵。常恐浮雲蔽西日。亂想

須營淨舍學東林。一心可憐世上愚癡輩。不及華間智慧禽。註一

寶樹亦能談妙法。何妨坐聽罷參尋。註一：悲愍慚憤。

◎佛自凡夫到果頭。親曾歷劫用功修。淨邦豈是天然得。

大道初非物外求。註一先悟色空離欲海。皆非物外後嚴福慧汎慈舟。

今來古往皆如此。註二度盡眾生願未休。註三註一：串對。註二：應起句。
註三：以佛為師。

◎亂世人如蟲在禪。炎炎火宅避無門。早知佛國相期處。註二

別有仙家不死村。身相短長同父子。註一蓮華開合表晨昏。註二

赤真珠樹黃金屋。反映蟲禪火宅每夜飛來入夢魂。註一：非同蟻蟲。
註二：言無展昏。應第四句。

◎見說西方住處佳。凭高極目興無涯。世情每逐炎涼改。



人事多因治亂乖。白骨可憐紫野草。註一金臺誰得挂庭槐。註二

勸君早結宗雷社。坐看雲端寶仗排。註一：應第四句。註二：應第三句。

◎琉璃地列紫金幢。翡翠樓開白玉窗。境界文字可誇才不稱。境界不思議

肉身未到意先降。觀道得力能言孔雀知多少。註一善語頻伽定幾雙。註二

清夢正貪歸路直。註三夜闌無奈鼓逢逢。註四註一：四無礙辯。註二：初善、中善、後善。

註三：從是西方。註四：逢叶符方切。音房。

◎剎海森羅一念包。註一於中不斷聖賢交。四傾身送想浮雲外。字連得妙

極目斜陽挂樹梢。激盪金波隨岸轉。參差寶葉任風敲。

諸天歎我駸駸老。上品早晚雞棲彩鳳巢。上生註二註一：振起下七句。註二：諸天慰語。

◎讚佛言詞貴直陳。攢花簇錦枉尖新。註一自然潤澤盈身器。註二

無數光明湧舌輪。稱性莊嚴依報土。註二隨機勸發信心人。註三

願求功德池中水。盡滌娑婆世上塵。註四

註一：麗句禪機愧死。註二：上三句。指三輪不思議化。下句。總承上三輪。機局巧異。註三：上皆直讚也。大宗匠拈動教義。直是家常茶飯而已。註四：以陳情結。



◎莫將胎獄比華池。早向池中占一枝。卻坐大蓮成佛子。註一

何煩慈母浴嬰兒。註二口餐法喜真饒饒。心得明門妙總持。註三

般若臺前回定日。令人長憶鴈門師。註一：承第二句。註二：承第一句。註三：串對。

◎百億劫中生死罪。纔稱名號盡消除。註一迷時妄想同春夢。註二

我佛真身等太虛。註三宮殿水晶千柱帀。園林雲錦萬華舒。註四

癡心不是分高下。註五上上金臺始可居。註六

註一：若不了者。請看注脚。註二：點雪。註三：洪鐘。○倒串。註四：皆洪鐘也。註五：向道皆洪鐘也。註六：九品亦約權實開顯。妙極。確極。

◎八表同遊雲門一字只等閒。須臾飛去又飛還。玉樓冉冉紅雲裏。

珠樹亭亭紫霧間。註一不立君王唯有佛。平鋪世界斷無山。絕對

天人一樣黃金色。盡未來時但少顏。註二註一：元來只在者裏。註二：豎窮橫徧。首尾相映。

◎須摩提國讚何窮。不與他方佛境同。此云極樂百味酸甜長滿鉢。

一身輕健任遊空。初心便獲無生忍。註二具縛能教宿命通。註三



今古往來留傳記。盡塵沙界扇真風。

註一：全提。○此約十方同居而論。詳在下兩聯。

註二：圓三不退。註三：任運而知。不比小乘作意。○此二句。下通凡地。上通聖地。一切教網。無此名相。一切佛刹。無此階差。的確不與他方佛國同也。註四：箇箇全提。

◎五濁煎熬道未成。群賢修習誓非輕。光中每出彌陀影。

註一：註二：註三：註四

夢裏親書普慧名。繡佛雖齋防退失。火車已現急求生。

註二：註三：註四

臨風莫灑楊朱淚。就我西方徑路行。

註五

註一：珍重。註二：二句根誓字來。行者深重誓願。入佛菩薩大誓海中。故精通膾合也。註三：應道未成。註四：應煎熬。註五：結歸群賢修習。

◎水若澄清月始臨。金容佛影現吾心。春風不易回枯木。

註一：註二

磁石應難受曲鍼。未得往生緣障重。必期成就用功深。

註二：註三：註四

譬如九轉丹砂力。一點能令鐵化金。

註一：惑障。註二：業障。註三：報障。註四：機局巧妙。

◎幽居悄悄柏森森。不遣紅塵染素襟。一佛號收無量佛。

註一：註二

後心功在最初心。雲開白月毫光滿。雨過青山髻色深。

註二：註三

當念休生差別解。聲聲遠喚盡玄音。

註一：解妙。行妙。註二：因妙。果妙。



◎曾聞金鼎煉硃砂。一服飛驚玉帝家。輕舉似風飄柳絮。

美顏如日映桃花。況修淨業身心妙。兼得慈尊願力加。

此是長生無比法。仙經十卷不須誇。

◎朝朝暮暮道心中。歲歲年年佛事同。一往進修安樂界。

六時朝禮法王宮。方袍不厭香煙黑。坐具何妨手汗紅。

如此出家今有幾。灼然認得主人公。

註一：應第一句。註二：應第二句。註三：承一往六時四字來。明信願行三。數十年家風不改也。註四：癡人猶自不肯。又云。隨黃檗脚跟。食大顛口唾。尋常粥飯僧耳。

◎池中蓮萼大如車。據實猶為小小華。聖眾略言千萬億。

佛身知是幾恆沙。我聞妙德同慈氏。誰道彌陀異釋迦。

南北東西清淨土。盡歸方寸玉無瑕。

◎紅蓮常映白蓮開。只有金蓮不易栽。念念若能離濁濁。

生生從此脫胞胎。且依彼國嚴新果。卻徧他方發舊荄。

事與種蓮無少異。根苗元向淤泥來。

註一：積蕪不易捨。註二：法界緣起不易信。



◎蓮宮只在舍西頭。公案易往無人著意修。三聖共成悲願海。

一身孤倚夕陽樓。註一秋階易落梧桐葉。夜壑難藏舴艋舟。註二

幸有玉池鳧鴈在。相呼相喚去來休。註三
註一：著意。註二：速速著意。
註三：結歸三聖。

◎千經萬論不虛標。共指西方路一條。舊直去念念刮磨心垢淨。

時時防護道芽焦。棲蓮靜覺身安穩。註一得果轟傳地動搖。註二

謾費工夫推甲子。娑婆大劫只崇朝。
註一：應第三句。
註二：應第四句。

◎家在西頭白玉京。老來難遣故鄉情。每瞻雲際初三月。

先注華間第一名。密密疎疎琪樹影。來來往往水禽聲。

紅樓紫殿春長好。縱有丹青畫不成。非公境界

◎近有人從淨土來。是甚人池心一朵玉蓮開。正當萼上標名字。

已向身前結聖胎。極樂逍遙長不死。欣閻浮逼迫最堪哀。厭

法王特地垂慈愍。同坐黃金百尺臺。



◎ 吾身念佛又修禪。自喜方袍頂相圓。註一 曾向多生修福果。註二

始依九品結香緣。註三 名書某甲深華裏。夢在長庚落月邊。註四

濁惡凡夫清淨佛。雙珠黑白共絲穿。註五

註一：方袍圓頂。註二：下何故單承念佛。不承參禪。參。註三：絕不似禪和口氣。註四：兩聯。一順串。一倒串。註五：且道此是佛耶。禪耶。參。

◎ 念極心開見佛時。自然身到碧蓮池。火輪罪淨千千劫。註一

瓊樹光分萬萬枝。註三 善友深談終不厭。靈禽妙語實難思。註五

功成果滿須臾事。尚謂奔流閃電遲。註六
註一：乞兒見小利者。急須諷此。註二：閉眼也著。

註三：閉眼也著。註四：廣長舌。註五：四六句。註六：鈍鳥逆風飛者。急須讀此。

◎ 無邊大士與聲聞。海眾何妨逐品分。註一 一會聖賢長在定。二句五

十方來去總乘雲。註二 談玄樹上摩尼水。念佛林間共命群。

坐臥經行無罣礙。天花隨處落繽紛。註一：無為差別。註二：差別無為。

◎ 佛袈裟下失人身。重得人身有幾人。萬行不如修白業。欣

一心何苦戀紅塵。法王立誓丘山重。感應道 迷子思歸涕淚頻。文



若解返觀觀自性・明珠百八總家珍。

註一：晝夜一百八。

◎西望紅霞白日輪・仰觀寶座紫金身。一方土淨方淨。

二句互

十念心真念念真。生極樂城終不退。盡虛空界了無塵。

註二

向來苦海浮還沒。何幸今為彼岸人。

註一：驢前馬後漢。註二：撒沙盆土。

◎娑婆生者極愚癡。眾苦縈纏不解思。在世更無清淨業。

註三

臨終那有出離時。百千經裏尋常勸。萬億人中一二知。

註一

註二

珍重大仙金色臂。早來攜我入華池。

註四

註一：須要思量到此。適可。註二：血滴滴地。又云。而今鼓歇鐘沈久矣。註三：上六句。乃行者所緣境也。正為此等。求生西方。註四：大事因緣。



評點定懷淨土詩跋

右靈峯老人選詩·七十七首·其圈點皆在平實切要處點睛·其詩家名句文身妙處·概不汙一絲墨痕·此大人作略·堪使行者喫緊得力·無復問橋之誤者也·讀誦之士·須具擇法眼以觀之·至於成時評語·亦在宗旨上討警策·無非欲讀者·以深信大願而起妙行耳·不無小補·故不敢廢·成時稽首謹識。



西齋淨土詩卷下

十六觀讚二十二首

日觀

第一觀門名日觀。遙觀落日向西懸。光明了了同金鼓。

輪相團團挂碧天。身去身來心不昧。眼舒眼合意常緣。

眾生與佛無差別。即見彌陀現我前。

結語總提十六觀之大綱

水觀

第二觀門名水觀。水成冰後作琉璃。金幢照耀珠無數。

寶界分明事不疑。樓閣萬千如月朗。樂音八種好風吹。


無常無我如何說。全佛全心更是誰。

地觀

第三地觀觀前地。一一觀來了了知。雖造次間無不念。

縱須臾頃亦當思。想成略見莊嚴國。佛說唯除飯食時。

消盡無邊生死罪。必登淨土復何疑。



樹觀

第四觀門名樹觀。七重寶樹列成行。高低盡覆真珠網。上下交輝七寶光。五百億童花裏住。三千世界果中藏。自心種子栽培得。各各撐天拄地長。

池觀

第五觀名池水觀。八池皆是七珍成。水從如意珠中出。沙向黃金渠底明。流出蓮華微妙響。化生寶鳥讚揚聲。何時到此分涓滴。業障塵勞盡洗清。

總觀

第六觀門名總觀。寶樓五百億崢嶸。虛空懸處諸天樂。日夜宣揚三寶名。上聖皆言心本具。西方不遠想初成。娑婆界內人雖惡。念佛功深定往生。

華座觀

第七觀名華座觀。想成七寶地蓮華。脈光華葉乃無數。八萬四千非強誇。臺上寶珠雖似幻。鏡中面像未曾差。雖云大道開步高視之離真偽。不礙通人辯正邪。



像觀

第八觀門名像觀。眾生不異佛如來。諦觀金色相好具。
端坐寶蓮心眼開。鳧鴈鴛鴦談妙法。觀音勢至列華臺。
所聞要與真乘合。出定休將妄想猜。

真身觀


第九真身觀彼佛。佛身高廣世難量。山毫宛轉籠千界。
海目分明照十方。大士眾多為近侍。化形無數出圓光。
慈悲心是彌陀體。不動纖塵見法王。

觀音觀

第十諦觀觀自在。頂輝肉髻紫金身。頭冠中立一化佛。
足印下成千輻輪。菩薩眾隨光不夜。摩尼華布色長春。
嬰兒久失慈悲父。應念臨風泣涕頻。

勢至觀

十一觀門觀勢至。天冠五百寶華新。頂中肉髻尤殊妙。
頭上金瓶絕比倫。行處莊嚴填布滿。坐時國界動搖頻。
堂堂一佛二菩薩。同現眾生數等身。



普觀

十二觀門名普觀。想身趺坐大華中。寶光照體如紅日。聖眾開眸滿碧空。水鳥樹林談法妙。語言文義與經同。道無彼此誰云隔。實在精誠一念通。

雜觀

十三雜觀先觀佛。池上端嚴丈六軀。左侍觀音華座近。右從勢至寶光舒。莫輕小相流塵刹。何礙全身滿太虛。變現十方皆自在。本來無欠亦無餘。

上品觀

(上品上生) 十四觀門三品列。上中下輩逐根差。

三心具足功無間。眾行兼修念不差。

上品上生安養國。金臺金地法王家。

須臾便得無生忍。到此寧憂作佛除。

(上品中生) 上品中生尤直截。大乘因果信無疑。

不論口誦諸經典_{申對}。惟願身生七寶池。

聖眾儼臨居止處。金臺迎接命終時。



(上品下生)

華開見佛親稱讚。小劫何嫌受記遲。
上品下生人易行。行如中輩不多爭。
但因無上道心發。串對直往金蓮華內生。
目睹如來諸相好。耳聞妙法眾音聲。
經三小劫登初地。佛果不勞彈指成。

中品觀 (中品上生)

求生定滿眾生意。五戒兼持八戒齋。
不造逆愆無過患。永離惡趣出沈埋。
華開即證阿羅漢。任運遊行白玉階。
(中品中生) 中品中生持戒法。沙彌具足一朝昏。
威儀檢點心無悔。眷屬來迎佛有恩。
先仗金光登淨域。後敷蓮萼讚慈尊。
預流道果從中證。便了真心徹本源。



(中品下生) 中品下生男與女。各行孝養具仁慈。

命終知識說淨土。法藏比丘真汝師。

生在寶蓮開合處。捷如健臂屈伸時。

觀音勢至親開導。果證無生不厭遲。

下品觀 (下品上生) 十六觀門三品列。上中下輩為君評。

愚人造惡無慚愧。善友垂慈勸往生。

頓使剎那心地淨。全標十二部經名。

臨終口誦彌陀號。便感西來化佛迎。

(下品中生) 下品中生多犯戒。純將惡業自莊嚴。

罪無避處神魂亂。命欲終時氣勢燿。

廣讚佛乘天蕩蕩。能消地獄火炎炎。

佛菩薩眾來迎汝。七寶華池得例霑。

最勝是一例字



(下品下生) 下品下生須猛省。眾生不善苦無窮。

此人若聽高賢語。來報當離惡趣中。

一旦魂飛心散亂。十稱佛號罪消鎔。

金蓮鏤鏤如初日。當念西昇極樂宮。

化生讚八首

白鶴 西方白鶴豈凡曹。朱頂玄裳格調高。豈與仙人作騏驎。

難同海鴈啄腥臊。孤遊不隔雲天路。六翮何慚腹背毛。

能讚苦空無我法。有聞因此斷塵勞。

舍利

唐言舍利彼云鶯鶯者恐誤是春鶯。墨蘸修眉漆點睛。濃把黃金塗作翅。

碎懸碧玉扣為聲。群飛上下七珍樹。百轉低昂三寶名。

誰解返聞聞自性。不勞重奏女媧笙。



孔雀

飛來孔雀淨無塵。諸作皆缺此意亦是如來一化身。翠尾擺開金殿曉。

珠華搖動玉樓春。不教都護聲相雜。專念彌陀語最真。

淨土靈禽知妙理。娑婆界上枉為人。

鸚鵡

此方鸚鵡信能言。念佛茶毘舌竟存。五色自來多慧解。

一靈從本共根源。山雞謾照寒潭影。杜宇空懷舊國冤。

爾輩何由如此鳥。高棲樂國任騰騫。

頻伽

慈尊六十種音聲。巧匠何由刻畫成。獅子嘖呻空外吼。倒半

頻伽繚繞樹間鳴。借喻降伏覺雄盡遣群雌伏。在轂須教眾鳥驚。

盡未來時聞妙響。心珠朗徹耳輪清。

共命

兩首雖殊一體同。來為共命佛園中。羽毛不異人頭面。

言語皆宣法苦空。菡萏葉香朝飲露。娑羅枝軟晝吟風。

細看互用根塵處。誰道緣差性不通。



水鳥

金鳧玉鴈采鴛鴦。水鳥同時讚吉祥。閒繞綠汀分箇箇。

卻回丹浦列行行。七重樹裏逍遙境。四色華間富貴鄉。

何日寶池親拭目。得瞻如意大珠王。

樹林

好將淨土繫吾心。華葉重重覆樹林。七寶互成微妙色。

三乘同唱涅槃音。失身地下皆霜劍。回首人間盡棘鍼。

西向坐思無限樂。幾多樓閣未登臨。

析善導和尚念佛偈八首

原偈·漸漸鷄皮鶴髮·看看行步龍鍾·假饒金玉滿堂·難免衰殘老病·
任你千般快樂·無常終是到來·唯有徑路修行·但念阿彌陀佛·

一 漸漸雞皮鶴髮·精神未免枯竭。可憐老眼昏花·恰似浮雲籠月。
二 妄想隨時出生·貪心何日休歇。不如及早念佛·苦海從今超越。
看看行步龍鍾·首腹猶如簸舂。涉遠奈何力倦·登高徒自情濃。



出門途路千里。拄杖雲山萬重。不如及早念佛。速瞻寶座慈容。
假饒金玉滿堂。珠翠綺羅豔妝。花下時時歌舞。樽前日日杯觴。
尋思無限活計。畢竟難逃死王。不如及早念佛。臨終定往西方。
難免衰殘老病。休誇氣力強盛。朱顏能得幾時。白髮忽然滿鏡。
有限光陰盡來。無常殺鬼催併。不如及早念佛。悟取彌陀自性。
任你千般快樂。饒君萬種方略。何由永固此身。謾說長生妙藥。
非久形神脫離。爭容頃刻停泊。不如及早念佛。淨土方為安樂。
無常終是到來。三界眾生可哀。如入寶山相似。自甘空手而回。
彌陀全體呈露。淨土隨方展開。不如及早念佛。轉身得坐蓮臺。
唯有徑路修行。實從自心發生。不離如今正念。頓除歷劫無明。
癡人尚自執著。濁染何由廓清。不如及早念佛。菩提道果圓成。
但念阿彌陀佛。此心念念是佛。佛外更無別心。心外更無別佛。
吹開萬里白雲。湧出一輪紅日。寶樹華池現前。語言文字難述。
灼然



懷淨土百韻詩

欲生安養國。以信願起承事鼓音王。行儀必不可苟且合掌須西向。標境必不低頭禮彼方。可龍洞

觀門誠易入。儀必不可苟且儀軌信難量。行儀必不可苟且佛願尤深廣。人心要久長人心要久長。

嬰兒思乳母。下十一聯皆言人心久長遠客望家鄉。鄭重迎新月殷勤送夕陽。大小藏法

分明蒙接引。造次莫遺忘飲啄齋稱首。八開熏修策最良。

五辛全新斷。十惡永隄防勿用求名利。毋勞論否臧

布裘遮幻質。藜糝塞空腸擺撥多生債。枝梧九漏囊痛要

精神纔懶慢。喜怒哀捨攘水滴俄盈器。江流始濫觴

積來功行滿。趁取色身強室置千華座。鑪焚百種香

新衣經獻著。美饌待呈嘗莫點殘油炬。宜煎浴像湯

形骸同土木。戒檢若冰霜想念離諸妄。跏趺在一牀


剎那登淨域。以下五十三聯皆脚踏中所觀方寸發幽光。骨肉都融化乾坤極杳茫。



太虛函表裏。佛剎據中央。蓮吐葳蕤萼。波翻激濫塘。
鮮颯須動蕩。綵仗恣搖颺。燦爛黃金殿。參差白玉堂。
樓隨四寶合。臺備七珍妝。鏡面鋪階砌。荷心結洞房。
珊瑚裁作檻。碼碯製為梁。田地琉璃展。園林錦繡張。
內皆陳綺席。外盡繞銀牆。覆有玲瓏網。平無突兀岡。
瑤林連處處。琪樹列行行。果大甜如蜜。音清妙似簧。
喬柯元自對。茂葉正相當。一一吟鸚鵡。雙雙集鳳凰。
瑤池無晝夜。珠水自宮商。渠瑩金沙底。風輕寶岸旁。
高低數菡萏。深淺戲鴛鴦。說蓮華異彩吞群鳥。奇葩掩眾芳。
千枝分赤白。萬朵間青黃。暫挹身根爽。微通鼻觀涼。
頻伽前鼓舞。共命後飛翔。竟日鶯調舌。沖霄鶴引吭。
悟空寧有我。此聯承上啟下暗轉知苦悉無常。大士談玄理。此十聯言善友聲聞會寶坊。
經宣十二部。偈演百千章。直指菩提徑。俱浮般若航。



挽回尋劍客。喚醒失頭狂。九品標麤妙。三乘互抑揚。
鍊深終絕鑛。簸淨豈存糠。示現真彌勒。咨參妙吉祥。
聖賢雲鬣隸。天樂日鏗鏘。俊偉純童子。伊優絕女郎。
語言工問答。進退巧趨蹌。火齊恒流燄。摩尼益耀芒。
不須懸日月。何處限封疆。食是天饋饈。餐非世稻粱。
挂肩如意服。擎鉢自然漿。脫體殊清淨。含暉更焜煌。
袈裟籠瑞靄。瓔珞襯仙裳。徧往微塵國。周遊正覺場。
慈顏容禮覲。供具任持將。側聽能仁教。還令所得亡。
及歸彈指頃。元未離極樂翻笑取途忙。每受經行樂。誰云坐臥妨。
普天除鬪諍。妙哉卍地息災殃。南北威靈被。東西德化彰。
幾番經劫燒。倒插四海變耕桑。此界無虧損。斯人但壽昌。
戶丁休點注。年甲罷推詳。滿耳唯聞法。充饑不假糧。
永懷恩入髓。且結且免毒侵瘡。試說娑婆苦。爭禁涕淚滂。



內宗誰復解。娑婆第一苦邪見轉堪傷。忍被貪瞋縛。甘投利欲坑。叶岡

君臣森虎豹。父子劇豺狼。儘愛錢堆屋。仍思米溢倉。

山中搜雉兔。野外牧牛羊。奪命他生報。銜怨累世償。

太平逢盜賊。離亂遇刀槍。好飲耽杯酒。迷情戀市娼。

心猿拋胃索。意馬放垂韁。逸志摧中路。英魂赴北邙。

干戈消禮樂。揖讓去陶唐。陶當作虞戰伐愁邊鄙。焚煙徹上蒼。

連村遭殺戮。暴骨滿城隍。鬼哭天陰雨。人悲國天殤。

歲凶多餓死。棺貴少埋藏。瓦礫堆禪剎。荊榛出教庠。

征徭兼賦稅。禾黍減豐穰。娑婆苦極念佛緣猶阻。于此尋經事亦荒。

素襟龍奮迅。此聯說自利高步鶴騰驤。載顧同群鴈。下六聯說利他毋為獨跳麀。

聖胎吾已就。法侶爾相望。寶地同瀟灑。金臺共頡頏。

翹勤山岌業。積德海汪洋。曠劫功彌著。纖毫過即禳。

三心期遠到。十念整遙裝。必欲超二利魔界。總結從今奉覺皇。應起句欲字。



娑婆苦漁家做十六首

聽說娑婆無量苦。能令智者增憂怖。愚不知也。壽命百年如曉露。君須悟。

一般生死無窮富。綠髮紅顏留不住。英雄盡向何方去。第一首緊。回首北邙

山下路。提生是淨土訣。斜陽暮。千千萬萬寒鴉度。

聽說娑婆無量苦。風前陡覺雙眉豎。次及煩惱惡業。貪欲如狼瞋猛虎。魔軍主。

張弓架箭癡男女。日月往來寒又暑。乾坤開合晴還雨。白骨茫茫

銷作土。嗟今古。何人踏著無生路。

聽說娑婆無量苦。千思萬算勞腸肚。地水火風爭勝負。何牢固。

到頭盡化微塵去。一顆心珠離染汙。聲前色後常披露。打破觸體

無覓處。除非悟。如來金口親分付。分付甚麼參

聽說娑婆無量苦。死王總作輪回主。六賊操刀為伴侶。同居住。

何曾頃刻拋離去。功德天和黑暗女。兩人最是難相聚。有智主人



俱不取。依吾語。從今更莫登門戶。

聽說娑婆無量苦。篋中四大蛇蛇聚。重者好沈輕好舉。相陵侮。況兼合宅空無主。早覺參差梁與柱。風飄雨打難撐拄。畢竟由他傾壞去。教人懼。不如覓箇安身處。

聽說娑婆無量苦。人皆染色貪樽俎。玉鏤笙簫金貼鼓。長歌舞。梨園子弟邯鄲女。冬衣紫貂春白苧。涼亭暖閣消寒暑。一旦神魂歸地府。應難取。空教淚點多如雨。

聽說娑婆無量苦。為君一一分明舉。風俗淫邪人跋扈。多囹圄。命終未免沈冥府。檢點惡名看罪簿。因茲惹起閻羅怒。鑪炭鑊湯燒又煮。爭容汝。自家作業非人與。

聽說娑婆無量苦。高誇富足慙貧窶。鄙見偏天壤無食無衣無棟宇。懸空釜。

舉頭又見紅輪午。只有礪邊芹可煮。黃昏坐聽饑腸語。多粟多金多子女。全不顧貧寒者同歡聚。看來總是前生注。



聽說娑婆無量苦。家家未免都是業根為商賈。出入江山多險阻。非吾土。
磨牙噬肉遭人虎。魂魄欲歸迷去所。煙橫北嶺雲南塢。一望連天
皆莽鹵。知何許。荒村颯颯風吹雨。
聽說娑婆無量苦。人當亂世投軍旅。寇至不分男與女。摧腰膂。
鳴蟬竟斷螳螂斧。縱有才能超卒伍。幾人衣錦還鄉土。燕領虎頭
封萬戶。喚醒虛相悞。多奈何李廣逢奇數。
聽說娑婆無量苦。凶兵解散還屯聚。昨日為齊今日楚。更奴擄。
乾坤畢竟歸神武。趙括才疎空自許。強秦用間欺其主。四十萬軍
生入土。悲前古。至今鬼哭長平下。
聽說娑婆無量苦。星分海角船居戶。東望扶桑朝日吐。迷洲渚。
砲車雲起青天雨。卸卻雲帆停卻櫓。打頭風急鯨魚舞。滾滾潮聲
喧萬鼓。愁肝腑。遭逢患難誰依怙。



聽說娑婆無量苦。茶鹽阮治倉場務。損折課程遭箠楚。賠官府。
傾家賣產輸兒女。口體將何充粒縷。飄蓬未有棲遲所。苛政酷於
蛇與虎。爭容訴。勸君莫犯雷霆怒。

聽說娑婆無量苦。如今業債前來負。賊劫貨財身被擄。逢狼虎。
挑生呪死兼巫蠱。奴婢辛勤依惡主。黑瘡白癩聾和瞽。醜惡愚癡
相與處。誰憐汝。發心歸命慈悲父。

聽說娑婆無量苦。橫遭獄訟拘官府。大杖擊身瘡未愈。重鞭楚。
血流滿地青蠅聚。牒訴紛紛皆妄語。無人敢打登聞鼓。天上群仙
司下土。能輕舉。何時一降幽囚所。

聽說娑婆無量苦。三農望斷梅天雨。車水種苗苗不舉。難禁暑。
被風扇作荒茅聚。久旱掘泉唯見土。海潮又入蒹葭浦。南北東西
皆斥鹵。枯禾黍。官糧更要徵民戶。



西方樂漁家傲十六首

聽說西方無量樂。三賢十聖同依託。同居超勝在此。稽首彌陀圓滿覺。長參學。

川流赴海塵成嶽。佛性在躬如玉璞。須憑巧匠勤雕琢。凡聖皆由

心所作。難描邈。但恁麼琢。華堂寶座珠瓔珞。

聽說西方無量樂。莊嚴七寶為樓閣。瑪瑙珊瑚兼琥珀。叶粘。光堪摘。叶樂

金繩界道何輝赫。叶整。寶樹靈禽皆化作。滿池鳧鴈鴛鴦鶴。鸚鵡頻伽

并孔雀。爭鳴躍。更看朵朵金蓮拆。叶拆


聽說西方無量樂。琉璃田地金城郭。翡翠鮮明珠磊落。蓮披萼。

幾多青赤并黃白。叶薄。大士聲聞隨所適。天華爛熳露衣襪。各各化身

千百億。音益。神通力。須臾遊徧微塵國。

聽說西方無量樂。法王治化消諸惡。天上人間元不隔。叶各。相參錯。上三句

聖凡平等同圓覺。說盡同居超勝。長見寶華空際落。朝朝暮暮聞音樂。衣食自然



非造作·香臺閣。具總徧周國界常寬廓。別二義

聽說西方無量樂·凡夫淺智難圖度。隨有願求無不獲。叶獲何勞索·

珠衣綺饌黃金宅。叶鐸地似掌平尤廣博·八功德水非穿鑿。白蕩華中

胎可託·三生約·如今豈可輕拋卻。

聽說西方無量樂·君王便是如來作。不立三光并五嶽·除溝壑·

紅霞紫霧長籠絡。四八儀容金閃爍·鉢中美味隨斟酌。發願往生

真上策。叶緯堪呵責。叶灼死生路上飄蓬客。叶恪

聽說西方無量樂·風林水鳥聲交作。法句時時相警覺·貪瞋薄·

能教有學成無學。不染六塵離五濁·如蟬脫去無明殼。肯受涅槃

生死縛·空撈摸·語言文字皆糟粕。

聽說西方無量樂·一聞妙道忘知覺。胸次不留元字腳。生西方真訣真標格。叶各

光明徧界紅輪赫。叶整鵬翅展開滄海窄。叶緯誰能更問籬邊雀。多少凡毛

并聖角·都拈卻·塵塵剎剎歸無著。



聽說西方無量樂。長生不假神仙藥。胎就眼開華正拆。叶心彰灼。
永為自在逍遙客。上自利來度眾生離火宅。下利他命終免被閻王責。露地牛兒
如雪白。無鞭索。叶黃金地上從跳躍。
聽說西方無量樂。娑婆已悔從前錯。佛號自呼還自諾。思量著。
唯心淨土誰云隔。叶一貫由來雙五百。嬰兒謾把空拳嚇。擬議不來。如何是雙
遭一擱。五百諸禪客。凡情聖解曾銷爍。叶
聽說西方無量樂。四方上下天垂幕。不比娑婆田地惡。無垠罅。
純將一片琉璃作。能埽愛河波浪洄。盡翻苦樹枝條落。智斂爭容
蚊蚋泊。神超卓。徑登廣大毘盧閣。
聽說西方無量樂。且教影與形商略。收拾神情歸澹泊。重磨削。
觚圓更復雕為朴。世事休休還莫莫。誰將天爵并人爵。一念未生
誰善惡。俄然覺。紫鱗掣斷黃金索。照願話頭



聽說西方無量樂。未曾聞見須揚摧。異寶奇珍光間錯。同棲泊。
如來大士并緣覺。同居超勝諸上善人皆許諾。談空說苦相酬酢。百鷲群中
隨一鷄。翔寥廓。從茲永斷凡夫惡。

聽說西方無量樂。樂邦是我心開拓。根缺女人皆不著。誰強弱。
一人一朵金蓮萼。行樹七重珠網絡。寶樓風韻金鈴鐸。天上樂音
相間作。須誠慤。返聞自性同先覺。

聽說西方無量樂。娑婆自恨身飄泊。注想存心連晦朔。歸皇覺。
金臺接引休忘約。架廈區區同燕雀。成橋渺渺隨烏鵲。早晚無常
來逼迫。叶博難推卻。西游快展摩霄翮。叶鶴


聽說西方無量樂。叶力彌陀聖主垂恩澤。洗我禪心清且白。難尋迹。
月光倒射寒潭碧。舊債新怨都解釋。通身變作黃金色。同居一念須臾
圓萬德。真奇特。十方佛授如來職。

西齋淨土詩



題跋一律

日日當陽話夕陽·金桴擊鼓響逢逢。叶房。覺翁永明解惑欣重解·則老
揚宗幸載揚。法界千華開佛國·無生一曲演珠王。臨行喝死支
離客·振古威名壓野狂。戊申七月·私淑弟子·古歛成時稽首
賦。時年五十有一。



附錄三篇



蓮池大師答蘇州曹魯川書

附來書

久不奉面命。歉歉。乃時時獲翻刻教。迪我孔多。慰謝慰謝。南企法雲。殊切瞻依。適敝郡斷凡悟上人。祇趨壇下。為求法故。附此候安。不佞繆迂。近守東魯。遠宗西竺。乃於儒釋之書為蠹魚者。四十年於茲矣。亦嘗奉教於諸達者。有所蓄積。冀正之於大善知識。茲因斷凡之來布之也。夫釋尊有三藏十二部教。所謂於廣大海。張眾多網。又所謂大困小困也者。祇宜譚大以該小。詎可舉一而廢多。比吾黨中有倡為歷劫成聖。必漸無頓之說者。夫漸亦聖說。未嘗不是。而以漸廢頓。左矣。尊者內祕頓圓。而外顯淨土法門。諸佛有然。無足疑者。豈近



來聽眾。不無如法華所說。初聞佛法。遇便信受。思惟取證者。直欲以彌陀一聖。而盡廢十五王子。以淨土一經。而盡廢三藏十二部。則不佞之所不願聞者也。時雖末法。而斯人之機。豈無巧鈍。有如釋尊為迦葉。為憍陳如。其說如此。為善財。為龍女。其說如彼。二十五聖。各證圓通。文殊所稱又如彼。正所謂昨日定今日不定。又所謂說我是空且不是空。說我是有且不是有。此所以為善無常主。活潑潑地。如水上按壺盧然。非死殺法也。儻釘樁守窟。焉利人天。所願尊者為大眾衍淨教。遇利根指上乘。圓融通達。不滯方隅。俾鵬鷄並適。不亦盡美盡善乎哉。又佛華嚴乃無上一乘圓教。如來稱性之極談。非教非宗。而即宗即教。不空不有。而無垢無淨。是在法華猶較一籌。若餘乘似難與之絜長比短也者。尊者乃與彌陀經並稱。已似未妥。因此遂有著論騰之。駕淨土於華嚴之上者。朱紫遞



清之謂何。鹿馬互指又何說也。此而無人言之。天下後世必有秦無人焉之嗤。亦願尊者為淨土根人說淨土。為華嚴根人說華嚴。毋相誚。亦毋相濫。乃為流通佛乘。乃為五教並陳。三根盡攝。奈之何。必刻舟而求劍。且彈雀而走鷄也。若夫華嚴一經。有信解行證四法。善說此法者。宜莫如方山。今其言具在。可覆也。爰有清涼。人號為華嚴菩薩。而實不會華嚴義旨。草草將全經裂為四分以隸四法。舍那妙義。委之草莽矣。亦願尊者辨黑白。分涇渭。揭杲日於義天。嗟嗟。今之時緇素中高流。日就彫謝。不佞之所仰重於尊者。如泰嵩然。故不以讚而以規。知尊者無我。而不佞亦非為我。故諄諄言之。惟尊者亮之。

久聞居士精意華嚴。極懷敬仰。茲接手教殷勤。直欲盡法界眾生而納之一乘性海。是普賢大願也。然不肖雖崇尚淨土。而實則崇




尚華嚴。不異於居士。夫華嚴具無量門。求生淨土。華嚴無量門中之一門耳。就時之機。蓋由此一門而入華嚴。非舉此一門而廢華嚴也。又來論謂不肖以彌陀與華嚴並稱。因此遂有著論駕淨土於華嚴之上者。此論誰作乎。華嚴如天子。誰有駕諸侯王大臣百官於天子之上者乎。然不肖亦未嘗並稱也。疏鈔中特謂華嚴圓極。彌陀經得圓少分。是華嚴之眷屬流類。非並也。古稱華嚴之與餘經。喻如杲日麗天。奪眾星之耀。須彌橫海。落群峯之高。夫焉有並之者。此不待論也。又來論謂宜隨機演教。為宜淨土人說淨土。為宜華嚴人說華嚴。此意甚妙。然中有二義。一者千機並育。乃如來出世事。非不肖所能。故曹溪專直指之禪。豈其不通餘教。遠公擅東林之社。亦非止接鈍根。至於雲門。法眼。曹洞。為仰。臨濟。雖五宗同出一源。而亦授受稍別。門庭施設。理自應爾。無足怪者。況不肖凡品乎。若其妄效古人。昨日定今日



不定。而漫無師承。變亂不一。名曰利人。實悞人矣。何以故。我為法王。於法自在。平民自號國王。不可不慎也。二者說華嚴則該淨土。說淨土亦通華嚴。是以說華嚴者自說華嚴。說淨土者自說淨土。固並行而不相悖。今人但知華嚴廣於極樂。而不知彌陀即是遮那也。又來論清涼不會華嚴義旨。而裂全經為四分以屬四法。夫信解行證。雖貫徹全經。而經文從始至終。亦有自然之次第。非清涼強為割截也。其貫徹也。所謂圓融。其次第也。所謂行布。即行布而圓融。四分何害。使無行布。圓融何物。必去行布而圓融。則不圓融矣。且信住行向地以至等妙。佛亦自裂全經為五十二段乎。何不將五十二段一句說盡。而為此多卷之文乎。因該果海。果徹因源。因果未嘗不同時。而亦未嘗不因自因。果自果也。何必定執八十卷經束作一塊。都盧是箇無孔鐵鎚。而後謂之圓融乎。定執一塊。不許分開。即死殺法。即釘椿。即守



窟。安在其為活潑潑也。方山之論。自是千古雄談。而論有論體。疏有疏體。統明大義。則方山專美於前。極深探蹟。窮微盡玄。則方山得清涼而始為大備。豈獨方山。即杜順而至賢首諸祖。亦復得清涼而大備。豈獨華嚴諸祖。即三藏十二部百家論疏。亦復得清涼而大備。溫陵解華嚴。以方山為主。清涼為助。已為失宜。而居士顧訾之。此不肖之所未解也。又龍樹於龍宮誦出華嚴。而願生極樂。普賢為華嚴長子。而願生極樂。文殊與普賢同佐遮那。號華嚴三聖。而願生極樂。咸有明據。皎如日星。居士將提倡華嚴以風四方。而與文殊普賢龍樹違背。此又不肖之所未解也。況方山列十種淨土。極樂雖曰是權。而華嚴權實融通。理事無礙。事事無礙。故淫房殺地。無非清淨道場。而況七寶莊嚴之極樂乎。婆須無厭。皆是古佛作用。而況萬德具足之彌陀乎。居士遊戲於華嚴無礙門中。而礙淨土。此又不肖之所未解也。不肖



與居士。同為華藏莫逆良友。而居士不察。區區之心。復欲拉居士為蓮胎骨肉弟兄。而望居士之不我外也。居士愛我。不讚而規。今妄有所規。亦猶居士之愛我也。病筆略申梗概。殊未盡意。惟鑑之諒之。

又

敝郡斷凡人索書上謁。附致悃素。顧承來翰。規切究竟。殷殷亟也。荷荷謝謝。來翰云。華嚴具無量門。求生淨土。華嚴無量門中之一門。就時之機。由此一門而入華嚴。非舉一門而廢華嚴。又謂華嚴圓極。無可駕於其上者。並為確論。第華嚴是法身佛說。一乘妙義。迥異諸經。而人多與釋迦經一目之。故疏此經者。賢首爰肇其端。方山深契其旨。在清涼則擇焉而弗精。在溫陵則語焉而未詳。至有譏為綸貫者。抑未矣。溫陵云。方山為正。清涼為助。此見最卓。而尊者以為失宜。似未



知溫陵。亦未知方山者。諸不了義經論。及別行普賢行願品。與起信等論。皆稱說淨土。此豈無因。然華嚴經中未嘗及之。即方山所第十淨土更晰也。法華鱗差十六王子。內有彌陀。未嘗定為一尊。其讚持經功德。旁援安樂。實說女人因果。首楞嚴二十五聖證圓通。文殊無所軒輊。但云方便有多門。又云順逆皆方便。然繼以遲速不同倫。則於無軒輊中。又未嘗無所指歸也者。故要極於普門。而不推詡夫勢至。更加貶剝曰無常。曰生滅。若夫釋尊。祇說大小彌陀。不啻足矣。胡為乎紛紛然三藏十二部為乎。賢首清涼諸師。亟標小始終頓圓五教。僉以為允。而未嘗品及淨土。心宗家流。尤所蕩掃。大鑑之言。且未及詮。更拈一二。如誌公曰。智者知心是佛。愚人樂往西方。如齊己禪師曰。惟有徑路修行。依舊打之繞。但念阿彌陀佛。念得不濟事。又曰。汝諸人日夕在徑路中往來。因恁麼當面



錯過阿彌陀佛。又曰。其或準前捨父逃去。流落他鄉。東撞西磕。苦哉阿彌陀佛。此之三言。或以為苛。然豈無謂而彼言之。亦必有道矣。古德云。一切眾生。自己迷悟不同。迷心外見。修行覓佛。未悟自性即是小乘。又有云。直下頓了此心本來是佛。無一法可得。此是無上道。此是真如佛。學道人。祇怕一念有。與道隔矣。又有云。目前無法。意在目前。他不是目前法。若向佛祖邊學。此人未具眼在。何不向生死中定當。何處更擬佛擬祖替汝生死。有智人笑汝在。所以達者亟道祇劫辛苦修行。不如一念得無生法忍。又道一念緣起無生。超出三乘權學。況毋論三乘一乘。要之無我我所。今之往生淨土也者。我為能生。土為所生。自他歷然。生滅宛然。忻厭紛然。所未及悉。願從來譚蓮乘者。必曰華開見佛悟無生。蓋必待往生而見彌陀。始從觀音若勢至。抑或彌陀。誨以無生。此時方悟。豈



其上品絕少。中下滋多。滯在祇劫。似為迂遲。矧欲修淨土。亦須先修有無等四四十六觀門。試問所觀者是何軌則。能觀者還有幾人。所以念佛者如牛毛。往生者如麟角。何似反而求之。自有餘佛在也。彼寒山之勸豐干。謂往五臺禮文殊。不是我同流。此在通達佛道者。出詞吐氣自別。且也一切佛道。以金剛般若為入門。以佛華嚴為究竟。金剛則曰實無少法可得。而佛華嚴所稱佛地二愚。一則曰微細所知愚。一則曰極微細所知愚。所以阿難自道不歷僧祇獲法身。識者猶且呵之。故或曰佛瘡。或曰佛魔。文殊瞥起佛見。未免貶向二鐵圍。嗟嗟。見河能漂香象。智主不受功德。道人心無住處。蹤迹不可尋。故不歷權乘。獨秉一乘。此則不佞之所為惓惓者也。彼諸佛祖。為一分執著我識下劣眾生。以及小乘弟子。惟依一意識。計以現在色心等為染淨依者。憫其四大既離。一靈無歸。如失水魚。



躑躅就斃。故不得不將錯淨土而安置之。此亦化城之類也。傳有之。若能悟法性身。法性土。要歸於無物。是真佛土。若華嚴性海所現全身。如人身中有八萬四千毛孔。東藥師。西彌陀。各各在一毛孔中說法度生。人若渙毛孔。徹全身。未嘗不可。儻拋撮全身入一毛孔。不但海漚倒置。而蠅投窗紙。其謂之何。昨不佞手疏所云為宜淨土人說淨土。為宜華嚴人說華嚴。自謂不悖諸佛法門。亦是為尊者赤心片片。尊者乃欲攜我蓮胎。則昔人所云。若捉物入迷津。與夫棄金擔草之謂矣。更稽之。古人有云。若欲究竟此事。須向高高山頂立。深深海底行。若閨閣中輒暖物捨不得。有恁麼用處。又有云。諸經所稱無瞋恨行。此之瞋恨。非凡情可比。恨者。恨一切眾生。皆有如來智慧德相。而不自覺。瞋者。瞋吾度脫之未至也。以故自覺覺他。有世間智。有出世間智。有世出世間上上智。舉以語人。得



無違拒。庶幾能利益於人。溯昔三教聖人出興於世。無不為一大事。且觀時節因緣。偏者補之。弊者救之。微者顯之。要以心性開示於人已耳。以今天下拘儒株守傳註。曠士溺意虛玄。餘之手木槌而口彌陀者。自通道大都。迨窮村僻巷。居相望而肩相摩也。尊者又從而和之。非所謂順世情之教。波隨而風偃者乎。是在不佞不能無疑。而來翰乃稱雖崇淨土。實尚華嚴。又云由此淨土一門而入華嚴。此如古德所云。但為弘實。而眾生不信。須為實施權。以淺助深。又云用與適時。口雖說權。內不違實。但使含生得權實諸益也者。則不佞誠契之。祇領之。且羨且慰矣。乃會下聽眾。自杭過蘇者。時時有之。罔弗津津九品。閒與之言。少涉上乘。則駭心瞠目。或更笑之。此其過在弟子耶。在師耶。大丈夫。氣宇沖天。而度生為急。若出世矣。開堂矣。敷座矣。不具大人作略。祇作閭巷老齋公齋。



婆舉止。忽被伶俐人問著。或明眼人拶著。擬向北斗裏潛身耶。
· 抑鐵圍山裏潛身耶。不見道。若是大鵬金翅鳥。奮迅百千由
旬。躡影神駒。馳驟四方八極。斷不取次啗啄。亦不隨便埋身
· 且總不依倚。佛法大事。非同小可。願尊者重厝意焉。來翰
又云彌陀不異遮那。是也。第化境化儀。各各差殊。蓋諸佛教
義。通宗因緣。既墮因緣。豈無大小。定有深淺。故謂諸佛為
異。則千佛一佛。不可謂異。謂諸佛為同。則徧照能仁二尊。
亦自不同。古人以為一切諸法同異重重。不可一向全同。不可
一向全異。不可以全同作全異。不可以全異作全同。迷此同異
二門。則智不自在。如云擬向白雪蘆花處覓。則以溫州橘皮作
火得乎。首山念有云。夫為宗師。須具擇法眼始得。所以古來
有拈古頌古。又有別古愍古。如云至道無難。唯嫌揀擇。又云
至道最難。須要揀擇。所以華嚴第八地曰。寂滅真境現前矣。



猶云應起無量差別智。又云。觀察分別諸法門。此非作而致其情也。我之鑑覺自性。本自圓明。如大寶鏡。胡漢不分而分。如如意珠。青黃不異而異。若是於諸法中不生二解人。何嘗離卻揀擇別求。明白這些道理。便是揀擇不揀擇。所謂善巧分別清淨智。非耶。方山為論。清涼為疏。皆綜佛乘。共闡圓宗。雖論有論體。疏有疏體。然惟其義。不惟其文。文或殊。而義則一耳。如以其義。則見地迥別。清涼演說諸經。真善知識。惟於華嚴。其句訓而字釋。豈無補於舍那。其挈領而引維。實弗逮夫棗柏。清涼棗柏之區別弗明。則盧舍那經之旨要終晦。所謂信解行證四法。裂全經而瓜豆之。此其大者。自餘更多。不佞謂之擇焉弗精。非無以也。儻以為未然。請更質之於棗柏大士。

辱惠書。纍纍及二千言。玄詞妙辯。汪濊層疊。誠羨之仰之。然



竊以為愛我深。而辭太費也。果欲揚禪宗抑淨土。不消多語。曷不曰。三世諸佛。被我一口吞盡。既一佛不立。何人更是阿彌陀。又曷不曰。若人識得心。大地無寸土。既寸土皆無。何方更有極樂國。只此兩語。來諭二千言。攝無不盡矣。茲擬一一酬對。則恐犯鬪爭。不對。則大道所關。不可終默。敢略陳之。來諭謂清涼擇焉而未精。愚意不知清涼擇華嚴未精耶。抑亦居士擇清涼未精耶。又來諭謂不了義經。乃談說淨土。而以行願品。起信論當之。起信且止。行願以一品而攝八十卷之全經。自古及今。誰敢議其不了義者。居士獨尚華嚴而非行願。行願不了義。則華嚴亦不了義矣。又來諭謂法華記往生淨土。為女人因果。則龍女成佛。亦只是女人因果耶。謂彌陀乃十六王子之一。則毗盧遮那。亦止是二十重華藏之第十三耶。居士獨尊毗盧。奈何毗盧與彌陀等也。又來諭謂楞嚴取觀音。遺勢至。復貶為無常生滅。則僑陳



如悟客塵二字。可謂達無常。契不生滅矣。何不入圓通之選。誠曰觀音登科。勢至下第。豈不聞龍門點額之喻。為齊東野人之語耶。又來論謂齊己禪師。將古人念佛偈。逐句著語。其曰惟有徑路修行。則著云依舊打之繞。其曰但念阿彌陀佛。則著云念得不濟事。居士達禪宗。何不知此是宗師家直下為人解黏去縛。乃作實法會。而死在句下耶。果爾。古人有言。踏毗盧頂上行。則不但彌陀不濟事。毗盧亦不濟事耶。此等語言。語錄傳記中。百千萬億。老朽四十年前。亦曾用以快其脣吻。雄其筆劄。後知慚愧。不敢復然。至於今。猶赧赧也。又齊己謂求西方者。捨父逃逝。流落他鄉。東撞西磕。苦哉阿彌陀佛。往應之曰。即今卻是如子憶母。還歸本鄉。捨東得西。樂哉阿彌陀佛。且道此語與齊己所說。相去多少。又來論謂多劫修行。不如一念得無生法忍。居士已得無生法忍否。如得。則不應以我為能生。以上為所生。何



則。即心是土。誰為能生。即土是心。誰為所生。不見能生所生而往生。故終日生而未嘗生也。乃所以為真無生也。必不許生而後謂之無生。是斷滅空也。非無生之旨也。又來論謂必待華開見佛方悟無生。則為迂遲。居士達禪宗。豈不知從迷得悟。如睡夢覺。如蓮華開。念佛人有現生見性者。是華開頃刻也。有生後見性者。是華開久遠也。機有利鈍。功有勤怠。故華開有遲速。安得槩以為迂遲耶。又來論謂遮那與彌陀不同。而喻華藏以全身。喻西方以毛孔。生西方者。如撮全身入毛孔。為海漚倒置。夫大小之喻則然矣。第居士通華嚴宗。奈何止許小入大。不許大入小。且大小相入。特華嚴十玄門之一玄耳。舉華藏不可說不可說無盡世界。而入極樂國一蓮華中。尚不盈華之一葉。葉之一芥子地。則何傷乎全身之入毛孔也。又來論謂荒山僧但問以上乘。便駭心瞠目。居士向謂宜華嚴者語以華嚴。宜淨土者語以淨土。今此



鈍根輩。正宜淨土。何為不以應病之藥而強聒之耶。又來論謂老朽既出世開堂。不具大人作略。而作閭巷老齋公齋婆舉止。設被伶俐人問著。明眼人拶著。向北斗裏潛身耶。鐵圍裏潛身耶。老朽曾不敢當出世之名。自應無有大人之略。姑置弗論。而以修淨土者。鄙之齋公齋婆。則古人所謂非鄙愚夫愚婦。是鄙文殊。普賢。馬鳴。龍樹也。豈獨文殊。普賢。馬鳴。龍樹。凡遠祖。善導。天台。永明。清涼。圭峯。圓照。真歇。黃龍。慈受。中峯。天如等。諸菩薩。諸善知識。悉齋公齋婆耶。劉遺民。白少傅。柳柳州。文潞公。蘇長公。楊無為。陳瑩中等諸大君子。悉齋公齋婆耶。就令齋公齋婆。但念佛往生者。即得不退轉地。亦安可鄙耶。且齋公齋婆。庸猥下劣。而謹守規模者是也。愚也。若夫聰明才辯。妄談般若。喫得肉已飽。來尋僧說禪者。魔也。愚貴安愚。吾誠自揣矣。寧為老齋公老齋婆。無為老魔民老魔女也。



。至於所稱伶俐人明眼人者。來問著拶著。則彼齋公齋婆。不須高登北斗。遠覓鐵圍。只就伶俐漢咽喉處安單。明眼者瞳人上敷座。何以故。且教伊暫閉口頭三昧。回光返照故。抑居士尚華嚴。而力詆淨土。老朽業淨土。而極讚華嚴。居士靜中試一思之。是果何為而然乎。又來諭謂勸己求生淨土。喻如棄金擔麻。是顛倒行事。大相屈辱也。但此喻尚未親切。今代作一喻。如農人投刺於大富長者之門。延之入彼田舍。聞者皆笑之。農人不知進退。更掃徑謀重請焉。笑之者曰。主人向者不汝責。幸矣。欲為馮婦乎。農人曰。吾見諸富室。有為富而不仁者。有外富而中貧者。有未富而先驕者。有典庫於富人之門。而自以為富者。且金谷郿塢。於今安在哉。而吾以田舍翁。享太平之樂。故忘己之卑賤。憐而為此。今知過矣。今知過矣。於是相與大笑散去。



蕩益大師答卓左車茶話

原問博山啟附

上堂則超佛越祖。接眾則權引中下。此流俗宗匠。未悟心法者。所必墮之窠臼。致禪。教。律。及淨土諸法。俱失綱宗。俱成實法。智者無所適從。愚人蔑棄一切。有自來也。佛言。若人專念彌陀佛。是名無上深妙禪。如今弄虛頭。逞精魂漢。一味胡言亂語。定不如真實參究念佛底人。寧為上上人撥無淨土。令悟土即心。不應為中下人收作權乘。破壞真法。況法王於法自在。隨時應機。自無陳見。何必依他古宿。揚禪抑淨。伏乞豎吹毛劍。擊塗毒鼓。大轉法輪。如何是念佛門中。通身入理。向上一路。直踏毘盧頂上行作略。如何是學人初下手時。便離四句絕百非念佛。如何是念佛人最後極則淆譌處。腦後一錘。從來宗門語句。壁立萬仞。一涉淨土。定屬廉纖。冀和尚



將向來自性彌陀。惟心淨土等語。撇向一邊。親見如來境界。快說一番。震動大千世界。

宗乘與淨土。二俱勝妙法。眾生根性異。不免隨機說。向上一著。非淨非禪。即禪即淨。才言參究。已是曲為下根。果大丈夫。自應諦信是心作佛。是心是佛。設一念與佛有隔。不名念佛三昧。若念念與佛無間。何勞更問阿誰。故參究誰字。與攝心數息等。皆非淨土極則事也。淨土極則事。無念外之佛。為念所念。無佛外之念。能念於佛。正下手時。便不落四句百非。通身拶入。但見阿彌陀佛一毛孔光。即見十方無量諸佛。但生西方極樂一佛國土。即生十方諸佛淨土。此是向上一路。若捨現前彌陀。別言自性彌陀。捨西方淨土。別言惟心淨土。此是淆譌公案。經云。三賢十聖住果報。惟佛一人居淨土。此是腦後一鎚。普賢十大願王。導歸極樂。誰敢收作權乘。憶佛念佛。不假方便。自得心開。




· 誰謂定屬廉纖。但能深信此門。依信立願。依願起行。則念念流出無量如來。徧坐十方微塵國土。轉大法輪。照古照今。非為分外。何止震動大千世界而已。欲知衲僧家事。不妨借中峯一偈。通箇消息。偈曰。禪外不曾譚淨土。須知淨土外無禪。兩重公案都拈卻。熊耳峯開五葉蓮。



蕩益大師示念佛法門

念佛法門。別無奇特。只深信力行為要耳。佛云。若人但念彌陀佛。是名無上深妙禪。天台云。四種三昧。同名念佛。念佛三昧。三昧中王。雲棲云。一句阿彌陀佛。該羅八教。圓攝五宗。可惜今人。將念佛看做淺近勾當。謂愚夫愚婦工夫。所以信既不深。行亦不力。終日悠悠。淨功莫剋。設有巧設方便。欲深明此三昧者。動以參究誰字為向上。殊不知現前一念能念之心。本自離



過絕非。不消作意離絕。即現一句所念之佛。亦本自超情離計。何勞說妙譚玄。祇貴信得及。守得穩。直下念去。或晝夜十萬。或五萬三萬。以決定不缺為準。畢此一生。誓無變改。若不得往生者。三世諸佛便為誑語。一得往生。永無退轉。種種法門。咸得現前。切忌今日張三。明日李四。遇教下人。又思尋章摘句。遇宗門人。又思參究問答。遇持律人。又思搭衣用鉢。此則頭頭不了。帳帳不清。豈知念得阿彌陀佛熟。三藏十二部極則教理。都在裏許。千七百公案。向上機關。亦在裏許。三千威儀。八萬細行。三聚淨戒。亦在裏許。真能念佛。放下身心世界。即大布施。真能念佛。不復起貪瞋癡。即大持戒。真能念佛。不計是非人我。即大忍辱。真能念佛。不稍間斷夾雜。即大精進。真能念佛。不復妄想馳逐。即大禪定。真能念佛。不為他歧所惑。即大智慧。試自檢點。若身心世界猶未放下。貪瞋癡念猶自現起。是



非人我猶自挂懷。間斷夾雜猶未除盡。妄想馳逐猶未永滅。種種他歧猶能惑志。便不為真念佛也。要到一心不亂境界。亦無他術。最初下手。須用數珠。記得分明。刻定課程。決定無缺。久久純熟。不念自念。然後記數亦得。不記亦得。若初心便要說好看話。要不著相。要學圓融自在。總是信不深。行不力。饒汝講得十二分教。下得千七百轉語。皆是生死岸邊事。臨命終時。決用不著。珍重。

淨土十要第七

明・蕩益大師選定

寶王三昧念佛直指

淨土十要
(八)




靈峯蕩益大師選定淨土十要第八

述曰。聞夫法外之異見易除。法內之異見難滌。慈氏所謂謗菩薩藏。說相似法也。淨土法門。如大小權實諸疑。皆自外來者也。胥徒入境。望為敵國。壁壘雖堅。而亦可攻。唯認自性彌陀。唯心淨土者。以虛妄識神為自性。以胸中緣影當唯心。癡守迷情。妄撥身土。此自內發者也。以法謗法。真似難明。襲我旌旗而來。人皆認賊為己。在昔像季。此說尚未熾然。末法漸深。毒氣漸慘。古今師匠。未有認定此疽以為時證。而專治之者也。妙喜老人。痛呵默照邪禪。埽清黑山鬼窟。妙叶禪師著念佛直指。暴斥土外立心之謬。二師所治者同一病。所投者同一藥。所顯示者同一不思議心性。而淨土尤難。良以自性二語。乃諸祖誠言。天下古今所共據。奸生肘腋。多易忽難圖。



舉國皆狂。每一呼眾譁。余讀十疑或問。以迄直指。深歎運愈移。人根愈陋。時日降。見網日張。所幸至人出興。恰應時節。蕭牆禍起。幹蠱誕生。十方廣長。無處不徧。諸佛恩德。其在茲乎。謹奉直指。次天如禪師或問而流通焉。至於此書顯晦之緣。詳在別序。

今調西齋詩於第七。
此則次西齋詩後。



重刻寶王三昧念佛直指序

念佛三昧。所以名為寶王者。如摩尼珠。普雨一切諸三昧寶。如轉輪王。普統一切諸三昧王。蓋是至圓至頓之法門也。始自華嚴。終至法華。一代時教。無不讚揚此寶王三昧。始自文殊普賢。乃至永明楚石。一切菩薩聖祖。無不宗教指歸修證弘通此寶王三昧。而世之昧者。猶以為誰不以此為自性彌陀。非即樂邦教主。豈知唯心淨土。甚耶不在十萬億西。妄認六塵緣影為自心相。全不知十方法界。一一無非即心自性也。可不哀哉。元末明初。鄞江有大善知識。厥名妙叶。深憫邪見。述為念佛直指二十二篇。世久失傳。故雲棲老人每欲見之。而不可得。神廟年間。古吳萬融禪伯。偶于亂書中。得此遺帙。與唐飛錫法師所撰寶王論。同為一編。



·皆雲棲老人所未見也。韓朝集居士·先刻寶王論板·置于雲棲·予續刻此直指板·留于佛日·客歲幻寓長干·有車菴蕃居士·秉受歸戒·聽講唯識心要·及南岳大乘止觀·遂專心修淨土行·今夏禁足九旬·執持名號·因念今時狂妄之徒·薄視念佛法門·以大悲心·手輯古今淨土法語一冊·名曰念佛須知·分為信解·發願·修行·證驗四門·蓋信願行三·乃生西之要筏·而證驗·則舉果以勸因也·節錄甫成·適予應祖堂請·重到長干·遂虛心乞予讎校可否·予曰·居士之志則善矣·但淨土法語·從古迄今·充楹積棟·曷擇其簡切精到者而流通之·不尤易取信乎·以予觀居士命名立科之旨·則叶師直指最為相似·何以言之·彼第一極樂依正·第二斥妄顯真·第三訶謬解·乃至第八示折攝·皆居士所謂信解門也·第九勸修·即居士所謂發願門也·第十勸戒殺·乃至第十八羅顯眾義·皆居士所




謂修行門也。第十九一願四義。謂戒解行向。是重申以願攝信
行也。戒亦是行。解即是信。向仍是願。一願便具四義。四義
乃滿一願。明信願行。本非條別。願居於中而統前後。厥義彰
矣。第二十示滅罪義。第二十一示列祖行。皆居士所謂證驗門
也。第二十二正示迴向。普勸往生。例同經論有流通分。從始
至終。雅合居士之旨若此。居士何不捨己從人。樂取於人以為
善乎。於是居士踴躍歡喜。再拜稽首而謝曰。某乃知妙叶大師
。先得我心之所同然。又能發我之所未發也。今得奉此遺編。
誓當刊布流通。用薦先人。早生淨土。又願普與法界有情。決
定信入此門。永不退轉。請更序厥緣。以為同志者告。噫。如
車居士。亦可謂勇於自利利他者矣。讀是書者。慎勿負此苦心
也哉。清順治七年庚寅冬十有一月之吉。古吳蕩益道人智旭。識於祖堂幽
棲寺之大悲壇右。



寶王三昧念佛直指卷上并序

明四明鄞江沙門妙叶集

念佛三昧稱為寶王者。蓋於一切三昧之中。最上三昧者也。首
獨唱於廬山。後徧流於天下。歷代所修。往生非一。著文於世
。證驗良多。自昔至今。富於編簡。若禪若教。無不尊崇。是
聖是凡。悉皆景仰。但末代淺根。因藥致病。以極樂淨土。不
求之於西方。而求之於分別緣影。多流此見。內懷痛傷。嗟彼
唐喪其功。雖修無感。乃以淨土諸經。及各宗疏鈔。採其奧旨
。述以成編。雖其言之不文。莫敢裁於胸臆。自為警省。敢聞
於人。故以寶王三昧念佛直指。定其名焉。



◎ 極樂依正第一

原夫無上正徧知覺。聖主世尊。普應機宜。從兜率宮降神於世。故四十年中。說法三百餘會。皆令群有皆法界緣起。同證真常。乃至末後靈山會上。方說法華。俾令眾生開示悟入佛之知見。出世本懷。於茲暢矣。然出世度生之道。非但釋迦。三世如來。莫不咸爾。而於釋迦一代施化法門之中。求其所以機宜相感此法界第一緣起。生佛緣深。至簡至易。而功高徑捷者。無越求生淨土一法門也。蓋念佛法門。首因法藏比丘。於無量劫前。為大國王。聞世自在王佛說法。遂棄國出家而成比丘。其佛復為廣說二百一十億佛剎莊嚴。人天善惡麤妙不同等事。法藏聞已。即於佛前發四十八種大願願王。願成佛時。國中無有三途。三毒。八苦。八難。九惱。十纏等。一切障礙。生我國者。皆住正定。得忍悟心。解脫勝智之人。乃至十念得



生。若不爾者。不取正覺。晉海其時大地震動。天雨妙花。空樂自鳴。佛與其記。今已得果。成佛十劫。因昔願勝。功德神通。光明力無畏等。超過十方。約同居應身而論佛號阿彌陀。其阿彌陀佛所居之國。從是娑婆世界。直西過十萬億國土。名曰極樂。或曰安樂。今現在彼。以昔大願及神通力而為說法。攝取十方世界念佛眾生。眾生生者。得不退轉。剎那尚莫勝數。何況歷劫度脫。其生彼者。有何限極。微塵恆沙所不能喻。其佛國土。莊嚴勝妙。超過十方。約同居淨土而論諸寶池。隨其大小。皆七寶成。或有大池。其量盈廣。正住其中。底布金沙。邊鋪階道。其池之上。復有樓閣。千層萬疊。廣博妙好。光明赫奕。不可具說。其池之內。八功德水。香美清徹。盈溢充滿。為十四支。於諸無量莊嚴具中。尋流上下。出聲演說。無量法門。是妙水中。復有六十億七寶蓮華。團圓正等。水注葉間。四色四光。三輩九品。行列次第。香潔微妙。映蔽其國。寶



地平正。願力所成。於其地上。復有七重欄楯。七重行樹。寶幢臺榭。檐蓋珠纓。各各無量。殊特妙好。周迴間列。莊嚴其國。又於虛空。雨諸天衣。天花。天香。天花。天繒。天樂。各各無量。繽紛散漫。徧虛空界。如是無量諸莊嚴具。皆金銀瑠璃。碑礫瑪瑙。毗楞伽。甄叔迦等。金剛摩尼。如意珠王。不可思議眾寶所成。是眾寶內。各放無量百千萬億寶色光王。互相輝映。一一徧照三千大千世界。其光交羅。不相障礙。極虛空際。不可窮盡。如是無量一光。光明。一一莊嚴。與虛空中天樂香華。珍禽鈴網。其聲雅正。宮商清徹。鏗鏘應節。流出無量無邊微妙之音。其音徧滿。不間不斷。悉能演說苦空無我諸波羅蜜。歎菩提道。讚佛法僧。或說念處正勤根力覺道。諸菩薩行。諦緣願度。力無畏等。十八不共。大慈大悲。大喜大捨。不可思議無量法門。其所說法。三世十方依正色心。融通無礙。及勸精進。如佛音聲。等無有異。其國



眾生聞是法已。悉皆念念隨其所樂。速能證入三乘勝行。一切道品。無量解脫。如從佛聞。得無差別。縱是凡夫。聞此法故。自然精進。尚無一念疲倦之心。云何更有退轉。又彼國土。純一男子。無有女人。蓮華化生。不處胎胞。妙服美味。能成法喜。從其所欲。悉隨念至。無寒暑晝夜。無生老病死。無土石諸山。無三途惡道。往來虛空。經行樹下。欲作佛事。示現神通。悉從心念。又復壽命無極。如是種種快樂無極。故名極樂。況復彌陀世尊。功德光明。威神相好。各八萬四千。如紫金山。處大蓮華師子之座。莊嚴赫奕。超過虛空。大海彌盧。所不能及。眉間白毫。功德增勝。如日舒光。眾明悉絕。光中化佛菩薩聲聞。各放光明遠照塵剎。攝受眾生。彼二大士。亦復如是。文殊師利。普賢大行。諸大菩薩。皆住彼國。一生補處。其數甚多。諸上善人。俱會一處。悉為良友。下十六句皆言與我同一相一味以佛為師。親近慈容。聞第一義。頓超三



界。即證無生。十地高超。二覺圓滿。況能於念念中。供養十方三寶。成就一切法門。遊戲神通。淨佛國土。乃至入於三途六道。舒光破暗。救苦眾生。或復塵剎分身。隨機化導。應病與藥。如佛弘慈。於念念中。圓滿普賢所有行願。具文殊智。有大勢力。如觀世音。同證菩提。同佛所住。則一切眾生性雖昏昧。得聞此說。誰不歡喜。而生信樂。然彼妙土及莊嚴事。雖具我心。若非彌陀如來。於過去世。為度眾生。行菩薩道。不可稱計。焉得成就。當知彼佛行願無邊。莊嚴無盡。是故如來居彼國土。大願圓滿。寶土斯成。依正莊嚴。悉皆具足。如是莊嚴依正境界。假使各十方面。百恒河沙微塵剎數菩薩聲聞。以大辯才。如實稱揚。盡未來時。不可窮極。若善男子善女人。聞如是說。至心信樂。欲生彼國者。應如佛教。圓發三心。具足眾戒。不犯威儀。然後直心正向。觀彼國土一切依正無量莊嚴勝妙境界。及彼如來八



萬相好功德光明清淨之身。或復隨取一相一境。乃至如來眉間白毫相光。遠離虛妄。或一念至十念。或一日至七日。譬如壯士屈伸臂頃。即得往生。其有直信有彼國土。有彼如來願力威神。不生疑惑。但能一心不亂。執持名號者。不出所期。亦得生彼。何待色身報滿。然後得生。當知阿彌陀佛。接引眾生。令離苦海。過彼慈親。於先劫中。已立大誓。無苦不忍。無行不臻。無願不立。無法不說。為度我故。方便百千。今正是時。目睛不瞬。垂臂待我。已歷十劫。念念不捨。甚於剖心。乃至其心激切。入生死中。徧歷三道。地獄猛火。不辭勞倦。我若迴心向佛。如子戀母。正慰所懷。則不逾當念。便得往生。何必更經十念之頃。然後得生。



斥妄顯真第一

附真妄心
境圖說

末法頂門鍼

行人欲生彼國。出離生死。先當深識求生彼土真妄之心。且謂如是極樂世界。為是在境。為是在心。若在於心。但有虛想。無土可生。若在於境。雖有生處。又復失心。若謂心境二俱求生。則我身心是一。寧生兩處。若謂心境是一。一心求生。則自今心境宛爾。難說是一。又極樂娑婆。淨穢不同。況是世尊垂教。敕令捨穢求淨。一義奚得。四句既不可求。或謂處處皆是西方極樂。或謂心淨則是極樂。或云極樂不離這箇。若作此解。斷案如山皆名邪見。而余因不得以默矣。彼若謂極樂在心。此乃緣影即便妄認此心住在我今身中。既在身中。但名求心。何名求生。豈我世尊不知極樂在心。而說在西方十萬億國土之外耶。又豈不能指說內心。而但能說外境耶。今西方極樂世界阿彌陀佛。現在說法。實境宛然。此是聖



人誠言。焉敢不信。而不知此緣影心外之極樂。正即是我真心。我此真心。如彼大海不增不減。而汝妄謂為境。汝謂極樂在緣影心。此緣影心。如海一漚。生滅全妄。而汝妄謂為心。汝若固執妄見。不信外有極樂。信在汝緣影心內者。汝緣影心無體。不可謂緣想過去五塵以心求生於心。而不知彼極樂雖在西方。西方即我真心。真心無性。即彼名體以顯我心。名體本空。亦即我心而示其相。心境一體。生佛同源。求彼佛。即求自心。非外求也。究自心。須求彼佛。豈他惑哉。如是則取捨忻厭。熾然著相。任我所求。豈復外心。心能具故。則知此心圓裹一切依正境界。乃至色心淨穢。生佛因果。三世十方諸法。含攝無外。同一受用。求一外相。了不可得。雖無外相。不分而分。淨穢宛爾。故當如是而求。豈可求之於妄心也。如是願求。佛所印可。與彼世之不識本心。愚癡無智。不求西方極樂之佛。但向自己肉團緣影妄心中求。謂是唯心肉團之計雖更愚淺然與緣影同計在胸



淨土。本性彌陀者。實遠遠矣。然彼極樂國土。非依緣影妄心。
又彼彌陀色身。非在眾生陰體。若向我今四大緣影身心中。求本
性自己之佛。不求西方極樂之佛。則妄心生滅。佛亦生滅。佛生
滅故。三昧不成。縱求有得。但成生滅之佛。還生生滅之土。不
成正行。經云。以輪迴心。生輪迴見。彼圓覺性。亦同輪轉。即
此義也。若欲離諸妄見。直生彼者。但求西方十萬億國土外極樂
彌陀之佛。以稱性妙觀。如實觀之。使彼如來本覺相好。於彼顯
現。合我眾生始覺真心。於此發明。始本相冥。生佛互感。三昧
乃成。正行斯立。不生滅土。始可生也。故知此心徧一切處。尚
不間於地獄。何止極樂。但地獄苦處。今順性而求離。極樂九品
。今順性而求生。但依修多羅教。順佛法音。求離苦得樂。從凡
入聖。實不出吾之心性。故名唯心淨土。本性彌陀。非謂從妄心
中求。妄心無體。焉得名為唯心本性之佛耶。彼向自己緣影妄心



中求者。以色身及山河大地十方剎海為外境也。此向自己不動真心中求者。即十方剎海大地山河為內心也。若知十方剎海即內心。則打成一片。故我任意於中捨穢取淨。厭東忻西。不出自心。以實有彼大願果佛能接引故。故求無不得。若謂十方剎海為外境。則打作兩橛。故纔動念。便乖法體。求心反即失其用。失心如不得自心。以但有此性具因佛。微悟無力用故。故雖求無得。又妄心但是虛妄緣影。惑為色身之內。無土可生。真心含育一切塵剎。本具極樂依正。求之必生。妄心捨外趣內。真心即外為內。內無外故。外求有因果佛。即求自心。內非實故。內求無體緣影。不見自心。妄心心境宛然。真心即心即境。妄心生滅無據。真心不動不搖。妄心在因無果。始終生滅。真心因果一致。性修交徹。故知從真心妄心求者。其別若是。論時。此邪妄非權小故云則何啻日劫相倍。論處。何當何但則何但天地懸殊。論體。真則圓裹十虛。妄則居於身內。論用。真則橫截娑



婆。直出生死。妄則煮砂為飯。經劫難成。是故行人發菩提心。求生淨土。豈可但求自己緣影妄心。不求西方極樂真佛。良可痛傷。譬如欲西而面東。欲升而抱石。從水求火。從火覓水。奚可得焉。嗟今之人。不識真心徧一切處。即色顯體。而妄認緣塵影事。謂是本性。謬之甚矣。譬如有人認賊為子。其家財寶必被消滅。分別影事。妄認為心。亦復如是。若或識子是賊。賊不為害。知意是妄。妄亦奚傷。但不可認彼為是極樂依正也。四明法智大師。所以有指妄即真之說。觀佛觀心之談。終不撥於極樂依正實境。奈何後世。邪見蜂起。魔侶熾然。破滅佛法。斷佛種性。妄計極樂妙土。在我緣影心中。而不肯西求。可勝顛倒。彼閻巷之人。無論僧俗箇箇點胸未聞正說。以此邪見。密相傳授。疑悞人者。雖不逃於地獄苦報。尚有可恕。而我出家四眾。圓頂方服者。同此見解。尤可傷憫。倘若真為生死。則必以此說為是。若有障重之人。於此



法門不能隨順者。則當更審緣影妄心。境界云何。此虛妄心既無有體。但隨我生滅。遂即妄認為我。妄認我故。便謂此心住在我今色身之內。謂此色身住於今之世界。謂此世界還住今之虛空之中。此虛空性。廣大難量。徧含塵剎。如是則空大界小。心劣於身。一念轉微。不可舉示。豈可以至微至末一念無體之妄心。而於此求極樂依正之妙境乎。不可求而求。豈不甚惑。既了此義。則知如是空性無邊。雖不可量。元不出我大覺清淨心中。如彼片雲點太清裏。況諸世界在虛空耶。況此色身在世界耶。況此妄心在色身耶。故知妄微身著。界大空圓。從纖至洪。不出我今本心之內。故知我心如空。彼空如塵。我心廣大無涯無底。圓裏十方三世一切虛空微塵剎土。一切眾生色身妄念。欲求一法在於心外。了不可得。何特西方極樂非心外耶。造次顛沛。尚不可離。況淨行莊嚴。要期西邁。透脫生死。豈求外耶。經云。認悟中迷。



晦昧為空。空晦暗中。結暗為色。色雜妄想。想相為身。聚緣內
搖。趣外奔逸。昏擾擾相以為心性。一迷為心。決定惑為色身之
內。不知色身外洎山河虛空大地。咸是妙明真心中物。譬如百千
澄清大海。棄之唯認一浮漚體。目為全潮。窮盡瀛渤。汝等即是
迷中倍人。如我垂手。等無差別。又云。妙覺明心。徧十方界。
含育如來十方國土。清淨寶嚴妙覺王刹。又云。十方虛空。生汝
心內。猶如片雲。點太清裏。況諸世界在虛空耶。以是義觀。既
十方空刹。依正色心。是我本有。我今決志求生本有之土。求見
本有之佛。有何不可。而謂外求。我既願求。心能感故。彼佛為
我顯現之時。即我自家底本有心佛顯現。心佛真實。何有外來。
既無外來。彼佛顯時。即我心顯。我心顯時。即彼佛顯。我心即
是彼佛之心。彼佛即是我心之佛。一體無二。性本圓融。何可捨
彼西方極樂內心之佛。而妄計別有唯心佛也。或曰。雖妄心。豈



不亦具依正之法。何必使人求乎外境。答曰。妄心設具一切依正之法。豈不亦具西方極樂。若知西方極樂一如娑婆之實境可求。可說心具妙。若謂此心即是。心外更無實境。此則但是妄心虛想。有何實焉。而謂心具妙。又即境之心名真心即境即心故即非即。離境之心名妄心。故知真妄雖同。即離為異。即得離失。即是離非。其旨明矣。又如法師少康。因念佛故。稱佛名時。佛從口出。狀若連珠。亦存其相。使其眾會皆得見也。佛既有相。土焉不實。更有一等。謂於事則有。於理則無。或云處處皆是淨土。傷哉此輩。深惑難祛。又禪宗南陽國師為禪客舉無情說法之話。雖不專言淨土旨趣。亦痛末世向緣影求佛者多。故此說中。不得不備。





附真妄心境圖說

下圖大方相·喻大覺不生滅之真心也·心量不可為喻·今姑以方相擬之·內一圓相·喻十方無邊虛空也·內十箇小方相·喻十方各微塵數世界也·內人身中心字·喻汝今胸中所蘊六塵緣影之妄心也·此妄影心在我身中·身在世界·世界在空·空在大覺本然真心之中·故知此東穢西淨二土·實境兩形·遠隔十萬億國土之外·豈在汝今虛妄緣影心中·佛祖有云·唯心淨土·本性彌陀者·正在此以方相為喻能含裹十虛大覺不生滅真心中·若謂在汝即今妄想緣影心中·可謂惑甚·楞嚴云·譬如百千澄清大海·棄之·惟認一浮漚體·目為全潮·窮盡瀛渤·此是迷中倍人·即此義也·又云·十方虛空生汝心內·如片雲點空·況世界在空·豈能離我本然真心也·又云·空生大覺中·如海一漚發·有漏微塵國·皆依空所生·如是則淨穢等土·不離真心·又何礙於著相求生耶·若能了遠即近·求即無求·自合理趣·此真妄二心·古人廣有妙釋·不能具引·行者可不鑑乎。



眞妄心境圖





阿謬解第三

堪為前
祖吐氣

念佛三昧。名三昧王。境界甚深。卒難究竟。古今師授。互有不同。至於天台。其說大備。慈恩賢首。各引其長。暨我禪宗。亦極明顯。但後學淺陋。莫得指歸。尚未升堂。焉能入室。尋門未得。異見多途。遂將禪宗六祖大師壇經說淨土處。暗地搏量。隨語生解。便謂本無淨土。不必求生。而不知我大師非但所說隨機。實乃義符經旨。縱隨其語。但言淨土不必生。亦不說無淨土。淨土既有。生理昭然。何故初機執指為月。若依大師所云。迷人念佛求生於彼。悟人自淨其心。又云。東方人但心淨即無罪。雖西方人心不淨亦有愆。東方人造罪。念佛求生西方。西方人造罪。念佛求生何國。凡愚不了。不識身中淨土。願東願西。悟人在處一般。又言。淨土遠近。但隨眾生善根不同。而佛土焉有遠近。

語契小本及觀經



之異。是謂不必求生也。然要眾生永斷十惡八邪。具修十善八正。又令妙識心地性王。不離此身。但迷悟有異。若悟。則能行慈悲喜捨。能淨平直等善。即是觀音勢至。釋迦彌陀。若迷。則分別人我。邪心虛妄塵勞之殊。即是須彌海水之境。龍鬼地獄之黨。今詳大師旨意。但能心淨。則隨處皆淨。實與維摩會上佛足按地。變穢為淨。其諸大眾各自見坐寶蓮華。義實無二。則經所謂隨其心淨即佛土淨。其說明矣。大師之辯。豈不稱可佛心。深符經旨。但聖人說法。遮表不同。其有位未至於此者。不可引彼遮詮而自誑也。況一大藏教。或說遮詮。一切皆非。何必求生。或說表詮。一切皆是。必當求生。此二法說。同出佛口。義無有殊。豈可偏執遮詮之說。頓棄表詮求生之義耶。若果直謂於土不必捨穢取淨。而但淨其心者。則大師亦當謂人但淨心而已。不必令人斷諸惡業而修善行也。今既令人斷惡行善。則必於土捨穢取



淨。其義益明。故佛說遮詮之時。正欲顯於表詮令求生。說表詮時。正是依於遮詮知無生。故知曹溪令人因心先淨。則報境自淨。吐唾要人掩鼻豈要人食唾耶

。不令求生。遮詮也。廬山令入佛報境淨。則因心自淨。教必求生。表詮也。然佛祖說法。因果不二。非前非後。二義未嘗相離。雖使人所入不同。而法體本一。奈何今人纔聞遮詮之說謂是。便謂表詮之談為非。常吐唾恐傷元氣。自生退障。良可憫傷。不知大師作此遮詮不必求生之說。正是顯於表詮。令求生淨土故也。又如釋尊一代聖教。諸部歷談。無非一味。而於顯說法中。定多讚顯說。於密說義中。必特稱密說。各宗當部。而置別談。然佛豈無別談妙於此者。蓋欲應機。使眾會受持。得以一志無猶豫也。今像季中扶宗樹教。豈無抑揚之時。六祖既欲弘一行三昧。理宜杜絕諸乘。廬山特欲闡念佛三昧。使之橫超直截。正當圓攝群機。決定論。後學豈可妄生二見。宜詳審之。又謂東方西方之人心淨無罪。不淨有愆者。



正謂東方惡境羸彊。佛已滅度。不能心淨。如俗在家。火宅萬煎。
· 縱修亦失。譬如小石。入水即沈。故必求生西方。彌陀聖眾現
在。境勝行深。逃子既回。佛親誨益。如出家在寺。善緣具足。
決不退轉。故生彼國。心淨無愆。如彼大石乘船。入水不沈故也。
· 又東方西方。理本一體。彼佛國土。非但境勝。其佛現在。能
除愆罪。心必清淨。聖地可階。故必遠勝娑婆。須求生也。若是
根勝如曹溪六祖者。尚能入生死大海。尋聲救苦。教化眾生。何
必求生。其或道力未充。妄效先覺。自不求生。教人亦不求生。
譬如救溺無船。彼此俱溺。可奈何哉。又我大師。實弘禪宗之六
祖。所說豈非闡揚少室之禪。乃云心平何勞持戒。行直何用修禪。
· 若依此語。則謂不必持戒修禪矣。而不知心若平。則我待物無
不平。物我既平。豈可殺他殺自養。盜彼盜自利。分男女淫相而行非行。
· 語不真實。而更飲酒酒。使醒醉異時。心平既無此犯戒之相。則



一切戒皆在其中。豈可全不持戒。與劫殺人等。而云心平。是知作此心平何勞持戒之語。正是顯於大戒也。禪字乃是梵語。此翻靜慮。或翻正定。或翻一行三昧。豈有行直之人。其心慮而不靜。其住定而不正。其行有不一者。是知何用修禪之語。正是顯於深禪也。大師行超天人之表。道隆像季之間。恐後學著法泥迹。於戒體中說何勞持戒之語。於禪境中說何用修禪之言。例此。則知亦於必當求生淨土法中。而說不必求生之語也。後學猶轉泥迹。謂實不必求生。愚之甚也。蓋大師所說。反勸也。諸祖所談。順讚也。非順。則無以啟進修之路。非反。則不顯圓頓之修。反勸順讚。悉應當時之機。無有實法。如云逢佛殺佛。豈真殺佛乎。若殺佛之語是實。則文殊仗劍。亦是真殺佛乎。苟隨古人之語。不求古人之心。謂實不必求生者。正所謂醍醐上味。為世所珍。遇斯等人。翻成毒藥矣。是故大師稱彼三諦圓妙之理。於有生



中說無生。於無證中說修證。二邊叵得。中道不存。令教乘圓頓法門。坦然明白。如揭日月於昏衢。無不蒙照。而謂禪宗於念佛正大三昧淨土旨趣。有所未盡。可乎。若夫河西綽公。長安善導。信源禪師。智覺。慈覺。豈非繼其後者。皆能遠稟遺音。力弘斯道。道珍。懷玉。行業厥彰。圓照諸師。其驗益著。況今禪林為病僧念誦。及茶毘十念稱佛名號。俾其往生。事載典章。餘風尚在。更奚惑焉。



正明心佛觀慧第四

此淨宗根本法輪。持名者亦須於此悟入理持。

夫念佛三昧者。實使群生超三界生極樂之徑路也。始自鷲嶺敷宣。次羨廬山繼軌。十方稱讚。諸祖傳持。自昔至今。有自來矣。但其說或不能一。致後學不得其歸。獨天台三觀法門。理冠群經。超乎眾說。稟教得旨。其益難思。故後學不可不以此為舟航也。



·夫三觀者·一念即空即假即中也·自我如來恢揚·至於智者妙悟·所謂空則一切皆空·假則一切皆假·中則一切皆中·俱破俱立·俱非破立·圓融絕待·難議難思·統諸部之玄門·廓生佛之境智·極萬法之源底·顯淨土之圓修·念佛三昧·非此法門·則有所未盡也·四明大師發揚妙旨·以諭後學·今悉用其語·求生淨土·雖不外乎世間小善·及彼事想·若非以大乘圓妙三觀法門·釋彼十六觀經奧旨·使人開解起行·何由必生·十六觀者·初觀落日·所以先標送想向彼佛也·初心行人·雖了根塵皆是法界·而心想羸劣·勝境難現·是故如來設異方便·即以落日為境·想之令起觀中之日·圓人妙解·知能想心·本具一切依正之法·今以具日之心·緣於即心之日·令本性日·顯現其前·斯乃以法界心·緣法境界·起法界日·既皆法界·豈不即空假中·此猶總示·若別論三觀成日功者·以根境空寂·則心日無礙·以緣起假



立。故累想日生。以其心日皆法界。故當體顯現。日觀既成。則三觀同在一心。非一非三。而一而三。不可思議。日觀既爾。餘觀例然。應知十六。皆用即空假中一心三觀以為想相之法。次觀清水。復想成冰。良以彼土琉璃為地。此地難想。且令想冰。冰想若成。實地可見。如上且以所見落日及冰以為方便。次觀地。觀樹。觀池。及以總觀樓地池等。已上六觀。皆所以觀彼土之依報也。至於觀華座者。為三聖之親依。觀寶像者。類三聖之真體。欲觀於佛。先觀於座。真佛難觀。要先觀像。乃至普觀往生。雜觀佛菩薩等。七觀。皆所以觀彼土之正報也。後三觀者。明三輩九品之人自此而生彼也。既然修因不同。是故感果差降。今亦觀者。為令行人識別三品優劣。捨於中下而修習上品往生故也。然諸觀皆用經所示相。憶持在心為所觀境。仍了自心本具此法。託境想成。發明心目。又經題云佛說觀無量壽佛經者。佛是所觀



勝境。舉正報以收依果。述化主以包徒眾。觀雖十六。言佛便周。則當但觀彼佛也。欲觀彼佛者。則當先觀彼佛如虛空量端嚴微妙廣大色身。一一身分。八萬四千相。一一相中。八萬四千隨形好。一一好中。八萬四千光明。一一光明之中。一一世界海。彼世界海中。一切十方諸佛菩薩聲聞緣覺僧眾。一一微妙廣大。不可具說。但當憶想。令心眼見。見此事者。即見十方諸佛。以見諸佛故。名念佛三昧。作是觀者。名觀一切佛身。以觀佛身故。亦見佛心。佛心者。大慈悲是。以無緣慈攝諸眾生。作此觀者。捨身他世。生諸佛前。得無生忍。又云。觀無量壽佛者。從一相好入。但觀眉間白毫。極令明了。見眉間白毫者。八萬四千相好自然當現。見無量壽佛者。即見十方無量諸佛。得見無量諸佛故。諸佛現前授記。是為徧觀一切色身相。故知十六妙觀。以觀佛為要。八萬相好都想難成。故令但觀眉間毫相如五須彌。此想若



成。八萬皆現。此為要門也。若修前諸觀。心得流利。觀已宏深。則可稱彼毫量而觀。使八萬相好自然皆現。疏中令觀劣應毫相。此即是觀經

· 乃為未修前諸觀者。及為雖修觀未成者。故於佛身別示初心可觀之相。為三昧門也。又慈雲法師。但令直想阿彌陀佛丈六金軀坐於華上。專繫眉間白毫一相。其毫長一丈五尺。周圍五寸。外有八棱。中表俱空。右旋宛轉。在眉中間。瑩淨明徹。不可具說。


· 顯映金顏。分齊分明。作此想時。停心注想。堅固勿移。此想若成。則三昧現前矣。是故觀佛三昧經云。若人至心繫念。端坐觀念色身。當知心如佛心。與佛無異。雖在塵勞。不為諸塵之所覆蔽。作是觀者。是真念佛。是知觀佛功德。其事如是。又彼世尊相好光明。微妙廣大。眾生狹劣。想念難成。佛令於真身觀前。先令想像。佛必坐座。又先觀座。座觀若成。則當想像。經云。諸佛如來是法界身。入一切眾生心想中。是故汝等心想佛時。



是心即是三十二相。八十隨形好。是心作佛。是心是佛。諸佛正徧知海。從心想生。是故應當一心繫念諦觀彼佛。夫法界身者。報佛法性之身也。滿足始覺名為報佛。究顯本覺。名法性身。始本相冥。能起應用。然非眾生能感。則諸佛亦豈能應。能感如水。能應如日。是故始覺合本。猶白日昇天。應入淨想。如影現百川。有感有應。此二道交。是為入眾生心想之義也。又法界身者。即佛身也。無所不徧。故以法界為體。若能得此觀佛三昧。則觀解心契入佛體。佛體入觀解心。斯乃始覺解於本覺。是故本覺入於始覺。有解有入。此二相應。是為入眾生心想中也。當知今之心觀。非直於陰心觀本性佛。乃託他佛以顯本性。是故先明應佛入我想心。次明佛身全是本覺。故應佛顯。知本性明。託外義成。唯心觀立。二義相成。是今觀法。又經中云。是心作佛。是心是佛者。所以示今觀佛。當明修性不二之旨。言作佛者。此有



二義。一者淨心能感他方應佛。謂諸佛法身。本無色相。由眾生淨心。依於業識。熏佛法身。故能見佛勝應色相。二者三昧能成自己果佛。謂眾生以淨心想。成就觀佛三昧。故能使自己終成果佛。此之二義。初作他佛。次作己佛。當知果佛從證。非是自然。即是而作。全性成修。顯非性德自然是佛也。言是佛者。亦有二義。一者心即應佛。前言佛本無相。心感故有。則心佛有無。條然永異。今泯此見。故即眾生之心。全是應佛。以離此心外。更無佛故。二者心即果佛。既心是果佛。故知無有成佛之因。以眾生心中。已有如來結加趺坐。豈待當來。方成果佛。此之二義。初是應佛。次是果佛。當知果佛本具。非從緣成。即作而是。全修成性。顯非修德因緣成佛也。若以作是顯於三觀。則空破假立。皆名為作。二邊之觀也。不破不立。名之為是。中道之觀也。全是而作。則三諦俱破俱立。全作而是。則三諦俱非破立。即



中之空假名作。則能破三惑。立三法。故感他佛三身圓應。能成我心三身當果。即空假之中名是。則全惑即智。全障即德。故心是應佛。心是果佛。故知作是之義一心修者。乃不思議之三觀。為十六觀之總體。一經之妙宗也。文出此中。義徧初後。是故行者當用此意修淨土因。或曰。何不依經所說。惟以事想。直生淨土。乃顯慧觀之門。使初心難入耶。答曰。觀慧事想。乃至人中微善。但得一心。皆可生於淨土。但麤妙之不同耳。麤則惟彼事想。妙則專乎心觀。疏云。良以圓解。全異小乘。小昧唯心。佛從外有。是故心佛其體不同。大乘行人。知我一心。具諸佛性。託境修觀。佛相乃彰。今觀彌陀依正為緣。熏乎心性。心性所具極樂依正。由熏發生。心具而生。豈離心性。全心是佛。全佛是心。終日觀心。終日觀佛。其旨明矣。又應了知。法界圓融不思徹底指示議體。作我一念之心。亦復舉體作生作佛。作依作正。作根作境



· 一心一塵· 至一極微· 無非法界全體而作· 既一一法全法界作
· 故趣舉一· 即是圓融法界全分· 既全法界· 有何一物不具諸法
· 以一切法· 一一皆具一切法故· 是故今家立於唯色唯香等義·
又云· 毘盧遮那· 徧一切處· 一切諸法· 皆是佛法· 所謂眾生性
德之佛· 非自非他· 非因非果· 即是圓常大覺之體· 故知果佛圓
明之體· 是我凡夫本具性德· 故四三昧· 通名念佛· 若此觀門·
託彼安養依正之境· 用微妙觀· 專就彌陀· 顯真佛體· 雖託彼境
· 須知依正· 同居一心· 心性周徧· 無法不造· 無法不具· 若一
毫法從心外生· 則不名為大乘觀也· 又仁王般若經云· 佛問波斯
匿王· 汝以何相而觀如來· 王言· 觀身實相· 觀佛亦然· 無前際
中際後際· 不住三際· 不離三際· 不住五蘊· 不離五蘊· 不住四
大· 不離四大· 不住六處· 不離六處· 不住三界· 不離三界· 乃
至非見聞覺知· 心行處滅· 言語道斷· 同真際· 等法性· 我以此



相觀如來身。佛言。應如是觀。若他觀者。名為邪觀。此義益明矣。又云。若其然者。何不直觀彼土真身之妙。而又此經教人先修像觀耶。答。娑婆教主稱讚樂邦。務引眾生出離五濁。教觀彼佛六十萬億那由他由旬之法身。而先之以華上寶像者。開示方便。使觀麤見妙也。繼之以丈六八尺之像者。隨順下凡。使觀小見大也。蓋麤妙異想。悉從性而起修。小大殊形。咸自本而垂迹。能觀之性。初無差別。所觀之境。寧可度量。是故圓頓之談。一音普被。開示其次第而非漸。隨順其根器而非偏。並啟觀門。全彰實相。像教妙之源。豈不在茲。此是念佛三昧單提直截之旨。始終不二之談。大乘圓頓之道。如日月普照天下後世。使知真妄之心。即一而不同。而理有所詣也。可謂不離日用。解行觀慧悉皆具足。學者可不盡其心哉。



道場尊像念佛正觀第五

最切要

夫觀承上文來慧三昧者。當以斯觀慧之旨。觀彼極樂依正。使此心純熟。

心境理一。而直生於彼土也。道場正觀者。以彼雖達觀慧之旨。

而六根所對。尚留塵境。或有退轉。故於道場聖像。乃至莊嚴供

具。即與極樂依正。一體而觀。行人雖未離娑婆。以此心觀一故

。如已生淨土矣。於命終時。莫不感應。且如行人懺悔行事。清

淨道場莊嚴供事。至於一香一華。了達諦理方知下來所供是實豈不即彼三諦之理。若不以此

諦理。事事之中。正念觀察。使勝行有歸。則於大乘圓頓之道。

不能開顯。如彼佛土。有無量一一莊嚴之具。皆從彼佛初修菩薩

行時因行所感。因行既立。果土現前。故莊嚴具。勝妙無盡。我

今觀果知因。則知三味道場一一莊嚴。與彼極樂因果無二。豈不

亦各各成大三昧。顯諸法門圓融微妙。如極樂土。等無差別。亦



自即彼嚴具。為妙身相。身相供事。非彼非此。非一非多。依正互融。顯法界理。如諸佛土不可思議。豈可視為土木所成境耶。故知或境或心。或身或土。同一受用。自在無礙。經云。以波羅蜜所生一切寶蓋。於一切境界清淨解所生一切華帳。無生法忍所生一切衣。入金剛法無礙心所生一切鈴網。解一切法如幻心所生一切堅固香。周徧佛境界如來座心所生一切眾寶妙座。供養佛不懈心所生一切寶幢。解諸法如夢歡喜心所生一切佛所住處寶宮殿。無著善根所生一切寶蓮華雲等。以是觀之。則知極樂依正之境。乃是彌陀如來因行所成。今感其果。我此道場。既是生淨土因。勝劣雖有不同。如海如滄。而其氣分。豈不與同體耶。因是義故。則道場中。六根所對香華燈燭。勝旛寶蓋。一切供具。乃至衣服臥具。飲食醫藥。諸受用具。一色一香。及一微塵。無非三昧。無非法門。皆能使人發乎妙解。悟心證聖。雖未聞音。亦能



表現念佛三昧諸大法門。亦即一切生佛之身。境智無礙。亦能與我同行。為真法侶。行人敢輕視之。使不發妙悟。俱生彼國。可乎。經云。禪定持心常一緣。智慧了境同三昧。義亦若是。能作此觀。則根境一致。何但我之三業為能修也。又如地獄苦具。刀杖劍火。以彼先造惡因所使。皆能搖動為蛇為狗。為蟲為鳥。穿骨入髓。作諸苦事。況道場中諸莊嚴具。而不依正同源。皆解脫法。與我共成三昧者乎。又道場莊嚴。形皆異物。尚能使人發乎妙解。況今所奉尊像。恭敬供養。盡心竭志。如父如母。豈不能令我解脫。速生安養。且如一佛二菩薩像。置道場中。為的對懺悔之主。餘像是伴。總名為正。諸莊嚴具。悉名為依。是則主伴依正。與彼極樂依正。雖麤妙不同。而其像主所有神通願力。同佛真身。叩之則靈。求之則應。有何差別。既無差別。則於此像。豈可但作土木膠漆金彩所成之見。而不作西方極樂大願相好真

此是初步信為能入

引證確



身之佛觀耶。若於像中不見真身。則其心不一。三昧難成。妙悟不深。失之甚矣。蓋今所見之像。與彼真身實無二致。但以彼佛大慈普徧。於無二身。隨機應現。示真示化。或示形像。而我以眼障尚深。於一法中所見自異。於佛真身而謂像耳。則知此像豈實像哉。譬如觀經三輩九品接引之佛。隨其品位。所遣從勝至劣。各各不同。故知我所見像。實亦當我所見。豈佛慈不普。而示我以像哉。雖然見有不同。皆即彌陀一體。又如經說。懺彼眼障漸薄。見佛座已。先見一佛二佛。障又薄時。漸漸見佛徧虛空界。以彼例此。若我懺願求生之心。與理相應。先見佛像及化。後能見佛真身。又如華嚴會上。佛體本一。大菩薩眾。見佛是廣大無量天冠莊嚴舍那之身。三乘見佛。是王宮降生老比丘身。我等凡夫。故應見佛是土木所成之身。不爾。云何普賢觀經。但懺眼罪而得見佛。是知佛本一體。或真或像。實見者自異耳。又昔有



人。刻木為母。母身本木。人有借覓於母。或與或悞。木母亦能形喜慍色。與真母同。彼世間孝意所感。尚能若是。況我無量大願神通之佛。即真寶像。不及木母者乎。況古今造像。徵驗不一。或放光明。或示瑞應。乃至身生舍利。水溺火焚不壞者。載之傳記。不可具陳。則我道場像主。即是彌陀如來真實色身。而我障故。謂是像耳。縱彼直謂是像。亦能入前像觀。從像見真。豈不顯同體之妙。經云。佛清淨身。徧一切處。又云。一切諸法。無非佛法。何特此像而非佛乎。或問。離一切相。即名為佛。佛身尚非。何況此像與佛同耶。答。若於相非佛。何止於像。雖舍那報身。亦非是佛。大法師大祖師若一切非佛。即一切是佛。何非佛耶。若知此義。則悟我今所奉尊像。不離願海。具大神力。能攝能受。所有一切力無畏等。十八不共。大慈大悲。常樂我淨。相好光明。與彌陀真身。等無差別。而我於中。懺悔行事。當如乞人。得近



帝王。常懷慚戰。畏愛兼抱。渴仰攝受。冀求出離。況復歷劫難遇。今既遭逢豈可輕易。使勝行不進。自作障難耶。又念彼佛哀憫我故。垂示像身。受我懺悔。既受我懺。則一切重罪字字廓徹重雲。定得消滅。必生淨土。於是心得歡喜。忽如天廓地清。獲得法眼。彼極樂國。可如目覩。故知真像一致之說。非不甚深。學者宜盡其誠。莫作異解。



關斷空邪說第六

救末法之極弊

釋迦如來一代聖教。一本於善惡果報。因緣諸法。為始終不易之正教也。雖有百非師子吼超脫之句。豈必離乎因緣法哉。奈何今時有一等斷人善根。極惡闡提之輩。不識佛祖為人破執除疑。解黏去縛之談。隨他腳後跟轉。妄謂除此心外。諸行皆空。無佛無法。非善非惡。錯認病根妄識是真。謂此心外。無法可得。遂其勢必至即撥無因果。



排斥罪福。言一切菩薩諸佛形像。祇是箇金銀銅鐵土塊木頭。一大藏教。亦祇是箇樹皮。揩不淨底故紙。本非真實。何足依憑。於一切善行功德。無不一一掃除。謂言著相。一路談他之短。顯尾巴露出己之長。或存所參話頭。而又謂不可固執。索性使人內外空空索索。豁達地了。即乃潛行諸惡。及淫怒癡等。反謂於道無礙。自賺賺他。內心腐爛。殆不可聞。譬如師子身中蟲。自食師子身中肉。此等見解。其類甚多。必是天魔波旬。昔恨未消所遣來者。令同我形服。壞我道法。而無遺餘。嗚呼痛哉。若如彼見。謂形像非佛。不知何者是佛。紙墨非經。不知何者是經。若自心是佛。何物非心。而獨謂聖人之像非心非佛耶。又心既是佛。何人無心。而獨謂汝心是佛。使人非像非經耶。不知眾生之心。全體在迷。必假聖人形像經法而表顯之。使人有所悟解也。若有悟解。則識生佛真心。平等徧一切處。經云。諸佛說空法。為度於有故。




若復著於空。諸佛所不化。又云。寧可說有如須彌山。不可說無如芥子許。縱證空法。猶滯小乘。豈能如大菩薩等。從空入有。證於俗假。於眾生界。如佛度生者也。是故小乘空見。是大乘菩薩所棄。佛說空法。是未了義。又佛說空法。乃即有顯空。空不離有。得名真空。今人說空。離有方空。空成斷見。深為可畏。如陷坑窞。永不可出。永嘉云。棄有著空病亦然。還如避溺而投火。斯之謂也。善星比丘。妄說法空。寶蓮香比丘尼。私行淫欲。生陷泥犁。豈不是後人龜鑑。後人不以為戒。復蹈其已覆之轍。如盲引盲眾。使師及弟子。自甘沒溺。可悲甚矣。又若孝子聞父過惡。以承彼生育之恩。猶尚不忍。況我釋氏之子。負出世恩。於佛形像法言。恣意輕毀。安然不懼。可不痛傷。此人必向五無間獄大熱猛焰之中。各各自受今日謬解之報。豈虛語哉。縱是德山丹霞。亦但如文殊等一時為人破執顯理耳。豈欲以此教後世

醒極



耶。今為其後者。不識先人之方便。更喫彼已吐之唾。一向謬謂拆佛殿燒木佛是究道之行。可謂顛倒。若遵彼遺說。唯能燒拆便是道者。今天下釋子。皆當如文殊師利以劍自隨。有佛殺佛。無佛斫像。即是道矣。更不須以佛所傳定慧等學而為道耶。又佛法門得久住者。全賴經像形服威儀。善行乘法而已。不知捨是何據而得久住者哉。是故佛說於諸經像敬之不至。尚獲大罪。況更輕毀。罪逆可知。妙經有云。提婆達多。昔作仙人阿私陀時。為釋迦師。釋迦自以其身而為牀座。奉上供養。令我具足六度。相好金色。無畏攝法。乃至不共。神通道力。成佛度生等者。皆因達多善知識也。今釋迦已得證果。欲相成其道。不說法空。但逆贊其法。微損佛足小指。尚不逃於地獄長劫之痛。何況後五百歲。斷人善根。妄說法空者。豈能免苦果耶。又佛說法空。蓋欲令人體空斷惡。奈何不識佛意。而反滯空退善。豈不顛倒。又彼於諸



不善。尚說無礙。不知善法何礙。而欲不修。古人以不落因果答
學者問。尚五百世墮野狐身。非百丈老人。不能脫之。況今妄說
法空。撥無因果。不懼後世。恣意妄談。非止毀於經像。又將素
食之人比之牛羊。說法之人叱為虛解。罪將安極。不知慧解如人
之目。道行如人之足。有目無足。雖見而不能行。有足無目。雖
行而不能見。以不見故。必墮坑塹。以不行故。奚到寶所。雖不
能到。還識是非。既墮坑塹。身命俱失。如經所謂五度如盲。般
若如導。以如盲故。行必墮凶。以如導故。必到寶所。豈可反叱
經教之談為虛解也。然則解行雖各為要。設使有行無解。莫若慧
解為優。譬如羅漢應供。象身挂纓。其義可了。又若有解無行。
菩提可發。有行無解。難會圓乘。故知文殊解深。為諸佛之師。
普賢行大。作群生之父。豈可偏滯一隅而自執也。禪宗南嶽。尚
以不似一物。不無修證。不可污染。為悟道入門之要旨。況今人



邪見若是之深。豈不速疾陷於極苦之處。楞嚴云。自謂已足。忽有無端大我慢起。心中尚輕十方如來。何況下位聲聞緣覺。又云。忽然歸向永滅。撥無因果。一向入空。空心現前。乃至心生長斷滅解。不禮塔廟。摧毀經像。謂檀越言。此是金銅。或是土木。經是樹葉。或是氎華。肉身真常。不自恭敬。卻崇土木。實為顛倒。其深信者。從其毀碎。埋棄地中。疑悞眾生。入無間獄。失於正受。當從淪墜。則知世尊於妄說法空之人。及未得謂得未證謂證者。預已授其入獄之記。明鑑若是。今人豈能逃佛所記哉。或曰。彼達多入獄無苦。我奚畏焉。不知達多因心欲逆贊釋迦之道。故在地獄。非但無苦。且如三禪天樂。然以身口似謗。故在地獄之中。還如身口所作。具受無量種苦。佛師尚爾。況今人效之。使人於經像間。不生尊敬。視猶土木。待如故紙。令彼不識因果。薄於罪福。違佛教誡。近五逆行。如是惡報。其能免乎。



開示禪佛不二法門第七

釋迦如來所垂念佛法門。統句全提卓哉法界群機而無外者也。實文殊普賢所證大人境界。天台四明。判與華嚴法華確同部。味屬醍醐。即禪宗所謂單傳直指之道。永明四料簡中謂無禪有淨土。萬修萬人去。但得見彌陀。何愁不開悟。誠更確向上一路也。奈何今人。因於名利所謀。不遂其志。乃作色長歎而自悔云。噫。我平生一切都罷了。參禪非我所望。不如且念些阿彌陀佛。以修來世。苟不折本足矣。於是反怠其身。曾未深省。倘或忽遇些些兒勢所必至得志趣。便自無量惡作。依舊一時現前。莫之能禦也。念佛如此。何益之有。今詳其見。彼謂參禪雖妙而難。如造萬間大廈。念佛雖麤且易。如作一隙草窟。見地若此。譬如饑世得遇大王百味珍饈。認作草菜之食。以如意珠王。視為魚目。可不哀哉。不知禪佛二門。發行



雖異。到家一著。其理是同。當知所以發行異者。如參禪拈來即是。不著佛求。然若自不能具正知見。又不遇正知見人。縱不退轉。多入魔道。無佛力救護故也。若念佛。一切不取。惟念彼佛。雖無正解。及師友開發。但直信有佛身土。發志即生。縱滯偏小。亦還於正。有彌陀願力救護故也。是名還識好歹否發行有異。非謂法門地位深淺有異也。是知參禪即念佛。念佛即參禪。禪非佛不得往生。佛非禪不得觀慧。念佛參禪。豈有二致。若知珍重此義。則當乘彼功名富貴得志之時。一刀割斷。即便猛發大心。力行斯道。於世所有妻子寶貨。頭目髓腦。乃至身命。不自憫惜。決志求生。豈可直待悔吝失節不得已之際。以此最上法門。但作草窟魚目小道之見。以苟且最切今時之心而欲修之。可傷可惜甚矣。若能因是悔吝。從今一時放下。生大乘寶所之見。辦決定不退轉心。譬如隨風順流之舟。更加櫓棹。豈不疾有所至。何幸如之。問。若是。則禪



書有云。如何是佛。答乾屎橛。答麻三斤。云我當時若見。一棒打殺與狗子喫。貴圖天下太平。乃至魔來也殺。佛來也殺。且道與念佛三昧。尊敬戀慕。畏愛渴仰之心。及到家之旨。如何同耶。答。念佛者。本持念彼西方極樂世界報身阿彌陀佛也。此佛報身。有無量相好光明。化佛菩薩聲聞。願力功德。不可具說。此為佛身。又佛所依境。有諸寶池地樹幢網欄臺鈴幡華水等一切莊嚴。此為國土。然彼佛以身為土。以土為身。身土無礙。心境圓通。或彼或此。同一受用。乃至蘊入界處一切諸法。直至無上菩提。及能殺所殺之義。一切時。一切處。無障無礙。非縛非脫。縱橫逆順。皆即彌陀清淨色身。何以故。心即境。境即心。身即土。土即身。生即佛。佛即生。此即彼。彼即此。及青黃赤白之色。眼耳鼻舌之根。如是諸法。或心或身。亦一一無不自在。無不解脫。尚不間於淫怒癡是梵行。塵勞儔是法侶。何特乾屎橛麻



三斤非是佛耶。此既是佛。何須於淨地上特地示現降生。挖肉做瘡。起度生想。如此正好一棒打殺與狗子喫。卻省得許多作模樣。六年苦行。降魔說法。於無生滅平等法中。唱生唱滅。賣弄千端。攪動世界。惱亂一切。使平地上死人無數。豈不天下太平。咦。到這裏他家有錯者裏無錯。不得動著。動著則喫我手中痛棒有分。若謂此說是曹溪門下搯搥堆頭觸著得底。且未曾夢見在。我早打折你驢腰。問。恐不容汝如此計較。答。亦不外此計較。又汝莫謂計較有心。計較無心。我幾曾計較來。問。只此早是計較了。答。我適來說什麼底。問者不會。良久又問。若一切是佛。則糞箕苕帚皆可酬彼所問。何特以極劣乾屎橛而作答耶。答。既一切是佛。則門窗戶闥目前諸境皆可為問。何特取最勝之佛而為問耶。故知問者心地未純。太取其高。而答者欲破彼執。反取其劣耳。若知屎橛非劣。則佛亦且非優。豈可謂彼語有不同。而妄認禪



佛為異行哉。問。此念佛法門若如此奇特。與少室指心成佛之說。台宗觀心觀佛之談。初無有異。可謂不出一念。顯三千妙法。而三觀宛然。不離萬法。究一真如門。而一心頓了。且教我鈍根後學之人。如何修行。得相應去。答。但肯發行。何慮不成。譬如空谷之間。有聲皆答。聲大則大鳴。聲細則細響。隨彼發聲。無不克應。正如樂國以三輩九品。攝受眾生。亦隨其根利鈍深淺。邪正遲速而導之。應生何品。無遺機矣。如谷應聲。高低共作。若能勤加精進。必不唐捐。又況時無先後。何嫌鈍根。以是義故。則知一切法門即一法門。一法門即一切法門。豈特禪佛不二。舉釋迦一代施化之道。不出念佛一法門矣。又此法門量廣大故。攝機無外。何間愚智之根。奉勸後賢。於此法門。莫生異見。



示諸佛二土折攝法門第八

夫二土者。即諸佛折攝二門也。行人聞上所說依正之境。則能如彼經旨。了知此土實苦。彼土實樂。雖聞觀慧法門。圓融微妙。而直見二土儼然。皆即實境。事持理持皆以此正智為本非如淺信之人。謂彼土心有則有心無則無。光影幻化。虛妄不實。處處皆是西方等解。深知彼土。亦如此土端確的實而無謬悞。若人能具此智。不為世間一切邪解偏見。正智善根非難至難所回轉。則當正觀二土苦樂淨穢。於其境上。生二種心。以為方便。非此二心。不能生彼。何謂二心。一者厭離心。二者忻樂心。於此娑婆生厭離故。則能隨順釋迦所說折門。於彼極樂生忻樂故。則能隨順彌陀所示攝門。以此二門。精進修行。念佛三昧。必定成就。何謂折門。以聞如上所說極樂勝妙。則應如理觀察此娑婆世界皆苦。無一樂者。三途地獄。日夜燒



然。餓鬼旁生。不可堪忍。修羅忿戰。人處何安。根塵與八苦交煎。因果共四生昇墜。時有寒暑。境是沙泥。晝夜推遷。無常不住。又復受身臭穢男女異形。所需衣食。艱難麤惡。壽命不永。眾苦相生。縱有生於天宮。報盡還歸極苦。又不知人中樂即是苦。親正是怨。顛倒攀緣。不求出路。從業致業。展轉不休。如是苦惱。不可具陳。故當厭離也。何謂攝門。行人聞說娑婆實苦如是。則於彼土西方極樂生大忻樂。彼極樂土。寶地寶池。無三惡道。莊嚴妙勝。超過十方。無寒暑晝夜推遷。無生老病死結業。純男無女。蓮華化生。衣食自然。能成法喜。壽命無量。身光莫窮。聞法音則應念知歸。覩相好而剎那悟道。如是種種。快樂無量。得名極樂。故當忻樂也。若能於此二門。精進修習。日夜不休。隨順佛教。於此土聲色諸境。作地獄想。作苦海想。作火宅想。於諸寶物。作苦具想。飲食衣服。如膿血鐵皮想。於諸眷屬



· 作夜叉羅剎噉人鬼想。況復生死不住。長劫奔波。實可厭離。
於知識若經卷中。聞彼佛願力。國土莊嚴。於念念中。稱彼理趣。
· 生安隱想。生寶所想。生家業想。解脫處想。彌陀如來菩薩僧
眾。如慈父想。如慈母想。生接引想。生津梁想。於怖畏急難之
中。稱名即應。功不唐捐。剎那便至速來救護想。應念出離想。
如是功德無量。實可忻樂。若於此折門不能修行。厭離不深。則
娑婆業繫不脫。曝論實事若於彼攝門不能修行。忻樂不切。則極樂勝境難
躋。是以行人欲生淨土。成就念佛三昧。當齊修二門。為發行最
初一步也。若不修此二門。雖了觀慧之旨。故知觀慧以事為本但成虛解。縱欲生彼
· 以不忻厭。無因可得。若能修此二門。不識觀慧之旨。雖可生
彼。但事想故。位非上輩。若能熾然忻厭。圓修觀慧既生而復上
品者矣。學者豈可謂此說固執著相而輕棄也。或曰。何不諸緣放
下。一念萬年。使心與理會。境與神融。自然合道。何必忻厭取



捨若是之深。答。若謂諸緣放下是道。只起一念放下之心。便不名為放下。卻與道反遠。類於斷見外道。故鵝湖云。莫祇忘形與死心。此箇難醫病最深。又云。若還默默恣如愚。知君未解做工夫。又佛十八不共法中。有精進無減。又六波羅蜜。因精進故。方得成滿。且放下者。但放下世間業緣耳。豈是放下精進體道之心哉。古人所謂坐在無事甲裏。正是此輩。若謂放下自在是道。而不勤加精進一心修行。豈得心會境融。打成一片。與道合耶。若知不放下是放下。熾然忻厭取捨。即是不忻厭取捨。修即無修。念即無念。則名無功用行。亦名無作妙心。奚難速證中道之理。又修故離斷。無修離常。斷常既離。則異乎所問。而直生安樂世界。以二大士為同修。日與彌陀佛相對。彼時有何法而不可問。何行而不可學。何疑而不可除。何求而不可得。既無退轉。則此忻厭。豈不是成無上正覺之大因行哉。

道此是什麼境界

且



❖

勸修第九

夫淨穢同心。生佛一理。諸法本等。奚假勸修。其奈眾生迷心作境。淨穢斯分。對待相成。縛脫迥異。纏縛多劫。不覺不知。故須勸娑婆苦海眾生。求生西方極樂世界也。行人既聞如上所說二種法門。則必深知淨穢苦樂之土。大慈大悲真實不謬。敢不勉耶便當發行求生。如彼農民得利自趨。止之不可得也。然彼農民。近為一歲饑寒之苦。尚甘日夜不休。朝愁暮苦。具經年載。而不自倦。況彼三昧行者。若一念精勤。超歷劫娑婆之苦。何止一歲饑寒。登九品極樂之安。何止一年溫飽。以彼較此。優劣可知。是尤不必待人勸也。又前示人折攝二門。其旨已明。如云。此是金玉。此是砂石。雖三尺孺子。亦必棄石而求金。不勸而自取。蓋因識其貴賤。行者亦爾。既明識此土是苦。彼土是樂。此是生死沈溺。彼是自在



解脫。亦必捨此穢土。而求彼淨土。自然念念不住。心心不息。如救頭然。聞教便行。奚待更勸。苦樂二土。是佛所說。諦信不疑。修則自得。今人見屎尿。則必擤鼻攢眉。嫌其臭穢。便欲速去。見錦綺。則必舒顏展笑。貪其瑩潔。便欲速得。彼暫時美惡幻境。尚不能一忍。而憎愛熾然。況長劫極樂極苦之處。而不速生忻厭。可謂愚之甚。惑之深矣。又此娑婆世界。釋迦已滅。彌勒未生。賢聖隱伏。一切眾生奔跋苦海。猶失父之兒。若不以極樂願王為歸。則誰為救護。又況此界六道雜遝。人天雖優。報盡則墜。今且以人處豎修論之。彼神仙之黨。未離空地。尚不易至。況彼天乎。彼生天者。以三品十善之因。生三界天。自劣至優。各歷多劫。不能如願。成小敗廣。如海如滴。中間或遇邪惡魔黨。永退永失。敢言得出三界。而望四果四向之地。況歷信住行向諸地。而超此耶。若能修此念佛法門。求生淨土。雖在凡地。



不出一生。即便橫截三界五道生死。徑超諸有。蒙佛接引。頓生安養。於彼上品蓮臺託質。花開見佛。聞法悟道。不離當念。闊步大方。供養一切三寶。教化一切眾生。彌勒世尊降生之時。再來此地。同佛弘慈。所有歷劫父母妻子。兄弟姊妹。怨親等境。諭以道品。告以昔因。皆令證果。則其行願。豈不廣大耶。此娑婆世界所有三障一切結業。更不能累我。如是功德。若一念失修。便屬後世。豈宜自緩。況又世事千端。生緣萬擾。如鎖如鉤。連環不斷。心則念念不住。身則在在無休。役我升沉。障我本性。歷劫至今。曾未休息。無常遷變。不可久留。縱壽百年。不逾彈指。今日明日。難保其存。忽於眼光落地之際。不覺剎那異生。隨其業因。受形別類。披毛戴角。著地飛空。今日見解都忘。

修行人急須猛省

恍忽三途六趣。飄零多劫。不知自歸。可謂大苦。縱是彌勒出世。而我生處何知。尚不聞父母三寶名字。何況經教圓談。雖受異



身。保惜深重。因業致業。從冥入冥。懼死貪生。不異今日。若非即於目下當念之間。效彼先覺丈夫。猛發大心。立決定志。奮揚舉鼎拔山之力。一截截斷。跳出稠林。使兩頭撒開。中間放下。安能行業昭著。光動人天。群有蒙恩。諸佛護念。閉三惡趣。開總持門。即使不待娑婆報滿。便得往生者也。若又更待處所穩便。衣食豐饒。充足香華。事事稱意。思前算後。卜彼良時。報盡恩怨。圓成善事。然後發行。假使虛空界窮。亦無此日矣。所謂晴乾不肯去。直待雨淋頭。古云。即今休去便休去。欲覓了時無了時。斯之謂也。



寶王三昧念佛直指卷下



勸戒殺第十

藥忌須知

相國裴公美休·嘗著圓覺經疏序·其略曰·夫血氣之屬必有知·凡有知者必同體·所謂真淨明妙·虛徹靈通·卓然而獨存者也·以是觀之·則知蜎飛蠕動至微之物·及彼大身師象巴蛇之類·與十方佛圓覺妙心·虛徹靈通·同一真淨·奚可分優劣乎·生佛既同·人雖至靈·豈不亦與彼等同一體性·共稟四大五行之質·同生天地之間·如虛鼠危燕之類·上應乾象·肖乎日月·反能司人災福·焉得不及人也·此理既明·乃知人與物類·性均天倫·彼此無別·豈可逞我一時之強暴·乘彼之微弱·而恣行殺戮哉·又彼所以異於人者·但因無始妄想極重惡業所牽·故不覺不知·改



頭換面。異類受形耳。非謂心體有異也。體既無異。又與彼類俱在生死。云何析其皮骨。潰其血肉腸胃肝膽。或稱量買賣。煎煮百端。咀嚼其軀。恣取甘美。於一時間。飫我貪饜。適我口腹。曾不顧懼未來惡道長劫之痛。可謂失之甚也。人雖或謂優彼。但業對未至耳。豈真優於彼哉。況彼類中。有報盡當為人者。為天者。有聖人諸佛菩薩示同其類者。我障不識。奚可殺彼所極愛重之身命。資我片時之口欲。忽爾人業報盡。反有不及彼者。奚謂彼類是我食啖。而定不及我乎。又況我身昔同彼類。彼類同我。於類類中亦曾互為父母兄弟。妻子姊妹。諸親眷屬。形體變流。心亦迷沒。不復相識。妄謂彼劣。今殺食之。牛羊眼不信其實事理即殺我父母先親眷愛。確然又我身不離四大。亦殺自己四大故身也。又佛言。一切眾生。皆有佛性。以未來必成佛故。尚當供養給侍。如父母想。奚忍殺之。若殺之。是亦殺未來佛也。可不懼乎。嗟今傷殺之人。不



識先因。為親之時。於逆境中。多生違逆。從親起怨。從怨結恨。怨恨連讎。世世不失。於是相生相殺。展轉不已。如彼海潮。盈虧往來。不能自止。審彼約己。可不痛傷。故梵網經中。既禁自殺。乃至教他方便讚歎誓呪等殺。及因緣法業。皆制令永斷。此佛誠教誡也。我若不止相吞食者。則必令彼佃獵漁捕惡求之人。展轉滋多。使水陸空行一切眾生藏竄無地。纔入其手。毛羽鱗甲一時傷毀。哀聲未絕。便供食啖。或易他物以養吾體。豈知一切物類。怕死貪生之心。本與我同。若能知是先親。同斷殺業。亦能全乎孝道。經云。孝名為戒。即戒殺為孝也。且彼物類。性具先知。避不擇時。逃不擇處。況復天地寬闊。亦有自養之處。今故不能自生。而兩恰相值。必入人之手者。蓋以先因不可逃耳。先因既不可逃。至此不醒非人也今因自當深思痛戒。倘或不戒。則彼此殺害之業。必如前牽入其類。亦安可逃耶。經云。假使百千劫。所作業不



亡。因緣會遇時。果報還自受。豈虛語也。故我世尊滿淨覺者。現相人中。於諸法會。以此戒殺之訓。叮嚀告誡。非不再三。且以此戒列於諸乘之首。於梵行中。非不嚴切。又復示現琉璃大王盡殺釋種。佛亦頭痛。及金鎗之報。垂誠於世。欲使人知因果難逃。而同止其殺也。可不信乎。或謂佛必無此。而為物示此者。則聖人有誑人之過。佛既無過。此奚不實。此既是實。佛自尚爾。何況於人。故知報償之理。如影隨形。又如世人。平生友善。但或一言之忤。一物之負。尚結怨至死。況加以白刃。恣食其肉。可忘深恨乎。且彼世典。亦有不合圍。不擒群。鈞而不綱。弋不射宿。及聞其聲不忍食肉之訓。正與吾佛三藏漸教。確論許食三種淨肉之說頗同。雖不如大乘方等盡止殺業。亦止殺之漸也。明眼止殺之漸。尚有至德及禽獸之譽。何況口悉素餐。身必麻襦。意專慈忍。不暴一物。使各遂其生。豈不德化無邊。可稱譽也。且古聖



尚不肯暴露枯骨。枯骨無知。心猶不忍而葬之。何況有命血肉同靈之物。乃可殺食耶。老子曰。馳騁田獵。令人心發狂。又曰。射飛逐走。發蟄驚棲。縱暴殺傷。非理烹宰。乃至行住坐臥。舉動施為。所傷殺物。其於天地空中。必有司命。欽承上帝好生之德。隨其輕重。悉筆記之。毫髮無失。使彼生則減紀。招不如意。死則墮獄。備受眾苦。所有刀山劍樹。斬剉煎煮。抽腸拔肺。剝皮啖肉。切骨削髓。繳首挑眼。焚腳燒手。諸大地獄。靡不經歷。拂石塵沙。無可喻其壽命。縱彼大獄之報有盡。於百千劫復墮餓鬼。於如是劫。又墮畜生。於畜生中。必殺一酬一。殺心若重。或殺一報之千萬。乃至無盡。方與相殺之人。如前相值。或殺或食。以償宿債。錙銖無差。如其先有微善。此指債後得生人中。尚世世貧窮孤苦。多病短命。癩癩失志。盲聾瘖瘂。疥癩癰疽。膿血諸衰。百千等苦。以自莊嚴。眾怨境界。畢集其身。親族棄捨。



不可堪忍。此皆殺業既深。故受如是極苦也。是以梓潼帝君有化書戒殺之篇。書經亦云。作惡降之百殃。不其然乎。又況異類亦有仁心。理不可殺。羔羊跪乳。慈鳥返哺。有行孝之禮。胡犬護主。獬豸不屈。有忠直之能。蜂蟻君臣。鴛鴦夫婦。鴈行兄弟。嚶鳴友朋。觀彼群生。與人何異。人雖至靈。反不能推同體之慈以及含識。更殺彼命以養一己。可謂靈乎。可謂仁乎。又如陸互大夫問南泉云。弟子食肉是。不食是。泉云。食是大夫祿。不食是大夫福。義亦可了。縱彼世俗延會賓客。及行時祭之禮。豈無蘋藻瓜果庶羞可薦之儀。得全齋戒之道也。又如經說。昔有屠殺之子。欲求出家。因不肯殺。其父以刀及羊并子。共閉密室。謂若不殺羊。當殺於汝。其子因即自殺。緣是功德。便生天上。於多劫中。受天快樂。是知不殺之人。既生善處。必善其身。世世得長壽之報。又能以德遠及子孫世代矣。然今佛法欲滅。如一絲



繫於九鼎。多有為佛弟子。不能體佛慈悲。飲啖自若。見素食人。反謗為小乘。為魔頭。甚至比為牛羊。為鵝豕。或謂其心太毒。及百般綺語。訐露其過。此等惡人。雖天神見而怒之。謂若啖人羅剎。其如世人得彼類己。反謂之條直也。嗚呼。此佛法將滅之兆。不可不知。夫子產於魚。尚發得其所哉之歎。齊王不忍。乃稱無傷仁術之言。戴記殺獸。有不孝之談。書生救蟻。中甲科之選。當知殺與不殺。損益昭然。況我釋氏四眾。乃可行此殺業乎。楞嚴云。以人食羊。羊死為人。人死為羊。汝償我命。我償汝債。以是因緣。經百千劫。常在生死。又云。生生死死。互來相啖。惡業俱生。窮未來際。法華云。佃獵漁捕。為利殺害。販肉自活之人。皆勿親近。又有偈云。若欲殺生者。應作自身觀。自身不可殺。物命無兩般。此等誠訓。寧不昭然。或有邪見之人。謂彼眾生。但妄生妄死。罪福本空。殺之無報者。則何不道我



等亦妄求妄食。舌味本空。食之無益也。是以既有貪心。豈無報境。若云此類不食何用。則蜈蚣蛇虺皆無用者。可食之乎。以上所述。乃是審己例彼。平等不殺。仁人各行之道。若我出家之子。欲修念佛三昧。正欲清淨三業。解怨釋結。生於淨土。豈可不斷殺食。於臨終時而自障乎。大藏經中。廣有教旨。諸佛一音。始終不二。三教聖訓。莫不皆然。片紙之中。豈能備引。但願法界眾生。聞斯義趣。體道好生。同躋仁壽。俱盡天年。免諸怨結。更能如法化人。充聖人慈濟之道。使彼已悉證慈心。必同造於蓮華之域。成正覺矣。

⑤

勸持家戒第十一

皆淨業
正因

惑者問曰。今聞念佛直指戒殺之說。可謂指體投機。事理悉備。實善世利物之訓也。敢問為只此殺業。當極戒之。為兼盜淫妄等



諸惡·悉宜深戒之耶·若當悉戒·何以語之略也·答·噫·是何言也·子豈不聞經有具足眾戒之說·奚獨戒殺·但殺業最重·通於貴賤·人所難除·故於正行之首·先令斷殺語合觀經·庶可具乎眾戒·故語之詳耳·戒體豈有取捨哉·又若戒德不修·憑何立行·如器欲貯醍醐·先滌不淨·修三昧者·亦復如是·必眾戒清淨·乃可得成·縱其宿業深厚·不能頓斷·亦當方便制抑·自勸自心·省方便身悔過·修四念處方便·了知世間樂少苦多方便·無常敗壞方便·不久磨滅·一切諸法·皆不清淨方便·如夢幻無我·設諸方便而使必斷·豈可隨妄念而失其宰·又戒德雖具·若不使身心澄定·息諸世間伎能雜術·乃至一切若善若惡能分念者·設不屏去·何能一心修此三昧·三昧不一·往生何由·然今一切眾生無明業識·徧周法界·苟起一念世心·便被如是等塵勞魔黨牽拽將去·全身陷沒·求出無期·譬如遊魚雖逸·一絲可繫·其害非不大也·心念尚爾·況身



行哉。今既修此三昧。正欲如箭一心取的。不待此身報盡。跳出稠林。決生淨土。豈可失戒攀緣。志行因循。使三昧不成。更入惡道。可不痛傷。若果聞之不戒。則臨終無驗。莫謂佛力無感應也。



勉起精進力第十二

精進者。不為世間八風所退。又不為身心異見。一切大小病緣。而怠其行。故名精進也。行人既依勸發。永斷殺業。漸具眾戒。欲入三昧。於三昧中。或被一切強輒二魔。內外惑亂。行有退轉者。則當堅強其志。重要緊加精進。如金剛幢。不可摧毀。如須彌盧。不可搖動。如彼大海。眾毒莫壞。假使行人聞佛記云。汝今雖修此行。彼安養土必不得生。即當答言。善哉世尊。我先受佛記。求生極樂。釋迦佛言。一切眾生。皆當發願。願生彼國。尚不間於女人根闕。十惡五逆阿鼻之輩。何況於我。我今道行雖微。



不造五逆。數過十念。必當得生。佛豈自誑。肯違本願。況十方諸佛。出廣長舌相。證明斯事。是故我今必定求生。不敢退轉也。如是名為行人金剛延幢勇健之力。佛記尚不能退其初志。何況天魔惡黨。人中水火盜賊。強邪境界。及妻妾情愛。而能動我。行願哉。或曰。我見世人雖修而不得生者。何耶。答。蓋其見異而行不莊故也。問。如是則虛喪其功耶。答。豈虛其功。彼亦必承彌陀願力。今世不生。二世必生。二世不生。三世必生。若但一念一動歸向彼佛。必在當來多世定得往生。是名皆得不退轉者。豈有不生者乎。故知生彼國者。得不退轉。修此行者。亦得不退轉也。但彼後世生者。枉受多劫輪迴之苦。故須一生取決。豈可自二其志。墮在他世往生者乎。其中若有宿業所使。願行有虧。大慈大悲。常當一心誦此拔一切輕重業障得生淨土陀羅尼。若持一徧。諸佛不身中思議甚深境界所有一切五逆十惡等罪。若持一十萬徧。即得不廢忘菩提心。



· 若持二十萬徧· 即感菩提芽生· 若持三十萬徧· 阿彌陀佛常住其頂· 決生淨土· 此呪世所誦者· 雖出藏本· 其音聲句讀多訛謬。今所傳者· 乃是近代三藏法師沙羅巴所譯· 比他本最為詳要。修是行者· 故宜誦之· 為正行之直指。今附錄於此· 呪曰·

奈麻辣怛納 特囉耶也 奈麻阿哩也 阿彌打跋也 怛達唎怛也
阿囉喝帝 三迷三不達也 怛的也 撻 唵 阿彌哩帝 阿彌哩
打 唄巴偉 阿彌哩打 三巴偉 阿彌哩打 葛哩比 阿彌哩打
薛帝 阿彌哩打 帝際 阿彌哩打 韋羯蘭帝 阿彌哩打 韋
羯蘭帝 唎彌你 阿彌哩打 唎唎奈 羯哩帝 葛哩 阿彌哩打
頓度比 蘇哇哩 薩哩哇 阿勒撻 薩怛你 薩哩哇 唎哩麻
吉哩舍 吉哩也 葛哩 莎喝

亦名無量壽如來根本真言· 誦此得大精進· 速生淨土。



正行第十三

如上所述依正二境。乃至精進。雖皆圓妙。悉是求生之方。未為正行。此下所陳。乃是正行之旨。何謂正行。行者既發此志。必使身心清淨。入於道場。先當觀察。我及盡虛空界微塵剎海一切眾生。常在生死大海。歷劫不休。飄零沈溺。於六道中。無歸無救。若不令其普得解脫。何名正行。於是等觀怨親之境。即此境上。起大悲心。如虛空量。廣大普覆。又作是念。我今此身。如彼瘡疣。怨業苦聚。若不以此布施眾生。等修三昧。令彼解脫。則違佛教誡。違我本願。眾生受苦。甚可悲愍。我今發心。如師子王出窟。不求伴侶。不求護助。嗚呻哮吼。摧伏一切。定不為彼弊魔惡黨之所退轉。如是大心既立。然後審彼古賢念佛正行。此中一字不可不遵當擇自然寂靜之方。及非先曾穢染之地。所費先當盡己所有。乃



可丐人。如法建立道場。下以香泥。上懸寶蓋。中奉三身及九品像。極令嚴淨。布諸幡華。供事畢備。皆令瑩淨微妙。次則著新淨衣。燒香然燈。安設坐具。無始所有一切善根。普為眾生迴向淨土。莊嚴行願。若不如是迴向。生因奚得。於是三心圓發。五體投誠。觀佛相好。胡跪合掌。乃至運心普緣無邊剎海一切眾生。及我此身。自昔至今。流浪不返。深為可痛。涕淚悲泣。求佛垂慈。不覺此身如大山崩。歸命三寶。手擎香華。想徧法界。請佛歎德。敬禮投誠。剖腹洗腸。發露過罪。修行五悔。旋繞歸依。於是端坐面西。觀佛相好。誦經念佛。出入經行。晝夜六時。剋期練行。如或障深未感。至死為期。於中不得剎那念世五欲。如是一心。若不往生。則我佛是大妄語者。故此三昧。其神若是。此三昧者。諸佛所讚。諸聖同遵。始則唱於廬山。終則流於天下。歷代傳弘。皆以此為歸趣。但三昧儀軌雖多。惟慈雲確確所撰。



詳略得中。宜熟味之。此是第一上行。境界甚深。學者於中。當竭其力。慎不可捨此而趨彼也。若或根機不等。勝行難全。亦必處於淨室。使內外肅清。隨意立行。禮佛懺悔。日定幾陳。精進一心。誓不中悔。或專誦經。或專持呪。或但執持名號。直求生。或能深達法義。觀佛依正。若至得見好相。即知罪滅緣深。亦生彼國。如經有云。不可以少善根福德因緣。得生彼國。若有聞說阿彌陀佛。歸重持名有特見執持名號。一日二日乃至七日。一心不亂。其人命終。佛與眾聖現前接引。即得往生。故知執持名號。即是多善根多福德因緣也。又有未能盡斷世緣。亦修世善。於極樂國。諦信不疑。不念念戀慕不忘。於前行門。隨意修習。四威儀內。以此為歸。不觸境則達彼淵源。臨事則力行方便。臨命終時。必生彼也。各各論遲疾。然此諸行。詳略雖有不同。而其法力本等。但存心或有緩速。故佛應亦有遲疾。學者不可不知。又有慈雲十念法門。每於晨朝



盥漱已畢·靜處面西·宜亦修行·此實往生極樂之初因·願必不可失也·如上行相·義具委明·可謂義無餘蘊矣·或曰·某於念佛之際·雖運身口·而心念紛飛·不能自制·且如何用心·得不散亂·答·能運身口之念·此答妙極勿草草放過毋論其散·但不間不斷·自能一心·亦可即名一心·惟行之不休為度·固不必憂散亂矣·譬如父母喪愛子·龍失命珠·不期心一而心自一·豈制之令一也·此心本不可制·實在行人勤怠耳。

別明客途所修三昧第十四

道場既備·供事已陳·一一無不如儀·豈可隨時空過·則當依教·運之以觀慧·解之以妙境·承此勝心·立無作行·則生死海必枯·淨土必生矣·時有客在座·雍容自如·端莊雅重·內蘊不怯之志·忽作禮而問曰·今觀師誨·則知運心廣大·深淺咸該·然



皆建立道場。使供事畢備。乃安心處靜。方可起修之說也。若余生於晚輩。機鈍寡聞。自昔至今。吟屐湖海。周旋境邑。或去或來。雖欲處靜進功。量力未得。若能即於旅次。不假道場。亦可六時行道。三業無虧。誦呪持經。稱名禮懺。一一如儀。期生安養。一同道場功行。庶我輩可以奉行。伏願弘慈。啟迪未聞之旨。曲垂始終方便。答。大哉問也。世人欲修三昧。謂必需百事具足。然後發行。今子之志。可謂拔乎其類矣。非此問。不發吾之所蘊。使悉被餘機也。蓋聖人垂教。如一味雨。三草二木。各得敷榮。況念佛三昧。普攝群機。子若求決生淨土。當知四威儀中。皆為道用。豈特妨於客途哉。子若欲就斯立行者。此數語前正修行人最初當先立不欺心。同誠但客途接人多尤易外馳故於此明之藏德露玼。慎毋矜耀。始從腳根下。便要內外穩當。次則必放下諸緣。休息萬事。預宜熟讀淨土經呪。五悔懺法。極令通利。又應修習所行威儀。必使端莊雅重。乃如前說。起真正



信心·運大悲智·普為眾生·如理觀察二土淨穢·苦樂兩報·實可厭忻·於此發行·既在客途·居處不一·如雲如水·故不必莊嚴道場·但一清淨身心·服隨分淨勝之服。此論最初發心起於六齋日·或客何處·即具行之日蕞爾香華之供·供養三寶·表有所施。正當於三寶前·拜跪稽顙·立廣大願·誓不退轉·在處生世·以此為歸·更不生中悔心·雖無道場莊嚴·即於是日為始·至形壽盡·每日六時·修行此法·香燈有無·毋固必矣。問·三昧既須一心·人事則有萬緒·且如何修行·佛事世事不相妨礙·答·譬如捕鳥入籠·身雖在籠·心憶園林·兩不妨礙·籠但繫身·不能繫彼此是念佛三昧求出之心·事但拘身·不能拘我願往之志。所謂三界如籠·此身如鳥·求出即願往·園林乃淨土也。故知妄緣萬緒·不礙真心·何況客中·他事少惱·自不涉他·身心坦如·正好進修·問·法門次第·願更委曲·使進修之人·臨事不惑·答·日三夜三·時分不差·是其



次第。今在客中。或日初時至。若有像處。或自有像隨身。則當口誦身禮。或默誦身禮。對像而修。如無佛像。或對經卷。或但面西遙禮。或但除東向。隨方修禮。當具如道場儀式。若有時在道登舟。及不得已一切治身動用之事。不可撥置。則佛事世事同運也。又當念此世務。本為養身。我身行道。功亦不棄。即與三昧同體也。問。我聞心無二用。得一失一。如何二事同運。答。子豈不聞籠鳥之喻。已自委明。又如一心不妨眼見耳聞。身作心憶。應用無盡。何止二事。用既無盡。則當就彼一切動用之中。一心持誦小阿彌陀經一卷。或上品。或楞嚴勢至章。及誦淨土呪。或三或七。至百多徧。又稱佛號。或三百五百至千。及不計數。為入懺佛事。迴向已。方入懺。其禮懺儀式。具出慈雲懺儀。從一切恭敬。次禮三寶。運香。歎佛。禮拜。懺悔。至於旋繞歸依。皆當隨其文義節段。一一想我此身。恭對淨土佛前。或此道

只除疑不另授以方法妙



場形像佛前。跪拜瞻繞。一一明了。不使昏亂。禮畢。觀佛及白
毫相等。量時而止。於是如前念誦經呪佛號迴向畢。方為初日分
佛事。以此想禮。與道場行法一同。但加身禮為異耳。又其所誦
之音。雖隨人境好惡而輕重之。當令聲默相半。沈大雅重。俾兩
肩之人隱聞。切不可與人多語。又當於未作務前。或先於佛前燒
香一炷。或更不能。但隨手拈物為香。就先散之。至時但運想耳
。於餘時惟宜獨坐獨行。遠離喧雜。及聚首閒談。戲謔侮弄。哂
笑歌歎。吟詠筆硯。使人忘失正念等事。是為日初分佛事。其日
中分後分。與夜三分亦然。是為六時行法。念彼夜中人定境寂。
用功正宜與日不同。行者既為生死事大。豈可隨於懈怠。而恣睡
眠。縱歷寒暑之極。慎勿脫衣。法服數珠。宜置近處。手中淨水
。不離座隅。或有所需。皆應預備。又應觀彼信根厚薄。不惱他
人。不使人厭。於此無礙。則當微出其聲。如琴如瑟。細而沉重




·大而不雌。使天神歡喜降護。鬼畜聞聲解脫。則其功彌深。或在船中。及在他家卑隈之處。皆當察境察人。一心精進。方便宛轉。以竭其行。切不可於中起人之過。彰人之惡。又不可盡人之歡。傾人之美。縱遇時間處便。或有他事異人為礙者。亦當擇於僻處。端坐面西。合掌至膺。聲默隨宜。如前想禮。與作務不異。又若於作務之時。事訖身閒。不拘其懺多少。乃至一句一拜未圓。即當連音隨誦。至彼佛前。身禮圓滿。若於佛前端禮之時。忽有他事急為。亦不拘懺多少。乃至一句一拜未圓。即當隨所作處。想禮圓滿。切不可入懺未多。而重起懺。又此客中想禮。蓋出乎不得已者。不可暇時亦以想禮而怠其身。又不可以此想禮加於作務之時。而於閒時反虛擲也。於淺信人。不可遽然勸修。於深信人。又不可不密啟之。使其自肯。又不可使化功歸己。如春育物。不見其功。彼依道場所修者。名順中易行。從客中而修者



·名逆中易行。若以逆中易行。比之於順中易行。不啻若天地之懸遠矣。·逆中易行。其功益著。問。·此想禮與身禮同否。答。·同。·子豈不聞三業者。意為身口之主。主既注想。焉得不及乎身口也。·又如懺中運念香華。及此身心徧至之旨。豈不亦但念想也。·例此可知。·問。·若爾。·但心想禮。·可不運身口耶。·答。·意業雖勝。·若全身口。·名三業圓修也。·其默誦之義。·例此可知。·又能以此想禮之數。·於空時填禮。·其行尤壯。·問。·六時行法之外。·如何用心。·答。·或觀佛相好。·持呪誦經。·稱名頂禮等行。·念念不捨。·剋期往生。·如行路人。·步緊到速。·步緩到遲。·當如是用心也。·若人身心力弱。·不能具修六時行法。·但剋定經懺之目。·每日或三五時。·雖不厭乎加多。·亦不可一時增減。·而改其所立之行也。·問。·客中三昧之說。·圓融次第。·於世罕聞。·若爾。·則依道場所修者為不必耶。·答。·如人墮海。·求船未得。·忽遇橫木。·且執之得達岸也。



豈可有船。反求其木而自喪哉。況又客中去住。隨主厭忻。得無罣礙。可不進功。如上。是為客途所修三昧。此三昧者。境界甚深。功能廣大。合佛妙心。稱揚莫盡。四三昧中。名非行非坐三昧。亦名隨順四威儀三昧。正被大機。小智小根。隨分受益。以此三昧比於道場。或缺身禮。餘儀亦同。子當以此三昧精進受持。一志西馳。切不可因循而更滯於生死也。如上。自為正行。余又觀今世之人。或有志於斯道者。纔聞其易。即作易想。便妄謂得證。纔聞其難。即生退屈。便盡失其志。縱有信心頗切者。又流入邪見叢裏。密相傳授。以悞多人。其傳授之法。千形萬狀。至有不可聞者。皆能羅罩人心。使其自肯。非行漸張。師徒俱陷。豈能若爾正心下問之切也。客作禮曰。某崎嶇於客中久矣。每想生死無常。欲修未得。但慮口體之養。於法行道場不得起修為恨。今宿生緣幸。得聞此說。可謂如甘露灌頂。徹骨清涼。敢謂決志



受持。始從今日。如怨為親。更無餘恨。從是身心放下。如息重擔。自在坦然。願世生生。頂戴受持。寧斷命根。誓不退失。普使一切同人。皆悉了知。在處在客。於逆順中。不礙道用。同成三昧。可謂群生之大幸。可謂學佛者之大幸也。此既可修。則知一切奔馳世務。流蕩四方。勞生販賣。邸店市塵。商賈負道。百工伎藝。男女老幼。奴婢黃門。受人驅役。不自在者。於彼一切行住坐臥。著衣喫飯。語默動靜。及被牢獄者。於喜怒哀樂之間。未有不可修時。況出家四眾。在家四民。有居可處。有暇可修。所欲皆具。得自在者。寧不進其行也。客又曰。今有聞極樂過十萬億佛土之遙。而望途怯遠。聞生者多是一生補處。而恥躬弗逮者。云何。答曰。彼等豈知如上所說十方空界。悉是我心。心淨則十萬非遙。心垢則目睫猶遠。但期心淨。何算程途。如少頃睡眠。夢行千里。豈以常時為比較哉。理既有土可生。切不可



謂但能心淨即是。更不須生於彼土也。乃復禮曰。唯。敬受來教。又曰。某初聞是說。先所未聞。謂師但隨自意以垂其言。今聞三昧之名。乃知來自聖典。實應機宜。如青天白日。可謂後學之誠訓也。豈是為我曲說哉。願筆記之。永為將來之訓。更求垂示道場所修始終微細正行法門。普利斯世。則其幸尤大。余曰。善哉。當盡子意。而與彼說之。客乃謙恭而退。其客名行一。字志西。自言曾讀智覺禪師萬善同歸集甚熟。後遊廬山。見始祖遠公遺迹。因發願念佛云。

三昧儀式第十五

念佛法門。嚴建道場之事。并供養儀式。及預治衣服鞋履。更衣沐浴。門頰出入。方便正修。禪誦懺禮等清淨法則。具如慈雲尊者懺儀等文。此不再具。如所期日至。當於七日之前。營理庶事。



俱畢。必先使身心立心必須如此近世學者多不然靜定。期於懺內。障盡行圓。又起首必六齋日。又期日之前。或三日。或七日。佛前香華淨水等下多慈雲所未盡供。不宜不謹。蓋有佛天先降。森嚴此處。辟除魔事穢惡等障。使行人於道場中三昧成就故。於此道場。當作淨土想。作解脫處想。作寶所想。作定得往生想。無輕視之。又當返觀世間無窮之苦。如得避怨。永不再入。又不可將平日難割捨事。蘊之於心。存其餘念。與正懺時作障。使勝行不進。虛喪其功。恐難再會。儀云。不得剗那念世五欲。

行者十人已還。多則不許。須預審擇其人可否。觀彼平日行止。無大麤過。或信根淳厚。離諸卒暴。音聲和雅。儀軌端莊。受人約束。為生死故。不生悔惱。肯存謙下。可作同修。若無是人。止四三人亦善。或一己尤妙。不可失察。反使敗壞軌則。惱亂清修。又於眾中。宜推尊一人德重行熟者。或別請久為師範者。作



方等道場之主。主行懺事。使一眾觀其儀禮。聽其舉揚。作大依止。於中或時示現逆順之相。毋見過失。其人亦可審己謙辭。或赴或止。

其禮誦儀式。或拜或跪。或坐或立。叉手合掌。恭敬旋繞。皆當一一端莊雅重。收視隔聽。攝境歸心。未達者。當問先覺。慎勿自恃其力。使身心搖動。或敬或倚。

眾雖預集。當於隔宿之前。沐浴盥漱。換服履等。使道具如儀。懺首鳴引磬。領眾入道場。除內護二人外。餘不許同入。各周旋燒香了。依修懺位。朝佛三禮。以祈感降。禮畢。環繞立定。主懺出眾白文一篇。讚佛讚水。乞祈三寶加護證明。俾於正修之時。無魔無障。必生淨土。禱畢。就舉過去正法明讚。念大悲呪七徧。如意輪呪七徧。毘盧灌頂呪七徧。主懺候舉呪之時。即以手執水盂。於香鑪上請熏。約半卷許。方傳與右邊之人。次砂。次




香·次華·亦然·如是右旋·展轉三帀·三呪畢·復舉大悲呪·周圍灑淨·及各處欲經過所·先明燈已·當最前挑燈照路·次則執盂灑水·次捧盤撒砂·次提鑪行香·後隨處散華·領眾從佛座後轉·先於道場內右繞熏灑·圓滿三帀·使砂水邊皆徧·次從道場外·及施生處所·到禪悅堂·亦繞轉一帀·次淨廚·次東淨浴室·脫著處·宴息處·閒處·及要路·凡行人及經過處·或繞彼屋·皆當熏灑一帀·是故以灑為界·名為結界·經云·界如金剛城牆·蓋遵此意·又撒砂者·換土淨地·結地界也·灑水者·即去垢鎮疆·結方隅界也·行香者·使香雲如懸蓋於空·結虛空界也·散華者·顯瑩潔鮮明·莊嚴法界也·如上一切法用·悉是我大悲聖主及神呪力加持·故砂水到處·為佛寶土·以是因緣·邪魔不能入·外道不能壞·而我三昧可成也·又此界相·慎不可破·若破此界·便為不祥·必使一眾道行·難成多障·何謂界相·



界相有二。有內。有外。內界相者。即修懺道場四方際畔是也。外界相者。即屋際外八方。砂水到處是也。內人出至外界裏必止。越外界為破界。外人入至內界外必止。越內界名破界。或辦事人以手指及衣裾入內界簾幕內一分許。亦為破界。或葷穢故此法惡人入不通隨喜喜外界片時。亦為破界。破界之兆。不吉可知。若如經旨。則當重建道場。再行懺悔。乃能遠破界之相也。行人可不畏哉。

其有身心之力不及。於此法行不能具修。若欲但修五時者。當止此亦止名隨喜不可名正修日中時。欲修四時者。又止夜中時。欲修三時者。又再止日後時。若欲但修二時者。惟在早晚之間也。又行雖隨意而立。立定之後。不許改易。但可增修。不可退減。縱有病緣官事。亦當想念。豈可隨意勤怠。或興或廢。朝立暮改。使其正行不純一也。今欲修此道者。必先取彼念佛法則。及淨土經懺呪等。前後排布。如意多少。安頓諦當。再三審實。我能行否。譬如有人。浮身渡



水·察水遠近·不致疲絕·而乃渡之。行人亦爾·觀自勤怠·觀此為障重者法廣略·而乃取之。不當趁一時之勇而立·即時而廢。又不可別有誦持·心不專注。如人發箭·心一則中·念佛法門·亦復如是·若能行純心一·應念得生·遊戲極樂·於一念中·所獲功德·豈易量哉。

◎

揚佛下化之力第十六

正信正願之本

已上所述種種方便·皆是眾生起心進行上求之心·而不知我世尊下化願力·種種方便·無所不至·過於眾生上求之心百千萬倍·不得為喻。如經所謂阿彌陀佛慈悲光明·徧照法界。普覆眾生·作大救護·不令墜墮。阿彌陀佛慈悲願力·徧周法界。普接眾生·作大攝受·不令漏失。阿彌陀佛陰入界身·徧同法界。普示眾生·令彼了悟·不令退轉。是故十方世界一切眾生·皆我彌陀願



力所持。猶彼慈母。愛惜嬰兒。懷抱乳哺。不令失念。父母愛兒。但止一世。報盡則休。佛念眾生。世世不捨。以是義故。能於我佛^妙大願之中。一稱其名。滅八十億劫生死重罪。信有旨矣。蓋我彌陀願力。常在世間。救苦眾生。眾生能念。豈不速應。譬彼母救嬰兒水火之難。何待兒求。兒若能求。母必倍愛。惟彼歷劫逃逝。自甘退失。不受救者。誠難救焉。縱有五逆具造。十惡滿心。毀謗妄語。虛誑說法。無罪不造。臨命終時。應墮阿鼻。其相已現。必入地獄之人。若能遇善知識。教令念佛。此人苦逼。一念改悔。能十稱其名者。尚能變地獄之相為淨土。而得往生。若能以是觀行莊嚴。及能先排所造之業者。豈不克應。喻昔有人懼虎上樹。因失聲故。稱南無佛三字。後值釋迦得道。況彼命終苦逼。猛勵十念。而不感彰。問。我聞彌陀願力徧一切處。今觀此說。但能救彼將入地獄及未命終之人。其已入者。似不能救。




如不能救。則知彌陀及諸佛願力。有不徧之處耶。答。子豈不聞諸法所生。唯心所現。一切因果世界微塵。因心成體。若知諸法尚不離於眾生之心。豈離彌陀本體而願力有不徧處耶。問。若爾如何地獄之人長劫受苦。未聞有能救護者。答。子又當觀今之市廛屠肆之內。聚生而殺。日夜不休。未聞有能止其殺者。殺因既不能止。獄報亦無能救。然則殺在彼而報在我。但因果難逃耳。

豈彌陀願力不徧。而地獄無救護者耶。譬如有人。頗知經義。此下一段為救彼不能救者故說可謂大慈大悲合佛妙心。而於身三口四等惡。承宿習故。不能滅除。因不滅故。其人命終之時。不遇善友提獎念佛。直入地獄。於地獄中。受無量苦。雖受諸苦。善因不滅。於諸苦事。皆能照察。觸境知心。既知是心。亦知生佛一體。以一體故。即知正是如來微妙清淨之身。由能覺了生佛一故。則當其人正受苦時。悉如夢事。了彼苦相。即是菩提。此心淳熟無錯謬故。又能促彼多劫地獄極苦之



報。一時輕受。其人於是雖受眾苦。得無苦相。反起代受苦心。是以不求出離。以此妙解合佛心故。彼昔所曾供養之佛。乃至曾於名像所歸敬佛。及經卷中所信解佛。或念彌陀機感相投之佛。彼佛則必如伊解境。還現如是廣大如虛空量。威德熾盛光明之佛。相好神通。巍巍赫奕。至彼地獄最上之頂。垂臂彈指。慈音告勅。於其支體。放大光明。其音隨光。直至地獄淵源之底。其獄所有鐵城鐵門鐵網銅柱。乃至刀山劍樹鑊湯鑪炭一切苦具。承光照者。無不摧碎灰滅。如影如風。了無蹤迹。又彼一切牛頭馬面。鬼吏獄卒。銅狗鐵鷹。鐵蛇鐵嘴諸蟲鳥等。承光照故。如菩薩相。慈視愛念。其受苦人。及同獄苦囚。忽得本心。增益善念。見彼光明。又聞告勅。如深井底。仰望雲漢。舉眼上視。見佛勝身。踴躍歡喜。頭面頂禮。悔過自責。與同苦者。發菩提心。隨光直上。至佛所已。摩頂授記。接足作禮。聽佛說法。應念悟道。



· 即能飛行遊戲神通· 淨佛國土· 同佛生處· 如大菩薩· 成無上道· 教化眾生· 難可窮極· 問· 若從因果· 則此佛光但照勝解之人出獄· 眾囚無與· 如何一時同出· 答· 譬如有一惡逆之人· 罹於官禍· 入獄之時· 由彼一惡為因· 眾過俱生· 則必展轉累乎妻子父母親戚知識人等· 同受苦果· 其善行人出獄之時· 亦復如是· 豈不亦令同受苦者· 展轉生善· 悉承佛力· 皆生樂處· 若此· 則我彌陀願力· 實徧一切時處· 豈特不能救護已入地獄眾生耶· 若謂獄報未盡· 先欲使之令出· 獄因無善· 而欲佛光下照· 其可得乎· 更能以彼省己· 奚不自悔· 問· 若待獄報盡時· 佛光來照· 我必報盡自出· 何須佛光照耶· 答· 若非佛光· 報盡雖出· 於三惡道· 未知何生· 則必各各自重至微· 展轉歷於多劫· 多無量劫· 不思議劫· 方至人中· 猶自貧窮下賤· 癯殘百疾· 受諸大苦· 又因求不得苦· 惡念轉甚· 若無微善· 還墮地獄· 如盲入棘林



· 何由能脫也。若承佛光下照威力。則能轉重輕受。轉長短受。轉多少受。又能一出地獄。便生佛土。豈可言不須佛光照耶。若作此見。得大重罪。經云。假使大千世界滿中大火。念彼佛者。直過無疑。何況一己之火而不可滅。即此義也。又云。彌陀如來。悲心激切。乃至於無間獄大火輪中。代諸眾生。受諸苦惱。方便救脫。令生安養。況未淪墜之人。而不救護。又云。彼佛慈力。普覆世間一切眾生。於彼佛身。刀斫香塗。以慈力故。不二攝受。是故彌陀願力。下化眾生激切之心。於茲可見。何況以種種形。身同眾生。於諸時處作化事者。實難可測。若不諦信。未可謂知法者。或謂眾生全體是佛。未審誰是能救所救者。余只向他道。汝欠悟在。



❖

十大礙行第十七

珍地左券

詳夫一心平等·體性無虧·眾生雖纏綿於業識之中·靡不有出塵之志。方欲究道·魔境先彰。一事虧心哀哉·萬善俱失。成小敗廣·得者還稀。況乎物欲交傾·死生遷變·遞相倣效·易地皆然·使我如來於三大阿僧祇劫·捨無數頭目髓腦·國城妻子·身肉手足·戒忍精進·承事知識·不惜身命·修行道品所得法門。因茲障礙·退其心故·一旦在我而滅·可不痛傷。我今既為釋迦之子·不以力爭。坐令法界群有·永失慧目·甚於割切身肉也。是故我今依經·創立十種大礙之行·名十不求行·人雖不故願於礙·但於此間·或不得已·有一切障礙現前之時·俾我身心先居礙中·而眾魔諸惡障礙之境·不能侵我·不能障我。譬如金火同鑪·火雖欺金·金必成器·其十種大礙之行·今當說·一念身初標起不求無病



· 二處世不求無難 · 三究心不求無障 · 四立行不求無魔 · 五謀事不求易成 · 六交情不求益我 · 七於人不求順適 · 八施德不求望報 · 九見利不求露分 · 十被抑不求申明 · 此十種大礙之行 · 攝一切諸礙 · 惟上智者堪任。誠然誠然可恥可痛中下之人 · 不敢希冀。若有得聞此十句義 · 於諸礙中 · 一一皆能照察覺悟 · 省身體道 · 持之不失 · 則能入諸魔界 · 不為群魔退轉其心 · 循諸色聲 · 不為色聲惑亂其志 · 乃至憎愛利名之境 · 人我得失之場 · 我心先居礙中 · 彼礙豈能為礙 · 礙若無礙 · 則於道行尚可直進 · 何況得於自然無礙之境 · 道豈不可進哉 · 譬如高崖之木 · 雖久旱如焚 · 尚不改其秀色 · 何況兩澤滂霈 · 而又加於三春之令 · 豈不敷榮茂實者乎 · 又如根缺之人 · 運用雖艱 · 而於求食之計 · 有不勝之巧 · 若以求得之計 · 移之於求道 · 豈在礙不能行道乎 · 當知此礙 · 即是一切眾生大善知識 · 亦是一切眾生良佑福田 · 可以了死脫生 · 可以超凡入聖 · 於諸



世間所有美味上服。金剛珠玉。一切眾寶所不能及。是故若非以礙為通。則於非礙。反成為礙。何以故。身次反明病根無病。則貪欲乃生。世無難。則驕奢必起。心無障。則所學躡等。行無魔。則誓願不堅。事易成。則志存輕慢。情益我。則虧失道義。人順適。則內必自矜。德望報。則意有所圖。利害分。則癡心必動。抑申明。則人我未忘。以是義故。則知十無礙道。能生是過。及成如是一切不吉祥事。為障道因緣。何以故。貪三詳列病證欲生。必破戒退道。驕奢起。必欺壓一切。學躡等。必未得謂得。願不堅。必未證謂證。志輕慢。必稱我有能。虧道義。必見人之非。內自矜。必執我之是。意有圖。必華名欲揚。癡心動。必惡利毀己。存人我。必怨恨滋生。是十種過。從凡妄生。皆名邪見。展轉生起無量惡法。徧虛空界。必令眾生。墮於地獄。豈可於此。不生敬慎。若能體茲礙境。識四出正義病因緣。知病性空。病不能惱。了難境界。體難本妄。



·難亦奚傷·解障無根·即障自寂·障不為礙·達魔妄有·究魔
 無根·魔何能燒·量事從心·成事隨業·事不由能·察情有因·
 於情難強·情乃依緣·悟人處世·觀人妄為·人但酬報·明德無
 性·照德非常·德亦非實·世利本空·欲利生惱·利莫妄求·受
 抑能忍·忍抑為謙·抑何傷我·是故大聖化人·以病苦五顯力用為良藥·
 以患難為解脫·以障礙為逍遙·以群魔為法侶·以事難為安樂·
 以弊交為資糧·以逆人為園林·以施德為棄屣·以疎利為富貴·
 以受抑為行門·如是則居礙反通·求通反礙·於此障礙·皆成妙
 境·故得之謂得反失與失·自不能知·人奚於中·強生取捨·是以如來於
 障礙中得菩提道·至若為半偈時之遇羅刹·作仙人世之值歌利·
 瓦石來擊之增上慢比丘·木盂為孕之大毀謗嬖女·及央掘摩羅之
 輩·提婆達多之徒·皆來作逆·而佛悉與其記·化令成佛·豈不
 以彼逆而為吾之順·以彼毀而為吾之成也·何況時薄世惡·人事



異常。於學道人。豈無障礙。於今若不先居於礙。則障礙至時。莫能排遣。使法王大寶。因茲而失。可不惜諸。愚故依經聊述所知。願勿嫌棄。倘因聞此義故。障礙現前。反能勇進於道。可謂得斯旨焉。

◎ 羅顯衆義第十八

夫念佛^{第一段}三昧者^{願圓攝義}。名一行三昧也。蓋彼行人既了深旨。能持一心。唯念彼土。唯憶彼佛。知身土無二。了憶念亦一。乃得名為一行也。雖名一行。亦當以彼一切世出世間無量法門諸功德行以為助道。則往生行疾。是故一切諸行。悉為淨土而修。無別歧路。名一行耳。譬如眾流入海。同得海名。萬善同歸。得名一行。以是義故。則一切念處正勤根力覺道。四弘六度。皆淨土行。乃至彈指之善。及散心念佛。或一稱名。或舉一手。一禮一讚。或一瞻



仰·乃至或奉一香一水·一華一燈·一供養具·或一念修習·至於十念·或發一施一戒一忍·禪定智慧·一切善根·迴向極樂·願力持故·雖有遲疾·皆得往生·如經所說喻·昔有人以小滴水寄於大海·願不壞不失·不異不竭·雖經多劫·要還原水·其人經多劫已·如寄所取·果得原水·不壞不竭·此亦如是·以小善根·迴向極樂·如寄滴水·雖經異生·善根不失·亦不壞竭·生彼無疑·是以大乘小乘·有漏無漏·散心定善·事想觀慧·皆名一行·悉得往生·惟除外道種性無信。故云·但辦肯心·必不相賺·又經所謂一稱南無佛·皆已成佛道·良可深信·其有因心未起無願行·善行未立·身心未屈真門外漢·先期感應者·不可與其同語也·是故釋迦聖主一代至談·有無量三昧·無量解脫·無量行願·總持相應無量法門·唯念佛一門·圓攝無外傾出一栲栳·悉皆具足·如彼大海·吞納眾流·性無增減·如如意珠·置高幢上·能滿一切眾生願求·體無



虧損。此三昧寶王。能攝能具。亦復如是。由是義故。始我世尊第二段類最勝義。以此三昧徧告眾會。非不再三。彼會所有承聽大根之士。若文殊等。及三乘聖賢。天龍八部。無不傾心而歸信也。逮法流東土。有大至人。於彼廬山闡揚遺化。彼信奉者。如風行草上。極天下之望。無不美其教焉。自佛至今。將二千三百餘載。中有聖賢之人。高僧巨儒。農商仕賈。匹夫匹婦。奴婢黃門。或自行而勸人。或著文而作誓。重法如寶。輕身若塵。臨難不懼。臨死不顧。挺身立行。力修此道者。何知其幾。或修隨喜。或信歸依。乃至隨得盡己之誠而行者。其數益眾。誠所謂列宿塵沙。莫況其多也。或有半信不信。猶豫不決之人。尚生彼國疑城邊地。何況正信行者哉。傳記所載。萬不及一。自古及今。咸受其賜。豈筆舌所能盡述。縱欲別修道品。但假自心之力。或有退轉著魔之患。唯此法門。因仗佛力。修則必成。無復魔業。永不退轉。又此三昧第三段



顯除災義

· 非但遠魔。亦於人間一切縣官口舌。是非患難。水火盜賊。惡人凶事。乃至一切虎狼蟲獸。鬼魅妖精。不吉祥事。不能侵害。又亦不為一切疫癘傷寒。癰疥下賤。眼耳鼻舌諸病所惱。如其願行無虧。皆能排遣。第四段顯正念義唯於人中名聞利養。甜愛輒賊及瞋心瞋火。雖有佛力。蓋是自咎。不能救焉。行人當深加精進。以攘卻之。

若一念因循。必為所奪。然彼輒魔。但能害淺信貪怠失念之人。

其精進者。如剛火得水反堅。焉敢小近而睥睨也。第五段顯實是故行人因佛

驗義

捍魔。非止此身安樂。又得三昧成就。天人護助。臨終正念往生

· 其往生之際。瑞應非一。或天樂盈空。或異香滿室。或光明照

體。或寶座現前。或彌陀垂臂親自來迎。或菩薩執臺授手而接。

乃至預知時至。正念不謬。諸障忽空。自能沐浴加趺。此六句不可著意恐反會眾說法

成虛妄

· 叉手告別。或更勉人進道。書偈擲筆。合掌而逝。或臨終之後

· 舉體如生。齒骨數珠。燒之不壞。光燄異常。五色鮮明。祥物



於空·盤旋不散·煙所至處·舍利流珠·觸物而生·此耳目之所
常有者也·若非平日履踐明白·精進力感·焉能若是·第六段嗟今之人
·或有修而無效者·蓋彼信根淺薄·因地不真·未曾立行·先欲
顯密修義人知·內則自矜·外欲顯曜·使人恭敬供養·冀有所得·可恥甚至妄
言得見淨境·或見小境及夢中善相·未識是非·淺劣先欲明說·此等
卑下·必為如上魔侶所惑·願行退失·還隨生死苦趣·可不慎哉
·雖有道場持誦懺願儀式·今人豈可使道場彰著耶不得不被人知·蓋出於不得已·豈可
特露其迹·使觀行傾敗哉·是則行人還當審諦·密實自行·內懷
慚愧·勿露其德·至到家時·不被如上強輓二魔所惑可也·中有
宿障欲滅·微見好相·如其不能蘊德·聞人之耳·則其行必覆·
所以遠公三觀聖相·平日未嘗言也·但除臨終時耳·至禱至禱·
又此第七段三昧·顯下學義體性雖圓·所解則宜廣大·所行則宜盡諸微細條章·
革諸猥弊·乃至小罪·猶懷大懼·又當解隨大乘·行依小學·乃




能合此三昧。若知小不自小。小隨解圓。圓不離小。小即是大。小大解行。一理無分。伶俐者少即超世見。經云。第八段顯淨業義孝養父母。奉事師長。慈心不殺。修十善業。受持三歸。具足眾戒。不犯威儀。發菩提心。深信因果。讀誦大乘。勸進行者。以上每句是一法行。古人各有法訓一章。茲不能述。又復當護人心。勿使誇嫌。動用自若。誦大乘經。解第一義。親近善友。請問先覺。不執己見。不引己長。志存忍辱。行當依經。聽聞正法。不毀僧尼。息世雜善。不貪名利。遠離邪惡。處事必忠。將過歸己。深誠綺語。一心不亂。視人如佛。捐棄技能。唯求往生。身必清淨。如是等無量善行。悉宜修習。能助正道。第九段顯剷染義更能割世染心。於憎愛二境。無諸留難。凝心如一。必生淨土。其功甚大。不可盡述。是故於此法中。密修斯行。高而不名。得生彼者。何知其幾。而有名於傳記之人。如大海之滴耳。豈可量其數哉。第十段顯報恩義若人能依教誠。但行此行。



尚能利益無量怨業眾生。何況父母師長。法門眷屬。兄弟姊妹。及平日中解我患難。提挈我者。不得其利。故知但修此行。恩無不報。第十一 段 顯 難 遣 義是以應當一心念佛。阿彌陀佛及二大士。境界甚深。於苦海中。難得親近。難得憶念。何以故。能憶念者。必解脫故。聞名尚難。何況親近。經云。若善男子善女人。但聞佛名二菩薩名。除無量劫生死之罪。何況憶念。若念佛者。當知此人。是人中芬陀利華。觀世音菩薩。大勢至菩薩。為其勝友。當坐道場。生諸佛家。第十二 段 顯 對 治 義是故十方如來示大舌輪。殷勤勸勵。娑婆教主告誡叮嚀。其辭激切。俾令五濁眾生。必修此道。乃得度世。何以故。蓋彼五濁眾生。身心俱苦。以苦為命。猶水火聚。而佛特於苦處。行悲最深。正應機宜。如水如月。感應道交故也。是故世尊自成正覺。至入涅槃。其音不二。於說法中。始從華嚴會上。終極法華道場。玉音布告。稱述何窮。彼會所有大心勝志之士。承順慈



旨·悉皆起願而求生也·何況我等末世鈍機流浪者哉·有識之流
·須銘肌骨。第十三段顯願力義自是彌陀願力不斷·代不乏人。聖人以此唱之於前
·賢者以此繼之於後。廓然徧乎十方三世·何止天下。霽然充乎
六道四生·奚但人倫。天神嚮化·鬼物順之。若人非人·無不讚
仰。載諸行事·具諸典章。盈溢乎海藏龍宮·徧布乎人間天上。
深根固蒂·悉應群機·蓋皆我彌陀願力致然也。佛言·最後惡世
·我法滅時。唯此教典·多留百年·以度群有·然則此法·豈非
我等殿後之至訓也·彼飛禽名八八鸚鵡者·墮在愚癡妄想異類之
中。以能隨人稱名·亦承三昧力故·尚于埋處生蓮。何況於人。
人而不如·可謂不知愧矣。第十四段顯二利義余生於末世·正值後五百歲·故人根
淺薄·疑惑不信·又復異見邪解·各執不同·遞相誘掖·使彼正
行之人·多被惑亂·傷感盈懷。是故集彼禪教淨土諸文·及諸經
卷·取其極深至要之義·述作此說·類以成編。流布世間·斥邪



顯正。普願法界眾生。於此說中。一見開解。了悟真心。知彌陀
依正。還在西方。達西方依正。不離本性。但含識者。皆同往生
。悉深入其階位也。更願先覺。不悞慈悲。見未悟人。如法教導
。前人若昧。可與隨根應病。剖析幽微。更為宣說。彼若一念信
解。行願必成。往生可期。功莫稱述。縱有異執牢固。信樂不深
。但一句染神。亦成緣種。展轉利益。無盡無窮。勸發之功。非
不大矣。若人果能如是不師於心。不欺不妄。隨此正教。誨人不
倦者。縱自不行。即為已行。縱自未學。即為已學。何以故。法
界一相。無自他故。如昔有人。自於一生未曾修行。但能二次悉
傾己有。平等一心。建會勸人同念佛故。命終之時。亦得往生。
其事昭著。故知能發慈悲之心。示攝受之相。及能利彼。勸人念
者。所得弘多。誠為無上法王所使。但不可執謂已定不必修耳。
是故三昧甚深。法門如海。顯利之事。豈能盡言。聊記所聞。為

此中勸誡雙行



世勸發。



獨示一願四義之門第十九

或有問曰。念佛勸發之書。吾於古人見之多矣。雖唱和相尋。言有同異。而義豈有異哉。若此集者。除述依正。明觀慧。分折攝。顯眾義等。餘如斥妄顯真之類。余若未之聞也。雖古之至人。尚未肯盡。如有所待。況某於此而敢輕視哉。余雖不能入直指之道。而亦獲新聞之益。敢問何為而作也。答曰。噫。余傷世之軌道也。而悉逐塊陷邪。故為之說。豈余之好辯哉。蓋出乎不得已也。又問。此三昧說。既詳且明。或謂難至。還可以一句而盡其義乎。答。何必一句。亦可以一言而盡。何謂一言。所謂願也。何謂一句。所謂戒解行向也。然此一部之義。不出戒解行向一句。戒解行向一句。必從願起。乃可以一言盡也。或廣或略。卷



舒自由。豈復滯於一隅者哉。何謂為戒。行人既修三昧。若不持戒。雖有信心。為彼世間惡緣雜染相侵相奪。塵勞難遣。毀壞法身。令解入邪。不得往生。經云。若一日夜持沙彌戒。持具足戒。即得往生。故必當持戒也。何謂為解。行人修此三昧。求生極樂。若不以此深慧妙解。知淨穢兩土。東西敵立。真實不謬。又知即此淨穢兩土。全具我心。不離當念。從何法修。可得生彼。經云。讀誦大乘。解第一義。乃得往生。故必當正解也。何謂為行。行人求生淨土。慧解既正。則必依解立行。六時行道。三業無虧。直進不退。決期生彼。經云。修行六念。迴向發願。一日乃至七日。即得往生。故必當立行也。何謂為向。行人欲必往生。於如是戒解行等所生功德。及今一切時處。與無始來大小善根。一一迴向淨土。臨終乃得決生。經云。迴向願求生極樂國。譬如辦事於家。歸家得用。故必當發迴向也。此四大法門一句之義。




·能攝一切善法。譬如四時成實穀果。各得其要。失一不成。此四法門。亦復如是。若失其一。三昧不成。是故須當四義具修。乃滿一願也。問。只此一句。還成多句。答。多句即一句。一句即多句。多句一句。攝義皆盡。不可謂多句義詳。而一句義闕也。問。若是。何不但說一句。答。多句廣說。一句略言。廣略雖殊。蓋各為其機。皆能顯道。豈可但一句說。而廢廣說也。又問。彼三家村裏匹夫匹婦。行公行婆。東西不辨。菽麥不分。此持戒等一言四義。懵然無知。或唯一心稱名。或但專勤禮拜。而得往生。臨終徵驗昭著。何也。答。此一心中。何法不具。既從慧解。信有二土。發行稱名。迴向求生。豈更破乎佛戒。如是四義既具。諸行不立而成。遂得往生。成其初願。豈可名為菽麥東西不分不辨者哉。問。若爾。行者但當一心。諸行自具。更不必立四義等也。答。若先知四義而一心者。如以基地堅牢故。則永無



退轉。若先一心而具四義者。雖得往生。於中忽遇魔惡邪黨。則多有退轉。是知還以四義為優也。即時問眾將散。忽有承上問意。復作問曰。我聞淨土勸修之書。自古及今。作者多矣。其辭義純善。悉應機宜。將徧於人間世。又依教得生者已廣。可謂義無餘蘊矣。云何於今更有所作。使學者有異解耶。今詳此集。義若述古。古人已明。不須更說。義若別立。今人莫解。恐成臆見。若不出二句而說。不知為名耶。為利耶。願聞其要。答。噫。陋矣。子之難誨難明也。吾聞古人立言。必祖佛經。既祖佛經。雖一句義。假使大千世界塵數眾生。皆如普賢。經劫而談。理趣猶尚不盡。豈古人已說。今人不可言哉。豈先佛已說。古人不可言哉。不知今人不述古人之言。古人之言行不顯。古人不垂今人之誠。今人之志慮無憑。又義雖述古。意趣不重。語雖別立。理不異古。但以世去人逝。所解異端。雖決甲疑。復增乙病。乙病既



復·丙疾又生。展轉多歧·流於歧見。又彼聖賢之書·雖則山高海積·泯滅者多·後學機遲·卒難尋究·是故於彼廣文中·摘其精華簡要之義·急欲解當世之惑·集以成帙·盡壬癸之沉痾·豈為利名乎哉·子之所問·慚且愧矣·譬如大海添流·海豈厭其深廣·巍山加土·山奚惡其崇高·又今人之疑·古所未聞·古人之偏·今人莫至·去聖既遠·故當依妙經·辨明今人之疑也·又如滿室並金之藥雖貴·若不診其疾·而擇其對者用之·非但疾之弗瘳·命亦難保·又經中一義·萬解字如萬明·何厭乎言之再聞·何憚乎言之未聞也·子當以此三昧·披究詳明·立大願行·直進於道·求生淨土·慎毋更待臨行決別之際·愛境惜身·如生龜脫殼·萬苦攢心而自悔焉。



示念佛滅罪義門第二十

有客問曰·念佛三昧直指·始於極樂依正之境·終則求生行願之門·無不畢備·但經有稱佛一聲·能滅八十億劫生死重罪之句·某於此語·不能無惑·若果有此理·今觀世人若貴若賤·於盡生中·未有不一稱其名者·則當皆滅如是重罪·悉生極樂世界矣·何世人依舊業識茫茫·死時如落湯螃蟹·昇墜不識所之·滅罪之義何在·不應佛語有虛妄者·願為釋答·答曰·至哉問也·彼世間未悟之人·因子所問·於此三昧必不退轉·直生淨土矣·今世行人·皆謂此說是方便勸進之語·豈知是佛真實之說·必不我欺也·子豈不聞汝於無量劫前·與世尊釋迦牟尼·同為凡夫之義否·而我世尊成道以來·已經爾所塵點劫數·此塵點劫·妙經委明·然我亦於爾所劫中·在凡夫地·漂零六道·造諸結業·不可限



量。同佛至今。久遠無異。如此塵劫。安可稱量。假使有人。於一生內。不說餘善。但稱佛名。盡壽聲聲不絕。隨其所稱之名。一一皆滅八十億劫生死重罪。然盡一生以及他生稱佛。滅罪劫數雖多。若比如是極大久遠塵點之劫。正如指上土。欲比大地土耳。豈可謂稱佛名能滅多劫罪故。更無餘劫之業。障我生淨土耶。而不知未滅之罪。劫數長久。無始無際。與佛同壽。實過如是八十億等數量劫外。又如炬火雖熱。欲消大地之雪。豈易融泮。故雖念佛滅罪。未得生者。其義如是。況人長劫造業心堅。念佛片時心弱。退易進難。又況與佛同為凡夫之前。劫數轉倍。乃至煩惱無始。發心在近。罪豈易滅。可不思之。今謂一日至七日。一心不亂。即得往生。及臨命終時。一心不亂。稱佛一聲。即滅八十億劫生死重罪。乃至極惡逆人。臨終獄火相現。能稱十念。悉生淨土者。蓋仗我稱佛名號滅罪威神一隙之功。承佛速疾救護大




願之力。譬如壯士正戰墮圍。臨危倉卒之際。得一勇夫。與之強弓銳刃。良馬善策。即便猛發其志。踴身馬上。奮揚威武。努力揮挽。突圍而出。戰勝獲功。偃寇施恩。歸奉其主。永享豐樂。此亦如是。彼佛接引生極樂國。其義若此。故云稱佛一聲。滅八十億劫生死重罪。非謂如今念佛人。今日三。明朝四。且猶且豫。或見目前些兒聲色境界。便被牽拽將去。全無把握。與不曾念者一般。欲因一稱之中。真實滅多劫罪。使便不為障。即生淨土。其可得乎。然如此念者。聲聲非不滅如是劫數罪。但因初心緩故。報生亦緩。止可作他世生緣耳。或能稱念不息。雖成聚露成流之功。豈得與前說較優劣速疾哉。若人精進。能如前說。生猶反掌。如箭取的。決無不中。故知散心念者。及雖志誠未離妄想者。或被如是劫外之罪所障。但報在他生。不能即應其功。若勵聲竭志勇猛念者。既滅爾所劫罪。由勇疾力。餘劫之罪。不為障

可痛可誠



礙。便得十念成就。往生淨土。此義瞭然可見。決定無疑。豈可因悠悠念佛之人。依舊業識茫茫。死時如落湯螃蟹。而疑佛為妄語。但是勸進之說哉。故知佛力廣大。徧覆一切時處。能攝我小善。入佛大願。使同一味。拔諸眾生置安樂地。使一切劫罪皆得消滅。何止滅八十億劫之罪耶。如是稱佛功德。實難可測。大乘世間難信之法圓頓橫超直截之旨。於斯可見。十疑論云。譬如十圍之索。千夫莫制。童子揮刃。須臾兩分。如觀經下輩生因之說。此喻纔念滅罪即生者也。又如佛世有人。於佛眾會欲求出家。歷徧聖眾。悉以道眼觀察。皆謂此人永無善根。無肯度者。後至佛所。佛乃度之。比丘以是問佛。佛言。此人雖無善根。但於無量劫前。非二乘道眼所知。此人因採薪。為虎所逼。上樹避之。忽失聲稱南無佛。以此一稱名故。於此賢劫之中。值我得度。後當會道。此明一生念佛。未即獲報。於後世方得往生者也。以此例之。則知一



稱佛名。雖未著何佛。尚能令人滅罪得道。何況彌陀願力超過十方。專注彼佛。稱名功德。所滅罪障。可思議耶。經云。一稱南無佛。皆已成佛道。是斯說之明證也。故知若能稱彌陀名。念念不休。此功德實難稱量。雖障重人。有散心退轉者。其於往生之驗。必在將來。又稱佛屬口。惟論其功。念佛在心。乃彰其德。論功則在我不倦。彰德乃見佛現前。二義不同。優劣可見。口稱尚爾。況心念乎。是故我今因汝所問。依經述事。達諸同行決志之人。願於此義如說修行。慎毋疑慮。



略示列祖行門第二十一

義達無關良工心苦

指念佛
法門廣大。徧攝群機。易進功高。眾行莫及。始自鷲峯初演。大器所歸。終至震旦流輝。三乘共證。其於法化益盛。振古絕今。可謂最上微妙不可思議。極勝廣大法門者也。迨至東晉遠祖。於



彼匡廬·唱立其教。即時和者·一百二十三人。祖師三觀聖相·如願往生。朝士劉遺民作文立誓·亦見彼佛親自摩頂·衣覆其體。又與同志闕公則等·於命終時·悉從其行。此皆傳記所明·實人世共知者也。又石晉翰林張抗·但持大悲呪十萬徧。劉宋江陵僧曇鑑·以平日毫芒之善·悉迴淨土。南齊揚都僧慧進·願誦法華為淨土行。而此三人皆生彼國·可謂行不虛矣·抗即見淨土在西屋間·良久而化。鑑乃覩彌陀以水灑面曰·滌汝塵垢·清汝心念。汝之身口·俱致嚴淨。又覩瓶中生花·定起與寺僧話別。進因誦經致病·乃願造法華百部施人·填吾所誦·造畢病愈。忽聞空中讚善·隨即往生。此三人者·其功尤難具述·又後魏壁谷僧曇鸞·棄仙學佛·修淨土真長生法。臨終乃令弟子高聲念佛·鸞即向西叩頭而亡。空中天樂·從西而去。隋僧道喻·以栴檀香造三尺彌陀之像·發願求生。後亦死而復甦·乃於冥中親覩瑞應。



見佛謂云·明星現時·吾來接引·及期果逝。其大行者·如唐京師善導和尚·台州懷玉·汾州芳果二師·真州自覺·睦州少康·及并州惟岸等·皆不離大乘·建誓立願·具修是行。靈驗昭著·感動天人。法雲普覆·含攝無窮。法雨徧濡·充擴一切。其德故非一端·實不可具述矣。又陳隋天台智者國師·洎傳法列祖·法智慈雲等·宋初永明智覺禪師·長蘆慈覺禪師·此大聖師·行超人天·德臨三有。揭昏衢之慧日·破苦處之導師。皆以此三昧為自利利他·傑世化人之道。化儀既畢·皆生上品者也。又唐長安尼淨真·誦金剛經十萬徧。將終五月內·十度見佛·兩度神遊極樂。唐房蕭·因勸一人念佛·感動幽冥。長安李知遙·五會念佛。見空中神僧來接·得生淨土。上黨姚婆·念佛立化。并州溫靜文妻·修行如願。又張鍾馗·張善和·皆為殺業·獄相已現。十念反不及彼便歸。石晉鳳翔僧智通·宋明州僧可久·觀智者遺文·一心修



習。亦爾神遊淨土。見標名華座者。出定之後。悉如其言。宋金太公。黃打鐵。吳瓊。初皆為惡業。因改悔精修。於往生時。悉有瑞應。荊王夫人。觀音縣君。馮氏夫人。雖在女流。其德反著。故知此勝法門。凡有心者。皆可修行。奚間緇白男女。老幼愚智。異流極惡。最逆闡提之輩也。雉聞法音。尚生善道。人能念佛。豈不西歸。如是則但慮人之弗修。毋慮佛不垂應也。今依傳記。聊述所聞。俾同志之士。見賢思齊。為日用行藏之警省耳。至若四海八極之地。古往今來之時。耳目不接。所聞未廣。歷時既久。亡失者多。豈能盡述。

正示迴向普勸往生第二十二

詳夫邪見之源。實由於不正師友之教也。雖是夙業所召。豈免於外緣自心見惑哉。惑既不離我心。報必難逃苦趣。況彼一染於識。萬內因苦



化莫回^苦。所以寶王三昧念佛直指。由是而作也。余纔立斯志。即以此心緣娑婆業繫之大苦。念極樂依正之逍遙。淨穢交參。生佛互顯。無量義海。聚之於心。法喜充盈。如不見我。理事無礙。身土圓融。或匪筆舌所拘。蓋猶生淨土矣。如是功德。無量無邊。我今願以如上功德。及未來際觀集發心。求生淨土一切善根。如法性理。展轉無窮。自果從因。徧周塵剎。為行為願。迴施眾生。一切圓成。同生淨土。又願承茲念力。悉使十方剎海。并娑婆世界一切眾生。如我所願。若同若別。依正色心。一時趣入樂邦教主無量光明一毫端中。皆為樂國。變現自在。遊戲神通。如佛所住。永無遺餘。我願方滿。於是重復一心。攝我無始至今。盡未來際。若大若小。三業所修一切無量善根。皆現在前。普與眾生。於極樂國。一心迴向。仰祈諸佛神力。彌陀願力。及二大士功德之力。願此法門。願此善根。徧我六根。及諸支體。令我



六根。境智自在。滿虛空界。皆為色身。悉能宣說。如是法門。以此根身。即於一切眾生之前。盡未來際。不生疲厭。供養恭敬。如事世尊。五體投地。胡跪合掌。志心奉勸。勸以偈曰。極樂世界最清淨。莊嚴微妙超世間。彌陀願力同虛空。相好光明亦如是。念念不離眾生界。普度我等生其邦。我等自甘生死中。歷劫沈淪莫超越。彼佛垂臂待已久。咨嗟彈指誠殷勤。光明欲發蓮華開。今正是時願生彼。身欲無常時欲過。眾苦交煎應當離。願速念佛同修行。盡此報身生極樂。

又願此集法門。常在世間。如佛法身。作不請友。利樂一切。同生安養。願天龍八部。常來護持。於此法門。不容毀滅。如法性理。永遠流通。與佛常住。

寶王三昧念佛直指



附錄



破妄念佛說


（一名直指心要）

功在萬世

念佛三昧者。大雄氏觀此娑婆。有生老病死等業繫諸苦。教人念彼阿彌陀佛。求生極樂國土之法也。以彼佛身。及彼國土。清淨無比。莊嚴第一。依正極妙。故得名焉。彼佛眾會所有大心菩薩。聞佛言教。得生彼者。何止萬億。自是法流天下。東土西國。自始至今。如教生者轉多。不可以微塵恆沙比其數量也。去聖逾遠。人世澆漓。不知西方極樂實境現存。乃錯解諸法在心一句以為玄妙。便妄認胸中六塵緣影昏擾擾相為心。謂樂土在內。不求生彼。顛倒甚矣。此六塵緣影。皆屬前塵。本



無自體。前塵若無。此心即滅。云何更有彼土真可噴飯在此心內耶。汝又謂心本在胸。心小在胸。焉可著此廣大佛土耶。縱謂悟道便為佛土在心者。只可名為見性悟道。焉可謂之淨土在心。若人作此見者。實名邪見。縱是天魔惡賊外道種性。亦超此見。世間無有此見最下劣矣。可憐憫哉。汝今若欲悟真實本然心者。先當觀汝所認六塵緣影之心。本在汝胸。胸住於身。身居國土。此土及一切淨穢剎海。悉在虛空之內。此虛空界。無際無外。十界依正。一切在中。廣大難思。此空雖大。我之天然不動真實本心。非大極大。又能圓裹如上最大虛空。彼空在我真心。尚如小片之雲。忽點太清之裏。云何娑婆極樂一切淨穢剎海。而不在我本然心中耶。然則佛說諸法在心者。實非在汝胸中妄想緣影心內也。乃在現前一念本真之心內也。此真實心。遠離知覺。超諸聞見。永斷一切生滅增減之相。非始非今。性本



真如。具含眾妙。乃十界迷悟之本。實不可得而思議其廣大者。既一切身土。皆在汝今大覺不動真心之中。與佛同證。則知極樂娑婆等土。雖是實境。乃全我心。既全我心。我今任意於此即中捨東取西。厭穢忻淨。惡娑婆。求極樂。乃至憎生愛佛。恣意熾然著相而求。皆不離我心也。如是而求。不離心故。故彼極樂彌陀相好現時。即自心顯。自心顯時。即彼佛現。又我心即是彼佛之心。彼佛即是我心之佛。一體無二。故云唯心淨土。本性彌陀。非謂西方無土無佛。不須求生。但在汝生滅緣影之中。名為唯心本性也。又云。求彼佛。即求自心。求自心。須求彼佛。義意甚明。云何今時有等破法散僧。閒道遊儒。與你泛參禪理者。不知即境即心。求不礙真之理。反於不二法中。分內分外。辨境辨心。又教人捨外取內。背境向心。使憎愛轉多。分別更甚。而深達理趣也。一分其境。便以極樂為外。教



人不必求生。一分其心。便妄指六塵緣影虛偽妄想為心。謂極樂在內。因思指出墮坑落堑之病根下三種病證此心無質。又謂本無一切因果善惡修證之法。從是恣意。妄涉此一種恰湊著順便世緣。教人不須禮佛。燒香然燈。誦經懺願等。種種善行。謂之著相。其上者。又使此一種蝦跳不出斗彼縛心不動。如頑石相似。壞亂禪法。甚者更令此一種毒發了也其放曠自如。言殺盜淫業。悉是空華。無妨於道。因此邪見。墮落生死。直向阿鼻獄底最下一層而住。罪甚屠酷。直待此見悔時。彼獄亦隨而壞。方乃得出。又於身外田屋山河大地所依之境。雖見實有。不敢說無。亦皆指為心外之物。打作兩橛。不能得成片段。使心境一如。唯於著衣喫飯。因貪口體之重。不敢叱之為外。而於天堂地獄。及極樂土等塵刹。雖曾聞名。因不見故。直說為無。反言某人某處快樂。便是天堂。某人某處苦楚。便是地獄。曾不知彼真心非幻。而亦實具天堂地獄刹海也。以此教人不必求生。愚之甚矣。



嗚呼。汝既不識不生滅真心含裹太虛。妄認身內方寸緣影為心。以賊為子。不求於佛。其見卑哉。經云。譬如百千澄清大海棄之。惟認一浮漚體。目為全潮。窮盡瀛渤。如來說為可哀憐者。正此輩也。是以我心實與佛心同一理故。故我彌陀願力威德光明在我心中。承我心愚癡之力。作一切佛事。無時不引導於我。我心亦於彌陀願力大心之內。修諸念佛求生一切善行。無一善行而不具含佛德。了彼佛德。成我三昧。故知彌陀願力。始於發心。終於究竟。無一法而不直趣我心。以我心即佛心故。我心亦於無始至今。盡未來際。修一切三昧。無一法而不攝歸佛海。成本來佛。以佛心即我心故。如是依正色心。因果淨穢。雖同一心。而實不妨一一自分。各住其位於一心內也。以一心故。雖淨穢不同。所求不出於真心。以自分故。雖一心灼然而必捨穢取淨也。捨穢取淨。則感應道交。見彼本性彌陀。取捨極時見本性



了悟一心。則淨穢淨穢分處自分。可悟唯心淨土。如是而修。譬如一滴投海。便同一味。方知大海即自己也。豈有一行虛棄。不成功德者哉。今彼三家村裏愚夫愚婦。雖不識理。以信實有彼土故佛祖心印。於命終時。反得往生。彼畏有陷空之人。因認緣影為心。謂無外土故。雖修還肯道行。還受折箭生死。如是則知彌陀光明威德願力。常在世間。化事不息。尚欲攝取逃逝專忘眾生。況憶念佛者。豈不生也。又彼國土既勝。其求生者。亦必當深心起勝願行。或單稱名號。專持一呪。及但旋繞禮拜。乃至燒香散華。六時懺悔。盡撥世緣。一心專注。觀佛形容。與白毫相。心不懈廢。命終定生。更能孝養父母。奉事師長。慈心不殺。修十善業。受持三歸。具足眾戒。不犯威儀。發菩提心。深信因果。讀誦大乘。勸進行者。修如此法。亦生彼也。若得生彼。非止得生。又能了知如上著實努力念念求生之時。正是無念無求無



生之理。何以故。即精修是無修。非謂不修是無修也。若果謂一切放下。善惡無著。坦蕩無礙。為無修者。又何異斷見外道。非愚癡而何。豈不聞古人以色相反為無相。以深修乃為無修。以彼例此。法法皆爾。可不審之。今念人命無常。轉息來世。又況塵事連環。如鈎鎖不斷。若不能於世事縈心。塵勞鬱結途窮路轉時。及正當得志歇手不得處。一割割斷。起願立行。盡力一跳。焉得應念生彼。是故我今作禮。奉勸佛子。皆當一心精進而行也。

此說因吾鄉大方李居士。作勸念佛圖。請著語於中。故述此云。時洪武乙亥九月二十日書附。



❖

舊跋

淨直向讀雲棲大師法語。便知有淨土法門。然猶謂淨業與禪。正如春蘭秋菊。不妨各擅其美。未知淨業即是無上深妙禪也。自丁亥冬。登祖堂。禮蕩益大師。聞禪淨不二之談。謂不唯不可分。亦且無待合。雖慕之。而竊疑之。今讀此念佛直指。方信蕩師實非臆說。兼信永明大師四料簡語。真不我欺。故力募眾緣。刻印流通。而眾友亦各歡喜樂助。當知阿彌陀佛弘誓願力。貫徹于人心久矣。刻既成。敬跋數語。以識法喜。辛卯中秋望日。淨業弟子車淨直。書于四蓮居。時年六十。

淨土十要第八

明・蕩益大師選定

淨土生無生論

淨土十要
(九)



靈峯蕩益大師選定淨土十要第九

述曰·靈峯老人云·昔人列蓮宗七祖·太局確·只如天台教主·坐不背西·臥必合掌·其發明淨土·如堂指十疑論等之陣·正正之旗·無敢與敵·又如法眼冢孫·晝夜彌陀十萬聲·萬善莊嚴安養·其發明淨土·如大將軍指四料揀等令出如山·無敢動者·非皆蓮宗確列祖乎·天台幽溪無盡師·奉慈雲行願為日課·講自所述生無生論·每一登座·天樂臨虛·臨終晝空·書妙經題·屹然而化·以為蓮宗確嫡裔·何愧焉·淨要中收幽溪兩作·今會為一要·近代諸師·公其絕倡矣·



淨土生無生論

明天台山幽溪沙門傳燈和南撰

稽首能仁圓滿智。無量壽覺大導師。所說安養大乘經。
了義了義至圓頓。妙德普賢觀自在。勢至清淨大海眾。
馬鳴龍樹及天親。此土廬山蓮社祖。天台智者并法智。
古往今來弘法師。我今皈命禮三寶。求乞冥加發神識。
敬採經論祕密旨。闡明淨土生無生。普使將來悟此門。
斷疑生信階不退。

將造此論。立為十門。一一真法界門。二身土緣起門。三心土相
即門。四生佛不二門。五法界為念門。六境觀相吞門。七三觀法
爾門。八感應任運門。九彼此恆一門。十現未互在門。



初—真法界門

一真法性中。具足十法界。依正本融通。生佛非殊致。

論曰。一真法界。即眾生本有心性。此之心性。具無量德。受無量名。云何具無量德。舉要言之。謂性體。性量。性具。云何性體。謂此心性。離四句。絕百非。體性堅凝。清淨無染。不生不滅。常住無壞。云何性量。謂此心性。豎窮三世。橫徧十方。世界有邊。虛空無邊。虛空有邊。心性無邊。現在有邊。過未無邊。過未有邊。心性無邊。無盡無盡。無量無量。云何性具。謂此心性。具十法界。謂佛法界。菩薩法界。緣覺法界。聲聞法界。天法界。修羅法界。人法界。畜生法界。餓鬼法界。地獄法界。此是假名。復有正報。謂佛五陰。菩薩五陰。乃至地獄五陰。此是實法。復有依報。謂佛國土。菩薩國土。乃至地獄國土。令易



解故。作三種分別。得意為言。即性具。是性體性量。性體離過絕非。即性具十界離過絕非。性體體性堅凝。清淨無染。不生不滅。常住不壞。性具十界亦然。性量豎窮橫徧。無盡無盡。無量無量。性具十界亦然。正報五陰。同性體性量。清淨周徧。依報國土亦然。此之三法。亦名三諦。性體即中諦。性量即真諦。性具即俗諦。故楞嚴經云。而如來藏。本妙圓心。非心非空。非地水火風。非眼耳鼻舌身意。非色聲香味觸法。非眼界。乃至非意識界。非無明。乃至非老死。非無明盡。乃至非老死盡。非苦集滅道。非智。非得。非檀那。乃至非般刺若。非怛闍阿竭。非阿羅訶。非三耶三菩。非常樂我淨。此即性量無相。是為真諦。而如來藏。元明心妙。即心即空。即地水火風。即六凡。即二乘。乃至即如來常樂我淨。此即性具十界。是為俗諦。而如來藏。妙明心元。離即離非。是即非即。此即性體統攝。是為中諦。又云



如來藏。性色真空。性空真色。清淨本然。周徧法界。地水火風空見識。莫不如是。地水火風空見識。即性具也。清淨本然。即性體也。周徧法界。即性量也。又地水火風空。清淨本然。周徧法界。即依報國土性體性量也。見識清淨本然。周徧法界。即正報五陰性體性量也。云何受無量名。舉要言之。此之心性。或名空如來藏。或名真如佛性。或名菴摩羅識。或名大圓鏡智。或名菩提涅槃。性體性量名空如來藏。即性具十界五陰國土名空如來藏。性體性量名真如佛性。即性具等名真如佛性。性體性量名菴摩羅識。即性具等名菴摩羅識。性體性量名大圓鏡智。即性具等名大圓鏡智。性體性量名菩提涅槃。即性具等名菩提涅槃。故曰。一真法性中。具足十法界。依正本融通。生佛非殊致。問曰。此一真法界。為初心是。為後心是。若初心是。應無七名。若後心是。應無九界。初後俱墮。立義不成。答曰。此正顯初心是。



以初心是故。方有後心是。以後心是故。方顯初心是。云何以初心是方有後心是。如果地依正融通。色心不二。垂形九界。方便度生。悉由證此因心所具。故曰。諸佛果地融通。但證眾生理本。故得稱性施設。無謀而應。若不然者。何異小乘外道。作意神通。故法智大師云。六即之義。不專在佛。一切假實。三乘人天。下至蛄蟻地獄色心。皆須六即辯其初後。所謂理蛄蟻。名字乃至究竟蛄蟻。以論十界皆理性故。無非法界。一不可改。故名字去。不唯顯佛。九亦同彰。至於果成。十皆究竟。云何後心是方顯初心是。正由後心果地。全證眾生理本。故果地七種名目。悉是眾生性德美稱。但眾生在迷。性德不顯。故無此稱。剋論性德。豈可言無。故初後俱善。立義成矣。



一 真法界性 · 不變能隨緣 · 三身及四土 · 悉由心變造。

論曰 · 一真法界性 · 即前文所明性體性量性具也 · 教中說 · 真如不變隨緣 · 隨緣不變者 · 正由性體性量即性具故 · 如君子不器 · 善惡皆能 · 故晉譯華嚴經云 · 能隨染淨緣 · 具造十法界 · 謂真如性中所具九法界 · 能隨染緣 · 造事中九法界 · 真如性中所具佛法界 · 能隨淨緣 · 造事中佛法界 · 所以能者 · 正由性具 · 性若不具 · 何所稱能 · 天台家言 · 並由理具 · 方有事用 · 此之謂也 · 是知事中十法界三身四土 · 悉由真如隨緣變造 · 既曰真如不變隨緣 · 隨緣不變 · 則事中染淨身土 · 當體即真 · 無一絲毫可加損於其間者 · 楞嚴經云 · 見八識見分 · 與見緣八識相分 · 見相二分 · 皆依他起性 · 并所想相此不了依他而起偏計 · 如虛空華 · 本無所有 · 此見及緣 · 元是菩提妙淨明體是也 · 若然 ·

一真法界性 · 不變能隨緣 · 三身及四土 · 悉由心變造。

論曰 · 一真法界性 · 即前文所明性體性量性具也 · 教中說 · 真如不變隨緣 · 隨緣不變者 · 正由性體性量即性具故 · 如君子不器 · 善惡皆能 · 故晉譯華嚴經云 · 能隨染淨緣 · 具造十法界 · 謂真如性中所具九法界 · 能隨染緣 · 造事中九法界 · 真如性中所具佛法界 · 能隨淨緣 · 造事中佛法界 · 所以能者 · 正由性具 · 性若不具 · 何所稱能 · 天台家言 · 並由理具 · 方有事用 · 此之謂也 · 是知事中十法界三身四土 · 悉由真如隨緣變造 · 既曰真如不變隨緣 · 隨緣不變 · 則事中染淨身土 · 當體即真 · 無一絲毫可加損於其間者 · 楞嚴經云 · 見八識見分 · 與見緣八識相分 · 見相二分 · 皆依他起性 · 并所想相此不了依他而起偏計 · 如虛空華 · 本無所有 · 此見及緣 · 元是菩提妙淨明體是也 · 若然 ·



則娑婆極樂。此世眾生。當生九品。彌陀已成吾心當果。悉由心性之所變造。心具而造。豈分能所。即心是佛。即佛是心。即心是土。即土是心。即心是果。即果是心。能造因緣。及所造法。當處皆是心性。故明此宗而求生樂土者。乃生與無生兩冥之至道也。

三心土相即門

西方安樂土。去此十萬億。與我介爾心。初無彼此異。

論曰。佛說阿彌陀經云。從是西方。過十萬億佛土。有世界名曰極樂。百億日月。百億須彌。百億大海。百億鐵圍山。名一佛土。十千為萬。十萬為億。一佛國土。已自廣大。況億佛國土乎。況十萬億乎。是則極樂國土。去此甚遠。博地凡夫。念佛求生。彈指即到者。正由生吾心所具之佛土也。言介爾心者。即凡夫念



佛之心也。剎那之心。至微不至。故稱介爾。謂十萬億遠之佛土。居於凡夫介爾之心。即心是土。即土是心。故曰初無彼此異。問曰。介爾之心。居於方寸。博地疑團何能包許遠佛土。答曰。介爾之心。昧者謂小。達人大觀。真妄無二。蓋此妄心。全性而起。性既無邊。心亦無際。性如大海。心如浮漚。全海為漚。漚還弔海。蓋真如不變隨緣。隨緣不變。既曰隨緣不變。豈可以真妄而局大小哉。

四生佛不二門

阿彌與凡夫。迷悟雖有殊。佛心眾生心。究竟無有二。

論曰。阿彌陀佛者。果人也。成就三身。四智。十力。四無所畏。十八不共等功德。凡夫者。因人也。具足無量恆沙煩惱。造作無量恆沙業繫。當受無量恆沙生死。迷悟之相。譬彼雲泥。言究



竟不二者。謂據相而言。則不二而二。約性而論。則二而不二。蓋諸佛乃悟眾生心內諸佛。眾生乃迷諸佛心內眾生。所以悟者。悟眾生本具性體性量性具也。所以迷者。迷諸佛所證性體性量性具也。心性之妙。豈受其迷。迷而不迷。斯言有在。故眾生本有性體。即諸佛所證法身。性量即報身。性具即應身。四智十力四無所畏十八不共等功德。會合可知。故古德云。諸佛心內眾生。塵塵極樂。眾生心內諸佛。念念證真。故彌陀即我心。我心即彌陀。未舉念時。早已成就。纔舉心念。即便圓成。感應道交。為有此理。故念佛人。功不唐捐。

五法界為念門

法界圓融體。作我一念心。故我念佛心。全體是法界。

論曰。行者稱佛名時。作佛觀時。作主伴依正餘觀時。修三種淨



業時。一心不亂時。散心稱名時。以至見思浩浩。恆沙煩惱。凡此有心。皆由真如不變隨緣而作。全體即是法界。故法智大師云。法界圓融不思議體。作我一念之心。亦復舉體作生作佛。作依作正。若然者。餘心尚是。況念佛心乎。是故行者念佛之時。此心便是圓融清淨寶覺。以此妙心。念彼阿彌。則彼三身。何身不念。求彼四土。何土不生。但隨功行淺深。品位高下耳。

六境觀相吞門

十六等諸境。事理兩種觀。彼此互相吞。如因陀羅網。

論曰。境觀相吞者。正由事事無礙也。事事所以無礙者。所謂有本者如是也。蓋由法界圓融不思議體。作我一念之心。亦復舉體作生作佛。作依作正。既皆全體而作。有何一法不即法界。故曰。一塵法界不小。剎海法界不大。多亦法界。少亦法界。是以西



方十六諸境。吾心事理二觀。一一無非法界全體。如帝釋宮中因陀羅網。雖彼此各是一珠。而影入眾珠。雖影入眾珠。而東西照用有別。境觀亦然。以境為事。則觀為理。理能包事。是為以觀吞境。以觀為事。則境為理。理能包事。是為以境吞觀。若觀若境。或一為事。餘為理。或一為理。餘為事。彼此互各相吞。故如因陀羅網。若然者。當我作觀時。則西方依正。已在我觀之內。我今身心。已在依正之中。了此而求生安養。可謂鴈過長空。影沉寒水。鴈絕遺蹤之意。水無留影之心。

七三觀法爾門

能觀為三觀。所觀即三諦。全性以起修。故稱為法爾。

論曰。三諦者。真俗中也。三觀者。空假中也。忘情絕解。莫尚乎真。隨緣應用。莫尚乎俗。融通空有。莫尚乎中。虛靈不昧。



此吾心自空者也。物來斯應。此吾心自有者也。空有相即。此吾心自中者也。此性也。非修也。三諦也。非三觀也。修之者。稱性照了也。故體達此心。空洞無物謂之空。照了此性。具足萬法謂之假。融通二邊。不一不異謂之中。然則即虛靈而應物也。即應物而虛靈也。空即假中也。假即空中也。中即空假也。是稱性而修也。絕待而照也。不思議之三觀也。首楞大定之司南也。此別論也如此。若總論者。或以吾心虛靈者為空。以所觀萬物者為假。以心境不二者為中。物吾心之物也。何假而不空。心萬物之心也。何空而不假。即心即物。即物即心。假空即中可知何中而不空假。是以觀極樂依正者。以吾一心之三觀。照彼一境之三諦。無不可者。以吾三觀之一心。照彼三諦之一境。亦無不可者。虎溪大師云。境為妙假觀為空。境觀雙忘即是中。忘照何嘗有先後。一心融絕了無蹤。尚何三觀之不法爾乎。



❖
八感應任運門

我心感諸佛。彌陀即懸應。天性自相關。如磁石吸鐵。

論曰。諸佛眾生。同一覺源。迷悟雖殊。理常平等。故曰。諸佛是眾生心內諸佛。眾生是諸佛心內眾生。迹此而言。則諸佛眾生。心精無時而不通膈。但諸佛無時不欲度生。而眾生念念與之迷背。故勢至菩薩云。一人專憶。一人專忘。若逢不逢。或見不見。子若憶母。如母憶時。母子歷生不相違遠。若眾生心憶佛念佛。現前當來。必定見佛。去佛不遠。正由一理平等。天性相關。故得任運拔苦與樂。況無量壽佛因中。所發四十八願。誓取極樂。攝受有情。今道果久成。僧那久滿。故凡百眾生。弗憂佛不來應。但當深信憶念。數數發願。願生西方。如磁石與鐵。任運吸取。然磁能吸鐵。而不能吸銅。鐵能合磁。而不能合玉。譬猶佛



能度有緣·而不能度無緣。眾生易感彌陀·而不易感諸佛。豈非生佛誓願相關者乎·是以求生淨土者·信行願三·缺一不可。

❖
九彼此恆一門

若人臨終時·能不失正念·或見光見華·已受寶池生。

論曰·往生傳云·張抗仕石晉·為翰林學士·課大悲呪十萬徧·願生西方·一日寢疾·唯念佛號·忽謂家人曰·西方淨土·祇在堂屋西邊·阿彌陀佛·坐蓮華上·見翁兒在蓮華池金沙地上·禮拜嬉戲·良久念佛而化·翁兒·抗之孫也·所以爾者·蓋西方極樂世界·乃吾心中之一土耳·娑婆世界·亦吾心中之一土耳·約土而言·有十萬億彼此之異·約心而觀·原無遠近·但眾生自受生以來·為五陰區局真性·不契心源·念佛之人·果報成熟·將捨現陰·趣生陰時·淨土蓮華·忽然在前·唯心境界·非有去來



彼此之相。故首楞嚴經云。臨命終時。未捨暖觸。一生善惡。俱時頓現。純想即飛。必生天上。若飛心中。兼福兼慧。及與淨願。自然心開。見十方佛。一切淨土。隨願往生。法智大師云。須知垂終自見坐金蓮身。已是彼國生陰。亦此意也。

十現未互在門

行者今念佛。功德不唐捐。因中已有果。如蓮華開敷。

論曰。圓頓教人。頓悟心性。無修而修。修彼樂邦。性中所具極樂。由修顯發。而此心性。豎貫三際。橫裹十虛。佛法生法。正法依法。因法果法。一念圓成。是以念佛之人。名為全性起修。全修在性。全性起修。雖名為因。全修在性。因中有果。以所具因法。與所具果法。同居一性。心性融通。無法不攝。故如蓮華開敷。華中有果。況此心常住。無生滅去來。即今念佛之心。便



是當來華池受生之時。故說初發心人。極樂寶池。已萌蓮種。若精進不退。日益生長。華漸開敷。隨其功德。大小輝煌。其或懈怠悔雜。日漸憔悴。若能自新。華復鮮麗。其或不然。芽焦種敗。且此蓮華。人誰種植。現未互在。斯言有歸也。

淨土生無生論

◎

舊跋

幽溪大師。中興天台教觀。以性具圓理。闡淨土法門。著為生無生論。初開演於新昌石城寺。每一登座。天樂盈空。大眾同聞。事非虛誑。誠可謂離五濁之大津梁。登九蓮之勝方便。正知於丁巳年春。歸依大師。即蒙相授。旋梓流通。後因板寄慧慶。遂復久置高閣。今與十疑寶王重梓。合成淨土三論。伏願



見聞隨喜·盡斷狐疑·速成三昧寶王·頓悟無生法忍·親觀彌陀·等蒙授記·丙戌冬日古吳比丘正知識於祖堂。

❖ 跋

此論以現前一念心·無法不具為本_{初門}·具則必造_{二門}·故佛土佛身·皆即我心_{三門}·今即以此本不可思議之一念念佛_{五門}·而西方依正·圓妙三觀·生佛感應·曠劫誓願因緣·總不出我現前念佛之一念_{六門·七門·八門}·如是·則十方彼此·三世因果·凡小偏邪種種諸疑·可以悉斷矣_{九門·十門}·後學成時識。



續淨土生無生論附

清閩鼓山沙門道霽造

明萬曆間·天台幽溪無盡燈法師·本一家教觀·作淨土生無生論·理無不圓·事無不徹·乃淨土之正宗·往生之捷徑。故當時論成·師登座·為四眾講演·感天樂鳴空·眾共聞見·每日皆然·講畢乃止。其靈應不爽如此。淨業行人·依之修持·復何惑哉。然余今日復有是作·貂續於其後者·蓋以十門中·有旨別而門同者·有門別而旨別者·皆足以互相發明·究竟淨土指歸。聊備自修·兼示同見同行者·同生淨土云爾。唯願我本師和尚阿彌陀如來·觀世音·大勢至·諸大聖眾·以及十方常住三寶·慈悲鑑念·倘有一言冥契佛心·願共法界眾生·同體眷屬·無生而生·齊登上品·共成佛道。時大清康熙丁卯歲·九月九日閣筆敘。

今造此論·分為十門·一一真法界門·二性心具造門·三心佛互



徧門。四心佛同體門。五唯心即至門。六性德莊嚴門。七佛佛同體門。八心佛感應門。九三無差別門。十因果互具門。

❖
一一真法界門

一真法界性。無佛無眾生。常清淨無相。不可得思議。

論曰。夫一真法界。空有未形。生佛絕朕。清淨無相。湛然常住。四句既亡。百非斯遣。不可得而名。強名曰一真法界。華嚴經第六地偈云。法性本寂無諸相。猶如虛空不分別。超諸取著絕言道。真實平等常清淨。此偈初句。標法性體本寂滅。無聖凡之相。次句。喻以虛空有三意。一喻不分別。二喻寂滅無相。三喻周徧。第三句。超諸取著。謂心行處滅。絕言道。謂語言道斷。不可思議也。末句。結歸實際。謂真實而無虛偽。平等而無差別。常住而不遷變。清淨而無感染也。問曰。若如是者。諸眾生等。



云何隨順而能得入。答曰。箇中本無眾生。誰背誰順。誰出誰入。有佛無佛。性相常然。平等平等。不可思議。此是諸佛本源。一切眾生性體。身心寂滅。平等真際。苟以情求之。不亦遠乎。雖然。試強言之。若欲入者。且從文殊一門而入。大般若經曼殊室利分。佛告文殊云。汝於佛法。豈不趣求。文殊答云。我不見有法非佛法者。何以趣求。世尊云。汝於佛法已成就耶。文殊答云。我都不見法可名佛法。何以成就。世尊云。汝豈不得無著性耶。文殊答云。我即無著。豈無著性復得無著。行者若能於文殊所答三語云。我不見有法非佛法者。又云。我都不見法可名佛法。又云。我即無著。豈無著性復得無著。如是信解悟明。則生佛俱盡。我法皆空。是謂從文殊門入。以文殊主信故。又主智故。故云。佛法大海。信為能入。智為能度。



❖ 一性心具造門

真如寂滅性·具恆沙功德·四聖及六凡·皆由心變造。

論曰·昔馬鳴菩薩·宗百部大乘經·造起信論·一心具二門·一者心真如門。二者心生滅門。既云心真如心生滅·豈有二致·不過波水之異耳·是以論中二門·皆各總攝一切法·以二門不相離故·今此中前門攝真如門·唯明真如體。此第二門乃生滅門·具明體相用。故論云·是心真如相·即示摩訶衍體·是心生滅因緣相·能示摩訶衍體相用故·此偈初句云寂滅性者·真如體也·次句具恆沙德者·真如相也·後二句四聖六凡由心變造者·真如隨緣之用也·隨緣者·論云·依如來藏·有生滅心·所謂不生不滅·與生滅和合·非一非異·名阿黎耶識。此識有二種義·一者覺義·二者不覺義·夫如來藏者·真如隨緣之別名也。生滅心者·



真如隨無明緣。動作生滅也。不生不滅。即如來藏。與無明生滅心和合。故非一異。得黎耶名。二義中。覺義。四聖之本也。不覺義。六凡之本也。凡聖雖殊。皆由真如性體本具。隨染淨緣。熏變而起。所謂不思議熏不可熏而熏也。。不思議變不可變而變也。。此之謂也。我今現前念佛。願生淨土。蒙佛授記。分身塵刹。攝化眾生。是菩薩法界。願究竟圓滿無上菩提。以念佛成佛。是親種故。是佛法界。二者皆自心真如。隨緣熏變而起。不由他得也。又達摩經頌云。無始時來界。一切法等依。由此有諸趣六凡也。。及涅槃證得四聖也。。界。作因義。因。指黎耶含藏染淨種子。故名種子識。如此猶涉權說。若作性義。性指一真法界性。即真如體也。四聖六凡。皆是性起。即入圓門。圓門者。天台性具圓頓法門云。現前念佛介爾之心。具足百界千如。三世間三千諸法。即空假中。更有各具互具之義。以趣舉一法。即法界之大都。互具各具。互融互攝。



參而不雜·離而不分。一多自在·不相留礙。故輔行云·學者縱知內心具三千_{各具義也}·不知我心徧彼三千·彼彼三千·互徧亦爾_{互具義也}。
·彼彼者·一彼彼佛·一彼彼生·心佛眾生·皆有各具互具之義·如帝網珠·交徹融攝·重重無盡也·然此一念·所以能爾者·以全性起修·全修即性故。四明尊者云·法界圓融不思議體·作我一念之心·亦復舉體作生_{九界也}·作佛_{佛界也}·作依_{器世間也}·作正_{五蘊世間也}·且趣舉一法·尚復具足。況念佛之心乎。如是念佛·是念究竟佛·必臻上品也。

三心佛互徧門

彌陀法界身·徧我心想中·我心想佛時·佛即全體現。

論曰·此偈即觀無量壽佛經云·諸佛如來是法界身·入一切眾生心想中。是故汝等心想佛時·是心即是三十二相·八十隨形好。是心作佛·是心是佛。諸佛正徧知海·從心想生。是故應當一心



繫念。諦觀彼佛。多陀阿伽度。如來。阿羅訶。應供。三藐三佛陀。正徧知。

諸佛如來下。統觀諸佛。是故應當下。別觀本師無量壽尊。諸佛是法界身者。界。性義。謂法性身也。無處不徧。謂徧一切眾生。一切國土。及於三世。無有遺餘。故華嚴經云。法性徧在一切處。一切眾生及國土。三世悉在無有餘。亦無形相而可得。今但云徧入眾生心想者。令其觀心。觀易成故。又諸佛法身入眾生心想中。是諸佛心內眾生。心心寂滅也。是故汝等心想佛時。是心即是三十二相。八十隨形好。是心作佛。是心是佛者。是眾生心內諸佛。萬德莊嚴也。心佛互徧。如一室千燈。雖燈燈不同。而光光互相徧攝。重重無盡也。又是心作佛者。從性起修也。是心是佛者。全修即性也。諸佛正徧知海。從心想生者。謂行人想佛之心。親從法界緣起。緣生無性。當體寂滅。即是如來正徧知海。無二無別。是故我現前一念。觀想阿彌陀佛之心。即是彌陀相。



好光明。全體顯現。無二法也。

❀
四心佛同體門

我心與佛心。究竟無有二。舉念佛現前。非一亦非異。

論曰。前門心佛所以互徧者。以諸佛眾生同一自性清淨心也。何以知然。華嚴經云。如來成正覺時。於其身中。普見一切眾生成正覺。乃至普見一切眾生入涅槃。皆同一性。所謂無性。是果門。攝法無遺。以佛所證。即眾生本覺真心也。又云。菩薩摩訶薩。應知自心。念念常有佛如來成等正覺。何以故。諸佛如來不離此心成正覺。故知自心。一切眾生心。亦復如是。是因門。攝法無遺。以眾生之心。即佛所證覺體也。若然者。心佛佛心。究竟無二。行人凡舉一念。念阿彌陀佛時。而阿彌陀佛。即時現前。以心佛歷然。故曰非一。心佛一體。故曰非異。大法眼云。華嚴



六相義。同中還有異。異若異於同。全非諸佛意。是也。

❧
五唯心即至門

此去西方路。遠隔十萬億。彈指頃即到。以本唯心故。

論曰。西方路隔十萬億者。阿彌陀經云。從是西方。過十萬億佛土。有世界名曰極樂。其土有佛。號阿彌陀。今現在說法。彈指即到者。觀無量壽佛經。上品上生章云。此人精進勇猛故。阿彌陀如來。與觀世音。大勢至。無數化佛。百千比丘聲聞大眾。無量諸天。七寶宮殿。觀世音菩薩。執金剛臺。與大勢至菩薩。至行者前。阿彌陀佛放大光明。照行者身。與諸菩薩授手迎接。觀世音大勢至與無數菩薩。讚歎行者。勸進其心。行者見已。歡喜踊躍。自見其身。乘金剛臺。隨從佛後。如彈指頃。往生彼國。夫極樂淨土。此去限十萬億佛土之遙。而到在彈指頃者。以唯心



故也。以是觀之。十萬億佛土不遠。而彈指頃不近。以心法無形。貫滿十方。無遠近故。娑婆眾生。耳根最利。非五根所能及。試於耳根中觀之。如危樓百尺。洪鐘在簾。遙杵一擊。聲聞百里。聲既不來。耳亦不往。聲聞同時。歷歷現前。詎非唯心之明驗乎。非唯土是唯心。而土中之佛。亦唯心現。故無量壽經云。佛告阿難。汝起整衣服。合掌恭敬。禮無量壽佛。阿難稟教。正面西向。五體投地。即見無量壽佛。放大光明。普照一切諸佛世界。威德巍巍。如須彌山。高出一切諸世界上。此會四眾。一時悉見。彼見此土。亦復如是。夫禮拜之頃。舉念即見阿彌陀佛。放光普照者。是亦唯心之明徵也。又解脫長者。示善財唯心念佛法門云。我欲見安樂世界阿彌陀佛。隨意即見。乃至云。然彼如來不來至此。我身亦不往詣於彼。知一切佛。及與我心。悉皆如夢如影。如幻如響。我如是知。如是憶念。所見諸佛。皆由自心。



夫由自心者。一法界心也。既云知一切佛。及與我心。悉如夢等。則若佛若心。皆從一法界真心現起。當體寂滅。故無來往也。清涼國師云。既了境唯心。了心即佛。故隨所念。無非佛矣。況無境非心。無心非佛。加以志一不撓。精詣造微。佛應克誠。於何不見。問。即佛之心。為如夢心。為法界心。答。達得心佛是夢。則當處寂滅。即法界心。非有二也。

六性德莊嚴門

西方安樂國。依正極莊嚴。須信非他物。皆是性功德。

論曰。西方依正莊嚴。皆性功德者。起信論云。復次真如自體相者。一切凡夫聲聞緣覺菩薩諸佛。無有增減。非前際生。非後際滅。註曰。此明真如體也。諸佛眾生。同一真性。無生滅增減。畢竟常住。無有變易。從本已來。自性滿足一切功德。所謂自體有大智慧光明義故。徧照法界義故。真實識知義故。自性



清淨心義故。常樂我淨義故。清涼不變自在義故。具足如是過於恆沙。不離。不斷。不異。不思議佛法。乃至滿足無有所少義故。

· 名為如來藏。亦名法身。

註曰：此明真相也。大智慧光明者。性自神解也。徧照法界者。周徧法界。事理俱照也。真實識知者。無倒正知也。自性

清淨者。離諸惑染也。常樂我淨者。四德圓備也。清涼不變自在義者。性離惑業。四相莫遷。無諸障礙也。不離者。恆沙性德。不離真體也。不斷者。無始相續也。不異者。體相一味也。不思議佛法者。唯佛證窮也。乃至滿足無有所少義者。真如體中。性體具足。如來既證性已。問曰。上說真如。其體平等。離一切相。云何復說體有如是種種功德。答曰。雖有此諸功德義。而無差別之相。等同一味。唯一真如云云。由此觀之。西方極樂世界。依正二報。功德莊嚴。如彌陀經中。珠網麗天。瓊林轟地。池流八德。蓮吐四光。天樂韻於六時。祇華散於億刹。化禽演道品。風樹傳法音。如是等無量功德。皆是極樂國土依報莊嚴也。又如相好八萬。舉光明以徧收。功德喻沙。言壽命以統括。成佛十劫。簡過未以釋疑。聲聞皆發大心。菩薩多居補處。生者咸歸於定聚。趣途即預於阿鞞。如是等無量功德。皆是壽尊

等。離一切相。云何復說體有如是種種功德。答曰。雖有此諸功德義。而無差別之相。等同一味。唯一真如云云。由此觀之。西方極樂世界。依正二報。功德莊嚴。如彌陀經中。珠網麗天。瓊林轟地。池流八德。蓮吐四光。天樂韻於六時。祇華散於億刹。化禽演道品。風樹傳法音。如是等無量功德。皆是極樂國土依報莊嚴也。又如相好八萬。舉光明以徧收。功德喻沙。言壽命以統括。成佛十劫。簡過未以釋疑。聲聞皆發大心。菩薩多居補處。生者咸歸於定聚。趣途即預於阿鞞。如是等無量功德。皆是壽尊



一佛二菩薩。及海會眷屬等正報莊嚴也。如上依正二報無量功德。原非他物。乃是真如體上本有之性功德。故雲棲蓮池大師疏阿彌陀經。一一以稱理釋之。其有旨哉。問。此功德性。為化主性。為海眾性。答曰。化主海眾。本同一性。而不妨有各具互具之義。如上一室千燈之喻。可見也。

七佛同體門

彌陀與諸佛。同一法界身。一稱無量壽。諸佛齊現前。

論曰。問。十方諸佛。各有願力。攝受眾生。何以不念十方諸佛。而偏念西方阿彌陀佛。求生極樂耶。答。以諸佛如來同一法身。念阿彌陀佛。即是念十方諸佛。故一稱彌陀萬德洪名。而十方諸佛一時齊現。何以故。同一法界身故。故華嚴經云。一切如來一法身。真如平等無分別。又云。一切諸如來。同共一法身。一




心一智慧。力無畏亦然。以此觀之。若稱阿彌陀佛。而諸佛不現前。則阿彌陀佛非法界身。以有身外諸佛故。阿彌陀佛既是法界身。則諸佛何以不現前。以是知行人至心稱念阿彌陀佛。而諸佛齊現。復何疑乎。

❖ 八心佛感應門

我心感我佛。我佛即應我。應感非前後。心佛同一體。

論曰。我現前感佛之心。是法身真我。而所感之佛。即我法身。即感即應。無前後也。何以故。以心佛同體。感應一時。感是我心之感。應是我心之應也。是以阿彌陀佛居法身地。與法界眾生心心相照。惘然契合。無二無別。行人能以信行願感之。當處現前。不爽毫髮也。唐解脫和尚。五臺縣人。姓邢氏。七歲出家。初從慧超禪師。超器之。後於五臺專誦華嚴。依經作觀。求見文



殊·文殊現身誨云·汝不須禮覲於我·應自悔責·必當大悟。因反求·乃大悟。感諸佛現身·說偈曰·諸佛寂滅甚深法·曠劫修行今乃得。若能開曉此法眼·一切諸佛皆隨喜。解脫問·寂滅之法·若為可說·得教人耶·諸佛即隱·復有聲告曰·方便智為燈·照見心境界·欲究真實法·一切無所見。以此觀之·諸佛與文殊解脫·同一法性·解脫以真誠心·求見文殊·而文殊現。感諸佛·而諸佛應·念佛行人求見阿彌陀佛·亦復如是。心外無佛·佛外無心·感應道交·炳然齊現也。



九三無差別門

心佛及眾生·是三無差別·我念佛發願·上求而下濟。

論曰·心佛眾生·三無差別·古謂佛法太高·眾生法太廣·觀心為易故但觀心法。佛是心佛·故念佛發願·上求於佛果。眾生是



心眾生。故下濟度於眾生。所以須上求下濟者。豈不見楞嚴會上。阿難因世尊開示五陰。六入。十二處。十八界。地水火風空見識七大等。一一打破。了不可得。本如來藏。妙真如性。清淨本然。周徧法界。廓然大悟。乃發願云。願今得果成寶王。還度如是恆沙眾。將此深心奉塵刹。是則名為報佛恩。願今得果者。上求於佛果也。還度沙眾者。下度於眾生也。深心者。佛本是心。則無佛可求。無可求中。吾固求之。眾生是心。則無生可度。無可度中。吾固度之。故維摩詰經云。雖知諸佛國。及與眾生空。而常修淨土。教化於群生。無求而求。無度而度。是謂深心。以此深心。奉塵刹諸佛。勤求大果。化塵刹眾生同生淨土。以眾生亦是未來之諸佛故。如此故能仰報於佛恩也。凡淨業行人。念佛發願。上求下化。應如是知。



十因果互具門

臨終在定心。已生安養國。上品寶華中。因果各互具。

論曰。天台智者大師云。臨終在定之心。即是淨土受生之心。是因中有果也。華開見佛。悟無生忍。繁興萬行。塵刹利生。是果中有因也。世間草木之華。或先華後果。或先果後華。唯蓮華。華果同時。華中有蓮。是因中有果也。蓮中有蕾。是果中有因也。因果互具。三際一時。故華嚴經。一切處文殊師利說偈云。一念普觀無量劫。無去無來亦無住。如是了知三世事。超諸方便成十力。故淨業行人。當拳拳致意于末後臨終一念。薦直而去。永無後念。如此成就。始是生淨土之明驗也。智度論云。臨終少時。能勝終身修行之力。以猛利故。如火如毒。唯恐其障緣現前。此一念不成就耳。故行願品。普賢菩薩教行人預發願云。願我臨



欲命終時。盡除一切諸障礙。面見彼佛阿彌陀。即得往生安樂刹。又淨名經。文殊菩薩問維摩詰云。生死有畏。菩薩當何所依。維摩詰言。菩薩於生死畏中。當依如來功德之力。夫菩薩於生死畏中。尚須依如來功德。況博地凡夫。而欲自恃天真。作增上慢人。非自賺乎。然如來功德無量。略具於觀無量壽佛經。淨業行人。但能隨念其名字。及相好光明壽量等。少分功德。倘不能久持。但一念頃專心瞻仰。而五畏一時可息。不特生死畏也。故華嚴云。若念如來少功德。乃至一念心專仰。諸惡道怖悉永除。智眼於此能深悟。如子依母。則得大安樂也。問曰。若然。則趙州何以云。佛之一字。吾不喜聞。又云。念佛一聲。漱口三日。此何說也。答曰。若如實知得趙州落處。許汝親見彌陀法身。是真念佛。若也不知。鸚鵡學語。自誤誤人。其害匪細。故四明云。不肖之徒。輕欺生死。於淨土要術。生謗障人。痛哉痛哉。凡真



心修淨業者。應如是永息諸疑。一心念佛。期生上品。始是佛之真子。不可忽也。

續淨土生無生論

跋

丁卯仲秋朔。余靜中念佛。忽得此十偈。竊欲續於幽溪生無生論後。而不果。越旬日。而溫陵龔明府。岸齋居士至。即出以相示。一覽知妙。洞徹源委。了無疑議。居士請竟其業。余深嘉其般若因地。來自多生。非偶爾也。不違其請。乃宗諸大經大論。作此論釋。既成。相與合二論而觀之。互相發明。淨土深旨。似無遺憾。因思非居士無以發余之緒言。非余無以竟居士之淨業。法會因緣。千載一遇。豈偶然哉。因併識之。以志



一時緣起云。

西真比丘道霈書於聖箭堂

淨土十要一書·真修淨指南·法門至寶。惜原板已失·廣播無由。化杰募依原本·續有是刻。俾使修淨諸公·自始至終·虔心體玩·如入五都之市·已無寶不陳矣。剞劂將終·又得為霖大師續生無生論一卷·更加眾寶之中·又獲驪珠一粒·欣喜不勝·謹成霖師本願·附刻生無生論後·更使修淨諸公·無寶不收焉。

可庵比丘化杰書於教忠堂



淨土法語

明天台山幽溪沙門傳燈述

夫修行法門。乃如來對病之良藥也。藥隨病廣。數逾恆沙。求其至捷徑。最簡要者。莫勝於念佛求生淨土法門。可謂速出生死之玄關。疾成覺道之祕訣也。蓋凡修行。求出離生死。須仗三種力。一自力。二他力。三本有功德之力。若惟務自修。悟明心地。裂無明網。出愛欲河。成佛作祖。謂之自力。是為沒量好漢。真大丈夫。如佛在世。及正法中諸大菩薩聲聞緣覺。及諸大祖師。是其人也。若像末_字之世_精。去古既遠。根器孱劣。有雖修而不悟。悟而不精。內照似脫。對境仍迷。縱使不迷。猶然坯器。菩薩有隔陰之昏。初果有入胎之昧。方之博地。安免隨流。此自力之無_{幸平心不欺}功。出塵之不效。一錯百錯。實可寒心。是以諸佛菩薩。曲垂方便。又有仗他之法門興焉。此之法門。經論發明。其品亦夥。求




其苦口叮嚀。極言稱歎。列祖弘通。人心崇奉。惟極樂世界念佛一門為究竟。可謂言言闡唯心淨土之心宗。句句演本性彌陀之妙法。悟此者。達生心與佛心平等。心上與佛土無差。修此者。獲妙觀與妙境相符。自力與他力兼濟。況本有功德之力。無始性具者。因此以全彰。曠劫積累者。藉之而頓發。故得娑婆報滿。淨土現前。蓮華化生。最要在此四字不迷生陰。一入永入。更不退轉。故曰眾生者。皆是阿鞞跋致。其數甚多。比夫在娑婆而入道。歷塵境之麤強。險難惡道。無處不有。固不侔矣。然而說之匪難。行之為難。行之匪難。心要為難。此昔人之所誠。在我輩之當遵。若求其為吾真切教誡。莫要乎楊次公之兩言。謂愛不重。不生娑婆。念不一。不生極樂。夫念佛以一其心。懇切持名。專志不亂。此吾所當盡心者。然或忘之而不能念。念之而不能一。無他。為情愛之所牽也。夫輕愛以杜其妄。斬斷情根。脫離愛網。此吾所當



盡心者。然或念之而不能忘。二句皆指愛言忘之而不能盡。此無他。為念心之不能一也。故念佛求生淨土之人。尋常有娑婆一愛之不輕。則臨終為此愛之所牽。而不得生。矧多愛乎。即極樂有一念之不一。則臨終為此念之所轉。而不得生。矧多念乎。蓋愛之所以為愛者。有輕焉。重焉。厚焉。薄焉。正報焉。依報焉。歷舉其目。則父母妻子。昆弟朋友。功名富貴。文章詩賦。道術技藝。衣服飲食。屋室田園。林泉花卉。珍寶玩物。種種妙好。不可枚盡。大而重於泰山。小而輕於鴻毛。有一物之不忘。愛也。有一念之不得生。嗚呼。愛不重不生娑婆。念不一不生極樂。此兩語。可謂刮翳眼之金錘。治膏肓之聖藥。凡有志於求生極樂者。宜以此書之於屋壁。銘之於肌膚。時時莊誦。念念提撕。於娑婆之愛。日務求其輕。極樂之念。日務求其一。輕之又輕之。以漸階乎無



。一之又一之。以漸鄰乎極。果能如此。則此人雖未脫娑婆。不是娑婆之久客。雖未生極樂。已是極樂之嘉賓。臨終正念現前。往生極樂必矣。或問。輕愛有道乎。曰。輕愛莫要乎一念。又問。一念有道乎。曰。一念莫要乎輕愛。或者莞爾謂曰。師言首鼠兩端。似無主正。俾學者乎何從。曰。非兩端也。欲明一念之所以也。蓋念之所不能一。由散心異緣之使然。散心異緣。又由逐境紛馳之使然。故娑婆有一境。則眾生有一心。眾生有一心。則娑婆有一境。故曰。心生故。種種法生。法生故。種種心生。聚緣內搖。趣外奔逸。心境交馳。塵沙莫盡。愛苟不忘。念能一乎。故欲一其念者。莫若輕其愛。欲輕其愛者。莫若一其心。一其心者。莫若杜其境。眾境皆空。則萬緣都寂。萬緣都寂。則一念自成。一念若成。則愛緣俱盡。故曰。欲一其念。莫若輕愛。欲輕其愛。莫若一念。蓋愛之與念。勢不兩立。若日月之代行。明



暗之相背也。或曰。杜境有道乎。曰。余所謂杜境者。非屏除萬有也。亦非閉目不觀也。將即境以了其虛。會本以空其末也。正以萬法本自不有。有之者情。故情在物在。情空物空。物空而本性現。本性現而萬法空。萬法空而情念息。自然而然。非加勉強。楞嚴所謂見與見緣。并所想相。如虛空花。本無所有。此見及緣。元是菩提妙淨明體。云何於中有是非是。是以欲杜其境。莫若體物虛。體物虛。則情自絕。情自絕。則愛不生。而惟心現。念一成。故圓覺云。知幻即離。不作方便。離幻即覺。亦無漸次。一去一留。不容轉側。功效之速。有若桴鼓。學道之士。於此宜盡心焉。又問曰。輕愛與一念。同乎異乎。對曰。能輕娑婆之愛。未必能一極樂之念。能一淨土之念。必能輕於娑婆之愛。此約無志有志間說也。若去無志而獨言有志。則愛非念一而不忘。念非忘愛而不一。兩者功夫。初無間然。又問曰。輕愛既聞命矣



· 一念為之奈何。對曰。一念之道有三。曰信。曰行。曰願。夫不疑謂之信。苟有疑焉。第一關則心不得其一矣。是以求生極樂者。要以敦信為之始。必須徧讀大乘。此為利根人說廣學祖教。凡是發明淨土之書。皆須一一參求。悟極樂原是我唯心之淨土。不是他土。了彌陀原是我本性之彌陀。非是他佛。大要有二。一悟妙有徧周徧具。以為欣淨之本。一悟真空圓離圓脫。以為捨穢之原。第二修行者。前敦信如目視。今修行如足行。信而不行。猶有目而無足。行而不信。猶有足而無目。是故信解既備。應當念佛修行。猶如目足兼備。然後能到涼池。故次信而說行也。行門有二。一正。二助。· 正行復二。一稱名。二觀想。稱名如小本彌陀經。七日持名。一心不亂。應先明事持理持後明事一心。若口稱佛名。繫心一心在緣。聲聲相續。心心不亂。設心緣外境。攝之令還。此須生決定心。欣極斷後際厭極念。撥棄世事。二句放下緣心。使此念心漸漸增長。從漸至久。自少




至多。若一日二日。乃至七日。畢竟要成一心不亂而後已。此事一心也。苟得此已。則極樂之淨因成就。而垂終之正念必然。身無病苦。不受惡纏。預知時至。身心歡喜。吉祥而逝。坐脫立亡。親見彌陀。垂光接引。若理一心者。此無他法。但於事一心中。念念了達能念之心。所念之佛。三際平等。十方互融。非空非有。非自非他。無去無來。不生不滅。現前一念之心。便是未來淨土之際。念而無念。了達其本來如此無念而念。無生而生。生而無生。於無可念中。熾然而念。於無生中。熾然求生。是為事一心中明理一心也。二觀想者。具如觀無量壽佛經。境有十六。觀佛最要。當觀阿彌陀佛丈六之身。作紫磨黃金色像。立七寶華池之上。作垂手接引狀。身有三十二種大人相。相有八十種隨形好。作此想者。應以觀劣應白毫為主白毫觀成方能進觀餘觀此經中決定之旨亦有事理。事則以心繫佛。以佛繫心。初觀足下安平猶如奩底。次觀具千輻輪相。如是次第。逆緣至於頂中肉髻。復從肉髻。順



緣至於足底。了了分明。無分散意。理一心者。經云。諸佛如來是法界身。入一切眾生心想中。是故汝等心想佛時。是心即是三十二相。八十種好。是心作佛。是心是佛。諸佛如來正徧知海。從心想生。是故汝等應當繫念彼佛多陀阿伽度。阿羅訶。三藐三佛陀。此義具明微妙三觀。具如觀經疏。妙宗鈔中說。然此二種正行。要當相須而進。凡於行住睡臥時。則一心稱名。凡於跌坐蒲團時。則心心作觀。行倦則跌坐以觀佛。坐出則經行以稱名。苟於四威儀中。修之不間。往生西方必矣。二助行亦有二。一者世間之行。如孝順父母。行世仁慈。慈心不殺。具諸戒律。凡是一切有利益之事。若能回向西方。無非助道之行。二者出世之行。如六度萬行。種種功德。讀誦大乘。修諸懺法。亦須以回向心而修之。無非淨土助行。更有一種微妙助行。當於歷緣對境。處

實即欣厭正行也
處用心。如見眷屬。當作西方法眷之想。以淨土法門而開導之。



令其輕愛以一其念。永作將來無生眷屬。若生思愛想時。當念淨因病土眷屬無有情愛。何當得生淨土。遠離此苦。若生瞋恚時。當念淨土眷屬無有觸惱。何當往生淨土。得離此苦。若受苦時。當念淨土無有眾苦。但受諸樂。若受樂時。當念淨土之樂。其樂無央智力。凡是所歷緣境。皆以此意而推廣之。則於一切時處。無非淨土之助行也。第三願者。夫淨土般若舟航。要以信為點頭探水。行為篙檣風帆。願為船柁撥正。無點頭探水。則不知通塞淺深。無篙檣風帆。則不能至其所止。無船柁撥正。則無約束要制。故次行以明願也。第所發之願。有通。有別。有廣。有狹。有徧。有局。通如長途修懺課誦。古德所立回向發願之文。別則各隨自己之意所立。廣如四弘。上求下化。狹如自修自度。決志往生。局如課誦有時。隨眾同發。徧則時時發願。處處標心。要須體合四弘。不得師心自立。大率所發之願。宜別不宜通。通恐隨人語轉



· 而自無繩準。別則自己標心。剋志進取。若能隨通文而生決志。此則雖通而別。若於別文而久生濫漫。此則別亦成通。又宜廣而不宜狹。廣則所發之心大。而所剋之果勝。狹則所發之心小。而所獲之果劣。宜徧而不宜局。局則標心有限。數數間斷於期心。徧則念念要心。刻刻圓成於樂土。如此三法。可謂生淨土之弘網。觀彌陀之寶筏。一切淨土法門。舉不外乎是矣。

淨土法語

附錄 二篇

清省庵法師勸發菩提心文

不肖愚下凡夫僧實賢。泣血稽顙。哀告現前大眾。及當世淨信男女等。唯願慈悲。少加聽察。嘗聞入道要門。發心為首。修行急務。立願居先。願立則眾生可度。心發則佛道堪成。苟不發廣大心。立堅固願。則縱經塵劫。依然還在輪回。雖有修行。總是徒勞辛苦。故華嚴經云。忘失菩提心。修諸善法。是名魔業。忘失尚爾。況未發乎。故知欲學如來乘。必先具發菩薩願。不可緩也。然心願差別。其相乃多。若不指陳。如何趣向。今為大眾。略而言之。相有其八。所謂邪。正。真。偽。大。小。偏。圓是也。云何名為邪正真偽大小偏圓耶。世有行人



·一向修行·不究自心·但知外務·或求利養·或好名聞·或貪現世欲樂·或望未來果報·如是發心·名之為邪·既不求利養名聞·又不貪欲樂果報·唯為生死·為菩提·如是發心·名之為正·念念上求佛道·心心下化眾生·聞佛道長遠·不生退怯·觀眾生難度·不生厭倦·如登萬仞之山·必窮其頂·如上九層之塔·必造其顛·如是發心·名之為真·有罪不懺·有過不除·內濁外清·始勤終怠·雖有好心·多為名利之所夾雜·雖有善法·復為罪業之所染污·如是發心·名之為偽·眾生界盡我願方盡·菩提道成我願方成·如是發心·名之為大·觀三界如牢獄·視生死如怨家·但期自度·不欲度人·如是發心·名之為小·若於心外見有眾生·及以佛道·願度願成·功勳不忘·知見不泯·如是發心·名之為偏·若知自性是眾生故願度脫·自性是佛道故願成就·不見一法·離心別有·以虛空之心




·發虛空之願·行虛空之行·證虛空之果·亦無虛空之相可得。如是發心·名之為圓。知此八種差別·則知審察。知審察·則知去取。知去取·則可發心。云何審察。謂我所發心·於此八中·為邪為正·為真為偽·為大為小·為偏為圓。云何去取。所謂去邪去偽·去小去偏·取正取真·取大取圓。如此發心·方得名為真正發菩提心也。此菩提心·諸善中王·必有因緣·方得發起。今言因緣·略有十種。何等為十。一者念佛重恩故·二者念父母恩故·三者念師長恩故·四者念施主恩故·五者念眾生恩故·六者念生死苦故·七者尊重己靈故·八者懺悔業障故·九者求生淨土故·十者為令正法得久住故。

云何念佛重恩。謂我釋迦如來·最初發心·為我等故·行菩薩道·經無量劫·備受諸苦。我造業時·佛則哀憐方便教化。而我愚癡·不知信受。我墮地獄·佛復悲痛欲代我苦。而我業重



·不能救拔。我生人道。佛以方便令種善根。世世生生隨逐於我。心無暫捨。佛初出世。我尚沉淪。今得人身。佛已滅度。何罪而生末法。何福而預出家。何障而不見金身。何幸而躬逢舍利。如是思惟。向使不種善根。何以得聞佛法。不聞佛法。焉知常受佛恩。此恩此德。邱山難喻。自非發廣大心。行菩薩道。建立佛法。救度眾生。縱使粉骨碎身。豈能酬答。是為發菩提心第一因緣也。

云何念父母恩。哀哀父母。生我劬勞。十月三年。懷胎乳哺。推乾去溼。嚙苦吐甘。才得成人。指望紹繼門風。供承祭祀。今我等既已出家。濫稱釋子。忝號沙門。甘旨不供。祭掃不給。生不能養其口體。死不能導其神靈。於世間則為大損。於出世又無實益。兩途既失。重罪難逃。如是思惟。唯有百劫千生常行佛道。十方三世普度眾生。則不唯一生父母。生生父母。



俱蒙拔濟。不唯一人父母。人人父母。盡可超昇。是為發菩提心第二因緣也。

云何念師長恩。父母雖能生育我身。若無世間師長。則不知禮義。若無出世師長。則不解佛法。不知禮義。則同於異類。不解佛法。則何異俗人。今我等粗知禮義。略解佛法。袈裟被體。戒品沾身。此之重恩。從師長得。若求小果。僅能自利。今為大乘。普願利人。則世出世間二種師長。俱蒙利益。是為發菩提心第三因緣也。

云何念施主恩。謂我等今者。日用所資。並非己有。三時粥飯。四季衣裳。疾病所須。身口所費。此皆出自他力。將為我用。彼則竭力躬耕。尚難餬口。我則安坐受食。猶不稱心。彼則紡織不已。猶自艱難。我則安服有餘。寧知愛惜。彼則華門蓬戶。擾攘終身。我則廣宇閒庭。優悠卒歲。以彼勞而供我逸。



於心安乎。將他利而潤己身。於理順乎。自非悲智雙運。福慧二嚴。檀信沾恩。眾生受賜。則粒米寸絲。酬償有分。惡報難逃。是為發菩提心第四因緣也。

云何念眾生恩。謂我與眾生。從曠劫來。世世生生。互為父母。彼此有恩。今雖隔世昏迷。互不相識。以理推之。豈無報效。今之披毛戴角。安知非昔為其子乎。今之蠕動蜎飛。安知不曾為我父乎。每見幼離父母。長而容貌都忘。何況宿世親緣。今則張王難記。彼其號呼於地獄之下。宛轉於餓鬼之中。苦痛誰知。飢虛安訴。我雖不見不聞。彼必求拯求濟。非經不能陳此事。非佛不能道此言。彼邪見人。何足以知此。是故菩薩觀於螻蟻。皆是過去父母。未來諸佛。常思利益。念報其恩。是為發菩提心第五因緣也。

云何念生死苦。謂我與眾生。從曠劫來。常在生死。未得解脫



。人間天上。此界他方。出沒萬端。昇沉片刻。俄焉而天。俄焉而人。俄焉而地獄畜生餓鬼。黑門朝出而暮還。鐵窟暫離而又入。登刀山也。則舉體無完膚。攀劍樹也。則方寸皆割裂。熱鐵不除飢。吞之則肝腸盡爛。洋銅難療渴。飲之則骨肉都糜。利鋸解之。則斷而復續。巧風吹之。則死已還生。猛火城中。忍聽叫嗥之慘。煎熬盤裏。但聞苦痛之聲。冰凍始凝。則狀似青蓮蕊結。血肉既裂。則身如紅藕華開。一夜死生。地下每經萬徧。一朝苦痛。人間已過百年。頻煩獄卒疲勞。誰信閻翁教誡。受時知苦。雖悔恨以何追。脫已還忘。其作業也如故。鞭驢出血。誰知吾母之悲。牽豕就屠。焉識乃翁之痛。食其子而不知。文王尚爾。噉其親而未識。凡類皆然。當年恩愛。今作怨家。昔日寇讎。今成骨肉。昔為母而今為婦。舊是翁而新作夫。宿命知之。則可羞可恥。天眼視之。則可笑可憐。糞穢



叢中。十月包藏難過。膿血道裏。一時倒下可憐。少也何知。東西莫辨。長而有識。貪欲便生。須臾而老病相尋。迅速而無常。又至。風火交煎。神識於中潰亂。精血既竭。皮肉自外乾枯。無一毛而不被針鑽。有一竅而皆從刀割。龜之將烹。其脫殼也猶易。神之欲謝。其去體也倍難。心無常主。類商賈而處處奔馳。身無定形。似房屋而頻頻遷徙。大千塵點。難窮往返之身。四海波濤。孰計別離之淚。峨峨積骨。過彼崇山。莽莽橫尸。多於大地。向使不聞佛語。此事誰見誰聞。未覩佛經。此理焉知焉覺。其或依前貪戀。仍舊癡迷。祇恐萬劫千生。一錯百錯。人身難得而易失。良時易往而難追。道路冥冥。別離長久。三途惡報。還自受之。痛不可言。誰當相代。興言及此。能不寒心。是故宜應斷生死流。出愛欲海。自他兼濟。彼岸同登。曠劫殊勳。在此一舉。是為發菩提心第六因緣也。



云何尊重己靈。謂我現前一心。直下與釋迦如來。無二無別。云何世尊無量劫來。早成正覺。而我等昏迷顛倒。尚做凡夫。又佛世尊則具有無量神通智慧。功德莊嚴。而我等則但有無量業繫煩惱。生死纏縛。心性是一。迷悟天淵。靜言思之。豈不可恥。譬如無價寶珠。沒在淤泥。視同瓦礫。不加愛重。是故宜應以無量善法。對治煩惱。修德有功。則性德方顯。如珠被濯。懸在高幢。洞達光明。映蔽一切。可謂不孤佛化。不負己靈。是為發菩提心第七因緣也。

云何懺悔業障。經言犯一吉羅。如四天王壽五百歲墮泥犁中。吉羅小罪。尚獲此報。何況重罪。其報難言。今我等日用之中。一舉一動。恆違戒律。一餐一水。頻犯尸羅。一日所犯。亦應無量。何況終身歷劫。所起之罪。更不可言矣。且以五戒言之。十人九犯。少露多藏。五戒名為優婆塞戒。尚不具足。何



況沙彌比丘菩薩等戒。又不必言矣。問其名。則曰我比丘也。問其實。則尚不足為優婆塞也。豈不可愧哉。當知佛戒不受則已。受則不可毀犯。不犯則已。犯則終必墮落。若非自慙慙他。自傷傷他。身口併切。聲淚俱下。普與眾生。求哀懺悔。則千生萬劫。惡報難逃。是為發菩提心第八因緣也。

云何求生淨土。謂在此土修行。其進道也難。彼土往生。其成佛也易。易故一生可致。難故累劫未成。是以往聖前賢。人人趣向。千經萬論。處處指歸。末世修行。無越於此。然經稱少善不生。多福乃致。言多福。則莫若執持名號。言多善。則莫若發廣大心。是以暫持聖號。勝於布施百年。一發大心。超過修行歷劫。蓋念佛本期作佛。大心不發。則雖念奚為。發心原為修行。淨土不生。則雖發易退。是則下菩提種。耕以念佛之犁。道果自然增長。乘大願船。入於淨土之海。西方決定往生。



。是為發菩提心第九因緣也。

云何令正法久住。謂我世尊無量劫來。為我等故。修菩提道。難行能行。難忍能忍。因圓果滿。遂致成佛。既成佛已。化緣周訖。入於涅槃。正法像法。皆已滅盡。僅存末法。有教無人。邪正不分。是非莫辨。競爭人我。盡逐利名。舉目滔滔。天下皆是。不知佛是何人。法是何義。僧是何名。衰殘至此。殆不忍言。每一思及。不覺淚下。我為佛子。不能報恩。內無益於己。外無益於人。生無益於時。死無益於後。天雖高不能覆我。地雖厚不能載我。極重罪人。非我而誰。由是痛不可忍。計無所出。頓忘鄙陋。忽發大心。雖不能挽回末運於此時。決當圖護持正法於來世。是故偕諸善友。同到道場。述為懺摩。建茲法會。發四十八之大願。願願度生。期百千劫之深心。心作佛。從於今日。盡未來際。畢此一形。誓歸安養。既登九



品。回入娑婆。俾得佛日重輝。法門再闡。僧海澄清於此界。人民被化於東方。劫運為之更延。正法得以久住。此則區區真實苦心。是為發菩提心第十因緣也。

如是十緣備識。八法周知。則趣向有門。開發有地。相與得此人身。居於華夏。六根無恙。四大輕安。具有信心。幸無魔障。況今我等又得出家。又受具戒。又遇道場。又聞佛法。又瞻舍利。又修懺法。又值善友。又具勝緣。不於今日發此大心。更待何日。唯願大眾。愍我愚誠。憐我苦志。同立此願。同發是心。未發者今發。已發者增長。已增長者今令相續。勿畏難而退怯。勿視易而輕浮。勿欲速而不久長。勿懈怠而無勇猛。勿委靡而不振起。勿因循而更期待。勿因愚鈍而一向無心。勿以根淺而自鄙無分。譬諸種樹。種久則根淺而日深。又如磨刀。磨久則刀鈍而成利。豈可因淺勿種。任其自枯。因鈍弗磨。




置之無用。又若以修行為苦。則不知懈怠尤苦。修行則勤勞暫時。安樂永劫。懈怠則偷安一世。受苦多生。況乎以淨土為舟航。則何愁退轉。又得無生為忍力。則何慮艱難。當知地獄罪人。尚發菩提於往劫。豈可人倫佛子。不立大願於今生。無始昏迷。往者既不可諫。而今覺悟。將來猶尚可追。然迷而未悟。固可哀憐。苟知而不行。尤為痛惜。若懼地獄之苦。則精進自生。若念無常之速。則懈怠不起。又須以佛法為鞭策。善友為提攜。造次弗離。終身依賴。則無退失之虞矣。勿言一念輕微。勿謂虛願無益。心真則事實。願廣則行深。虛空非大。心王為大。金剛非堅。願力最堅。大眾誠能不棄我語。則菩提眷屬。從此聯姻。蓮社宗盟。自今締好。所願同生淨土。同見彌陀。同化眾生。同成正覺。則安知未來三十二相。百福莊嚴。不從今日發心立願而始也。願與大眾共勉之。幸甚幸甚。



圓觀·鑑空·法雲·海印信·末山·義斷崖·絕學誠公座
下之少年僧·及法華尼·念佛婆子·諸人傳

圓觀鑑空等傳評曰·按此多人·皆與念佛無關。而圓觀·在生已悟後果·再世不昧前因·其定慧造詣·均非常人所能企及。因其不知念佛求生西方·又未到斷惑證真境界·依舊滯在輪迴·不能自由擺脫。鑑空·宿生尚為講主·浮俗已斷根源·修持頗稱精苦。因尚未及果證·稍有疵類·轉世即為常受凍餒之窮困士。宿生同修五人·祇梵僧獨得解脫·其餘均困生死中。法雲·往昔為大法師·因貪利養·悞佛法·致墮牛類·償宿債·久受劇苦·方轉為人·猶癡鈍無記。海印·亦屬名僧·曾主大剎·受人崇奉·轉生即作檀越家女。末山·來歷不凡·為僧復能好善·再轉則與僧為讎·癡獸無智·頓失宿生所習。斷崖·與某少年僧·參禪均稱已悟·二皆仍



轉為僧。一則受人供養·忙碌一生·己躬事完全忘失。一則利養到身·驕奢心動·竟成流俗之造業僧。法華尼·苦修三十年·諒由淫心固結·致轉世失身為官妓。唯念佛婆子·宗教一無所知·祇以彌陀是念·而死後演出如許奇特事·確證往生西方之無疑。總是以觀·若論生前慧解·則諸僧尼之超過念佛婆遠甚。至論身後果證·而諸僧尼之不及念佛婆亦遠甚。圓觀鑑空法雲尚恐不及·其餘真不足以望其項背。可見自力了脫之難·念佛往生之易。故云餘門學道·如蟻子上于高山。念佛往生·似風帆揚于順水。知此·則平昔以高明自負·欲仗自力了生脫死·而尚未至業盡情空之地位者·寧不慄然。故特附錄于此·以為藐視淨土·好仗自力而誇口頭者戒。凡有志於自利利人·欲速得解脫者·均當注意於念佛一

門焉。

釋德森
錄畢識



唐洛京慧林寺釋圓觀。不知何許人也。居於洛宅。率性疎簡。或勤梵學。而好治生。獲田園之利。時謂之空門猗頓也。此外施為絕異。且通音律。大曆末。與李源為忘形之友。源父愷居守。天寶末陷於賊中。遂將家業捨入洛城北慧林寺。即愷之別墅也。以為公用無盡財也。但日給一器。隨僧眾飲食而已。如此三年。源好服食。忽約觀遊蜀青城峨眉等山洞求藥。觀欲遊長安。由斜谷路。李欲自荆入峽。爭此二途。半年未決。李曰。吾已不事王侯。行不願歷兩京道矣。觀曰。行無固必。請從子命。遂自荆上峽。行次南浦。泊舟。見婦女條達錦璫。負嬰而汲。觀俛首而泣曰。某不欲經此者。恐見此婦人也。李曰。自上峽來。此徒不少。奚獨泣為。觀曰。其孕婦王氏者。是某託身之所也。已逾三載。尚未解脫。唯以吾未來故。今既見矣。命有所歸。釋氏所謂循環者也。請君用符呪。遣其速生。且



少留行舟。葬吾山谷。其家浴兒時。亦望君訪臨。若相顧一笑。是識認君也。後十二年。當中秋月夜。專於錢塘天竺寺外。乃是與君相見之期也。李追悔此之一行。致觀到此。哀慟殆絕。召孕婦告以其事。婦人喜躍還。頃之。親族畢集。以枯魚濁酒。饋於水濱。李往授符水。觀具其沐浴。新其衣裝。觀其死矣。孕婦生焉。李三日往看新兒。襁抱就明。果致一笑。李泣具告王氏。王氏厚葬觀。明日李迴棹歸慧林寺。詢問弟子。方知已理命矣。李常念杭州之約。至期。到天竺山寺。其夜桂魄皎然。忽聞葛洪井畔。有牧童歌竹枝者。乘牛扣角。雙髻短衣。徐至寺前。乃觀也。李趨拜曰。觀公健否。曰。李公真信士。我與君殊途。慎勿相近。君俗緣未盡。但且勤修不墮。即遂相見。李無由敘語。望之潸然。觀又歌竹枝。杳覆前去。詞切調高。莫知所謂。歎曰。真得道之僧也。咫尺懸隔。聖凡路殊。



·諒有之乎。

高僧傳三
集感通篇


唐洛陽香山寺釋鑑空·俗姓齊·吳郡人也。少小苦貧·雖勤於學·而寡記持。壯歲為詩·不多靡麗。常困遊吳楚間·已四五年矣。干謁侯伯·所潤無幾。錢或盈貫·則必病生·用罄方差。元和初·遊錢塘·屬其荒儉·乃議求餐於天竺寺。至孤山寺西·餒甚不前·因臨流雪涕·悲吟數聲。俄有梵僧臨流而坐·顧空笑曰·法師秀才·旅遊滋味足未。空曰·旅遊滋味則已足矣·法師之呼·一何乖謬。蓋以空未為僧時·名君房也。梵僧曰·子不憶講法華經於同德寺乎。空曰·生身已四十五歲矣·盤桓吳楚間·未嘗涉京口·又何洛中之說。僧曰·子應為饑火所燒·不暇憶故事。遂探囊出一棗·大如拳許·曰·此吾國所產。食之者·上智知過去未來事·下智止於知前生事耳。空饑極·食棗掬泉飲之·忽欠呻枕石而寢·頃刻乃寤·憶講經於同



德寺。如昨日焉。因增涕泣。問僧曰。震和尚安在。曰。專精未至。再為蜀僧矣。今則斷攀緣也。神上人安在。曰。前願未滿。悟法師焉在。曰。豈不記香山石像前。戲發大願乎。若不證無上菩提。必願為赳赳貴臣。昨聞已得大將軍矣。當時雲水五人。唯吾得解脫。獨汝為凍餒之士也。空泣曰。某四十許年。日唯一餐。三十餘年擁一褐。浮俗之事。決斷根源。何期福不完乎。坐於饑凍。僧曰。由師子座上。廣說異端。使學空之人。心生疑惑。戒珠曾缺。羶氣微存。聲渾響清。終不可致。質樸影曲。報應宜然。空曰。為之奈何。僧曰。今日之事。吾無計矣。他生之事。警於吾子焉。乃探鉢囊取一鑑。背面皆瑩徹。謂空曰。要知貴賤之分。修短之期。佛法興替。吾道盛衰。宜一鑑焉。空覽照久之。謝曰。報應之事。榮枯之理。謹知之矣。僧收鑑入囊。遂挈而去。行十餘步。旋失所在。空是夕



投靈隱寺出家。受具足戒。後周遊名山。愈高苦節。太和元年詣洛陽。於龍門天竺寺。遇河東柳瑄。親說厥由。向瑄。瑄聞空之說。事皆不常。且甚奇之。空曰。我生世七十有七。僧臘三十二。持鉢乞食。尚九年在世。吾捨世之日。佛法其衰乎。瑄詰之。默然無答。乃索瑄筆硯。題數行於經藏北垣而去。曰。興一沙。衰恆河沙。兔而置。犬而拏。牛虎相交與角牙。寶檀終不滅其華。系曰。食梵僧之棗。而知宿命者。與茹雪山之藥。解諸國語音同也。覽鑑而知吉凶者。與窺圖澄塗麻掌同也。食棗臨鑑。豈偶然耶。非常人之遇也。其空公題識而答塞柳理之問。驗在會昌之毀教矣。時武宗勒僧尼反俗。計二十萬七千餘人。圻寺并蘭若。共四萬七千有奇。故云興一沙。衰恆河沙。兔在置。犬仍拏。言殘害之甚。乙丑毀法。丙寅厭代。佛法喻寶檀之樹。終不絕其華。藹芬馥。故云也。苟非異人。何以



藏往考來之若是乎。

高僧傳三
集感通篇

唐法雲者·鴈門趙氏子。受質淳善·毀譽淡然。及就學·癡鈍無記。年十二·父母送禮五臺華嚴寺淨覺為師。拾薪汲水·初不憚勞。年三十六·誦習未能·眾以其愚·呼為牛雲。一日自恨愚質·久生何為。時方大雪·跣足禮臺·一心持念文殊師利·願求大聖開決心眼。如是而行·寒不知衣·食不知味·內不知身·外不知物·唯聖是求。逢人即問文殊住處。既徧五峯·了無所見。至寺求食·其志增銳。如迷如醉·復至東臺·見老人曝火·即叩問曰·大德·文殊住何處。老人云·汝問他何為。雲曰·我生愚鈍·乞為開明。老人云·那羸頹百拙漢·汝不須見他好。雲以為狂·遂趣北臺。既至·見先老人擁雪而坐。心生希有·以為真文殊也·趣前叩首。以凍餒馳困·倒地不起·口吐血團。見先老人語曰·汝於往生曾作法師·貪他利養·



祕恪佛法。以是因緣。墮牛類中。愚無所知。償他宿債。持法力故。今得人身。復預僧數。慳法餘業。故無誦習。老人即以鐵如意鈎。斲出心藏。令其視之。宛若牛心。於天井洗蕩。復以安之。叱云。起起。於是忽醒。無所痛恙。徧體汗流。更覓老人。竟不復見。但見祥雲驟起。輒風拂衣。仰視天際。圓光若鏡。見先老人。坐蓮華上。晃焉而沒。法雲從此往世所持經論。宛然記憶。如獲舊物。終身行道。如救頭然。一夕繞育王塔。至三更。見白光如水。自北臺連接鷲峯。中現天閣。寶色燦爛。額曰善住。時開元二十三年春。辭眾而終焉。清涼山志

宋海印信和尚。嗣瑯琊。桂府人。住蘇州定慧寺。年八十餘。平日受朱防禦家供養。屢到其宅。一日朱問曰。和尚後世能來弟子家中託生否。師微笑諾之。及歸寺得疾。數日而化。其遷化日。朱家生一女子。圓照本禪師。時住瑞光。聞其事。往訪



之。方出月。抱出。一見便笑。圓照喚云。海印。汝錯了也。

女子哭數聲化去。


宗門
武庫

元建寧府。有僧名末山。後檢一行著定平生詩。有一木移來嶺上安之。句。造物預定其名也。好作善緣。平路疊橋。不知其數。既死。現夢於城中鄒氏託生。其友亦有夢之者。既長。雖自知前身是僧。不喜與僧交。癡癡獸獸。若木石然。杭州天目山。義斷崖。見高峯得旨。歸向者甚眾。既死。現夢託生於吳興細民家。後為僧。名瑞應。字寶曇。自幼至壯。受人禮拜供養無虛日。余寓居天界時。寶曇亦在焉。鄰居頗久。察其所為。碌碌與常人無以異。間有以己躬事叩之者。但憊懽而已。二人前身皆非常人。胡乃頓忘前世所習如是。古人謂聲聞尚昧於出胎。菩薩猶迷於隔陰。然則修行人。可不慎歟。江西絕學誠公。山居不出世。座下有七人結盟習禪。一人年最少。超然



有得。誠公驗以三關語。其答如鼓應桴。不幸早世。生山下民家。父母俱有夢。甫五歲。命讀書。吾伊上口。不煩師訓。又能析其義。一日其父攜入山見誠公。公問汝前生答我三轉語。記得否。進云。試舉看。既舉。乃點首云。是我語。誠公囑其父善保養之。他寺僧。因厚賄其家。求為弟子。使習魚山梵唄。自此赴檀家請。多得勸施。驕奢心動。世俗不法事。無不為之。誠公因立三種大願厲學者。大凡參禪人。於靜定中得箇歡喜處。乃塵勞乍息。慧光少現。然未可以為究竟也。何則。蓋八識田中。無明根本尚在。喻如石壓草。去石再生無疑矣。後人其預戒之。山庵雜錄

宋歐陽永叔知潁州。一官妓。口氣作蓮華香。有僧知宿命。言此妓前世為尼。誦法華經三十年。一念之差。遂至於此。問妓云。曾讀法華經否。答云。失身於此。何暇誦經。與以法華。



則讀誦如流。與之他經。則不能讀。以此知僧言可信矣。使此尼知西方法門。則上品上生可也。不知而墜墮於妓。可不哀哉。以此知能用西方法門教人者。其濟拔之功大矣。福報豈易量哉。

龍舒淨
士文

元至順庚午。浙西連歲飢饉。杭州城中。餓殍相枕藉。有司令坊正倩人舁棄六和塔後山大坑中。有一婆子。兼旬不腐爛。每日居眾屍之上。人怪之。搜其身懷中有小囊。貯念彌陀佛圖三幅。事聞有司。為買棺斂。焚之。烟焰中現佛菩薩像。光明燁燁。因此發心念佛者極眾。

山庵
雜錄

附錄無功叟淨土自信錄序

古之大聖人。立言垂教。被百世之下。其志猶鬱而未暢。晦而未明者。蓋有之矣。即吾佛淨土法門是也。余徧覽諸經。深求




其旨。往生功德。一言以蔽之曰。在凡夫獲不退而已矣。何則。此土修行。圓教初信。小乘初果。邪見及三毒永不起。茲為斷惑發悟。創入聖流。則越生不昧其所證。斯超四趣。不失人天。至於凡夫地中。雖伏惑發悟菩薩。一經生死非常之變。則忘其所證所修。是故遇緣或退。仍墮苦途者。容有之。乃若凡聖同居淨土。如極樂國等。雖具三界。唯有人天。故一切含識獲生者。即長辭四趣。又助緣大備。壽數莫量。縱至鈍根。一生熏修。無不證聖果。寧復有退失事乎。如來讚勸之本意。不過如此。且圓機體道。是最上淨業。苟加願導之。即預優品。若夫愚朴輩。但能稱佛發願者。而莫不往生。嗚呼。觀淨土一門。則知聖人無棄物矣。彼守癡空之徒。效無礙無修。起自障心。絕他學路。乃高其言曰。淨土末事也。何足道哉。可不哀耶。

淨土十要第九

淨土十要（下冊）

佛陀教育基金會

印贈



淨土十要（下冊） 目錄

◎淨土十要（十）

| | |
|----------------|---|
| 靈臺湧益大師選定淨土十要第十 | 0 |
| 評點西方合論序 | 0 |
| 西方合論原序 | 0 |
| 西方合論 | 0 |
| 第一刹土門 | 0 |
| 第二緣起門 | 0 |
| 第三部類門 | 0 |
| 第四教相門 | 0 |
| 第五理諦門 | 0 |
| 第六稱性門 | 0 |
| 第七往生門 | 0 |
| | 9 |
| | 8 |
| | 7 |
| | 6 |
| | 4 |
| | 3 |
| | 2 |
| | 1 |
| | 9 |
| | 6 |
| | 3 |
| | 1 |



| | | | | |
|-----------|-------|---|---|---|
| 第八見網門 | | 1 | 0 | 7 |
| 第九修持門 | | 1 | 3 | 3 |
| 第十釋異門 | | 1 | 4 | 7 |
| 舊跋 | | 1 | 6 | 2 |
| 附紀夢 | | 1 | 6 | 4 |
| 公安覺隱袁中道紀 | | 1 | 6 | 4 |
| 舊跋 | | 1 | 6 | 8 |
| 附袁中郎傳 | | 1 | 6 | 8 |
| 徹悟禪師語錄 | | 1 | 7 | 0 |
| 重刻徹悟禪師語錄序 | | 1 | 7 | 0 |
| 原序 | | 1 | 7 | 3 |
| 自序 | | 1 | 7 | 5 |
| 念佛伽陀序 | | 1 | 7 | 6 |
| 徹悟禪師語錄卷上 | | 1 | 7 | 7 |
| 示眾 | | 1 | 7 | 7 |



| | |
|----------|-----|
| 徹悟禪師語錄卷下 | 226 |
| 雜著 | 226 |
| 徹悟禪師行略 | 267 |
| ◎蓮華世界詩 | |
| 蓮華世界詩序 | 271 |
| 蓮華世界詩目錄 | 274 |
| 如來弘願第一 | 278 |
| 苦勸迴轡第二 | 281 |
| 翻然嚮往第三 | 296 |
| 一意西馳第四 | 303 |
| 執持名號第五 | 314 |
| 聖境現前第六 | 323 |
| 發明心地第七 | 337 |
| 華開見佛第八 | 357 |
| 廣度眾生第九 | 361 |



◎淨土十要附本

| | |
|-----------------------|---|
| 續刻蓮華世界詩 | 3 |
| 附省庵勸修淨土詩（百八首） | 6 |
| 往生論註序 | 0 |
| 無量壽經優婆提舍願生偈 | 3 |
| 無量壽經優婆提舍願生偈註卷上 | 7 |
| 無量壽經優婆提舍願生偈註卷下 | 0 |
| 略論安樂淨土義 | 4 |
| 婆藪槃頭法師傳 | 2 |
| 北魏曇鸞法師傳 | 4 |
| 同音義字、古今字、本俗字、同義字對照參考表 | 8 |
| | 5 |
| | 4 |
| | 3 |


印光大師讚語：

《淨土十要》乃蕩益大師以金剛眼，于闡揚淨土諸經中，選其契理契機，至極無加者。第一彌陀要解，乃大師自註，文淵深而易知，理圓頓而唯心，妙無以加，宜常研閱！

明·蕩益大師選定

西方合論

淨土十要
(十)




靈峯蕩益大師選定淨土十要第十

述曰。世有兩般人。於淨土法門。必不能入。禪者執悟門。矜自力。視念佛不啻依草附木。搖尾乞憐。儒者咀名理。豔清言。視念佛不啻臭腐殘餒。食唾欲嘔。此兩者。一如長貽深暎。而不見^{大類叩齒}眇毛。一如覓龍肝鳳髓。而厭棄^{愚夫婦是}本分茶湯也。何從接而入哉。儻冀其入。須向此人眼底盤踞鴟蹲。揚聲大呼。使其眩暈失據。或俟枵腹垂涎時。進以簞食豆羹。使其饒饒厭足。然非尋常禪者儒者及念佛者可能也。禪能滅卻正法眼藏。灼見永明楚石用處。儒能裂斷文字縛。徹悟君子之道。果造端乎夫婦之知能。然後從而發揮淨土。庶可死兩般人偷心耳。袁宏道身為橫掃千軍之儒英。又為跳踉井幹之禪孽。乃能百尺竿頭。得^{十方}



一退步。世界現全身合西方言教而論斷之。使上兩般人不能不屈驕折傲。俯從而窺。纔一俯窺。心膽俱寒。肺腑盡奪。匪仗阿彌神力。未易有此也。嗟乎。壇經之警策既杳。世徒聞破斥安養之譚。龍谿之宗說雙亡。世徒有尋僧說禪之號。西方豐蔀。日斗俱蔽矣。合論出於淨宗弊極之年。闡教救時。於今為烈。靈峯收為一要。卷當第十。志殿也。



評點西方合論序

唯大徹大悟人。始可與談念佛難三昧。否則百姓之與知與能甚難。猶遠勝仁者見之謂之仁。智者見之謂之智也。達摩西來。事出非常。有大利。必有大害。嗚呼。先輩幸得大利。今徒有大害而已。誰能以悟道陽春白雪之後為先鋒。以念佛引商刻羽之為後勁。穩趨無上覺路者耶。袁中郎少年穎悟。坐斷一時禪宿舌頭。不知者。以為慧業文人也。後復深入法界甚難甚難。歸心樂國。述為西方合論十卷。字字從真實悟門流出。故絕無一字蹈襲。又無一字杜撰。雖台宗堂奧可見悟門不可限量。尚未詣極。而透徹禪機。融貫方山清涼教理。無餘矣。或疑佛祖宗教。名衲老宿。未易徧通。何少年科第。五欲未除。乃克臻此。不知多生熏習祇因透徹。非偶然也。傳聞三袁是宋三蘇後身。噫。中郎果是東坡透徹融貫。佛法自爾融貫



二公自知

乃大進矣。予每謂明朝功業士。遠不及漢唐宋。理學則大過之。

陽明一人。直續孔顏心脈。滿園春色別露一枝皆正宗之記佛門居士。唐梁肅。宋陳瓘。明袁宏

道。蓋未可軒輊也。千秋月旦 陳瓘識忠肅初年。偶疑金剛為泥人背語。遂為禪

者所笑。試讀彼三千有門頌。可復笑乎。中郎少年。風流灑落。

亦為縑素所忽。試讀彼西方合論。可復忽乎。嗚呼。今人不具看

書眼。何怪乎以耳為目也哉。特即吳門所刻標註。并為評點以表

彰之。重謀付梓。用廣流通。普使法界有情。從此諦信念佛法門

。至圓至頓。高超一切禪教律。統攝一切禪教律。不復有泣歧之

歎也。辛卯夏四月。北天目蕩益沙門智旭拜述。

曾有縑素共閱此序。一人大拂。一人把玩不置。數人傾服。余

謂數人曰。大徹悟人。與與知與能之百姓。相去幾何。皆擬議

。余又問。設使未悟。以何為先鋒。復擬議。余為指大拂者曰

。此公若解。傾服定不類公等。又為指把玩者曰。此公得其毛



· 公等不屬於毛。時數公互相顧笑。而拂玩兩公默然。然則具
擇法眼。誠難乎哉。附記於此。弟子成時



西方合論原序

(此序亦靈峯大師評點)

香光子避鷲山剎·修習淨業·有一禪人·閱視高步·過舍而譚·見案上有石頭居士新撰淨土合論·閱未終篇·抗聲言曰·若論此之法門·原用接引中下之根·何者·中下根人智慧輕微·業力深重·以憶佛念佛·獲生淨土·如頑石附舟·可以到岸·誠宜念佛·至於吾輩洞了本源·此心即是佛·更于何處覓佛·此心即是土·更于何處見土·于實際理中·覓生佛去來生死三世之相·無一毛頭可得·纔說成佛·已是剩語·何得更有分淨分穢·捨此生彼之事·若於此處悟得·是自在閒人·即淫怒癡·皆是阿彌平等道場·如如不動·何乃捨卻己佛·拜彼金銅·且謂悟與未悟·皆宜修習·無事生事·吾所不曉·香光子聞而太息曰·若汝所言·止

頂



圖口角圓滑。不知一舉足將墜于火坑也。生死無常。轉盼即至。

如何熟記宗門現成相似之語。以為究竟。都云我已成佛。不必念

佛。若約理而言。世間一蚤一蠱。皆具有如來清淨覺體。無二無

別。乃至諸佛成等正覺。證大涅槃。本體未嘗增得一分。眾生墮

三途。趨生死海。本體未嘗減卻一分。如如之體。常自不動。生

死涅槃。等是妄見。亦無如來。亦無眾生。於此證入。亦無能證

之人。亦無所證之法。泯絕心量。超越情有。大地無寸土。佛之

一字向何處安著。至於進修次毒法門。於無修證中修證。於無等級中

等級。千差萬別。雖位正見正論至等覺。尚不知如來舉足下足之處。從上

祖師所以呵佛斥教。一切皆遮者。止因人心執滯此學而不思之病教相。隨語生解

。不悟言外之本體。漫執語中之方便。一向說心說性。說空說幻

。說頓說漸。說因說果。千經萬論。無不通曉。及問渠本命元辰

。便將經論現成語言抵對。除卻現成語言。依舊茫然無措。所謂



數他家寶。已無分文。其或有真實修行之人。不見佛性。辛苦行

此思而不學之病

持。如盲無導。止獲人天之果。不生如來之家。於是諸祖一說棄知其流

弊。遂用毒手。剗其語言。塞其解路。拶其情識。令其苦參密究

。逆生滅流。生滅情盡。取捨念空。始識得親生父母。歷劫寶藏

。卻來看經看教。一一如道家中事。然後如說進修。以佛知見。

淨治餘習。拜空華之如來。修水月之梵行。登陽燄之階級。度谷

響之眾生。不取寂證。是謂佛種。悟後正好看經。正好修行。可見悟道是初步。看經修

為深遠。成顛倒見。

。正如果日當空。行大王路。不同長夜趨走。攀荊墮棘。

三引證

豈謂一悟之後。即同極果。如供奉問岑大蟲。果上涅槃。天下善

知識證否。岑曰。未證。奉曰。何以未證。岑曰。功未齊於諸聖

。奉曰。若爾。何得名為善知識。岑曰。明見佛性。亦得名為善

知識也。弘辨禪師曰。頓明自性。與佛同儔。然有無始染習。故


假對治。令順性起用。如人喫飯。不一口便飽。為山曰。初心從



緣頓悟自理。猶有無始曠劫習氣。未能頓淨。須教渠淨除現業流
識。即修也。不可別有法。教渠修行趣向。看經修行。皆所以淨除習氣。皆非別法。若論諸祖此下總斷
師為人之處。壁立萬仞。大火聚中。觸之即爛。刀槍林裏。動著
便創。未曾開口。已隔千里萬里。至機緣之外。平實商量。未嘗
盡絕階級。盡遮修行。傳燈錄中。分明詳悉。大慧中峯言教。尤
為緊切。血誠勸勉。惟恐空解著人。墮落魔事。何曾言一悟之後
。不假修行。頓同兩足之尊。盡滿涅槃之果。說出病根後世不識教意。不
達祖機。乃取喝佛罵祖。破膽險句。以為行持。昔之人為經論所
障。猶是雜食米麥。確甚不能運化。後之人飽記禪宗語句。排因撥果
。越分過頭。是日取大黃巴豆以為茶飯也。自誤誤人。弊豈有極
。是以纔入此門。便輕十方如來。莫不自云無佛可成。無行可修
。見人念佛。則曰自性是佛。見人修淨土。則曰即心是淨。言參
禪。則尊之九天之上。言念佛。則蹂之九地之下。全不思參禪念



佛·總之為了生死。同是出苦海之橋梁·越界有之寶筏。事同一家·何勝何劣。參門之中·所悟亦有淺深公論。念佛之眾·所修亦有高下。如何執定參者即是上根·念者便為中下·自達摩西來立此宗門·已云二百年後聖口授記果然不差·明道者多·行道者少·說理者多·通理者少。今傳燈錄中·如麻似粟·同云入悟·其實迥別確。至如般若緣深·靈根夙植·迦陵破卵·香象截流·或見根宗於片言·或顯威用於一喝·一聞千悟·得大總持·或有懷出世之心·具丈夫之志·舍彼塵情·究此大事·不怙小解·惟求實知·臥薪嘗膽·飲冰吞檠·如此三十年四十年後·或遇明師·痛與鍼劄·偷心死盡·心華始開·此後又須潛行密修·銷融餘習。法見尚捨·何況非法。若趙州除粥飯是雜用心。湧泉四十年尚有走作。香林四十年打成一片。兢兢業業·如護頭目。直至煙銷灰滅·自然一念不生·業不能繫·生死之際·隨意自在。詰其所證尤確·恐亦未能超於上品



上生之上。何以明之。龍樹菩薩。宗門之鼻祖也。得大智慧。具大辯才。住持佛法。故世尊數百年前。於楞伽會上。遙為授記。然亦不過曰。證初歡喜地。往生安樂國而已。而觀經中上品上生。生於彼間。一剎那頃。亦證初地。今宗門諸大祖師。縱使見離蓋纏。語出窠臼。豈能即過龍樹。龍樹已悟無生無相之義。已具不墮階級之見。而生於安養。與上品上生所證之果正等。則禪門諸人所證。豈能獨過。良以上品上生解第一義。還同禪門之悟。深信因果。還同禪門之修。止是念佛往生別耳。然吾以為禪門悟修之士。既不能取無餘涅槃。同於如來。又不肯取有餘涅槃。同於二乘。必入普賢行願之海。若不捨一身受一身。濟度眾生。則當從一剎至一剎。供養諸佛。既見諸佛。還同往生。究竟與上品上生。止在鴈行伯仲之間。何以高視祖師。輕言淨侶。其或悟門已入。休歇太早。智不入微。道難勝習。一念不盡。即是生死之

金口誠言不可不信乎

妙

別亦不別

可為寒心喪膽



根。業風所牽。復入胞胎。如五祖戒復為東坡。青草堂再作魯公。隔陰之後。隨緣流轉。道有消而無長。業有加而無減。縱般若緣深。不落三途。而出房入房。亦太辛苦。還視中下往生之眾。已天地不足喻其否泰矣。況後世宗風日衰。人之根器亦日以劣。發心既多不真。功夫又不純一。偶於佛祖機鋒知識語言。或悟得本來成佛處。當下即是處。意識行不到語言說不及處。一切不可得。即不可得亦不可得處。將古人語句和會。無不相似。既得此相似之解。即云馳求已歇。我是無事道人。識得煩惱如幻。則恣時情以肆煩惱。識得修行本空。輒任意以壞修行。謂檀本空也。反舍檀而取慳。謂忍本空也。反聽隨而真忍。言戒。則曰本無持犯。何必重持輕犯。言禪。則曰本無定亂。何必舍亂取定。聽情順意。踏有譚空。既云法尚應捨。何為復取非法。既云真亦不求。胡為舍之求妄。既云修觀習定。皆屬有為之迹。何獨貪名求利。

說盡今



偏合無為之道。愛憎毀譽之火。纔觸之而即高。生老病死之風。微吹之而已動。爭人爭我。說是說非。甚至以火性為氣魄。以我慢為承當。以譎詐痛切只恐不知為機用。以誑語為方便。以放恣為遊戲。以穢言為解黏。讚歎破律無行之人。侮弄繩趨尺步之士。偏顯理路。故窮玄極妙。莫之蹤迹。盡剗行門。故縱意任心。無復規矩。口言往生是小乘法。令人修習。己乃宴然。或至經年不拜一佛。經年不禮一懺。經年不轉一經。反看世間不必有之書。行道人不宜行之事。使後生小子。專逞聰明。惟尋見解。纔有所知。即為一超直入。更復何事。輕狂傲慢。貢高恣睢。口無擇言。身無擇行。父既報讎。子遂行劫。寫烏成馬。展轉差謬。不念世間情欲無涯。隄之尚溢。字字血淚如何日以圓滑之語。大破因果之門。決其防藩。導以必流。自誤誤人。安免淪墜。若不為魔所攝。定當永陷三途。刀山劍樹。報其前因。披毛戴角。酬還宿債。莫云我是悟達之



人。業不能繫。夫謂業不能繫。非謂有而不有。正以無而自無。生既隨境即動。死安得不隨業受生。眼前一念瞋相。即是怪蟒之形。眼前一念貪相。即是餓鬼之種。無形之因念甚小。有形之果報甚大。一念之微。真實語識田持之。歷千萬劫。終不遺失。如一比丘。以智慧故。身有光明。以妄語故。口流蛆蟲。一言之微。得此惡果。雖有智慧。終不能消。況今無明煩惱。熾然不斷。可痛欲以相似見解。消其惡業。冀出三途。無有是處。嚮使此等。不得少以為足。常如說以修行。終不自言我已悟了。即心是佛。豈可復同中下念佛求生。了達生本無生。不妨熾然求生。即心是土。蓮邦不屬心外。不釋禮拜。不舍念誦。智力行力。雙轂並進。方當踞上品之蓮臺。坐空中之寶閣。朝飯香積。夕遊滿月。回視胎生之品。彳亍寶地。不聞法語。不見法身。象馬難群。雞鳳非類。何況人天小果。甕中蚊虻者哉。而乃空腹高心。著空破有。卒以偏執



之妄解。櫻非常之果報。不與阿彌喚醒邪禪如震大雷作子。卻為閻羅之囚。不與淨眾為朋。卻與阿旁為伍。棄寶林而行劍樹。舍梵音而聽叫號。究其所受。尚不能與世間無知無見之人行少善事。作少功德。生於人天者等。毫髮有差。天地懸隔。可不哀歎。然則宗門中人。上長舌之未必能超於上品上生。而下之已墮三途。故知此道險難。未易行遊。成則為佛。敗則為魔。王虜分於彈指。卿烹別於絲毫。苦樂之分。宜早擇矣。況今代悟門一脈。確確不絕如綫。禪門之中。寂寥無人。止有二三在家居士。路途端直。可以流通此法。然既為居士。不同沙門釋子猶有戒律縛身。方寘身大火之中。浸心煩惱之海。雖於營幹世事內。依稀得一入門。而道力甚淺。業力甚深。即極羸莫如淫殺之業。猶不能折身不行。何況其細。生死之間。安能脫然。徒見豪奢如于頔。奸惡如呂惠卿夏竦。躁進如張天覺。風流豔冶如白樂天蘇子瞻等。皆列於傳燈。便謂一切無礙。



不知從上諸人。雖具正見。若謂其從此不受分段。確確業不能繫。吾未敢許。方當長夜受報。未有了期。故知念佛一門。於居士尤為喫緊。業力雖重。仰借佛力。免於沉淪。如負債人藏於王宮。不得抵償。既生佛土。生平所悟抄所解。皆不唐捐。生死催人。出息難保。早尋歸路。免致忙亂。縱使志在參禪。不妨兼以念佛尤妙。世間作官作家。猶云不礙。況早晚禮拜念誦乎。且借念佛之警切。可以提醒參禪之心。借參門之洞徹。可以堅固淨土之信。適兩相資。最為穩實。如此不信。真同下愚。石頭居士。少志參禪。根性猛利。十年之內。洞有所入。機鋒其實發露懺悔迅利。語言圓轉。尋常與人論及此事。下筆千言。不踏祖師語句。直從胸臆流出。活虎生龍。無一死語。遂亦自謂了悟。無所事事。雖世情減少。不入塵勞。然嘲風弄月。登山玩水。流連文酒之場。沉酣騷雅之業。懶慢疏狂。未免縱意。如前之病。未能全脫。所幸生死心切。不長陷




溺·痛念見境生心·觸途成滯·浮解實情·未能相勝·悟不修行
·必墮魔境·佛魔之分·只在頃刻·始約其偏空之見·涉入普賢
之海·又思行門端的·莫如念佛。而權引中下之疑·未之盡破·
及後博觀經論·始知此門原攝一乘·確悟與未悟·確皆宜修習。於是
採金口之所宣揚·菩薩之所闡明·諸大善知識之所發揮·附以己
意·千波競起·萬派橫流·詰其匪歸·皆同一源。其論以不思議
第一義為宗。以悟為導。以十二時中·持佛名號·一心不亂·念
念相續為行持。以六度萬行為助因。以深信因果為入門。此論甫
成·而同參發心持戒念佛者·遂得五人·共欲流通·以解的宗教之
惑·香光識劣根微·久為空見所醉·縱情肆志·有若狂象·去年
沉湎之夜·親遊鬲子地獄·烈火洞然·見所熟譚空破戒亡僧·形
容尪羸·跛足而過·哭聲震地·殆不忍聞。及寤·身毛為豎。遂
亦發心·歸依淨土。後讀此論·宿疑冰釋。所以今日·不憚苦口

自思之

殷鑑不遠今人請



。病夫知醫。浪子憐客。汝宜盡剝舊日知見。虛心誦習。自當有
入。生死事大。莫久遲疑。於是禪人此禪人亦伶俐可敬悲淚交集。自云。若不遇子
。幾以空見賺過一生。子生我矣。懇求案集。作禮而去。時萬曆
庚子二十八年仲春之二十有三日也。袁宗道伯修甫書於白蘇齋。



西方合論

明荷葉庵石頭道人宏道撰述
明雙徑沙門如奇標旨
清瀟益沙門智旭評點

夫滯相迷心。有為過出。著空破有。莽蕩禍生。達摩為救執相之者。正大光明之論說罪福之皆虛。永明為破狂慧之徒。言萬善之總是。滅火者水。水過即有沉溺之災。生物者日。日盛翻為枯焦之本。如來教法。亦復如是。五葉以來。單傳斯盛。迨於今日。狂濫遂極。謬引唯心。同無為之外道。執言皆是。趨五欲之魔城。不思阿難未得盡通。頭陀擯斥。磨達微牽結使。尊者呵譏。蟬翅薄習。寶所斯遙。丘山叢垢。淨樂何從。至若楞伽傳自達摩。悟修並重。清規創始百丈。乘戒兼行。未聞一乘綱宗。呵叱淨戒。五燈嫡子。貪戀世緣。昔有道士夜行。為鬼所著。宛轉塚間。有田父見之。扶掖入舍。湯沃乃醒。道士臨別。謂田父曰。羈客無以贈主人。



有辟鬼符二張。願以為謝。聞者笑之。今之學者。貪瞋邪見。熾然如火。而欲為人解縛。何其惑也。余十年學道。墮此狂病。後因觸機。薄有省發。遂簡塵勞。歸心淨土。禮誦之暇。取龍樹天台長者永明等論。細心披讀。忽爾疑豁。既深信淨土。復悟諸大菩薩不會歸淨土差別之行。如貧兒得伏藏中金。喜不自釋。會愚庵和尚。與平倩居士。謀余哀集西方諸論。余乃述古德要語。附以己見。勒成一書。命曰西方合論。始於萬曆二十七年己亥十月二十三日。成於十二月二十二日。既寡檢閱。多所脫漏。唯欲方便初心。尚期就正有道。略稽往哲。分敘十門。

- 第一剎土門。
- 第二緣起門。
- 第三部類門。
- 第四教相門。
- 第五理諦門。
- 第六稱性門。
- 第七往生門。
- 第八見網門。
- 第九修持門。
- 第十釋異門。



第一剎土門


夫一真法界·身土交參·十佛剎海·淨穢無別·祇因眾生行業有殊·諸佛化現亦異·或權或實·或偏或圓·或暫或常·或漸或頓·一月千江·波波具涵淨月·萬燈一室·光光各顯全燈·理即一諦·相有千差·若非廣引靈文·眾生何所取則·爰約諸教·略敘十門。

一毗盧遮那淨土·二唯心淨土·三恆真淨土·四變現淨土·五寄報淨土·六分身淨土·七依他淨土·八諸方淨土·九一心四種淨土·十攝受十方一切有情不可思議淨土·

一毗盧遮那淨土者·即諸佛本報國土·十蓮華藏世界海·一一蓮華藏最下世界·皆有十佛世界微塵數廣大剎·清淨莊嚴·一一廣大剎·復有十佛世界微塵數諸小剎圍繞·倍倍增廣·一一華藏世



界。皆滿虛空。互相徹入。淨穢總含。重重無盡。如法而論。一
草一木。一毛一塵。各各皆具此無盡法界。佛及眾生。無二無別
。或曰。奇曰此孝長者言此是眾生實報莊嚴。不同權教推淨土於他方。是為實教
。或曰。眾生雖具此實報。爭奈真如無性。不能自證。漫漫長夜
。無見日期。波波劫海。無到岸期。雖云地獄起妙覺之心。佛果
現泥犁之界。其如眼前鐵牀銅柱何哉。譬之餓鬼渴死於海邊。貧
人數錢於金窟。祇見其虛。何名為實。若非假之方便。由權入實
。眾生豈有證毗盧之日也。答曰。若約諸佛化儀則可。實相土中
。無此戲論。夫毗盧遮那。此云徧一切處。徧一切處。即無量壽
表義。豈有勝劣。祇因如來為一分取相凡夫故。說有阿彌陀在於
西方。亦如大雲經中阿彌陀佛告一菩薩言。有釋迦在於娑婆世界
也。夫當釋迦為主。則釋迦徧一切。而阿彌陀為所徧之一處。當
阿彌為主。則阿彌徧一切。而釋迦牟尼為所徧之一處。如一人之



身。當自自時。不妨為一切人之他。當他他時。不妨為一切人之自。以是義故。自他不成。自他不成。即自亦徧一切處。他亦徧一切處。豈定有他方可執。是故西方毗盧。非自他故。何以故。毗盧無不徧故。若言權。言方便。即有不徧。有不徧者。毗盧之義不成。可見西方即毗盧淨土。毗盧是實。則西方決非權矣。

二唯心淨土者。直下自證。當體無心。即是淨土。如維摩經云。寶積當知。直心是菩薩淨土。菩薩成佛時。不諂眾生來生其國。深心是菩薩淨土。菩薩成佛時。具足功德眾生來生其國。大乘法是菩薩淨土。菩薩成佛時。大乘眾生來生其國。經文繁多。不能廣引。大約謂欲得淨土。當淨其心。隨其心淨。則佛土淨。夫心是即土之心。土是即心之土。心淨土淨。法爾如故。此語豈非西方註腳。多有執心之士。卑此法門以為單接鈍根者。由於心外見說破土故也。病根夫念即是心。念佛豈非心淨。心本含土。蓮邦豈在心外



。故知約相非乖唯心。卓見稱心實礙普度矣。

三恆真淨土者。即靈山會上所指淨土。引三乘中權教菩薩。令知此土即穢恆淨。諸眾信而未見。夫穢性本寂。俗相恆空。本寂故。菩薩居穢常寂。恆空故。菩薩入俗常空。正顯淨義。但以眾生執海難清。識繩易縛。言業本空。則恣情作業。言行無體。即肆意冥行。犯永嘉之所呵。墮善星之所墜。以至生遭王難。死為魔眷者。往往而是。嗟夫。使盡大地皆菩薩。則斯言誠為利益。天下之菩薩少而凡夫多。則斯言之利天下也少。而害天下多矣。敢謹

以恆真淨土之言為利少害多。非大悟者。不能有此膽識。

四變現淨土者。如法華經。三變淨土。移諸人天置於他方。維摩經。世尊以足指按地。即時三千大千世界。若百千珍寶嚴飾。此是如來暫令顯現。亦是法爾。然智如鶩子。尚且如盲。劣根眾生。無緣獲見。且人天置諸方外。全無接引之緣。神力暫現還無。



詎是恆常之土。豈若安養淨邦。塵劫常住。阿彌慈父。十惡不遺者哉。國土勝劣。居然可知。

五寄報淨土者。如摩醯首羅天。如來於彼成等正覺。此為實報淨土。起信論云。菩薩功德成滿。於色究竟處。示乃化非報示一切世間最高大

身。謂以一念相應慧。無明頓盡。名一切種智。自然有不思議業。能現十方利益眾生。藏和尚云。何故受用報身在此天者。以寄報十王。顯別十地。第十地寄當此天王。即於彼身。示成菩提。然彼天雖云無漏。未若蓮邦直出三界。何以故。在色究竟故。

六分身淨土者。如涅槃經。佛答高貴德王云。善男子。西方去此娑婆世界。度三十二恆河沙佛土。有世界名曰無勝。猶如西方極樂世界。我於彼土。出現於世。為化眾生故。於此世界現轉法輪。又央掘經。佛謂央掘曰。我住無生際。而汝不覺知。央掘云。若住無生際。何以生於此土。佛云。東方有佛。汝往問之。央掘



往問。彼佛答言。釋迦者即是我身。大意謂彼淨土是佛實報。此是分身。雖彰一佛之報境。未具攝化之義。佛分上即有。眾生分上即無。未為殊勝。

七依他淨土者。如梵網經云。我今盧舍那。方坐蓮華臺。周匝千華上。復現千釋迦。一華百億國。一國一釋迦等者。以初地化百佛刹。則有百葉之華。二地化千佛刹。故華有千葉。若至三地。應現萬葉。四地億葉。次第倍增。為是依他受用身。分示報境。入地乃見。非如蓮池會上。十念眾生。頓見淨佛國土故。

八諸方淨土者。如東方藥師佛。南方日月燈佛。上方香積佛。佛佛各有淨土。諸經所述。不可具載。皆是諸佛實報莊嚴。經中或有以佛神力暫令顯現。或諸大菩薩詣彼供養。緣彼佛未言攝生。故諸眾生亦無緣生彼。即如妙喜世界。釋迦雖記有往生者。未聞無動有普引之言。且其國有鐵圍須彌諸山。及鬼神婦女。當知嚴



淨不如安養也。又如藥師如來以十二大願度諸有情。經中亦言有信心者應當來生。稽彼願力。多是解脫一切憂苦。究竟安樂。未若阿彌如來純以念佛。攝一切人往生彼土。

九一心四種淨土者。一曰凡聖同居土。二曰方便有餘土。三曰實報無障礙土。四曰常寂光土。一凡聖同居土者。自分二類。初同居穢土。次同居淨土。穢土之中。凡居聖居各二。凡居二者。一惡眾生。即四趣也。二善眾生。即人天也。聖居二者。一實聖。即四果。辟支。通教七地。別十住。圓十信後心。通惑雖盡。報身猶在。皆名實也。二權聖。謂方便實報寂光土中。法身菩薩。及妙覺佛。為利有緣。應生同居。皆是權也。是等與四趣共住。故名穢土。次同居淨土者。如極樂中有眾生。妙喜國中有鐵圍男女之類。以無四惡趣。故名淨土。余按同居穢土之中。既有諸聖。亦可名同居淨土。如娑婆世界在華藏世界第十三重。亦云華藏



也。二方便有餘土者。下方便等三土。各分淨穢。唯西方極樂。橫具四土。而四土皆淨。所以最妙。尚宜細細發揮。二乘。三種菩薩。破見思惑。證方便道。塵沙別惑無明未斷。捨分段身而生界外。名曰有餘。故釋論云。出三界外有淨土。聲聞辟支佛出生其中。受法性身。非分段也。三實報無障礙土者。無有二乘。純諸法身菩薩所居。盡塵沙惑。分破無明。得真實果。而無明未盡。潤無漏業。受法性報身。亦名果報國。故仁王經云。三賢十聖住果報。以觀實相。發真無漏。感報殊勝。七寶莊嚴具淨妙五塵。故名為實。色心不二。毛剎相容。故名無障礙。華嚴明因陀羅網世界是也。四常寂光土者。妙覺極智所照如如法界。名之為國。亦名法性土。但一真如佛性。非身非土而說身上。離身無土。離土無身。諸佛如來所遊居處。妙宗曰。經論中言寂光無相。乃是已盡染礙之相。非如太虛。空無一物。良由三惑究竟清淨。則依正色心究竟明顯。大經曰。因滅是色。獲得常色。受想行識。



亦復如是。仁王稱為法性五陰。是為極果。然十方剎土隨心異見。七寶砂礫當處差別。故嘗川曰。極樂國土。四土不同。何則。約人天二乘。即前二種土。約菩薩佛。即後二種土。故知六十萬億那由他恆河沙由旬等身。不妨更有丈六之身。華藏海會無邊佛土。不妨更有尼連河土。何以故。是法爾故。非是神力變現故。十攝受十方一切有情不可思議淨土者。即阿彌陀佛西方淨土。其中所有大功德海。大悲智海。大願力海。若具說者。假使盡十方世界諸佛菩薩聲聞辟支天人鬼畜。下至蜎飛螻動。及一切無情草木瓦礫鄰虛微塵之類。一一具無量口。口中一一具無量舌。舌中一一出無量音聲。常說。倍說。熾然說。無間說。經百億萬塵沙阿僧祇劫。亦不能盡。今且略釋。一身土不思議義。二性相不思議義。三因果不思議義。四去來不思議義。五畢竟不可思議不思議義。一身土不思議義者。阿彌身中有無量眾生。眾生身中有無



量阿彌。國土亦然。是故一眾生念阿彌。一阿彌現。眾眾生念阿彌。眾阿彌現。眾生念念阿彌。分明之極人自不知即念念阿彌現。若眾生身中無阿彌者。阿彌不現。如陽燧身中。不能得水。非本有故。阿彌身中無眾生者。阿彌亦不現。如石女求生兒。必不可得。以非應得故。是故身中含身。身中含身。土中含土。土中含土。身土交含。重重無盡。是身土不思議義。二性相不思議義者。若離性言土。土即心外。是幻化故。幻化者即斷滅相。眾生不生。若即性言土。性是有形。是一定故。一定者即無變易。無變易眾生亦不生。即性即相。非性非相。存非非亡。存即即壞。是性相不思議義。三因果不思議義者。有二義。一因先果後義。如念佛是因。見佛是果。見佛是因。成佛是果。成佛是因。度眾生是果。二因果無前後義。即念即見即成即度。一時具足。如人三十至四十歲。三十是因。四十是果。然三十四十無間斷相。若無四十。三十



不立。無三十者。四十不成。是故當知非離三十至四十故。若離三十至四十者。中間即有分限相。而我此身。無分限故。若由三十至四十者。中間即有相續相。而我此身。乃至相續不可得故。念佛因果。亦復如是。是因果不思議義。四去來不思議義者。若阿彌陀佛因念而來此。眾生因憶佛而生彼。即有去來。有去來。即有程途。有程途。即有險易。如人近京師則覲君易。遠則難。果爾。念佛求生應有難易。而阿彌僕僕道途。亦無說法之日矣。故般舟三昧經曰。不於是間終。生彼間佛剎。佛無所從來。我亦無所至。又先德云。生則決定生。二句更宜徹講去則實不去。如天鼓鳴。遠近齊聞。非去來故。如水中月。東行則東。西行則西。非去來故。是去來不思議義。五畢竟不可思議不思議義者。如澄潭山影。如春暘百草。如眾生業力。如日月光相。如胎中根。如身中我。如齒堅舌柔。如眉橫髮長。是畢竟不可思議不思議義。所以十方諸




佛吐心吐膽。亦只道得箇希有難信而已。雖有徧覆三千大千舌相。詎能分疏其萬一哉。孔子曰。夫婦之愚可以與知。及其至也。聖人不知。至哉言也。無量法門。一以貫之矣。

◎

第二緣起門

夫樂鮑肆者。不念栴檀。非實不念。以不厭故。乍使引之晤室。蕪穢炙沉。不終日而悲其昔之穢。厭離之不早也。夫生死臭穢。愈於鮑肆。眾生貪嗜。倍彼蠅蚋。諸佛為鬻香長者。見一輩人天沒溺濁海。能不惻然。是故阿彌導師。廣開香嚴之肆。釋迦慈父。確指淨域之門。盡大地無非貧兒。一佛號便為資本。欲驗誠言。莫離十念。塞鼻膾腥。久當自厭。今約西方起教。略分十義。一一大事故。二宿因深故。三顯果德故。四依因性故。五順眾生故。六穢相空故。七勝方便故。八導二乘故。九堅忍力故。十示



真法故。


一一大事者。眾生處五濁世。如囚處獄。但以罪之輕重。受等不等罰。或干小法。或投極網。罪雖不同。至於縲紲之苦。笞杖之罰。未有一人得免者。何也。以入獄者皆罪人。處人天者。皆是業報分段之身故也。然罪人一入獄。未有時刻不求出離者。則以知獄之煎苦難忍難堪。棘牆之外更有許大安樂世界故也。今眾生以煩惱為家。以生死為園觀。繫心衣冠之囚長。適情金玉之桁楊。豈知大鐵圍山。是我棘牆。三界法場之外。各各自有家鄉田地。諸佛憫此。酸心痛骨。是故為分別淨穢。指以脫歸路程。而歲久拋業之人。了無歸處。諸佛又大建宅舍以安之。一則往來獄門。為治道途。一則長伺獄外。修飾旅館。如是之恩。何身可報。嗟夫。燭三界之長夜。揭億生之覆盆。諸佛既不惜垂手。眾生獨何苦戀戀也。經曰。如來為一大事出現於世。大事者。即此事



也。眾生種種。反戀此毛頭許事。以小易大。甘心瘕死。何哉。

奇曰。囚以饑
寒死。曰瘕。

二宿因深者。有三。一者正因。二者正願。三者正行。一正因者。即是三世諸佛與諸有情自清淨體。如萬象依空。山川依地。穀依種子。華果依仁。若無此因。佛果不成。何以故。一切悲智。純依此因而得建立故。長者合論曰。如來藏身。即法身也。諸佛智海莫不居中。故稱為藏。若不見法身。一切福智大慈大悲。悉皆不辦。總屬生滅。法身者。即正因是。二正願者。如本經法藏比丘於世自在王如來所。發四十八大願。一願不成。不取菩提。此是依自性無量悲智。發如是不可思議願力。非是心外見有眾生。發願欲度。以眾生非心外故。三正行者。如本經言發是願已。如是安住種種功德。修習如是菩薩行。經於無量無數億那由他百千劫。又如一向出生菩薩經云。阿彌陀佛昔為太子。聞此微妙法



門。奉持精進。七千歲中。脅不至席。不念愛欲財寶。不問他事。常獨處止。意不傾動。復教化八千億萬那由他人。得不退轉。此是自性行持。自性精進。非是有作有為功德。雖歷億劫。不離一念。以微妙法門。離一切行。一切劫故。是謂正因正願正行。如伊三點。缺一不成。非是作得。非不作得。故先德云。根深果茂。源遠流長。宿因既深。教起亦大。誠然乎哉。○△此梵書伊字也

三顯果德者。奇曰此對下依因性非對上宿因深如華嚴經普賢行願品云。諸佛如來。因於眾生而起大悲。因於大悲。生菩提心。因菩提心。成等正覺。譬如曠野沙磧之中。有大樹王。若根得水。枝葉華果悉皆繁茂。生死曠野菩提樹王。亦復如是。一切眾生而為樹根。諸佛菩薩而為華果。以大悲水饒益眾生。則能成就諸佛菩薩智慧華果。是故當知一切諸佛取佛果者。依於眾生。若無眾生。佛果不成。譬如漢王以救民故。而有百戰。以百戰故。登大寶位。登寶位故。百姓樂業。若



無百姓。即無如上等事。究而論之。凡行一德一事一利一名者。若無眾生。皆悉不成。是故我無眾生。即不成我。眾生是依。我即是正。眾生是正。我即是依。人我平等。依正無礙。是法爾故。法爾者。即自然果德故。若向外建立。即不成果義。

縱迷心性。向外建立。亦不

在心性外。以心性無外故。

四依因性者。一切眾生。皆有如是淨性。譬一精金。冶為釵釧及溺器等。金性是一。溺器者。是器具穢。非金穢故。若加銷冶為種種玩好等物。金亦不易。生佛亦然。同一淨性。但以釵釧溺器而有差別。非是性異。是故博地凡夫十念即生者。以本淨故。阿彌陀佛欲攝受是眾生即攝受者。以眾生本淨故。如鏡中之光。不從磨得。生淨土者。非是行願及與念力所能成就。何以故。念行如鑪錘等。但能銷金。無別有金生故。

五順眾生者。謂樂兒童者當以餅果。樂婦女者必用綺羅。一切眾



生所重。惟寶玉衣食。是故有自然七寶。及與樓閣妙麗。衣服飲食等事。譬諸火宅諸兒。非羊鹿等車。決不肯出。出已。純與大車。今釋迦如來順眾生情見。說阿彌陀七寶淨土。祇為眾生見境如是。合如是說。眾生生已。各各自見細妙淨相。無可比喻。方知琉璃瓔珞瑪瑙。猶如瓦礫。如達官貴人向田舍兒說王宮精嚴。姑就彼人所極珍異者為比。向非情量所及。如對生盲說色。亦無所用其方比矣。

六穢相空者。如智論曰。譬如人有一子。喜在不淨中戲。聚土為穀。以草木為鳥獸。而生愛著。人有奪者。瞋恚啼哭。其父知己。思惟此子今雖愛著。此事易離。兒大自休。何以故。此物非真故。菩薩亦如是。觀眾生愛著不淨臭身。及種種五欲。若信等五根成就時。即能捨離。若小兒所著實是真物。雖復等至百歲。著之轉深。若眾生所著物實有者。雖得五根。亦不能捨。以諸法皆



空誑不實故。故得捨離。如來為眾生說淨土亦爾。以眾生所著非實。即易為訓化故。如人少時悅色。壯歲營官。老年嗜利。若是實可好者。不應年變月易。以變易故。說淨土時。亦悅亦營亦嗜。如夢中人。喚之即醒。若夢實者。雖喚無益。以俱非實。是故諸佛為一切眾生說如是法門。

七勝方便者。為此方便非是自力。亦非他力。緣自性海中。具有如是自在功德。一切現成。是故一句聖號。無復煩詞。十念功成。頓超多劫。如萬竅怒號。力在扶搖。因竅顯故。如幽谷洞明。功在晨曦。因谷現故。如一綫之蟻孔。能穿連山之堤。是水之力。非蟻力故。又如一葉之筆席。能運萬斛之舟。是風之力。非筆力故。總之皆是法界性海無作無為不思議力所現。非自非他。一切具足。故有如是殊勝方便。是謂捷中之捷。徑中之徑。舍此不修。是真愚癡。

千古不易之論。



八導二乘者。二乘避境趨寂。證假涅槃。不得如來法身。受業惑苦。一者無明住地。不得至見煩惱垢濁習氣臭穢究竟滅盡淨波羅蜜果。二者因無明住地。有虛妄行未除滅故。不得至見無作無行我波羅蜜果。三者因微細虛妄。起無漏業。意生諸陰未除盡故。不得至見極滅遠離樂波羅蜜果。四者變易生死。斷續流注。不得至見極無變易常波羅蜜果。以是四種業惑。未證真理。如來憫之。教令回斷滅心。修淨土行。令知即空不斷。即有不常。乘大乘智。入涅槃海。

九堅忍力者。龍樹菩薩曰。童子過四歲以上。未滿二十。名為鳩摩羅伽地。若菩薩初生菩薩家者。如嬰兒。得無生法忍。乃至十住地。離諸惡事。名為鳩摩羅伽地。欲得如是地。當學般若波羅蜜。常欲不離諸佛。問曰。菩薩當化眾生。何故常欲不離諸佛。答曰。有菩薩未入菩薩位。未得阿鞞跋致受記剎故。若遠離諸佛



· 便壞諸善根。沒在煩惱。自不能度。安能度人。如人乘船。中流壞敗。欲度他人。反自沒水。又如少湯投大冰池。雖消少處。反更成冰。菩薩未入法位。若遠離諸佛。以少功德無方便力。欲化眾生。雖少利益。反更墜落。以是故新學菩薩不應遠離諸佛。

問曰。若爾者。何以不說不離聲聞辟支佛。聲聞辟支佛亦能利益菩薩。答曰。菩薩大心。聲聞辟支佛雖有涅槃利益。無一切智故。不能教導菩薩。諸佛一切種智故。能教導菩薩。如象沒泥。非象不能出。菩薩亦如是。若入非道中。唯佛能救。同大道故。故說菩薩常欲不離諸佛。復次菩薩作是念。我未得佛眼故。如盲無異。若不為佛所引導。則無所趣。錯入餘道。設聞佛法異處行者。未知教化時節。行法多少。復次菩薩見佛。得種種利益。或眼見。心清淨。若聞所說。心則樂法。得大智慧。隨法修行而得解脫。如是等值佛無量益利。豈不一心常欲見佛。譬如嬰兒。不應



離母。又如行道。不離糧食。如大熱時。不離冷風涼水。如大寒時。不欲離火。如度深水。不應離船。譬如病人。不離良醫。菩薩不離諸佛。過於上事。何以故。父母親屬知識人天王等。皆不能如佛益利。佛益利諸菩薩離諸苦處。住世尊之地。以是因緣故。菩薩常不離佛。問曰。有為之法欺誑不真。皆不可信。云何得如願不離諸佛。答曰。福德智慧具足故。乃應得佛。何況不離諸佛。眾生有無量劫罪因緣故。不得如願。雖行福德。而智慧薄少。雖行智慧。而福德薄少。故所願不成。菩薩求佛道故。要行二忍。生忍法忍。奇曰于一行生忍故。一切不循理事耐不與較一切眾生中發慈悲心。滅無量劫罪。得無量福德。奇曰于境界難堪難禁處忍耐不行行法忍故。破諸法無明。得無量智慧。二行合和故。何願不得。以是故菩薩世世常不離諸佛。復次菩薩常愛樂念佛故。捨身受身。恆得值佛。譬如眾生習欲心重。受淫鳥身。所謂孔雀鴛鴦等。習瞋恚偏多。生毒蟲中。所謂惡龍羅剎蜈蚣毒蛇等。




。是菩薩心不貴轉輪聖王人天福樂。但念諸佛。是故隨心所重而受身形。復次菩薩常善修念佛三昧因緣故。所生常值諸佛。天如或問曰。禪宗悟達之士。既曰見性成佛。焉肯復求淨土。答曰。悟達之士。政願求生。汝但未悟。使汝既悟。淨土之趨。萬牛莫挽。問曰。學者但患大事不明。大事既明。當行佛教。隨類化身。入泥入水。不避生死。廣度生靈。何故求生淨土。厭苦趨樂。答曰。汝將謂一悟之後。習漏永除。便得不退轉耶。將謂一悟之後。更無徧學佛法修行證果等事耶。將謂一悟之後。便可上齊諸佛。入生死不受障緣之所撓耶。審如是。則諸大菩薩修六度萬行。動經恆河沙數劫者。是皆愧汝。古教有云。聲聞尚有出胎之味。菩薩亦有隔陰之昏。況近時薄解淺悟。自救不了者。縱有悟處深遠。見地高明。行解相應。志在度人者。奈何未登不退。力用未充。居此濁惡。化此剛強。此亦先聖之所未許。如以未完不固



之舟。濟多人於惡海。自他俱溺。其理必然。故往生論云。欲遊戲地獄門者。必生彼土。得無生忍已。還入生死。救苦眾生。以此因緣。求生淨土。又先聖有云。未得不退轉位。不可混俗度生。未得無生法忍。要須常不離佛。譬如嬰兒。常不離母。又如弱羽。只可傳枝。今此國中。釋迦已滅。彌勒未生。四惡趣苦。因果牽纏。外道邪魔。是非扇亂。美色淫聲之相惑。惡緣穢觸之交侵。既無現佛可依。又被境緣所撓。初心悟達之人。豈有不遭其退敗者。所以世尊慇懃指歸極樂。良有以也。蓋彼彌陀。現在說法。樂土境緣。種種清淨。倘依彼佛。忍力易成。高證佛階。親蒙授記。然後出化眾生。去來無礙。多見今之禪者。灼然今時不究如來之禪病了義。不知達摩之玄機。空腹高心。習為狂妄。見修淨土。則笑之曰。彼學愚夫愚婦之所為。余嘗論其非鄙愚夫愚婦。乃鄙文殊普賢龍樹馬鳴等也。非特自迷正道。自失善根。自喪慧身。自亡



佛種。且成謗法之業。又招鄙聖之殃。佛祖視為可哀憐者。於是永明和尚。深憐痛哀。剖出心肝。主張淨土。既以自修。又以化世。故其臨終有種種殊勝相現。舍利鱗砌。徑生極樂上品。乃至閻羅以為希有。圖像禮敬。夫永明既悟達摩直指之禪。又能致身於極樂上品。以此解禪者之執情。以此為末法之勸信。是真大有功於宗教者。豈特永明為然。如死心新禪師作勸修淨土之文。又如真歇了禪師作淨土說有云。洞下一宗。皆務密修。其故何哉。良以念佛法門。徑路修行。正按大藏接上上根器。傍引中下之機。又云。宗門大匠。已悟不空不有之法。秉志孜孜於淨業者。以淨業見佛。尤簡易于宗門故。又云。乃佛乃祖。在教在禪。皆修淨業。同歸一源。入得此門。無量法門悉皆能入。至如天衣懷禪師。圓照本禪師。慈受深禪師。南嶽思禪師。法照禪師。淨靄禪師。淨慈大通禪師。天台懷玉禪師。梁道珍禪師。唐道綽禪師。



毗陵法真禪師。姑蘇守訥禪師。北磻簡禪師。天目禮禪師等諸大老。皆是禪門宗匠。究其密修顯化。發揚淨土之旨。則不約而同。廣如彼文。不能盡錄。是故當知禪宗密修。不離淨土。初心頓悟。未出童真。入此門者。方為堅固不退之門。

十示真法者。一切修行法門。言空即斷。言有即常。未為究竟。唯此念佛三昧。即念而淨。淨非是無。即淨而念。念非是有。達淨無依。即是念體。了念本離。即是淨用。是故非淨外有念能念于淨。若淨外有念。念即有所。所非淨故。非念外有淨能入諸念。若念外有淨。淨即有二。二非淨故。當知諸佛順寂滅心而嚴淨土。是故念淨土者當入一切寂滅門。諸佛順常樂我淨心而嚴淨土。是故念淨土者當入一切常樂我淨門。諸佛順平等眾生心而嚴淨土。是故念淨土者當入一切平等眾生門。諸佛順大悲智業而嚴淨土。是故念淨土者當入一切大悲智業門。諸佛順無作無為不可思



議業而嚴淨土。是故念淨土者當入一切無作無為不可思議門。諸佛順塵勞煩惱性而嚴淨土。是故念淨土者當入一切塵勞煩惱門。諸佛順微塵芥子相而嚴淨土。是故念淨土者當入一切微塵芥子門。以上諸大法門。但單傳直指如是如是一聲阿彌陀佛。皆悉證入。亦無能證所證之相。若不爾者。則是有餘之淨。念佛三昧。即不如是。

第三部類門

夫如來說教。廣有多門。經中或偶一拈題。或因緣舉出者。不可勝載。唯念佛一門。頻形讚歎。如高巒之峙平原。躍空而出。類金星之晃沙磧。映日即明。故知法門殊勝。未有逾此一門者也。今約諸經。但言西方大事者。一概收入。分經緯二義。說文曰。織有經。集絲為之。經常而緯變。是故以經則非專談安養者不收。以緯則凡泛舉念佛者亦入。登蔥山而樵玉。首採羊脂。泛溟海



而斲香·忍捨牛頭·孔子曰·爾所不知·人其舍諸·至於聞所未聞·不無望於來哲。一經中之經·二經中之緯·三緯中之經·四緯中之緯。

一經中之經者·一無量清淨平等覺經·二無量壽經·三阿彌陀經·四無量壽莊嚴經·五出寶積第十八經·名無量壽如來會·五經同一梵本·前四譯稍不精·六即大阿彌陀經·龍舒居士將前四譯和會者·佛在王舍城靈鷲山·為阿難慈氏等說·中間出寶積者·旨富詞法·不知龍舒何以不見此本·一佛說阿彌陀經·二稱讚淨土佛攝受經·二經同一梵本·初經簡淨愈於後譯·佛在舍衛國祇樹給孤獨園·為舍利弗說·讀誦者多主此經·一觀無量壽佛經·佛在王舍城耆闍崛山中·為韋提希夫人說·經中言十六妙觀·修持法門·備載此經·故孤山判為定善·然三種經·皆專為西方起教·如天中之天·人中之王·不必自相排抑·譬如太虛空·一尚



不得。豈有二哉。經中妙義。具見餘門。今不贅述。

二經中之緯者。一鼓音聲王經。佛在瞻波大城伽伽靈池。與比丘百人說。中云若有四眾受持阿彌陀佛名。臨命終時。佛與聖眾。接引往生。一後出阿彌陀佛偈經。自惟念法比丘。乃從世饒王。至弘此無量誓。世世稽首行。共五十六句。始終唯偈。二經亦專言淨土。言義較前甚略。判入緯類。又鼓音意重持呪。偈經是伽陀部。非教本故。

三緯中之經者。一華嚴經。普賢菩薩勸進善財童子海會大眾發十大願。至臨命終時。一切諸根悉皆散壞。一切威勢悉皆退失。惟此願王。不相捨離。於一切時。引導其前。一剎那間。即得往生極樂世界。其人自見生蓮華中。蒙佛授記。得授記已。經無數劫。普於十方不可說不可說世界。以智慧力。隨眾生心而為利益。乃至能於煩惱大苦海中。拔濟眾生。令其出離。皆得生於極樂世



界。又解脫長者云。我若欲見安樂世界無量壽如來。隨意即見。如是十方一切世界所有如來。我若欲見。隨意即見。我能了知如來國土莊嚴神通等事。無所從來。亦無所去。無有行處。亦無住處。亦如己身。無來無去。無行住處。一法華經云。聞是經典。如說修行。於此命終。即往安樂世界阿彌陀佛。大菩薩眾圍繞住處。生蓮華中寶座之上。得菩薩神通無生法忍。得是忍已。眼根清淨。以是清淨眼根。見七百萬二千億那由他恆河沙等諸佛如來。一楞嚴經。大勢至白佛。我憶往昔恆河沙劫。有佛出世。名無量光。十二如來相繼一劫。其最後佛。名超日月光。彼佛教我念佛三昧。譬如有人。一專為憶。一人專忘。如是二人。若逢不逢。或見非見。二人相憶。二憶念深。如是乃至從生至生。同於形影。不相乖異。十方如來憐念眾生。如母憶子。若子逃逝。雖憶何為。子若憶母。如母憶時。母子歷生。不相違遠。若眾生心。



憶念佛。現前當來。必定見佛。去佛不遠。不假方便。自得心開。如染香人。身有香氣。此則名曰香光莊嚴。我本因地。以念佛心。入無生忍。今於此界。攝念佛人。歸於淨土。佛問圓通。我無選擇。都攝六根。淨念相繼。得三摩地。斯為第一。一寶積經。佛告父王。一切眾生。皆即是佛。汝今當念西方世界阿彌陀佛。常勤精進。當得佛道。王言。一切眾生云何是佛。佛言。一切法無生。無動搖。無取捨。無相貌。無自性。可於此佛法中。安住其心。勿信於他。爾時父王與七萬釋種。聞說是法。信解歡喜。悟無生忍。佛現微笑。而說偈曰。釋種決定智。是故於佛法。決信心安住。人中命終已。得生安樂國。面奉阿彌陀。無畏成菩提。又佛告彌勒。發十種心。往生極樂。何者為十。一者於諸眾生起於大慈。無損害心。二者於諸眾生起於大悲。無逼惱心。三者於佛正法。不惜身命。樂守護心。四者於一切法。發生勝忍



· 無執著心 · 五者不貪利養恭敬尊重 · 淨意樂心 · 六者求佛種智 · 於一切時無忘失心 · 七者於諸眾生 · 尊重恭敬 · 無下劣心 · 八者不著世論 · 於菩提分 · 生決定心 · 九者種諸善根 · 無有雜染 · 清淨之心 · 十者於諸如來 · 捨離諸相 · 起隨念心 · 是名菩薩發十種心 · 由是心故 · 當得往生 · 若人於此十心隨成一心 · 樂欲往生彼佛世界 · 若不得生 · 無有是處 · 一般舟三昧經 · 佛告跋陀耶菩薩 · 若沙門白衣所 · 聞西方阿彌陀佛剎 · 常念彼方佛 · 不得缺戒 · 一心念 · 若一日晝夜 · 若七日七夜 · 過七日已後 · 見阿彌陀佛 · 於覺不見 · 於夢中見之 · 譬如夢中所見 · 不知晝 · 不知夜 · 亦不知內 · 亦不知外 · 不用在冥中故不見 · 不用有所蔽礙故不見 · 如是跋陀耶 · 菩薩心當作是念時 · 諸佛國境界名 · 大山須彌山 · 其有幽冥之處 · 悉為開闢 · 目亦不蔽 · 心亦不礙 · 是菩薩摩訶薩不持天眼徹視 · 不持天耳徹聽 · 不持神足到於佛剎 · 不於是間終



· 生彼間佛刹乃見· 便於是間坐· 見阿彌陀佛· 聞所說經· 悉受得· 從三昧中· 悉能具足為人說之· 一觀佛三昧經· 文殊自敘宿因· 謂得念佛三昧· 當生淨土· 世尊復記之曰· 汝當往生極樂世界· 一大集經賢護品云· 求無上菩提者· 應修念佛禪三昧· 偈云· 若人稱念彌陀佛· 號曰無上深妙禪· 至心想像見佛時· 即是不生不滅法· 一十住斷結經云· 時座中有四億眾· 自知死此生彼· 牽連不斷· 欲為之源· 樂生無欲國土· 佛言· 西方去此無數國土· 有佛名無量壽· 其土清淨· 無淫怒癡· 蓮華化生· 不由父母· 汝當生彼· 一如來不思議境界經云· 菩薩了知諸佛· 及一切法· 皆唯心量· 得隨順忍· 或入初地· 捨身速生妙喜世界· 或生極樂淨土中· 一隨願往生經言· 佛國無量· 專求極樂者何· 一以因勝· 十念為因故· 一以緣勝· 四十八願普度眾生故· 一稱揚諸佛功德經云· 若有得聞無量壽如來名者· 一心信樂· 其人命終· 阿彌



陀佛與諸比丘住其人前。魔不能壞彼正覺心。又云。持諷誦念。此人當得無量之福。永離三途。命終之後。往生彼剎。一大雲經云。善男子。於此西方有一世界。名曰安樂。其上有佛。號無量壽。於今現在常為眾生講宣正法。告一菩薩。汝善男子。娑婆世界釋迦牟尼佛。為諸薄福鈍根眾生。說大雲經。汝可往彼。至心聽受。是彼菩薩欲來至此。故先現瑞。善男子。汝觀彼土諸菩薩身。滿足五萬六千由旬。世尊。彼來菩薩名號何等。何緣而來此土。將非為度眾生故來。唯願如來為諸眾生分別解說。善男子。彼土菩薩欲聞淨光受記蒞事。並欲供養如是三昧。是故而來。善男子。是菩薩名無邊光。通達方便。善能教導。一入楞伽經云。大慧汝當知。善逝滅度後。南天竺國中。大名德比丘。厥號為龍樹。能破有無宗。世間中顯我。無上大乘法。得初歡喜地。往生安樂國。一大悲經云。我滅度後。北天竺國有比丘名祈婆伽。修



習無量最勝善根已。而命終生於西方過百千億世界無量壽佛國。以後成佛。號無垢光如來。

四緯中之緯者。一如華嚴毗盧遮那品云。爾時大威光童子。見波羅蜜善根莊嚴王如來成等正覺。現神通力。即得念佛三昧。名無邊海藏門。又光明覺品云。爾時光明過千世界。乃至一切處文殊菩薩。各於佛所。同時發聲。說此頌言。一切威儀中。常念佛功德。晝夜無暫斷。如是業應作。又賢首品云。見有臨終勸念佛。又示尊像令瞻敬。俾於佛所深歸仰。是故得成此光明。又十無盡藏品第八念藏云。此念有十種。所謂寂靜念。清淨念。不濁念。明徹念。離塵念。離種種念。離垢念。光耀念。可愛樂念。無能障礙念。又兜率偈讚品離垢幢菩薩云。以佛為境界。專念而不捨。此人得見佛。其數與心等。又十回向品第十回向云。以法施回向。願得憶念與法界等。無量無邊世界。未來現在一切諸佛。又



十地品中。從初至末。地地皆云。一切所作。不離念佛。又佛不思議法品云。如來有十種佛事。一者若有眾生專心憶念。則得現前。二者若有眾生心不調順。則為說法等。又入法界品云。德雲比丘告善財言。善男子。我得自在決定解力。信根清淨。智光照耀。普觀境界。離一切障。具清淨行。往詣十方。供養諸佛。常念一切諸佛如來。總持一切諸佛正法。常見一切諸佛。隨諸眾生種種心樂。示現種種成正覺門。於大眾中而師子吼。善男子。我唯得此憶念一切諸佛境界智慧光明普見法門。所謂智光普照念佛門。常見一切諸佛國土種種宮殿悉嚴淨故。令一切眾生念佛門。隨諸眾生心之所樂。皆令見佛得清淨故。令安住力念佛門。令入如來十力中故。令安住法念佛門。見無量佛聽聞法故。照耀諸方念佛門。悉見一切諸世界中。等無差別諸佛海故。入不可見處念佛門。悉見一切微細境中。諸佛自在神通事故。住於諸劫念佛門。



· 一切劫中。常見如來諸所施為。無暫捨故。住一切時念佛門。
於一切時。常見如來。親近同住不捨離故。住一切剎念佛門。
一切國土咸見佛身。超過一切。無與等故。住一切世念佛門。
隨於自心之所欲樂。普見三世諸如來故。住一切境念佛門。
普於一切諸境界中。見諸如來次第現故。住寂滅念佛門。
於一念中。見一切剎一切諸佛示涅槃故。住遠離念佛門。
於一念中。見一切佛從其所住而出去故。住廣大念佛門。
心常觀察一一佛身充徧一切諸法界故。住微細念佛門。
於一毛端有不可說如來出現。悉至其所而承事故。住莊嚴念佛門。
於一念中。見一切剎皆有諸佛成等正覺。現神變故。住能事念佛門。
見一切佛出現世間。放智慧光。轉法輪故。住自在心念佛門。
知隨自心所有欲樂。一切諸佛現其像故。住自業念佛門。
知隨眾生所積集業。現其影像。令覺悟故。住神變念佛門。
見佛所坐廣大蓮華。周徧法界而開敷故。住虛



空念佛門。觀察如來所有身雲。莊嚴法界虛空界故。一法華經云。若有因緣。獨入他家。一心念佛。乞食無侶。一心念佛。又云。若人散亂心。入于塔廟中。一稱南無佛。皆已成佛道。一淨名經云。寶積當知。直心是菩薩淨土。菩薩成佛時。不諂眾生來生其國。深心是菩薩淨土。菩薩成佛時。具足功德眾生來生其國。大乘心是菩薩淨土。菩薩成佛時。大乘眾生來生其國。布施是菩薩淨土。菩薩成佛時。一切能捨眾生來生其國。持戒是菩薩淨土。菩薩成佛時。行十善道。滿願眾生來生其國。忍辱是菩薩淨土。菩薩成佛時。三十二相莊嚴眾生來生其國。精進是菩薩淨土。菩薩成佛時。勤修一切功德眾生來生其國。禪定是菩薩淨土。菩薩成佛時。攝心不亂眾生來生其國。智慧是菩薩淨土。菩薩成佛時。正定眾生來生其國。四無量心是菩薩淨土。菩薩成佛時。成就慈悲喜捨眾生來生其國。四攝法是菩薩淨土。菩薩成佛時。解



脫所攝眾生來生其國。方便是菩薩淨土。菩薩成佛時。於一切法方便無礙眾生來生其國。三十七品是菩薩淨土。菩薩成佛時。念處正勤神足根力覺道眾生來生其國。迴向心是菩薩淨土。菩薩成佛時。得一切具足功德國土。說除八難是菩薩淨土。菩薩成佛時。國土無有三惡八難。自守戒行。不譏彼缺是菩薩淨土。菩薩成佛時。國土無有犯禁之名。十善是菩薩淨土。菩薩成佛時。命不中天。大富梵行。所言誠諦。常以軟語。眷屬不離。善和諍訟。言必饒益。不嫉不恚。正見眾生來生其國。如是寶積。菩薩隨其直心。則能發行。隨其發行。則得深心。隨其深心。則意調伏。隨意調伏。則如說行。隨如說行。則能迴向。隨其迴向。則有方便。隨其方便。則成就眾生。隨成就眾生。則佛土淨。隨佛土淨。則說法淨。隨說法淨。則智慧淨。隨智慧淨。則其心淨。隨其心淨。則一切功德淨。是故寶積。若菩薩欲得淨土。當淨其心。隨



其心淨。則佛土淨。又云。菩薩成就八法。於此世界。行無瘡疣。生於淨土。何等為八。饒益眾生而不望報。代一切眾生受諸苦惱。所作功德盡以施之。等心眾生。謙下無閔。於諸菩薩。視之如佛。所未聞經。聞之不疑。不與聲聞而相違背。不嫉彼供。不高己利。而於其中調伏其心。常省己過。不訟彼短。恆以一心求諸功德。是為八。一涅槃經云。菩薩六念。念佛第一。又云。繫念思惟因緣力故。得斷煩惱。一大悲經云。一稱佛名。以是善根。入涅槃界。不可窮盡。一大般若經云。佛告曼殊室利。菩薩能正修行一相莊嚴三昧。疾證菩提。修此行者。應離喧雜。不思眾生相。專心繫念於一如來。審取名字。善想容儀。即為普觀三世一切諸佛。即得諸佛一切智慧。一坐禪三昧經曰。菩薩坐禪。不念一切。惟念一佛。即得三昧。一增一阿含經云。四事供養閻浮提一切眾生。若有稱佛名號。如穀乳頃。功德過上不可思議。一



文殊般若經云。佛告文殊。欲入一行三昧者。應處空閒。捨諸亂意。不取相貌。繫心一佛。專稱名字。隨彼方所。端身正向。能于一佛。念念相續。即是念中。能見過去未來現在諸佛。念一佛功德。與念無量佛功德無二。阿難所聞佛法。猶住量數。若得一行三昧。諸經法門。一一分別。皆悉了知。晝夜宣說。智慧辯才終不斷絕。阿難多聞辯才。百千等分不及其一。一大集經云。若人專念一方佛。或行或坐。至七七。現身見佛。即得往生。一法華三昧觀經云。十方眾生一稱南無佛者。皆當作佛。唯一大乘。無有二三。一切諸法一相一門。所謂無生無滅。畢竟空相。習如是觀。五欲自斷。五蓋自除。五根增長。即得禪定。一那先經云。王問那先。人生造惡。臨終念佛。得生佛國。我不信是語。那先答言。如持大石置于船上。因得不沒。人雖本惡。因念佛故。不入泥犁。其小石沒者。如人作惡。不知念佛。便入泥犁中。



頌曰·

如來金口言·讚歎西方土·如入長安城·東西南北入·
入已即一城·無別天子都·普賢佛長子·文殊七佛師·
授記及迴向·是果位往生·釋種得法忍·善財證佛果·
面奉阿彌陀·是菩薩往生·龍樹破有無·祈婆最勝根·
皆得佛授記·是禪師往生·聞佛心信樂·誦念與持諷·
大石置船上·是下劣往生·阿難世多聞·佛子中第一·
不如念一佛·頓了諸經法·云何義解家·得輕易念佛·
諸正念法門·經中皆悉載·但一大乘法·無二亦無三·
奉勸悟達士·趁時歇狂解·一心念阿彌·蓮華念念生·
此是常寂光·非報非方便·作是觀為正·勿妄生分別·
禪教律三乘·同歸淨土海·一切法皆入·是無上普門·
教海義無量·甕觀拾少許·一鬻徧鼎味·是中有全藏·



第四教相門

夫一大藏教。如器銜空。空無相體。器有方圓。器盡空除。緣亡教滅。是故隨緣普應。則涅槃真如一器也。稱智自在。則名相專持一空也。藥無定方。定方以病。豈謂玉屑珊瑚無上妙藥。概以治四百四病哉。夫病除藥貴。便溺即是醍醐。異證同方。參苓化為酖毒。何況無上醫王。治三乘出世之藥。療人天聲聞凡夫等瘡者哉。故先德約教。或一或多。名相雖別。理趣是同。道人不揣固陋。竊附先哲。分別諸句。用彰一乘。庶使觀者知淨土法門。攝一代時教。毋為僮侗禪宗。輕狂義虎。所誑惑云爾。一假有教原名。二趨寂教。三有餘教上三教分攝。四無餘教。五頓悟教。六圓極教上三教全攝。○純有。即人天乘。趨寂等五。即小始終頓圓也。若論判教。須約化儀四教。化法四教。通別五時。方可全收一代所說法門。今僅依五教。尚可商。惜中即四十餘歲已棄世。未入台宗之室也。又純有不能出世。不得立教。祇可附在三藏教耳。



一假有教者。為諸凡夫耽著愛染。造諸黑業。如來悲憫。為說地獄苦。餓鬼苦。畜生苦。無福德著我所苦。欲生人天。當修善根。如佛初成道為提謂說世間因果。五百賈人同受五戒。先懺悔五逆十惡謗法等罪。是為有教。觀經修三福中。首言孝養父母。奉事師長。慈心不殺。修十善業。又無量壽經。極言五惡五痛五燒之苦。教化群生。令持五善。亦攝此義。然是經為求往生。遮諸不善。非是忻心人天小果。修持是同。證果即別。如楞嚴華嚴諸方等雖不單說。亦兼帶之。不名假有。觀經鈔曰。圓頓行者。豈違小乘出家之式。三歸眾戒威儀等事。又曰。得前前者不得後後。得後後者必得前前。何以故。一切諸佛無不以十善而得度故。華嚴經曰。十不善業道。是地獄畜生餓鬼受生之因。十善業道。是人天乃至有頂處受生之因。又此上品十善業道。以智慧修習。心狹劣故。怖三界故。闕大悲故。從他聞聲而了解故。成聲聞乘。



· 又此上品十善業道。修治清淨。不從他教。自覺悟故。大悲方便不具足故。悟解甚深因緣法故。成獨覺乘。又此上品十善業道。修治清淨。心廣無量故。具足悲愍故。方便所攝故。發生大願故。不捨眾生故。希求諸佛大智故。淨治菩薩諸地故。淨修一切諸度故。成菩薩廣大行。又此上品十善業道。一切種清淨故。乃至證十力無畏故。一切佛法。皆得成就。是故我今等行十善。應令一切具足清淨。乃至菩薩如是積集善根。成就善根。增長善根。· 思惟善根。繫念善根。分別善根。愛樂善根。修習善根。安住善根。菩薩摩訶薩如是積集諸善根已。以此善根所得依果。奇曰依報果修菩薩行。於念念中。見無量佛。如其所應。承事供養。又云。雖無所作。而恆住善根。又云。雖知諸法無有所依。而說依善法而得出離。奉勸悟達之士。勿輕戒律。勿貪虛名。猛省永嘉豁達之言。早尋白社不請之友。蓮邦不遠。請即加鞭。



二趨寂教者。即二乘寂滅之教。趨向涅槃。於嚴土利他。不生喜樂。是為小乘。與淨土大乘之教正反。今云分攝者。以無量壽經及觀經中。皆有須陀洹。乃至得阿羅漢果故。先德云。小乘不生。據決定性不生。此中明生。為在此間先發大乘心。熏成種子。退心下地。要由垂終回小向大故生。問曰。既回心向大。何故至彼復證小果。釋曰。以退大既久。習小功深。是故彼佛稱習說小。且令證果。又此證小果者。不守小位而住。還起大心。進行彌速。或五劫。或十劫。得成初地。如是階級。猶是殊勝。是故不同。又云。經中亦有頻婆證阿那含。然非此教正所被機。今從正為韋提希等宣淨土觀。尚非通別。豈是小乘。如迦文出世。亦有聲聞畢竟大乘。是正以羊鹿等車。非實車故。

三有餘教者。了二空真理。修習萬行。趣大乘佛果。唯不許闡提。賢首名此為大乘始教即天台通教及別接通義耳而未廣明此教亦有四門故未盡理

二乘成佛。謂闡提無性。二乘定性。決不可成。未盡大乘真理。



故名有餘。此經言除五逆不生。又云二乘種不生。教義似同。二乘上已釋竟。言五逆不生者。以謗法故。以無信心。非是無性決不可成故。觀經中毀戒眾生臨終惡相現者。聞讚佛功德。地獄猛火化清涼風。乃至五逆十惡具足十念者。見金蓮華猶如日輪。一剎那頃皆得往生。此是自性不思議功德。仗不思議佛力。得顯現故。若不具足佛性。如頑石濁滓。豈能透月。當知念能顯性。如是往生。是性力故。如日能顯空。空非因日。是故一切眾生皆成佛。故不同始教有餘之教。

賢首名終教即天台別教及圓接別意耳
四無餘教者。一切眾生平等一性。悉當成佛。是為大乘極則之教。

· 唯一自心為教體。故云無餘。今此淨土法門。依正信願等法。究極皆歸一心。故經中言一心不亂。即得往生。又大本三輩生彼者。皆云發無上菩提之心。菩提心者。即佛性是。華嚴經曰。菩提心者猶如種子。能生一切諸佛法故。猶如良田。能長眾生白淨



法故。猶如大地。能持一切世間故。猶如淨水。能洗一切煩惱垢故。猶如大風。普于世間無所礙故。猶如盛火。能燒一切諸見薪故。廣在彼經。當知菩提心是鐵礮中利藥。念佛是藥綫。華嚴初發心時便成正覺。即是此義。菩薩五位加行。亦只是藥中引綫耳。無量妙行。詎有加一行三昧之外者哉。

五頓悟教者。長者論曰。但一念不生。即名為佛。不從地位漸次而說。故立為頓教。如思益經。得諸法正性者。不從一地至一地。楞伽經曰。十地則為初。初則為八地。乃至無所有何次。當知頓者。即是不歷階級之義。天台觀經疏曰。頓悟漸入。此即頓教。正為韋提希及諸侍女。並是凡夫。未證小果。故知是頓。不從漸入。鈔曰。今經頓者。乃于化法。以圓為頓。何故。無生忍位。別在初地。圓在初住。別教凡夫經無數劫。方至此位。唯有圓教。即生可入。今就韋提希即身得忍。判為頓者。是圓頓故。又

唯其以圓為頓故同



達摩之禪

他經說受菩薩戒。身身相續。戒行不缺。經一劫二劫三劫始至初發心住。如是修行十波羅蜜等無量行願。相續不斷。滿一萬劫。至第六正心住。從是修行增進。始至第七不退住。今此經中五逆十惡持名即生。皆得不退。正合頓義。如觀經中是心作佛。是心是佛等語。皆直指心宗。更無迂迴。且如阿彌一聲。是非俱剗。何等直截。故古人謂之頭則公案。鑊湯波底。豈貯寒冰。烈火燄中。詎容寸草。達摩復起。不易吾說。更或踟躕。萬里千年。

六圓極教者。慈恩通贊曰。此方先德總判經論有四宗。一立性宗。二破性宗。三破相宗。四顯實宗。涅槃法華華嚴等。是顯于真實中道義。捨化城而歸寶所。故知彌陀經乃第四宗也。又以教準宗。宗有其八。一我法俱有宗。二有法無我宗。三法無去來宗。四現通假實宗。五俗妄真實宗。六諸法但名宗。七勝義皆空宗。八應理圓實宗。如華嚴及彌陀經。是第八宗收。又若真歇了禪師

彌陀同華嚴此句具眼



等。以帝網千珠。發明淨土圓融之義。諸書具載。近有老宿以華嚴配此經。謂圓全攝此。此分攝圓。得圓少分。分屬圓故。據經判義。甚有旨趣。但圓極義者。無全無分。如月在川。川川皆有全月。乃至瓶池寸水亦是全月。無分月故。如風在樹。樹樹皆有全風。乃至片葉莖草亦是全風。無分風故。若圓中有分者。圓即有段。若分中非全者。圓即不徧。分全雙乖。圓義不成。今約蓮宗圓極。分五種義。一剎海相含義。二三世一時義。三無情作佛義。四依正無礙義。五充徧不動義。一剎海相含義者。一切諸佛報化國土。互相攝入。全他全此。而無留礙。若計不相入者。此即情見。情見非實。如一室中。含一虛空。其中若人若畜若鬼若蟲若几若瓶若架之類。皆依虛空建立。虛空屬人時。則諸鬼畜蟲几瓶架所依之虛空。一切攝入人中。虛空屬鬼時。則諸人畜蟲几瓶架所依之虛空。一切攝入鬼中。虛空屬蟲時。諸人鬼畜几瓶架

破得確甚



所依之虛空。一切攝入蟲中。乃至虛空屬架時。則諸人畜鬼蟲几瓶所依之虛空。一切攝入架中。參而不雜。離亦不分。非入非不入。是故經云。國土光淨。徧無與等。徹照無量無數不可思議世界。如明鏡中現其形像。當知淨方濁土。交光相入。如千燈一室故。二三世一時義者。眾生情見。執有時分過現未來等事。約實相中。即無時體可得。何以故。若計晦明是時者。晦明則是業相。如病眼見青。非定相故。若計老少是時者。老少則是幻質。如敝網裹風。非定質故。云何是中而有實義。今約延促相入二義。以明時體。一促中有延。二延中有促。一促中有延者。如人假寐。夢經種種城邑聚落。及見故人。悲笑分明。經歷時月。醒而問人。熟睡幾時。侍者答言。數千錢時。其人自思假寐無幾。云何經歷如許變態。了了記憶。非病非醉。展轉追惟是義。終不可得。二延中有促者。如人二十忽得顛病。吞刀捉火。或為人言未來



事。或對妻子嬉笑如常。及生男女。或忽能文。著種種書。經三十年。遇一異人呪水與飲。其人如睡忽覺。即以二十為昨日事。家人屈指為計歲月。出示子女及種種書。其人自思。本無歲月。焉有是事。亦不復記病與不病。以是二喻。進退互觀。畢竟無有三世可得。是故經云。觀彼久遠。猶若今日。經須臾間。歷事諸佛。徧十方界。是謂三世無間。三世無間者。時體不可得故。三無情作佛義者。權教中言。有情有佛性。無情無佛性。一切草木器界。不能成道及轉法輪。此是執情強計。屬意即有。屬物即無。透徹之極清涼國師當讓一義不了諸法皆住法位。何以故。意是色故。是空根故。是往古來今故。是無情故。一無一切無故。青黃是意故。風鳴谷響是意故。草木瓦礫是意故。是有情故。一有一切有故。故知情之為情。亦可說自。亦可說物。不應說言誰無誰有。如一夫妻共生一子。不應說言誰生誰不生。夫髮毛爪齒。亦是無情。與我俱佛耶。抑



與我不俱佛耶。夢中見山見水見木見石。亦是無情。是情想攝耶。
· 抑非情想攝耶。當知是中尚無是我非我。云何更計有情無情。
是故經中道場寶樹。能淨諸根。風枝水響。咸宣妙法。何等明白無一物非
佛身。揚決無一物不轉法輪。豈是情見妄知所能計度。四依正無礙義
者。依是器界。正是身根。若約凡情。即橫計有依有正。是義非
實。何以故。若言虛空是依者。如人張口。則虛空入。乃至毛孔
骨節心腹之內。皆有虛空。是依耶。是正耶。若言地水火風是依
者。如人涎液入器為水。髮焦為土。兩手相觸成火。嗑氣為風。
是依耶。是正耶。是故經中無量寶華。一一華中出三十六億那由
他百千光明。一一光明出三十六億那由他百千佛。普為十方。說
一切法。以佛力故。現有寶華。以寶華故。復現諸佛。是故當知
盡一剎是佛身。剎剎皆然。無一身非佛剎。身身皆然。非是佛神
力變現。唯一真法界智為依正故。五充徧不動義者。眾生妄計佛




身即有去來。而實佛身無去無來。亦無不去不來。譬如鳥飛空中。一日千里。空非隨鳥。鳥不離空。是故經言。阿彌陀佛常在西方。又言至一切行人之所。如涅槃經。佛言。善男子。波羅奈城。有優婆夷。已于過去無量先佛。種諸善根。是優婆夷。夏九十日。請命眾僧。奉施醫藥。是時眾中有一比丘。身嬰重病。良醫診之。當須肉藥。若不得肉。病將不痊。時優婆夷尋自取刀。割其髀肉。切以為臠。送病比丘。比丘服已。病即得差。是優婆夷患瘡苦惱。不能堪忍。即發聲言。南無佛陀。南無佛陀。我于爾時在舍衛城。聞其音聲。於是女人。起大慈心。是女尋見我持良藥塗其瘡上。還合如本。我即為其說種種法。聞法歡喜。發阿耨多羅三藐三菩提心。善男子。我于爾時。實不往至波羅奈城。持藥塗是優婆夷瘡。當知皆是慈善根力。令彼女人見如是事。復次善男子。調達惡人貪不知足。多服酥故。頭痛腹滿。受大苦惱。



發如是言。南無佛陀。南無佛陀。我時住在優禪尼城。聞其音聲。即生慈心。爾時調達尋便見我往至其所。手摩頭腹。授與鹽湯。而令服之。服已平復。善男子。我實不往調達所。摩其頭腹。授湯令服。當知皆是慈善根力。令調達見如是事。復次善男子。憍薩羅國有五百賊。群黨鈔掠。波斯匿王遣兵伺捕。得已。挑目。逐著黑闇叢林之下。受大苦惱。各作是言。南無佛陀。南無佛陀。啼哭號咷。我時住在祇桓精舍。聞其音聲。即生慈心。時有涼風吹香山中種種香藥。滿其眼眶。尋還得眼。如本不異。諸賊開眼。即見如來住立其前。而為說法。賊聞法已。發阿耨多羅三藐三菩提心。善男子。我于爾時實不作風吹香山中種種香藥。住其人前而為說法。當知皆是慈善根力。令彼群賊見如是事。如上的法。豈容思議。總之皆是一真法界。不得言是自心感現。亦不得言心佛和合。以佛地中。離自離他。離和合故。是故入此門者

情見分別計度



亦本離自他和合亦即非情見所能分別計度也
· 莫同凡夫情見· 分別計度· 如清涼云· 阿彌陀佛· 即本師盧舍

那· 猶屬情量· 何以故· 十方世界· 惟一智境· 無別佛故·


奇問· 論中所引涅槃經言慈善根力· 或者如來法性無人我遠邇· 眾生受苦· 皆如來性中境相耶· 答· 此止說得正因佛性· 然論正因· 寧獨如來· 雖眾生之性亦爾· 但眾生為業所障· 於他人受苦· 縱親詣彼所· 尚不克救· 況不往而獲免耶· 教中言八地以上菩薩· 一呼其名· 即蒙利益· 以分別業盡· 法爾如然· 故杜順和尚· 一履懸門· 十年無人竊去· 自云多生不作盜業· 故得如是報· 宋人有鄒囊陀者· 人一見其面· 輒得禍· 近時有某妃子· 貧甚· 凡手所觸物· 尋即廢去· 不能自存· 此非多生業力之故歟· 佛善根力· 合得如是報· 無足怪者·

第五理諦門

夫即性即相· 非有非空· 理事之門不礙· 遮表之詮互用· 言無者· 如水月鏡華· 不同龜毛兔角· 言有者· 似風起雲行· 不同金堅石礙· 是故若滯名著相· 即有漏凡夫· 若撥果排因· 即空見外道· 夢中佛國· 咸願往生· 泡影聖賢· 誓同瞻仰· 說真說相· 似完



膚之加瘡。道有道無。類紅鑪之點雪。爰約真諦。分別四門。
一即相即心門。二即心即相門。三非心非相門。四離即離非門。
一即相即心門者。淨土境觀要門曰。經云。心包太虛。量周沙界。
·又云。心如工畫師。造種種五陰。一切世間中。莫不從心造。
是故極樂國土。寶樹寶地寶池。彌陀海眾正報之身。三十二相等
·皆是我心本具。皆是我心造作。不從他得。不向外來。能了此
者。·方可論于即心觀佛。故觀經云。諸佛如來是法界身。入一切
眾生心想中。至八十隨形好句。天台大師作二義釋。一約感應道
交釋。二約解行相應釋。若無初釋。則觀非觀佛。若無次釋。則
心外有佛。至釋是心作佛。是心是佛。從修觀邊說。名為心作。
從本具邊說。名為心是。義徧初後。例合云。是心作日。是心是
日。乃至是心作勢至。是心是勢至。以至九品之中。隨境作觀。
莫不咸然。又曰。觀心觀佛。皆屬妄境。意在妄即真。不須破



妄。然後顯真。故荊溪云。唯心之言。豈唯真心。須知煩惱心徧。子尚不知煩惱心徧。安能了知生死色徧。色何以徧。色即心故。若爾。不須攝佛歸心。方名約心觀佛。如此明之。非但深得佛意。亦乃迥出常情。宗鏡錄曰。自心徧一切處。性相雙明足破兩家界畔所以若見他佛。即是自佛。不壞自他之境。唯是一心。眾生如像上之模。若除模。既見自佛。亦見他佛。何者。雖見他佛。即是自佛。以自鑄出故。亦不壞他佛。以於彼本質上雖變起他佛之形。即是自相分故。又曰。自心感現。佛身來迎。佛身常寂。無有去來。眾生識心。託本佛功德勝力。有來有去。如面鏡像。似夢施為。鏡中之形。非內非外。夢裏之質。非有非無。但是自心。非關佛化。故知淨業純熟。目睹佛身。惡果將成。心現地獄。如福德之者執礫成金。業貧之人變金成礫。礫非金而金現。金非礫而礫生。金生但是心生。礫現唯從心現。轉變是我。金礫何從。正法念處經云。



點慧善巧畫師。取種種彩色。取白作白。取赤作赤。取黃作黃。若取鵠色則為鵠色。取黑作黑。心業畫師亦復如是。緣白取白。奇曰緣想白於天人中則成白色。何義名白。欲等漏垢所不染汙。故名白色。又復如是心業畫師取赤彩色。於天人中能作赤色。何義名赤。所謂愛聲味觸香色。又復如是心業畫師取黃彩色。於畜生道能作黃色。何義名黃。彼此遞互飲血啖肉。貪欲瞋癡。更相殺害。故名黃色。又復如是心業畫師取鵠彩色。攀緣觀察。於餓鬼道作垢鵠色。何義名鵠。彼身猶如火燒林樹。饑渴所惱。種種苦逼。又復如是心業畫師取黑彩色。於地獄中畫作黑色。何義名黑。以黑業故。生地獄中。有黑鐵壁。被然被縛。得黑色身。如是乃至心業畫師善治禪彩。攀緣明淨。如彼畫師。善治彩色。畫作好色。皆是自心。非他所作。是故當知心業畫師。以純淨色。畫作淨土。亦復如是。又如般舟三昧中說。菩薩得是三昧。便于是間坐。見



阿彌陀佛。譬如有人聞毗耶離國。有淫女人名菴羅婆利。舍衛國。有淫女人名須曼那。王舍城。淫女人名優鉢羅槃那。有三人各聞人讚三女人端正無比。晝夜專念。心著不捨。便于夢中。夢與從事。覺已心念。彼女不來。我亦不往。而淫事得辦。因是而悟一切諸法皆是耶。往告跋陀和菩薩。菩薩答言。諸法實爾。皆從念生。如是種種為三人說。三人即得不退轉地。菩薩於是問國土。聞阿彌陀佛。數數念。用是念故。見阿彌陀佛。譬如人遠出到他郡國。念本鄉里家室親屬財產。其人於夢中歸到故鄉里。見家室親屬。喜共言語。於夢中見已。覺為知識說之。我歸到故鄉里。見我家室親屬。菩薩如是。其所向方聞佛名。常念所向方。欲見佛。菩薩一切見佛。譬如比丘。觀死人骨著前。有觀青時。有觀白時。有觀赤時。有觀黑時。其骨無有持來者。亦無有是骨。亦無所從來。是意所作。菩薩如是。欲見何方佛。即見。何



以故。持佛威神力。持佛三昧力。持本功德力。用是三事。故得見佛。譬如年少之人。端正姝好。以持淨器盛好麻油及盛淨水。或新磨鏡。或無瑕水精。於是自照。悉自見影。何以故。以明淨故。自見其影。其影亦不從中出。亦不從外入。菩薩以善清淨心。隨意悉見諸佛。見已歡喜。作是念言。佛從何所來。我身亦不去。即時便知。佛無所從來。我亦無所去。復作是念。三界所有。皆心所作。何以故。隨心所念。悉皆得見。以心見佛。以心作佛。心即是佛。心即我身。心不自知。亦不自見。若取心相。悉皆無智。心亦虛誑。皆從無明出。因是心相。即入諸法實相。是故當知心外見佛。即成魔境。何以故。以心外無一法可得故。以心性無外故。以一切十方三世諸法。皆不在心外故。若達心外無法。則魔界即佛界。以一如無二如故。

二即心即相門者。謂諸法畢竟空故。則有諸法。若諸法有決定性



者。則一切不立。般若經曰。若諸法不空。即無道無果。法句經曰。菩薩于畢竟空中。熾然建立。華嚴經曰。菩薩摩訶薩。了達自身及以眾生。本來寂滅。而勤修福智。無有厭足。於諸境界。永離貪欲。而常樂瞻奉諸佛色。知佛國土。皆如虛空。而常莊嚴佛刹。以是義故。菩薩樂修淨土。群疑論問曰。諸佛國土亦復皆空。觀眾生如第五大。何得取著有相。捨此生彼。答。諸佛說法。不離二諦。經云。成就一切法。而離諸法相。成就一切法者。世諦諸法也。離諸法者。第一義諦無相也。又云。雖知諸佛國。及與眾生空。而常修淨土。教化於群生。汝但見說圓成實相之教。破徧計所執畢竟空無之文。不信說依他起性因緣之教。即是不信因果之人。說于諸法斷滅相者。是為邪見外道。又十疑論曰。夫不生不滅者。於生緣中。諸法和合。不守自性。求于生體。亦不可得。此生時。無所從來。故名不生。諸法散時。不守自性



· 此散滅時。去無所至。故言不滅。非因緣生滅外。別有不生不滅。亦非不求生淨土。喚作無生。偈云。因緣所生法。我說即是空。亦名為假名。亦名中道義。又云。諸法不自生。亦不從他生。不共不無因。是故說無生。又云。譬如有人造立宮室。若依空地。隨意無礙。若依虛空。終不能成。諸佛說法。常依二諦。不壞假名。而說諸法實相。智者熾然求生淨土。達生體不可得。即是真無生。此謂心淨故佛土淨。愚者為生所縛。聞生即作生解。聞無生即作無生解。不知生即無生。無生即生。不達此理。橫相是非。瞋他求生淨土。幾許悞哉。長蘆曰。以生為生者。常見之所失也。以無生為無生者。斷見之所惑也。生而無生無生而生者。第一義諦也。永明曰。即相之性。用不離體。即性之相。體不離用。若欲讚性。即是讚相。若欲毀相。祇是毀性。天如曰。性能現相。無生即生。相由性現。生即無生。是則無聲聲中。風枝



水響。非色色裏。寶樹欄干。豈同灰飛煙滅之頑空。與撥無因果之魔屬哉。

三非心非相門者。婆沙論明新發意菩薩。先念佛色相。相體相業。相果相用。得下勢力。次念佛四十不共法心。得中勢力。次念實相佛。得上勢力。不著色法二身。偈云。不貪著色身。法身亦不著。善知一切法。永寂如虛空。寶性論曰。依佛義故。經云。佛告阿難言。如來者。非可見法。是故眼識不得見故。依法義故。經云。所言法者。非可說事。是故非耳識所聞故。依僧義故。經云。所言僧者。名無為。是故不可身心供養禮拜讚歎故。摩訶般若經曰。菩薩摩訶薩念佛。不以色念。不以受想行識念。以諸法自性空故。不應以三十二相。八十隨形好念。不應以戒定慧。解脫。解脫知見而念。不以十力。四無所畏。四無礙智。十八不共法而念。何以故。是諸法自性空故。自性空。則無所念。無所念



故。是為念佛。智度論曰。若菩薩于過去諸佛取相分別回向。是不名回向。何以故。有相是一邊。無相是一邊。離是二邊行中道。是諸佛實相。是故說諸過去佛。墮相數中。若不取相數回向。是為不顛倒。佛藏經曰。見諸法實相。名為見佛。何等名為諸法實相。所謂諸法畢竟空無所有。以是畢竟空無所有法念佛。乃至又念佛者。離諸想。諸想不生。心無分別。無名字。無障礙。無欲無得。不起覺觀。何以故。舍利弗。隨所念起一切諸想。皆是邪見。舍利弗。隨無所有。無覺無觀。無生無滅。通達是者。名為念佛。如是念中。無貪無著。無逆無順。無名無想。舍利弗。無想無語。乃名念佛。是中乃至無微細小念。何況麤身口意業。無身口意業處。無取無捨。無諍無訟。無念無分別。空寂無性。滅諸覺觀。是名念佛。舍利弗。若人成就如是念者。欲轉四天下地。隨意能轉。亦能降伏百千億魔。況弊無明。從虛誑緣起。無



決定相。是法如是無想無戲論。無生無滅。不可說。不可分別。無暗無明。魔若魔民所不能測。但以世俗言說。有所教化。而作是言。汝念佛時。莫取小想。莫生戲論。莫有分別。何以故。是法皆空。無有體性。不可念一相。所謂無相。是名真實念佛。又止觀明念佛三昧者。當云何念。為復念我當從心得佛。從身得佛。佛不用心得。用者以也不用身得。不用心得佛色。不用色得佛心。何以故。心者佛無心。色者佛無色。故不用色心。得三菩提。佛色已盡。乃至識已盡。佛所說盡者。是癡人不知。智者曉了。不用身口得佛。不用智慧得佛。何故。智慧索不可得。自索我。了不可得。亦無所見。一切法本無所有。壞本。絕本。若如是念者。是名實相念佛之門。亦名絕待門。

四離即離非門者。永明曰。若執言內力。即是自性。若言他力。即成他性。若云機感相投。即是共性。若云非因非緣。即無因性。




·皆滯闕執·未入圓成·當知佛力難思·玄通罕測·譬如阿迦叔
樹·女人摩觸·華為之出·是樹無覺觸·非無覺觸·菩薩摩訶薩
不思議念觸·亦復如是。又如象齒因雷生華·是齒非耳·云何有
聞·若無聞者·華云何生·又若雷能生華者·諸物應有·菩薩摩
訶薩不思議聲塵·亦復如是。又如勇士疑石為虎·箭至沒鏃·箭
非剋石·石非受矢·菩薩摩訶薩不思議精進·亦復如是。又如有
人遠行·獨宿空舍·夜中有鬼擔一死人·來著其前·復有一鬼隨
逐瞋罵·云是我物·先鬼言我自持來·後鬼言實我擔來·二鬼各
執一手爭之·前鬼言·此中有人可問·後鬼即問·是誰擔來·是
人思惟·二鬼力大·妄語亦死·何若實語·即言前鬼擔來·後鬼
大瞋·捉此人手·拔斷著地·前鬼取死人一臂附之·即著·如是
兩臂兩腳頭脅·舉身皆易·於是二鬼共食所易人身·拭口而去·
其人思惟·眼見我身被鬼食盡·今此我身·盡是他肉·即于一切



時作他身想。乃至五欲。亦不貪著。是他身故。不應供養。乃至妻子。亦不生染。是他身故。不應有染。乃至種種訶斥苦辱。亦皆順受。是他身故。無復憍慢。後忽自計。若是他者。真不應有我。疑。若非他者。他身現在。是中非他。真非非他。非我。非非我。我亦不可得。他亦不可得。從本已來。恒自如是。即時得知一切法。是我非我。皆為妄計。菩薩摩訶薩不思議觀力。見佛自他。亦復如是。又如貧人商丘開。信富者言。入火不燒。入水不溺。投高不折。乃至隨諸誑語。皆得實寶物。而是貧人。無他術故。菩薩摩訶薩不思議貪欲。獲佛寶王。亦復如是。又如空谷隨聲發響。此響不從空來。不從谷來。不從聲來。若從空來者。空應有響。若從谷來者。應時時響。若從聲來者。呼平地時。此響亦傳。乃至非和合來。非因緣來。非自然來。菩薩摩訶薩不思議聲相。非來非去。亦復如是。又如幻人。幻長者所愛馬入小瓶中。瓶不



加大。而馬跳躍如常。長者為設食已。馬繫柱如故。菩薩摩訶薩不思議幻法。變現佛刹。亦復如是。又如訶宅迦藥。人或得之。以其一兩變千兩銅悉成真金。非千兩銅能變此藥。菩薩摩訶薩不思議大丹。點穢成淨。亦復如是。又如有人得安繕那藥。以塗其目。雖行人中。人所不見。菩薩摩訶薩不思議藥力。於念念生中。得無生身。亦復如是。又如無能勝香。若以塗鼓。其聲發時。一切敵軍皆自退散。又轉輪王有香。名海藏。若燒一丸。王及四軍。皆騰虛空。菩薩摩訶薩不思議正念香。伏諸魔軍。超越三界。亦復如是。是故當知念佛三昧。不可思議。如普賢毛孔不可思議。如摩耶夫人腹不可思議。如淨名丈室不可思議。如具足優婆夷小器不可思議。何以故。一切法皆不可思議故。若有一毛頭許可思議者。即非法界性海。如上言心言境。言有相無相者。皆是思議法。若入此即知一切心境有相無相念佛皆悉不可思議不思議解脫。即知一切分別念佛。皆為戲論。



◎
第六稱性門


夫一切賢聖·稱心而行。法性無邊·行海叵量·是故或一剎那中·行滿三祇·或恒河沙劫·未成一念·飛空鳥迹·辨地位之分齊·淚日風華·明過現之影像·無脛而走·舍阿彌以何之·不疾而速·識西方之非遠·譬諸五色至玄而亡·萬流以海為極者也·今約大乘諸行總入一行·略示五門·一信心行·二止觀行·三六度行·四悲願行·五稱法行。

一信心行者·經云·信為道元功德母·一切諸行·無不以信為正因·乃至菩提果滿·亦只完此信根·如穀子墮地·迨于成實·不異初種·如稚筍參天·暨至叢葉·本是原竿·初心菩薩·無不依是信力而成就者·是故蓮宗門下·全仗此信為根本·一者信阿彌陀佛不動智·根本智·與己無異·如一太虛空·日映則明·雲來



則翳·虛空本無是故。又則雲與日皆即虛空故。二者信阿彌陀佛從發願來那由他劫內·一切難行難忍種種修習之事·我亦能行。何以故·自憶無始劫中·漂溺三途·生苦·死苦·披毛戴角苦·鐵牀銅柱苦·一切無益之苦·皆能受之·何況如今菩薩萬行濟眾生事·豈不能為。三者信阿彌陀佛無量智慧·無量神通·及成就無量願力等事·我亦當得。何以故·如來自性方便·具有如是不思議事。我與如來同一自體清淨性故。四者信阿彌陀佛不去不來·我亦不去不來·西方此土不隔毫端·欲見即見·何以故·一切諸佛皆以法性為身土故。五者信阿彌陀佛修行歷劫·直至證果·不移剎那·我今亦不移剎那·位齊諸佛·何以故·時分者是業收·法界海中·業不可得故。如是信解·是謂入道初心·信一切諸佛淨土之行。

二止觀行者·如圓覺楞嚴華嚴諸方等經·古今學者廣設觀門·唯



台宗三觀·最為直捷。示一心之筌蹄·撮諸法之要領·修行徑路·無踰于此。西方宗旨·自有十六正觀·然一一觀中·具含此三義。故天台詮經·直以三諦攝彼十六·妙宗鈔曰·性中三德·體是諸佛三身。即此三德三身·是我一心三觀。若不然者·則觀外有佛·境不即心·何名圓宗絕待之觀。亦可彌陀三身以為法身。我之三觀以為般若。觀成見佛·即是解脫·舉一具三·如新伊字。觀佛既爾·觀諸依正·理非異途。廣如疏鈔·不能具述·至若溫陵禪師·則純以念佛一聲·入三觀門·言念存三觀者。如一聲佛·遂了此能念體空·所念無相·即念存空觀·所念之佛即應身·即心破見思惑也·雖能念體空所念無相·不妨能念分明所念顯然·即念存假觀·所念之佛即報身·即心破塵沙惑也·正當能念所念空時·即能念所念顯然·正當能念所念顯時·即是能念所念寂然·空假互存·即念存中觀·所念之佛即法身·即心破無明惑



也。是又即念佛因。究竟三諦。淨彼四土。如拈一微塵。變大地作黃金。是謂法界圓融不可思議觀門。○△此即梵書新伊字

三六度行者。起信論曰。菩薩從初正信已來。於第一阿僧祇將欲滿故。於真如法中。深解現前。所修離相。知法性體離慳貪故。隨順修行檀波羅蜜。法性無染。離五欲過故。隨順修行戒波羅蜜。法性無苦。離瞋惱故。隨順修行忍波羅蜜。法性無身心相。離懈怠故。隨順修行精進波羅蜜。法性常定。體無亂故。隨順修行禪波羅蜜。法性體明。離無明故。隨順修行般若波羅蜜。故智度論曰。菩薩觀一切法畢竟空。不生慳貪心。何以故。畢竟空中。無有慳貪。慳貪根本斷故。乃至般若波羅蜜畢竟空故。常不生癡心。所以者何。佛說一切法無施無受。非戒非犯。乃至不智不愚故。又云。菩薩雖不見布施。以清淨空心布施。作是念。是布施空無所有。眾生須故施與。如小兒以土為金銀。長者則不見是金




銀。便隨意與。竟無所與。其餘五法亦復如是。是謂菩薩行于六度。修淨土者。即無如是差別名相。然亦不越一行。具此六義。一者捨諸雜念。是行於施。又則繫佛。不住捨念。是性施故。二者念念中淨。是行于戒。又則繫佛。不求滅念。是性戒故。三者世念盡寂。是行於忍。又則繫佛。非關摧念。是性忍故。四者畢念不退。是行精進。又則一念即是。不著苦行。是性精進故。五者得念三昧。是行于定。又則念念是佛。不貪禪味。是大定故。六者了念佛因。即念而佛。是行于智。又則念本非有。佛本非無。不落斷常。是一切種智故。是故念佛一門。能該諸行。何以故。念佛是一心法門。心外無諸行故。然亦不廢諸行。若廢諸行。即是廢心故。

四悲願行者。諸佛菩薩性海無盡。供養無盡。戒施無盡。乃至饒益無盡。如普賢發十大願。虛空界眾生界無有盡時。而我此願亦



無有盡。身語意業。無有疲厭。名為願王。一切諸佛。無不成就。如是願王。證涅槃果。故天親菩薩淨土五念門。以禮拜讚歎作願觀察前四種。為成就入功德門。回向一切煩惱眾生。拔世間苦。為成就出功德門。菩薩修五念門。速得阿耨多羅三藐三菩提。難曰。佛及眾生本無所有。如淨名經言。菩薩觀于眾生。如呼聲響。如水聚沫。如芭蕉堅。如電久住。如無色界色。如焦穀芽。如得忍菩薩貪恚毀禁。如佛煩惱習。如夢所見已寤。菩薩觀眾生為若此。是則眾生本空。菩薩種種發願利生。將無眼見空華耶。答曰。智度論中。佛說此中言無佛者。破著佛想。不言取無佛相。是故當知言無眾生者。破眾生想。不言取無眾生相。如淨名言。菩薩作是觀已。自言我當為眾生說如斯法。即真實慈。即知菩薩不取無眾生相。又則說是法者。真實利生。真實悲願。無別度眾生事也。又如般若經。菩薩深入大悲。如慈父見子為無所值物故

奇曰猶云無



是物
死。父甚憐之。此兒但為虛誑故死。諸佛亦如是。知諸法空。畢

竟不可得。而眾生不知。眾生不知故。于空法中染著。著因緣故

。墮大地獄。是故深入大悲。是則諸佛與慈運悲。正以眾生空故

。眾生誑入生死故。豈有反息悲願之理。故知菩薩種種度生者。

是深達無眾生義。何故。若見有眾生。故即有我。慈悲心劣。豈

能行如是饒益之行。又先德云。未居究竟位。全是自利門。從十

信初心。歷十住十行十迴向十地。直至等覺。佛前普賢。猶是自

利。利他門者。登妙覺位。佛後普賢。方是利他之行。如佛告比

丘。功德果報甚深。奇曰因功德受勝報故功德曰恩分無有如我知恩分者。我雖復盡其邊底。我本

以欲心無厭足故得佛。是故今猶不息。雖更無功德可得。我欲心


亦不休。當知行海無邊。非丈竿尺木所能探其底裏。如癡兒見人

指門前竿。云在天半。即計量言。從地至天。止兩竿許。佛法戲

論。亦復如是。



五稱法行者。法界海中無量無邊。菩薩行海亦無量無邊。虛空著彩。粉墨徒勞。法界無方。轍迹安用。是故菩薩自性行者。非有非無。非行非不行。唯是稱法自在之行。一者菩薩度一切眾生究竟無餘涅槃。而眾生界不減。如登場傀儡。悲笑宛然。唯一土泥。空無所有。是稱法行。二者菩薩行五無間。而無惱恚。至于地獄。無諸罪垢。至于畜生。無有無明憍慢等過。如倩女離魂。逐所歡去。乃至生子。而身常在父母前。是稱法行。三者菩薩自身入定。他身起定。一身入定。多身起定。從有情身入定。從無情身起定。如猛虎起屍。跪拜作舞。唯虎所欲。而屍本無知。是稱法行。四者菩薩於一小眾生身中。轉大法輪。燃大法炬。震大法雷。魔宮摧毀。大地震動。度無量無邊眾生。而此小眾生不覺不知。如天帝樂人。逃入一小女子鼻孔。徧索不得。而此女子不覺不知。是稱法行。五者菩薩欲久住世。即以念頃衍作無量無數百



千億那由他劫。欲少住世。即以無量無數百千億那由他劫縮為念頃。如小兒看燈中走馬。計其多寡首尾。了不可得。是稱法行。是故若證如是不思議行者。一念之中。三世諸佛淨土攝入無餘。是謂菩薩莊嚴淨土之行。以無思智照之可見。非是情量所能猜度。何以故。以自性超一切量故。

第七往生門

夫究竟涅槃。唯除如來。二乘破有執空。假名寂滅。菩薩發真無漏。分破無明。何況劣根淺解。大海一滴。輒逞狂慧。斷無後有。以恣情為遊戲。以修行為纏縛。自殺殺他。何異酖毒。如佛在時。有一比丘得四禪。生增上慢。謂得阿羅漢。不復求進。命欲盡時。見有四禪中陰相現。便生邪見。謂無涅槃。佛為欺我。惡邪生故。失四禪中陰。便現阿鼻泥犁中陰相。命終。即生阿鼻地。



獄。此等猶是坐禪持戒。一念妄證。遂沉黑獄。而今禪人得少為足。蕩心逸軌。真實語天鼓音其惡報又不知當如何也。古人云。不生淨土。何土可生。三祇途遠。入餘門者。多有退墮。是以古今聖流。皆主張此一門。今略示六種。以定指南。

一菩薩生人中者。二菩薩生兜率天者。三菩薩生長壽天者。四菩薩生界外者。五菩薩初發心時。生如來家者。六菩薩三祇行滿。生十方世界利益一切眾生者。

一菩薩生人中者。如般若經云。有菩薩人中命終。還生人中者。除阿毗跋致。是菩薩根鈍。不能疾與般若波羅蜜相應。諸陀羅尼門。三昧門。不能疾現在前。夫人中火宅。百苦相纏。唯大菩薩處之。則無染累。如鵝入水。水不令溼。若諸小菩薩。非深種善根。尺進丈退。何由得諸三昧。如舍利弗。于六十劫行菩薩道。欲渡布施河時。有乞人來乞其眼。舍利弗出一眼與之。乞者得眼。



·于舍利弗前嗅之。唾而棄地。又以腳蹋。舍利弗思惟言。如此
弊人等。難可度也。不如自調。早脫生死。思惟是已。于菩薩道
退迴小乘。又如飛行仙人。以王夫人手觸。神通頓失。迦文往因
·以歡喜丸媚藥。暱就淫女。賢聖猶爾。何況初心。豈若一念阿
彌。三昧疾現。寄質蓮邦。永離貪欲者哉。論曰。菩薩以不見現
在佛。故心鈍。即知菩薩常當近佛。以近佛根利。疾得般若故。
二菩薩生兜率天者。為一生補處菩薩。皆生兜率。欲隨菩薩下生
者。亦生彼處。十疑論曰。兜率天宮是欲界。退位者多。又有女
人。長諸天愛欲。天女微妙。諸天耽玩。自不能捨。不如阿彌淨
土。純一大乘清淨良伴。煩惱惡業。畢竟不起。遂致無生之位。
如師子覺菩薩生彼。為受天樂。從去已來。總不見彌勒。諸小菩
薩尚著五欲。何況凡夫。又彌勒上生經。得入正定。方始得生。
更無方便接引之義。是則兜率內院。尚不求生。何況欲界諸天。



妙欲之藪。豈有需飲而入焦石之鄉。避溺而沉大海之底者哉。

三菩薩生長壽等天者。智度論曰。菩薩無方便入初禪。乃至行六波羅蜜無方便者。入初禪時。不念眾生。住時起時。不念眾生。但著禪味。不能與初禪和合行般若波羅蜜。是菩薩慈悲心薄故。功德薄少。為初禪果報所牽。生長壽天。長壽天者。非有想非無想處。壽八萬大劫。或有人言一切無色定。通名長壽天。以無形不可化故。不任得道。常是凡夫處故。或說無想天名為長壽。亦不任得道故。或說從初禪至第四禪。除淨居天。皆名長壽。以著味邪見。善心難生故。如經中說。佛問比丘。甲頭土多。地上土多。諸比丘言。地上甚多。不可為喻。佛言。天上命終。還生人中者。如甲頭土。墮地獄者。如地土。何以故。以本發阿耨多羅三藐三菩提心。或於禪中集諸福德。方得還生人中。聞佛法故。若是最初發心求生淨土。即常得聞法。直至不退。豈有如是等過。



四菩薩生三界外者。有二種。一二乘三種菩薩。折伏現行煩惱。捨分段而生界外。悲智狹劣。于嚴土利他。不生喜樂。為如來所呵。若不迴心行六度等行。畢竟不入大乘智海。二法身菩薩。如般若經。佛告舍利弗。有菩薩摩訶薩得六神通。不生欲界色界無色界。從一佛國。至一佛國。供養恭敬尊重讚歎諸佛。舍利弗。有菩薩摩訶薩遊戲神通。從一佛國。至一佛國。所到到處。無有聲聞辟支。乃至無二乘之名。舍利弗。有菩薩摩訶薩所到到處。其壽無量。釋曰。菩薩有二種。一者生身菩薩。二者法身菩薩。法身菩薩斷結使。得六神通。生身菩薩不斷結使。或離欲。得五神通。得六神通者。不生三界。所至世界。皆一乘清淨。壽無量。阿僧祇劫。菩薩生彼。為樂集諸佛功德故。當知菩薩具六神通。方得生彼。甚為希有。凡夫往生者。以佛力故。又則念力不可思議。以念念中具六神通故。



五菩薩初發心時奇曰此必修行業然不近佛行何由成故須生淨土生如來家者。為上上根人。頓示本智。初心創發。

· 十住位上。即與佛同。如華嚴經。有一類菩薩此明未悟之修不名。經百千億那由

他劫真修。行六波羅蜜。不生佛家。猶是假名菩薩。以雖見佛性此明悟後不。未

彰智業可無修。長者決疑論云。初發心住。明以從禪定顯得根本空智慧

門。無明始謝。智慧始明。初生如來智慧之家。名住佛所住。故

得憶念一切諸佛境界智慧光明普門法門。以此見道。無古今中邊

等見。經歷五位。鍊磨習氣。增長慈悲。名為修道。故言初發心

時。便成正覺。方可修道。如善財南行。求諸勝友。皆云。我已

先發阿耨多羅三藐三菩提心。云何學菩薩行。修菩薩道。不云增

長佛道。為根本智以定顯得。無作無修。但學菩薩行。根本智自

明自顯。若不得正覺之體。諸行並是無常。皆是人天有生死業報

也。又云。經此現生一生發心相應時。得以正智。于分段身觀行

心成。兼修善業。來生入變易身。以今生分段之身。是過去作業



· 今身以智修觀行業。來生得神通變化生也。如十善業尚生天上
· 得業報神通。如龍大力鬼尚以無明惡業。猶有神通。何況道眼
開敷。慈善根力。使智神用。一生作意。而于來世不獲大用神通
者也。宗鏡錄曰。初心成佛者。非謂不具諸功德。如經說普莊嚴
童子。一生得聞善熏習。二生成其解行。三生得入果海。同一緣
起。而此三生。只在一念。猶如遠行。到在初步。然此初步之到
· 非謂無於後步。明此童子得入果海。非不久植善根。問。既久
修始得。云何言一念得耶。答。言久修善根者。即在三乘教攝。
從三乘入一乘。即是一念始修足故。經云。初發心時。便成正覺
· 譬眾川入海。纔入一滴。即稱周大海。無始無終。若餘百川。
水之極深。不及入大海之一滴。即同三乘中修多劫。不及一乘之
一念。又此時劫不定。或一念即無量劫。如十玄門。時處無礙。
又大乘明一念成佛有二。一者會緣以入實。性無多少。故明一念



成佛。二者行行纔滿。取最後念。名為一念成佛。如人遠行。以後步為到。若一乘明一念成佛者。如大乘取後一念成佛。即入一乘。以後即初。初念即是成。何故。以因果相即。同時相應故。然一念成者。即與佛同位。未具究竟故。復有淺深之殊。如人始出門。及以久遊行他土。雖同在空中。而遠近有別。是故十信十住等五位。各各言成佛。而復辨其淺深。此中須善思之。若二大士言。即知禪門悟達之士。不得廢一切行。銷磨無始結習也。夫居此濁惡。進明悟後修一退須生淨土萬。若不近佛。垢膩交集。行何由成。如善財初發心悟道時。德雲比丘教以憶念一切諸佛法門。及入彌勒閣後。普賢菩薩為發十大願王。導生極樂。此是一切如來入道榜樣。何等教眼華嚴所說一真法界門。不同餘教有權有實。是經不信。即真闡提。雖使釋迦讚歎。普賢勸進。彌勒作證。亦末如之何也已矣。六菩薩三祇行滿。生十方世界。利益一切眾生者。菩薩功德成滿。



· 自然有不思議業。能現十方。利益眾生。起信論曰。證發心菩薩。于一念頃。能至十方無餘世界。供養諸佛。請轉法輪。唯為開導利益眾生。不依文字。或示超地。速成正覺。為怯弱眾生故。· 或說我于無量阿僧祇劫當成佛道。為怠慢眾生故。而實菩薩種性根等。發心則等。所證亦等。無有超過之法。以一切菩薩。皆經三阿僧祇劫故。· 如智度論言。釋迦世尊。從過去釋迦文佛。至尸棄佛。為初阿僧祇。從尸棄佛。至然燈佛授記時。為二阿僧祇。· 從然燈佛。至毗婆尸佛。為三阿僧祇。婆沙論。敘三阿僧祇劫修六度行。百劫種相好因。然後獲五分法身。唯識。謂地前歷一僧祇。初地滿二僧祇。八地至等覺是三僧祇。然後獲究竟法身。· 難曰。長者合論。皆云。不離一念。歷阿僧祇。何得執定永劫。· 乖第一義。答曰。長者但言三祇本空。時體不可得。非是無時。· 如人眼耳鼻舌身現在。說六根本無。不是廢卻六根言無也。譬如



小兒見水中月。心生愛著。欲取而不可得。智者教言。是可眼見。不可手捉。但破可取。不破可見。諸佛菩薩三世行業亦然。雖一切不可得。而非是無行。且如龍樹馬鳴二大菩薩。皆是禪門傳衣之祖。豈肯自誑誑他。誤賺後來。當知生死事大。非是一知半行所能跳出。智度論曰。有菩薩利根心堅。未發心前。久來集諸無量福德智慧。是人遇佛。聞是大乘法。發阿耨多羅三藐三菩提心。即時行六波羅蜜。入菩薩位。得阿鞞跋致地。所以者何。先集無量福德。利根心堅。從佛聞法故。譬如遠行。或有乘羊而去。或有乘馬而去。或有神通去者。乘羊者。久久乃到。乘馬者。差速。乘神通者。發意頃便到。如是不得言發意間。云何得到。神通相爾。不應生疑。菩薩亦如是。發阿耨多羅三藐三菩提時。即入菩薩位。有菩薩初發意。初雖心好。後雜諸惡。時時生念。我求佛道。以諸功德。迴向阿耨多羅三藐三菩提。是人久久無量



阿僧祇劫。或至或不至。先世福德因緣薄。而復鈍根。心不堅固。如乘羊者。有人前世少有福德利根。發心漸漸行六波羅蜜。若三若十若百阿僧祇劫。得阿耨多羅三藐三菩提。如乘馬者。必有所到。第三乘神通者如上說。是知漸修頓證。各各不同。菩薩欲取佛位。無驟至者。故先德云。雖齊佛覺。未逮極果。非為究竟。是故悟達之士。決當求生淨土。如法修行。免致退墮。俟忍力堅固。入世利生。方為究竟佛果故。



第八見網門

夫一切迷情。依諸見起。履之則為稠林。溺之則為熱海。如蠶作繭。即住處為受縛之因。似蛾赴燈。依光明作喪生之本。故先達云。行起解絕。所以將趨聖室。先入普賢之門。欲修正因。首割邪見之網。今約諸家負墮。略分十則。無法可捨。是見必訶。拋真



家語實蕩子·可謂久病成醫慣憐羈旅之人·落第寒生·備識窮途之苦。幸順佛言·

莫依魔教。一斷滅墮·二怯劣墮·三隨語墮·四狂恣墮·五支

離墮·六癡空墮·七隨緣墮·八唯心墮·九頓悟墮·十圓實墮。

唯心頓悟圓實皆名為墮·非真見理·那有此膽識·

一斷滅墮者·有二種·一諸儒生滯現在身·疑未來斷滅·二新發意學人執空相·疑一切斷滅·此等尚不信有生·云何信往生·及淨土等事·今為略釋·一釋儒生等者·楞嚴經·佛告波斯匿王·汝今自傷髮白面皺·其面必定皺於童年·則汝今時觀此恆河·與昔童時觀河之見·有童耄不·王言·不也·佛言·大王·汝面雖皺·而此見精·性未曾皺·皺者為變·不皺非變·變者受滅·彼不變者·元無生滅·云何於中受汝生死·而言此身死後全滅·智度論·問曰·人死歸滅·滅有三種·一者火燒為灰·二者蟲食為糞·三者終歸於土·今但見其滅·不見更有出者受于後身·以不



見故。則知為無。答曰。若謂身滅便無者。云何有眾生先世所習憂喜怖畏等。如小兒生時。或啼或笑。先習憂喜。故今無人教而憂喜續生。又如犢子生。知趣乳。豬羊之屬。其生未幾。便知有牝牡之合。子同父母。好醜貧富。聰明闇鈍。各各不同。若無先世因緣者。不應有異。如是等種種因緣。知有後世。又汝先言不見別有去者。人身中非獨眼根能見。身中六情各有所知。有法可聞可嗅可味可觸可知者。可聞法尚不可見。何況可知者。有生有死法。亦可見。亦可知。汝肉眼故不見。天眼者了了能見。如見人從一房出。入一房。捨此身至後身亦如是。若肉眼能見者。何用求天眼。若爾者。天眼肉眼愚聖無異。汝與畜生同見。何能見後世。可知者。如人死生。雖無來去者。而煩惱不盡故。于身情意相續。更生身情意。身情意造業。亦不至後世。而從是因緣更生。受後世果報。譬如乳中著毒。乳變為酪。酪變為酥。乳非酪



酥·酪酥非乳·乳酪雖變·而皆有毒·此身亦如是·今世五眾因奇曰即五陰緣故·更生後世五眾·行業相續不異故·而受果報·又如冬木雖未有華葉果實·得時節會·則次第而出·于是因緣·故知有死生·復次現世有知宿命者·如人夢行疲極·睡臥覺已·憶所經由·又一切聖人內外經書·皆說後世·復次現世不善法·動發過重·生瞋恚嫉妬·疑悔內惱故·身則枯悴·顏色不悅·惡不善法受害如是·何況起身業口業·若生善法·淨信業因緣·心清淨·得如實智慧·心則歡悅·身得輕輦·顏色和悅·以有苦樂因緣故·有善不善·今定有善不善故·當知必有後世·但眾生肉眼不見·智慧薄故·而生邪疑·雖修福事·所作淺薄·譬如醫師為王療病·王密為起宅·而醫師不知·既歸見之·乃悔不加意盡力治王·復次聖人說今現在事實可信·故說後世事亦皆可信·如人夜行險道·導師授手·知可信故·則便隨逐·奇曰比量之智比智及聖人語·可知定有後



世·汝以肉眼重罪·比智薄故·又無天眼·既自無智·又不信聖語·云何得知身後·如宣聖言費隱·則言鬼神德盛·明明說道武周達孝·唯在識鬼神之情狀·事死如事生處·而考亭先生·曲為解說·歸之二氣·何其敢于誣先聖·疑後來耶·且稗官野史不足論·如彭生為豕·伯有為厲·劉聰為遮須國王·蔣濟之子乞官于泰山令·則正史也·玄鳥生商·帝武肇周·則正經也·雀化蛤·田鼠化鴛·鷹化鳩·則正令也·一微塵識·所知幾何·擬欲蛙嫌海量·螢掩日光·侮聖褻天·當得何罪·又談者恆言非人所經歷·及道理不可信者·即不足憑·如日月度數·及五星往來·非人所得經歷也·天不來此·人亦不往彼·何以推測皆驗·又天何為高·地何為卑·風何為起·雲何為行·春何為生·秋何為殺·此有何道理可憑·胎中之根·無知而轉·字母之乳·無因而出·此有何道理可憑·微而至于一毛一塵·一草一木·若有毫頭許道理



可憑。幸為指出。不過常見故則常之。此常見者亦復無理。是故不應以不見故。而疑往生。二釋學道執空相者。論曰。學人聞說空。于生死業因緣中生疑。若一切法畢竟空。無來無去。無出無入。云何死而有生。現在眼見法。尚不應有。何況死後復生餘處。不知佛法中。諸法畢竟空。而亦不斷滅。生死雖相續。亦不是常。無量阿僧祇劫業因緣雖過去。亦能生果報而不滅。是為微妙難知。若諸法都空。佛不應說往生。何有智者。前後相違。若生死相實有。云何言諸法畢竟空。但為除諸法中愛著邪見顛倒故。說畢竟空。不為破後身。又為遮罪業因緣故。說種種往生。佛法不著有。不著無。有無亦不著。非有無亦不著。不著亦不著。如是人則不容難。如以刀斫空。則無所傷。是為畢竟空相。畢竟空。不遮生死業因緣。是故說往生。此疑甚淺。少有知者皆能斷之。以世間人作此見最多。故首破之。為是求往生者之第一障難故。」



二怯劣墮者。一疑結習濃厚。二疑念力輕微。三疑萬億剎遠。一疑結習濃厚者。凡夫但知業力。不知業性空故。所以若眾生業性實者。盡虛空界亦無容受處。如黑雲障空。風至則滅。若雲實者。吹亦不去。虛空喻性。黑雲喻業。念佛喻風。又則業性即是法性。力用至大。以結使故。神力不現。如烏芻瑟摩聞空王佛說。多淫人成猛火聚。卻後徧觀四支百骸諸冷煖氣。神光內凝。化多淫心。成智慧火。夫同一熱惱。方其淫。成大火聚。及其離。成大寶燄。若淫性實者。云何是中而得三昧。是故迷成則處胎獄。念成即入蓮胞。以胎性即是化性。非從外來。如濁水中清。非外來故。二疑念力輕微者。眾生愚昧。信有形之行業大。不信無形之念力尤大。何故。念力是行業根。一切事業。非念不成。如人造罪。無心造者重得輕報。有心造者反是。以念力重故。如人無記時。流俗鄙事耳提面囑。亦復不記。若心在者。種種難記之事。



· 一入耳根。終身憶持不忘。以念力堅故。蘇子瞻曰。佛以大圓覺。充滿十方界。我以顛倒想。出沒生死中。云何以一念。得往生淨土。我造無始業。本從一念生。既從一念生。還從一念滅。生滅滅盡處。則我與佛同。如投水海中。如風中鼓橐。雖有大聖智。亦不能分別。淨土決云。人之念頭所繫最急。如水之必赴海。如火之必炎上。如利刃之必傷。如毒藥之必殺。無空過者。念佛之念。亦復如是。如淫男子。淫念堅故。化為猛燄。延燒神廟。又如月光童子觀想水故。弟子窺屋。唯見清水。又如僧清辯與外道論議。外道堅執己見。忽化為石。清辯猶書目于石上。明日往視之。亦有答辭。久之忽自破碎。而吼聲于空中。是等皆以念力堅猛。無因變化。云何念佛而佛不現。當知念力是一切法中之王。如摩訶那伽大力勇士怒時。額上必生瘡。瘡若未合。徧閻浮提人無敵者故。三疑億萬剎遠者。凡夫執定十萬億剎。意謂快馬



疾帆·日不千里·云何剎那得生彼處。不思國土遠近者·從分段身計度生·從肉眼生。此往生者·為是分段身耶·為是周徧含容之心耶。若分段身者·身是頑質·云何得生。若心生者·心周沙界·淨土原在心中·焉有往來·如人在長安思鄉·或閩或滇·隨念即至·豈有程途·又如人夢時·身雖在牀·而心意識徧至他方·無功居士曰·極樂去此十萬億剎·凡夫命終·頃刻即至者。蓋自心本妙耳。故楞嚴云·汝猶未明一切浮塵諸幻化相·當處出生·隨處滅盡·因緣和合·虛妄有生。因緣別離·虛妄名滅·以此推之·當命終時·染濁緣離·故娑婆當處幻滅。清淨緣合·故極樂當處幻生·此滅彼生·間不容髮·亦何頃刻之可論。往余鄉有人·能致乩仙。乩仙者·即其兄也·後赴選京師·余兄等有所卜·其人虞地遠不能赴·不得已書符宣詞·少頃即至·此等是業繫·尚如是速疾·何況不思議念力·仗阿彌陀本願功德·順水張帆



· 有何障難。是故念佛之人。應當遣此三疑。若不遣者。是真結習濃厚。是真念力輕微。是真十萬程遠。如人欲出門而自扃其籬。是自不欲出。非無門過。

三隨語墮者。六祖言。東方人造罪。念佛求生西方。西方人造罪。念佛求生何國。龐居士云。事上說佛國。此去十萬里。大海渺無邊。動即黑風起。因此。一輩無知。傳虛接響。謂淨土不足修。自障障他。深可憐憫。夫論宗門提唱。尚不言有佛。何況佛國。為欲破相明心。是非俱剗。如吹毛利刃。執則傷手。金剛栗棘。豈是家常茶飯。且宗門中。此等語句甚多。若一一執之。釋迦老子出世。將真以飼雲門狗子乎。又古德云。如何是佛。乾屎橛。果爾。則凡見糞車糞擔溷廁。應當一一禮拜供養。彌陀疏鈔曰。西方去此十萬億土。壇經言十萬八千者。是錯以五天竺等為極樂也。此語近是。為六祖未閱大藏。聞人說西方。即以為五天竺



者有之。教中分明言極樂國三毒不生。得不退轉。今言西方造罪。求生何土。此亦一證也。然宗門中。此等一期之語最多。亦不足辯。噫。學人果能頓悟頓修。解行相應。如六祖。投金漢水。遊戲生死中。如龐老。雖不求生。亦何害于生哉。六祖龐老。亦何害生。西方。千古至言。四狂恣墮者。有等魔民。專逞狂慧。不肯持戒修行。妄引經中相似語言。如煩惱即菩提。淫怒癡即梵行之類。隨語生解。隨解發毒。果如彼說。迦文悟道。應親寶女。阿難淫舍。何須提獎。六祖初隨獵人。尚未受戒。何苦但食肉邊菜也。經云。尚無不殺不盜不淫。何況更有殺盜淫事。豈有聞人呵沉水香。便謂應住坑廁者也。昔五天有僧達磨達者。有辯慧。師事師子尊者。尊者知其悟解。對眾稱之。至傳法嗣祖。則以授婆舍斯多。磨達心恨之曰。尊者蓋知我之深。何故嗣位不以見授。一日獨行度水。有女子浣。露其脛。磨達念曰。此脛白皙乃爾。尊者忽在旁曰。今日之



心。可授祖位乎。磨達于是攝念。禮足求哀。即一淫戒。餘行可例。般若經曰。罪不罪不可得故。應具足尸羅波羅蜜。釋云。罪不罪不可得者。非為邪見麤心。言不可得。菩薩深入諸法相。行空三昧慧眼觀故。罪不可得。罪無故。不罪亦不可得。若人貪著無罪。見破戒罪人則輕慢。見持戒善人則愛敬。如是持戒。是名起罪因緣。不名具足。故知住戒即破。何況棄毀。戒執亦戒。始名持戒。諸大經言梵行不可得等。皆即此義。永明曰。帶習尚被境牽。現行豈逃緣縛。猶醉象無鉤。癡猿得樹。奔波乍擁。生鳥被籠。是故菩薩稟戒為師。常懷大懼。又曰。末代宗門中。學大乘人。多輕戒律。所以大涅槃經扶律談常。則乘戒俱急。故號此經為續常住命之重寶。何以故。若無此教。但取口解脫。全不修行。則乘戒俱失故。乘。謂悟第一義。戒。謂止一切黑業。祖師于此。分四料簡。一戒急乘緩。以戒急故。生人天中。如箭射空



·力盡還墜。以乘緩故。雖聞大法。如聾若啞。二乘急戒緩。以戒緩故。生惡趣中。以乘急故。常聞大法。如華嚴會上八部鬼神是也。三乘戒俱急。則生人天中。而常聞大法。四乘戒俱緩。則墮三惡道。而永不聞法。是故乘戒二法。如車二輪。廢一不可得故。龍樹曰。破戒之人。如清涼池而有毒蛇。不中澡浴。其家如塚。人所不到。失諸功德。譬如枯樹。如田被雹。不可依仰。如大病人。人不欲近。譬如吐食。不可更噉。菩薩如是苦口呵責。曾許人破戒不。是故千日學解。不如一日持戒。何得貪悟道之虛名。受泥犁之實禍。欺己誑人。枉遭王難。夫狂吠之人。無所不破。今獨言戒者。以邪見惡火。首燒戒寶故。又則戒是淨業之基。一切白法由戒生故。

五支離墮者。多有法師。涉獵教典。記註章句。執法身之假名。析名相之分齊。東緝西補。竟月窮年。弄毗盧之畫面。坐法界之



排場。貢高我慢。得少為足。聞人念佛。則曰此小乘中攝妄想之一法。或云教海義深。爾輩鈍根。念此亦可。或云此三藏中。為某藏攝。或云此屬何教。似坊上小兒鬪曲。以多為勝。各爭己見。無實行履。如長爪梵志。以論議力。摧伏諸師。搪揆蹴蹋。無能制者。後至佛所。作是念。一切論可破。一切執可轉。是中何者是諸法實相。何者是第一義。何者性。何者相不顛倒。作是思惟已。白佛言。瞿曇。我一切法不受。佛問梵志。爾一切法不受。是見受不。梵志答言。瞿曇。一切法不受。是見亦不受。佛語梵志。汝不受一切法。是見亦不受。則無所受。與眾人無異。何用貢高。而生憍慢。如是梵志不得答。自是服膺。是故當知饑兒過屠門大嚼。止益饒心。無救枵腹。昔在江南。有一靈俐座主。為余辨析唯識。及示所得教中奧義。于諸名流註疏。多肆評駁。余問曰。是可敵得生死不。僧傲然曰。有何生死可敵。余曰。是



即是。但恐閻羅殿前無譯字生。不會座主語言三昧也。此雖一時戲笑。亦大中講席之病。奉勸少年開士。長篇短章。牽藤引蔓。口誦心憶。腦昏眼昧。究其效驗。不過上幾回座。講幾期經。受幾箇瞎漢禮拜。若無真實功行。唯添業債。何若一聲阿彌。直登不退。事一功百。如曇謨最。講涅槃華嚴。領眾千人。為閻羅所呵云。講經者。心懷彼我。以驕陵物。比丘中第一麤行。即押付司。可為明戒。然有義解高流。因參教典。悟此西方不思議大事。以此自利利他。好出身路轉益未來。燃長夜炬。功德無量。又何必懲噎廢食。見蹶停驂哉。

奇曰前破學道執空相單明生死之業此破學道執法空
六癡空墮者。學道之人。稍窺法空。聞人念佛。即曰法離名字。所破義深廣
若徇假名。轉益虛妄。何故。文言尚空。何況名號。答。法句經名號實性大益愚庸
曰。佛告寶明菩薩。汝且觀是諸佛名字。若是有。說食與人。應得充饑。若名字無者。定光如來不授我記。及于汝名。如無授者



· 我不應得佛。當知名字。其已久如。以我如故。備顯諸法名字性空。不在有無。華嚴經曰。譬如諸法不分別自性。不分別音聲。而自性不捨。名字不滅。群疑論曰。若言名字無用。不能詮諸法體。亦應喚水。火來。故知筌蹄不空。魚兔斯得。稱斯弘名。生實淨土。何得言虛。天台智者曰。世間有空行人。執其癡空。不與修多羅合。聞此觀心而作難言。觀心是法身等。應觸處平等。何故經像生敬。紙木生慢。敬慢異故。則非平等。非平等故。法身義不成。答。我以凡夫位中。觀如是相耳。為欲開顯此實相。恭敬經像。令慧不縛。使無量人崇善去惡。令方便不縛。豈與汝同耶。上都儀曰。夫皈命三寶者。要指方立相。住心取境。不明無相離念也。佛懸知凡夫繫心尚乃不得。況離相耶。如無術通人。居空造舍也。法華經曰。汝證一切智。十力等佛法。具三十二相。乃是真實滅。南泉大師曰。微妙淨法身。具相三十二。祇



是不許分劑心量。若無如是心。一切行處。乃至彈指合掌。皆是正因。百丈和尚曰。行道禮拜。慈悲喜捨。沙門本事。宛然依佛敕。祇是不許執著。淨土指歸曰。圓頓行人。語默動靜。皆遵聖教。盡合佛心。若以念佛生心動念成妄想者。則息心無念。亦成妄想。首楞嚴經云。縱滅一切見聞覺知。內守幽閒。猶為法塵分別影事。若以念佛著有為患。則執空之人。其患尤甚。永嘉云。豁達空。撥因果。漉漉蕩蕩招殃禍。若以外求他佛為未達。則內執己心。不達尤甚。長沙云。學道之人不識真。只為從來認識神。無量劫來生死本。癡人喚作本來人。若以別求淨土為偏見。則執目前為淨土者。其失尤甚。楞嚴經說。落魔道者。都指現前即為佛國。無別淨居。及金色相。口中好言眼耳鼻舌皆為淨土。男女二根即是菩提。弟子與師。俱陷王難。迷惑無知。墮無間獄。若以執有修證為權說者。執無修證。墮落外道。其禍尤甚。楞嚴



經曰。若彼定中諸善男子。見色陰消。受陰明白。自謂已足。則有一分大我慢魔入其心腑。謂三祇劫。一念能越。心中尚輕十方如來。何況下位聲聞緣覺。不禮塔廟。摧毀經像。謂檀越言。此是金銅。是土木。經是樹葉。或是疊華。肉身真常。不自恭敬。卻崇土木。實為顛倒。疑誤眾生。入無間獄。是故當知執空破相。皆是魔屬。智度論曰。譬如田舍人。初不識鹽。見人以鹽著種種肉菜中而食。問言。何以故爾。語言。此鹽能令諸物味美故。其人便念此鹽能令諸物味美。自味必多。便空鈔鹽。滿口食之。鹹苦傷口。而問言。汝何以言鹽能作美。人言。癡人。此當籌量多少。和之令美。云何純食。無智人聞空解脫門。斷諸善根。亦復如是。思之思之。任爾一切空。生死空。爭奈閻羅大王空不得何。

七隨緣墮者。謂古人云。隨緣消舊業。任運著衣裳。但順天真。



萬行自圓。舉足下足。誰非淨業。何用種種作為。答。先德問曰。即心是佛。何假修行。答。祇為是故。所以修行。如鐵無金。雖經鍛鍊。不成金用。賢首國師曰。今佛之三身十波羅蜜。乃至菩薩利他等行。並依法融轉而行。由眾生心中有真如。體大相大用大。今日修行。引出法報身等。由眾生心中有真如。法性自無慳貪。今日修行順法性無慳。引出檀波羅蜜等。涅槃經。佛告師子吼菩薩。一切眾生皆有念心。慧心。發心。勤精進心。信心。定心。如是等法。雖念念滅。猶故相似相續不斷。故名修道。乃至如燈雖念念滅。而有光明除破暗冥。如眾生食雖念念滅。亦能令饑者而得飽滿。譬如上藥雖念念滅。亦能愈病。日月光明雖念念滅。亦能增長草木樹林。寶積經曰。若無正修者。貓兔等亦應成佛。牛頭融大師曰。若言修生。則造作非真。若言本有。則萬行虛設。長者論曰。若一概皆平。則無心修道。應須策修。以



至無修。慈愍三藏錄曰。若言世尊說諸有為。定如空華。如何救諸弟子勤修六度萬行妙因。當證菩提涅槃之果。豈有智者讚乾闥婆城堅實高妙。復勸諸人以免角為梯而可登陟乎。由此理故。雖有漏修習。是實是正。如達摩對梁武之言。為彼貪著有為。因病發藥。何得以一期之語。廢佛道業。且諸經中所謂不住相戒施等者。謂有而不住耳。有而不住。故作而無作。今以本無為不住。如下里乞兒。向人言。吾不確以富貴驕人。豈非夢語。又復執言無作者。將須槁心枯體。如鑄金像等耶。抑猶酬酢應對。如常人耶。若酬酢應對者。應非無作。若言不乖無作者。觀佛禮念妙。本自天真。豈應獨乖。二義不成。即大妄語。是故當知隨緣任運。非是無礙。若無礙是隨緣者。蚓壤蛙泥。亦是隨緣。何不成佛。錯照認祖機暗明燈。執礫為玉。與市井兒所宗之無為教。何以異哉。

八唯心墮者。謂自性淨土。即俗恆真。七寶瓦礫。一道平等。但



淨自心。何須分別。答。汝言心淨土淨。不須分別者。引汝入廁室中。能久住不。入死屍場。穢氣熏灼。不掩鼻不。與疥癩膿血之人。能同應器及牀褥不。若不能者。此相即是厭五濁相。若居住尚須淨室。同遊尚宜淨侶者。此相即是忻淨土相。忻厭熾然。何謂平等。縱汝難忍能忍如上所說種種濁穢。不求遠離。則諸虻螻鴉犬。亦能親近此種種物。豈皆得道。脫汝淨穢俱離。依然取捨。於唯心義。亦不相應。是故當知諸佛以唯心故。忻厭出生。以唯心故。說名平等。以唯心故。莊嚴佛土。若不唯心。豈能隨念。若非平等。凡夫無分。穢尚不捨。何獨捨淨。捨此方是唯既是心。取亦何乖。皆由不了佛旨。致斯妄執。但識唯心。疑義斯遣。

九頓悟墮者。今世禪人。皆云一超直入。不落功勳。尚不求作佛。何況往生。答。言不求作佛者。捨身之後。將灰斷永滅耶。抑尚受後有耶。若受後有者。為生淨土耶。為生三界耶。若居三界



· 即不如淨土。若淨土者。即同往生。又先德曰。夫善知識者。雖明見佛性。與佛同等。若論其功。未齊諸聖。須從今日。步步資熏。又云。未悟而修。非真修也。唯此頓悟漸修。既合佛乘。不違圓旨。如頓悟頓修。亦是多生漸修。今生頓熟。此在當人時中自驗。決定自欺不得若所言如行。所行如言。量窮法界之邊。心合虛空之理。八風不動。三受寂然。種現雙銷。根隨俱盡。譬諸無病。不應服藥。如或現行未斷。煩惱習氣又濃。寓日生情。觸塵成滯。雖了無生之義。其力未充。不可執云。我已悟了。煩惱性空。若起心修。卻為顛倒。然則煩惱性雖空。能令受業。業果無性。亦作苦因。苦痛雖虛。祇麼難忍。如遭重病。病亦全空。何求醫人。徧服藥餌。祖師云。將虛空之心。合虛空之理。亦無虛空之量。始得報不相酬。汾陽無業禪師云。如今天下解禪解道如河沙數。說佛說心有百千萬億。纖塵不盡。未免輪迴。絲念不忘。盡從淪



墜。如斯之類。尚不能自識業果。妄言自利利他。自謂上流。並他先德。但言觸目無非佛事。舉足盡是道場。原其所習。不如一箇五戒十善凡夫。觀其發言。嫌他二乘十地菩薩。且醍醐上味。為世所珍。遇斯等人。翻成毒藥。假使才並馬鳴。解齊龍樹。只是一生兩生。不失人身。臨命終時。一毫聖凡情量不盡。纖塵思念未忘。隨念受生。輕重五陰。向驢胎馬腹裏託質。鑊湯鑪炭裏燒煮。從前記憶想見解。一時失卻。依舊再為螻蟻。從頭又作蚊虻。雖是善因。而招惡果。圓悟和尚曰。生死之際。處之良不易。唯大達超證之士。一徑截斷則無難。然此雖由自己根力。亦假方便。於常時些小境界。轉得行。打得徹。踐履將去。養得純熟。到緣謝之時。自然無怖畏。是故古德坐脫立亡。行化倒蛻。能得勇健。皆是平昔淘汰得淨。香林四十年得成一片。湧泉四十年尚有走作。石霜勸人休去歇去。古廟香鑪去。永嘉云。體即無



生。了本無速。蓋兢兢業業。念茲在茲。方得無礙自在。既捨生之後。得意生身。隨自意趣後報。悉以理遣。不由業牽。所謂透脫生死者耶。當知諸大師密密履踐。祇是圖箇生死好處。路雖不同。期於終淨一也。往有狂僧自負見地。余問之曰。汝信得家不。信得身在長安不。僧愕然曰。惡得不信。余曰。汝夢中或夢未出家時。見父母兄弟時。或為稚子嬉戲時。是時知身在客不。僧曰。不知。余曰。論汝信得出家及與行腳。可是極明極徹。汝見道明白。當不過此。然纔到枕上。返僧為俗。易客為家。已自不知。何況生死長夜。靠汝些子見地。焉能保其不顛倒也。時僧悚然。

十圓實墮者。謂華藏世界。一剎一塵。具含無量國土。本無淨穢。焉有往來。故長者言。西方淨土。是權非實。以情存取捨。非法界如如之體故。答。若約真論。則華藏世界亦是權立。何獨西




方。如論中言。理智無邊。名之為普。知隨根益。稱之曰賢。是普賢菩薩亦權也。文殊師利。是自心善簡擇妙慧。覺首目首等菩薩。是隨信心中理智現前。是文殊菩薩等亦權也。又如此方聖賢尼父顏淵等。論中皆云此是表法。本無是人。是一切賢聖皆權也。今試定量。文殊普賢。及與此方賢聖。權耶。實耶。若言權。則現有其人。及諸遺言往行。若言實。則是長者誑凡滅聖。犯大妄語。於此辨得。西方亦入剎塵。剎塵亦含西方。豈有權實。又若論中云。蓮華藏體。是法身隨行無依住智體之所報得。宮殿。總大悲含育之所報得。樓閣。即是智照觀根。順悲濟物之所報得。其地金剛。平等自性法身之所報得。摩尼莊嚴。法身戒體隨行報得。金剛輪圍山。大悲戒防護之業之所報得。眾華莊嚴。萬行利生開敷之所報得。寶樹。建行利生覆蔭含識之所報得。但業不相應者。同住居而不見。猶如靈神及諸鬼趣。與人同處。人不能



見。若爾。則所謂華藏世界者。與汝所見之剎塵。同耶。異耶。若云同者。目連驚子。視聽尚隔。若云異者。何名一真。又如僧靈幹。志奉華嚴。作華嚴觀。及彌勒天宮觀。至於疾甚。目睛上視。若有所見。童真問之。答曰。向見童子引至兜率天宮。而天樂非久。終墮輪迴。蓮華藏是所圖也。言終氣絕。須臾復甦。真問何所見。幹曰。見大水徧滿。華如車輪。而坐其上。所願足矣。言終而逝。故清涼國師云。觀行則天童迎。而大水瀰漫。此與西方往生。為同為別。是故當知漏卮勺海。螢火焚山。徒益疲勞。諸有智者。不應如是分別。

謂娑婆在華藏十三層者。乃凡人之報土。非佛之淨土也。長者所論之華藏。與靈幹所生之華藏。皆是佛之報土。凡

人所同住而
不見者也。



◎

第九修持門

夫積劫情塵·多生愛海·似蝕劍之苔華·若吞珠之泥鏽·無礪不吐·去垢方明。欲得真實商量可謂法界實鑑心淨·除非穢滅·悟者常須覺觀·迷人勤加折伏·其或愛鎖貪枷·亦當慟年惜月。孔子曰·困而不學·民斯為下·今欲一生超僧祇之果·十念攝億萬之程。豈是麤見浮思·結心塵口所能超越·不拌一忍·空累多生·如法而修·免墮魔胃。

。一淨悟門·二淨信門·三淨觀門·四淨念門·五淨懺門·六淨願門·七淨戒門·八淨處門·九淨侶門·十不定淨門。

一淨悟者·行者欲生實淨土·當真實參究·如法了悟·何故·悟是迷途導師·如人入暗·當燃燈炬。悟是淨國圖引·如人行遠·當識郵程。悟是諸行領首·如人衝堅·當隨將帥。一者悟能了知即穢恆淨·不捨淨故。二者聞淨佛國土不可思議·不怯弱故。三



者知畢竟空中。因果不失。止一切惡法。不更作故。四者知彼土不去不來。此亦不去不來故。五者悟佛身量徧滿虛空。眾生身量亦徧滿虛空。如地獄業力。一人亦滿。多人亦滿故。六者聞阿僧祇劫無量諸行。如人說彈指頃事。不驚怖故。七者修十善三福。不住人天故。八者如覺後憶夢中事。不作有無解故。九者如眼見故鄉。信不信不可得故。十者知法無我。順性利生。直至成佛。無疲厭故。菩薩入此門已。成就白法。隨意得生。是故觀經上品云。深解義趣。於第一義。心不驚動。疏云。第一義者。謂諸法實相。言語道斷。心行處滅。又上品六念義云。安心不動。名之為念。鈔曰。第一義理。悉不為二邊所動。通名為念。故西方如韋提希善財龍樹等。以入地往生。此方如遠公智者永明等。以證悟往生。一切經論中廣載。不能具錄。論中或有言生彼求悟者。為中下人說。至言悟自己佛。不必求生。此則為十地菩薩以上說。



。若云·悟第一義·諸結使未斷者·皆不求生·則如龍樹永明等·亦為捏目生華·無事多事矣。

二淨信者·智度論曰·若人心中·有信清淨·是人能入佛法·若無信·是人不能入·譬如牛皮未柔·不可屈折·無信人亦如是。又經中說信為手·如人有手·入寶山中·自在能取·若無手·不能取·信亦如是·昔王仲回問無為子曰·如何念佛得無間斷·無為子曰·一信之後·更不再疑·即是不間斷也。仲回欣躍而去·未幾得生·還來致謝·是故若人修行·未能頓悟·當深植信根·不驚不動·一者信金口誠言·決定當生故·二者信自心廣大·具有如是清淨功德故·三者信因果如形影·決定相隨故·四者信此身形識·及一切世界建立·如陽燄空華·無所有故·五者信五濁惡世·寒熱苦惱·穢相熏炙·不容一刻居住故·六者信一切法唯心·如憶梅舌酸故·七者信念力不可思議·如業力故·八者信蓮



胞不可思議。如胞胎故。九者信佛無量身。無量壽。無量光。不可思議。如蟻妙信必須如此子身。蜉蝣。螢火光。同一不思議故。十者信此身決定當死故。若人具有如是信根。舉足下足。無非念佛。故知信之一字。通上中下。但信有大小。若無甚深信力。如無羽之鳥。決定不得飛故。

三淨觀者。眾生無始垢穢。徧一切法。如油入麪。似金在鑛。修

淨業者。真正宗通說通當加種種觀行。磨鍊習氣。為白法之垣壇。作往生之津

梁。一淨觀。謂觀佛相好。如十六觀經所說故。二不淨觀。謂觀

身心不淨。器世界不淨。生厭離故。三無常觀。謂觀一切法無定

。如一美色。淫人觀之為樂。妒婦觀之為苦。觀行人觀之。種種

惡露。異類觀之。如土木故。四和合觀。謂觀是身。是世界。是

見聞覺知。如積木為屋。積土為壘。積雜彩為畫。無實體故。五

對治觀。謂觀自身何結最重。當用何法對治。如輕冷苦澀藥草飲



食等。於熱病中為藥。於餘病非藥。輕辛甘熱藥草飲食等。於冷病中為藥。於餘病非藥。如是觀察對治故。六慚悔觀。謂觀一切眾生。無量劫來。與我互為父母兄弟姊妹男女。遞相淫毒。曾不覺知。如梟獍殺父母。牛羊鴿雀配其親屬。彼不自知。而人觀之。慚愧譏笑。諸佛菩薩見於我等。亦復如是。是故當生大悔恨故。七念念觀。謂觀一切時中。幾許憶念佛心。幾許利生心。幾許垢淨沉掉心故。八平等觀。謂觀一切色一色。無好醜故。一切聲一聲。無譽毀故。一切受一受。無恩仇故。一切義一義。無淺深故。九微細觀。謂觀佛念法念。起于何來。去于何往故。十法界觀。謂觀一毛一塵一草一木。皆具有無量淨佛國土故。行者若行諸觀時。以第一淨觀為主。餘九為伴。如石中覓珠。若不破石。無緣得珠故。

四淨念者。念佛之法。名一行三昧。惟在決定。若不得念。即有



散漫。三昧不成。一攝心念。謂一切處攝念不忘。縱令昏寐。亦繫念而寢。不隔念。不異念故。二勇猛念。如好色人。聞淫女所在。高巖深澗。燐途虎窟。必往不怯故。三深心念。如大海深廣。必窮其底。覺路遙遙。不竟不休故。四觀想念。謂念念中。見三十二相。八十隨形好故。五息心念。謂息一切名心。宦心。慾心。世間心。貪戀心。貢高心。遮護心。人我是非心。念佛故。六悲啼念。每一想佛。身毛皆豎。五內若裂。如憶少背之慈母。及多慧之亡兒故。七發憤念。如落第孤寒。負才寂寞。每一念及。殆不欲生故。八一切念。謂見聞覺知。及與毛孔骨髓。無一處不念佛故。九參究念。謂念佛一聲。便念此聲落處故。十實相念。謂不以有心念。不以無心念。不以有無心念。不以非有無心念故。是為上品念佛門。若如是念佛者。現生必得見佛。

五淨懺者。經云。前心起罪。如雲覆空。後心滅罪。如炬破暗。



又云·百年垢衣·可於一日浣令鮮淨·是故欲除重障·當勤懺悔
·一內懺·謂懺心意識不淨因故。二外懺·謂懺一切色一切聲一
切不淨法故。三事懺·謂懺十八界二十五有八萬四千種種塵勞結
使·障學阿僧祇劫見佛利生諸行業故。四理懺·謂懺入道以來·
所得狂解·所學經論·所聞奧義·作止任滅等病·障佛無漏智故
。五過去懺·謂懺無始世來·所作黑業·如今生雖不偷盜·但所
求不如意·即是盜業未盡·今生雖不邪淫·但值不隨意眷屬·即
是淫業未盡·今生雖不謗法妄語·但言出人或疑信相半·即是謗
法及妄語業未盡·於一切果中·察一切因·當知前生無惡不造·
一一當懺悔故。六未來懺·謂一切惡法·即今便止·盡未來世·
永不相續故。七現在懺·謂懺現在世所有生老病死種種苦業·種
種煩惱業·舉足下足業·起口動心業·一切微細不可稱量業故。
八剎那懺·謂一念中有九十剎那^{此節精進義}·一剎那有九百生滅·一生滅一



懺故。九究竟懺此懺下劣得少為足及潤道法愛等罪。謂等覺位中。有一分無明。猶如微煙。究竟洗滌故。十法界懺。謂法性中。無我無人。普為十方過現未來一切眾生懺故。若能如是真實懺者。一切障礙悉得消滅。不離道場。得見諸佛。

六淨願者。智度論曰。諸菩薩見諸佛世界無量嚴淨。發種種願。有佛世界都無眾苦。乃至無三惡之名者。菩薩見已。自發願言。我作佛時。世界無眾苦。乃至無三惡之名。亦當如是。有佛世界七寶莊嚴。晝夜常有清淨光明。無有日月。便發願言。我作佛時。世界常有嚴淨光明。亦當如是。有佛世界一切眾生皆行十善。有大智慧。衣被飲食。應念而至。便發願言。我作佛時。世界中眾生衣被飲食。亦當如是。有佛世界純諸菩薩。如佛色身三十二相。光明徹照。乃至無有聲聞辟支佛名。亦無女人。一切皆行深妙佛道。遊至十方。教化一切。便發願言。我作佛時。世界中眾



生。亦當如是。如是等無量佛世界種種嚴淨。願皆得之。以是故名願受無量諸佛世界。問曰。諸菩薩行業清淨。自得淨報。何以要須立願。然後得之。譬如田家得穀。豈復待願。答曰。作福無願。無所標立。願為導御。能有所成。譬如銷金。隨師而作。金無定也。如佛所說。有人修少施福。修少戒福。不知禪法。聞人中有富樂人。或聞欲天色天。心願樂者。命終之後。各生其中。菩薩亦如是。修淨世界願。然後得之。以是故知因願受勝果。復次莊嚴佛界事大。獨行功德不能成。故要須願力。譬如牛力雖能挽車。要須御者。能有所至。淨世界願。亦復如是。福德如牛。願如御者。問曰。若不作願。不得福耶。答曰。雖得。不如有願。願能助福。常念所行。福德增長。以是義故。修淨佛國土者。當發大願。是名淨土無上願王一者不為福田故願。願為一切眾生蔭。生淨土故。二者不為眷屬故願。願治一切如來家。生淨土故。三者不為病苦故



願。願醫一切世間無明等瘡。生淨土故。四者不為轉輪王故願。願轉諸佛如來法輪。作大法王。生淨土故。五者不為欲界故願。願離一切微妙五欲。生淨土故。六者不為色界故願。願離一切禪著。生淨土故。七者不為無色界故願。願盡種種微細流注。證無量相好身。生淨土故。八者不為聲聞辟支故願。願以福智二嚴。饒益一切眾生。生淨土故。九者不為一世界千世界故願。願代無央數世界苦。拔一切世界眾生。生淨土故。十者不為一阿僧祇劫千阿僧祇劫眾生故願。願代無量無數阿僧祇劫眾生苦。拔一切眾生。生淨土故。若能如是發大願者。最後剎那。決定當如普賢願中所說。是故當知願為截苦海之舟航。導極樂之明師故。

七淨戒者。一切淨法。以戒為址。如人作舍。先求平地。如畫師畫諸山水。先治光明素練。然後著彩。戒亦如是。是故戒為諸善法之首。入淨國之初門。若不持戒。如惡陋敝女。欲事帝釋。無



有是處。一慳貪戒。謂行財命二施。及與法施。無愛惜故。二毀禁戒。謂五戒。律儀戒。乃至無漏戒。滿足持故。三瞋恚戒。謂以忍調心。及於身口。若遇惡口刀杖所加。但自思惟業因緣法。作償負想。作導師想。作風寒冷熱想故。四放逸戒。謂生死險道。無放身處。如人持滿油鉢。行懸繩上。不得左右顧視。及生第二念故。五散亂戒。謂守攝諸根。息諸緣影。如護風燈。如防生鳥故。六愚癡戒。謂以智慧。破諸迷悶。如作務人。常借日光。若是長夜。諸作皆廢故。又如登覽。當用開目。若是盲人。及與睡眠。諸山河大地。與無等故。七憍慢戒。謂不應以才辯故貢高。不應以悟解故貢高。不應以諍論故貢高。一切所得。如大地上塵。如鏡面上垢。不應以此垢驕彼垢故。八覆藏戒。謂一切處諸佛。一切處菩薩。一切處神明。無可覆故。如日中逃影。波中逃溼。沙中逃塵。無可逃故。九無益戒。謂一切嬉戲事無益。一切



詩文無益。一切塵緣無益。一切口解脫無益。當遠離故。十不住戒。謂如上持戒。但為生淨土。饒益眾生。不求聞譽法。及諸人天二乘果故。菩薩如是行於淨戒。則能攝諸眾生。生於淨土。何以故。一切眾生雖至冥頑。莫不欽仰戒德故。

八淨處者。學道之人。既有志出塵。應當捨諸惡處。若不捨者。

應是厭離未極。若厭離未極者。應是忻淨土未極。龍樹曰。菩薩

心不貴轉輪聖王。要切人天福樂。但念諸佛。是故隨心所重。而生佛

土。今小小適意處。尚不能捨。何況轉輪聖王。如縛足欲行。繫

翅求飛。去住皆累。兩心虛縈。一繁華喧闐處當遠故。二歌樓酒

肆處當遠故。三熱燄熏灼處當遠故。四論除目。及朝事處當遠故

。五恩愛纏縛。及熟遊歷處當遠故。六詩壇文社。鬪章摘句處當

遠故。七譏刺古今。較長競短處當遠故。八講無義味道學處當遠

故。地九義解家鬪名相。矜小智之處當遠故。十宗乘狂解。妄談頓



悟。輕視戒律之處當遠故。是等撓道。與魔不異。是故當遠。行者若離是諸處。一切道業即當成辦。

九淨侶者。一切悟機非友不發。一切惡法非友不止。如車二輪。去一則蹶。是故世間文字。諸戲論法。尚須同心印正。何況志求無上大道因緣。經曰。譬如風性雖空。由栴檀林薈蔔林吹香而來。風有妙香。若經糞穢臭屍而來。其風便臭。又如淨衣置之香篋。出衣衣香。若置臭處。衣亦隨臭。友亦如是。是以行道求友者。當嚴別淨穢。一山林閒適之友當近。能止躁心故。二嚴持戒律之友當近。能淡諸慾故。三智慧廣大之友當近。能出迷津故。四總持文字之友當近。能決疑難故。五寂寞枯槁之友當近。能恬進取故。六謙卑忍辱之友當近。能銷我慢故。七直心忠告之友當近。能抑諸過故。八勇猛精進之友當近。能速道果故。九輕財好施之友當近。能破大慳故。十仁慈覆物。不惜身命之友當近。能摧



人我等執故。若無如是淨侶。即當屏人獨處。自辦道業。以像設為師。以經論為侶。其他嬉戲之徒。寧絕勿通。如入園中。雖無佳華。不植臭草。以無益賞心。徒增厭穢故。

十不定淨者。一切眾生根器。利鈍不同。如上諸法。皆是上根利器。方得具足。是故如來有異方便。開九品之門。分上中下修習三等。一者或解義諦。未全伏惑。或不深解。但能誦讀諸經故。二者或但依語生信。或因他生信。或遇貧窮折辱生信故。三者或觀金像。或隨意觀一相故。四者或晨朝十念百念。乃至千念故。五者或但懺諸麤重習氣。及十不善業故。六者或為怖生死。發願往生。或遇苦難。發願往生。但不得作人天及諸福德願故。七者或但持八戒五戒。乃至但戒殺盜淫妄故。八者一切喧場。不能卒離。但時時生厭離心故。九者於諸世法中人。不能即斷。但不隨順故。十者如觀經下品中說。或但臨終十念故。如上諸法。但能



至心受持一法者。皆得往生。唯不得疑信相參。至論若有疑者。一切諸行悉不成就。如人夜中。獨趨遠道。不得生疑。是故眾生聞法。疑者不如不聞。何以故。彼無聞者。但不聞法。非有障難。此則自作障難故。

第十釋異門

夫西方大旨。經中自明。淨土要門。諸論具釋。如天親。智者。海東。越溪等。皆抉發幽微。舉揚宗趣。近則雲棲和尚所著小本疏鈔。條分類析。精宏淵博。真照夜途之長炬。截苦海之輕舟。諸師所發。已無餘蘊。但諸經中隨時立教。逗根說義。時有差別。致生學者疑畏。今略為拈出。博採諸論。附以管見。會歸一處。以便參考。一刹土遠近釋。二身城大小釋。三壽量多少釋。四華輪大小釋。五日月有無釋。六二乘有無釋。七婦女有無釋。



八發心大小釋。九疑城胎生釋。十五逆往生釋。

一刹土遠近者。問。大小本經皆云。西方去此十萬億刹。觀經獨

云。阿彌陀佛去此不遠。二說誰正。釋。以遠近無定故。故言亦

一句誰二說

遠亦近。何故。凡言某方者。某方至某方。幾城幾邑者。是從色

身建立。身相虛故。是故所計方向道里。亦皆不實。不得言誰近

誰遠。如滇人言燕地遠。是從滇計故。燕實無遠。齊人言燕地近

。是從齊計故。燕實無近。又如十步之地。蟻子即遠。大象即近

。不應言遠是實。何故。是地不當從蟻計故。亦不應言近是實。

何故。是地不當從象計故。又則計十步者。亦非是實。何故。是

地既不從蟻不從象。亦不當從人計故。智度論曰。隨世俗所傳。

故說有方。方實不可得。問曰。何以言無方。是方亦有亦常。如

隨情說

經中說。日出處是東方。日沒處是西方。日行處是南方。日不行

處是北方。日有三分合。若前合。若今合。若後合。隨方日分初



合是東方。南方西方亦如是。日不行處是無分。答曰。不然。須彌山在四域之中。日繞須彌。照四天下。鬱怛羅越日中。是弗婆提日出。於弗婆提人是東方。弗婆提日中。是閻浮提日出。於閻浮提人是東方。是實無初。何以故。一切方皆東方。皆南方。皆西方。皆北方。汝言日出處是東方。日行處是南方。日沒處是西方。日不行處是北方。是事不然。問曰。我說一國中方相。汝以四國為難。以是故東方非無初。答曰。若一國中與東方合。是有為邊。有邊故無常。無常故是不徧。以是故但有方名而無實。是則方所尚不可得。豈有程途。然亦不廢方所及程途故。何故。以不當從閻浮提計。亦可即閻浮提計故。如日雖非東西出沒。亦可言東出西沒故。

二身城大小者。問。聲王經曰。阿彌陀佛與聲聞俱。其國號曰清泰。聖王所住。其城縱廣十千由旬。觀經曰。佛身高六十萬億那



由他恆河沙由旬。眉間白毫右旋宛轉。如五須彌山。佛眼如四大海水。今計一海八萬四千由旬。四海合三十三萬六千由旬。身過其眼五百六十萬由旬。計所住城。尚少於眼三十二萬六千由旬。何況其身。不應身城懸絕如是。釋。海東疏中。亦有此問。疏曰。彼佛有眾多城。隨眾大小。城亦大小。大城之中。示以大身。小城之中。現以小身。聲王經言十千由旬者。是與聲聞俱住之城。當知佛身相當而住。觀經所說身高大者。當知其城亦隨廣大。與諸大眾俱住處故。先德云。法華中。淨光莊嚴土唯演頓故。淨名中。眾香佛土純菩薩故。所以彼佛但現高大之身。若安養土頓漸俱談。聲聞菩薩共為僧故。故使佛示生身法身二種之相。三十二相。通於生法。大小共見。若八萬相。局在法身。大乘賢聖方得見也。是故應以藏塵尊特之相得四益者。佛為稱機現藏塵尊特身。應以八萬尊特之相得四益者。佛為稱機現八萬尊特身。應以



三十二尊特之相得四益者。佛為稱機現三十二尊特身。如毗盧遮那。聲聞視聽。隔於對顏。不妨菩薩更見大身。何故。佛身隨所被機大小。如日光隨隙分大分小。而是日光。無大小故。

三壽量多少者。經云。彼佛壽命。無量無邊阿僧祇劫。又云。彼佛至般泥洹時。觀世音菩薩乃當作佛。既當入滅。即是有量。釋。先德云。藏通補處。彰佛有量。別圓補處。顯佛無量。以十方三世一切如來更無彼此迭相見故。同一法身。一智慧故。菩薩機忘。如來應息。名補佛處。實異藏通前佛定滅。後佛定生。故金光明四佛降室。疏乃釋云若見四佛同尊特身。一身一智慧。即是常身。弟子眾一故。若見四佛。佛身不同。即是應化。弟子眾多故。故知全法界身。非生非滅。豈得豎分當現。橫論彼此。既非生滅。無量義成。且淨佛剎中。塵剎水樹。皆是佛身。故經中云。是諸眾鳥。皆是阿彌陀佛變化所作。智度論曰。眾生甚多。若



佛處處現身。眾生不信。謂為幻化。心不敬重。有眾生從人聞法。心不開悟。若從畜生聞法。則便信受。如本生經說菩薩受畜生身。為人說法。人以說法希有故。無不信受。有人謂畜生是有情之物。以樹木無心而有音聲。則皆信受。以是故水樹禽鳥皆是佛身變現故。若佛壽量有盡者。道場國土。及諸水鳥音聲。亦應有盡。若有盡者。不應有補。若無盡者。不應言滅。如虛空分齊。非有分齊。非無分齊。以不思議智。此同觀心釋也照之可得。

四華輪大小者。小本曰。池中蓮華大如車輪。觀經云。一一池中。有六十億七寶蓮華。團圓正等十二由旬。大本云。池中蓮華。或一由旬。乃至百由旬千由旬。夫人世車輪。大不逾丈。縱復輪王千輻金輪。縱廣不過一由旬。何得大小相懸。乃爾。釋。華輪大小。亦如身城。以眾生機有大小故。身城水樹現有大小。蓮華亦然。如初地化百佛剎。現百葉華。二地化千佛剎。即現千葉。三



地萬葉。四地億葉。五地千億。六地百千億。七地百千億那由他。
· 八地百千萬三千大千世界微塵數。九地百千萬億阿僧祇國土微塵數。十地十不可說百千億那由他佛剎微塵數。以自受用身有大小故。現華亦爾。非是華有大小故。嘗聞僧言。海邊有阿育王舍利塔。眾生見者。光明各異。有見無光者。有見光如細豆許者。有見如棗巨者。有見如指頂大者。有見大如斗者。如斗者。千不一見。眾生同一肉眼。所見尚異。何況菩薩聲聞乃至人天等。功用懸絕。所感華輪。焉得不殊。如此土中剎利貴種。飛樓傑閣。徧滿城邑。寒微瑩子。敝茅土窟。乃至不得。不應難言大小懸殊。何故。是自福德所招故。寶池華相。應亦如是。

此上所言阿育王舍利塔。以本人未曾親見。傳聞失實。爰為補書。以昭聖迹。其寺原名阿育王。後改為廣利。人仍以阿育王稱之。在浙江寧波鄞縣南鄉四十里鄞山。佛滅度百年後。中天



竺國阿育王。統王閻浮。威德廣大。所有鬼神。皆為臣屬。意
 欲普利世人。啟其祖阿闍世王所藏之八萬四千佛舍利。役使鬼
 神。碎七寶眾香為泥。一夜造成八萬四千寶塔。散布南瞻部洲
 。耶舍尊者。伸手放八萬四千道光。一鬼捧一塔。順光而趨。
 至光盡處。則安置地中。東震旦國。有十九處。大教東來。次
 第出現。如五臺育王等是也。五臺之塔。闕於大塔之中。育王
 之塔。於晉武帝太康三年。劉薩何。乃利賓菩薩示迹。出家法
 名慧達。禮拜請求。從地涌出。遂建阿育王寺。供於殿內石塔
 中。塔門常鎖。有欲睹舍利者。先通知塔主。殿中禮佛。禮畢
 。跪於殿外階緣。每有人跪。凡欲睹者。均隨之而跪。塔主請
 塔出。先令居中跪者睹。次則徧令隨跪者睹。雖一日隨睹數次
 。亦不以為煩。其塔高一尺四寸。周圍亦只尺餘。塔之中級。
 內空。中懸一實心鐘。鐘底正中有一鍼。舍利附於鍼端。四面



有窗·華格欄遮·手不能入·即於華格孔中睹之。其舍利之形色大小多少定動均無一定。平常人睹·多見是一粒·亦有見二三四粒者。有見舍利靠於鐘底不動者·有見一鍼下垂至寸許者·有見忽降忽升·忽小忽大者。有見青者黃者赤者白者·及一色之濃淡不同·并二色相兼之各種異色者。有見色氣黯然者·有見色氣明朗者。不獨人各異見·即一人亦多轉變不一。又有見蓮華·及佛菩薩像者。亦有業力深重·完全了無所見者。見其小時·每如小綠豆大·亦有見如黃豆大棗大者。明萬曆間·吏部尚書陸光祖·篤信佛法·極力護持。與親友數人來睹·初看如小豆大·次如黃豆大·次如棗大·次如瓜大·次如車輪大·光明朗耀·心目清涼。時舍利殿壞·塔供庫房·陸遂發心重修塔殿。彼親友所見亦甚好·但無陸之奇特神妙耳。須知如來大慈·留此法身真體·俾後世眾生·種出世善根。以由睹此神



異。自可生正信心。從茲改惡修善。閑邪存誠。以期斷惑證真。了生脫死。直至復己本具佛性。圓滿無上菩提。此如來示現不思議相。曲垂接引之本心也。願見聞者。同深感念。則幸甚。光於光緒二十一年。幸得虔禮數旬。兼閱育王山志。故知其詳。民國二十年辛未元日。常慚愧僧釋印光謹書。

五日月有無者。諸本或言日月處空。或言處空而不運轉。或不言有無。或直言無有。又經曰。彼佛光明。普照佛剎無量無數不可思議。映蔽日月。諸聲聞眾。皆有身光。能照一尋。菩薩光照。極百千尋。二菩薩光明。常照三千大千世界。如是雖有日月。如燭火之處太陽。豈有光照。若日月不能照者。應無晝夜。何故。經言晝夜六時。及與清旦食時等事。明知亦是權說。借此晝夜。喻彼時分。非為實事。且晝夜往來者。是眾生心明暗傾奪。感有此相。故淨佛國土。不應有此。如忉利而上。尚不假明日月。何



況極樂。縱令有者。亦是彼化國眾生色空見未盡。現有如是日月相故。而實佛土無有日月。如大論曰。釋迦文佛更有淨國土。如阿彌陀佛。阿彌陀佛亦有不嚴淨國。如釋迦文佛。此隨機感說。亦不妨說有故。

六二乘有無者。問。天親菩薩無量壽偈曰。大乘善根界。等無譏嫌名。乃至不聞二乘名。何況有實。是諸經中皆言國土聲聞。不可稱量。何故。釋。先德云。二乘生者。皆是臨終回小向大。以習小功深。聞佛所說。及風柯水響皆演小故。暫證小果。漸次增進。至菩薩位。非是住小。是故說無二乘者。有二義。一是決定二乘不生。是實無故。二是不住二乘。是畢竟無故。譬如二人同官郎署。一人官止於此。一人將遷。止郎署者。可以稱郎。以無後官故。將遷官者。不定是郎。以郎畢竟改故。以是故淨土不得言有二乘。以畢竟至菩薩位故。



七婦女有無者。聲王經中。阿彌陀佛亦有父母。何得言無女人。釋。此亦化作。如化鸚鵡。海東疏曰。聲王經說安樂世界阿彌陀佛有父母者。是變化女。非實報女。又復雖有父母。而非胎生。實是化生。假為父母。如彼經言。若四眾能正受佛之名號。以此功德。臨命終時。阿彌陀佛即與大眾住此人所。令其得見。見已慶悅。倍增功德。以是因緣。所生之處永離胞胎穢欲之形。純處鮮妙寶蓮華中。自然化生。具大神通。光明赫奕。當知父母假寄之耳。或說聲王經中說有父母。是顯彼佛所住穢土。是義不然。何故。彼經既說寶蓮化生。又言二菩薩侍立左右。此等悉是淨土相。不異觀經所說故。當知彼經所說提婆達多。及魔王等。悉於淨土變化所作。不由此等。為非淨土。如化畜生。非穢土故。

八發心大小者。魏譯三輩之中。皆有發菩提心。觀經下品直言十念。諸經互異。今欲和會者。諸經皆是發大菩提心以為因故。何



故。若是最初無大因者。其人雖復經耳。亦生疑難。何得頓聞頓信。是故當知下品十念者。亦是宿植大因。後生退墮。故其臨終遇善知識。如旱苗得雨。萌芽頓發故。若無因者。知識尚不得遇。何況信受。如聰慧貴遊之士。多有愈聞愈不信者。即知一聞頓念。非是小緣。不應以一生作惡。便謂此人無大因故。經云。世間人民。得聞阿彌陀名號。若慈心喜悅。毛髮聳然。淚即出者。皆是累世嘗行佛道。或他方佛所嘗為菩薩。是故不論顛愚點慧。凡至心念佛者。皆是多劫深植善根。發大菩提心故。何故。所謂善根者。不專言智慧。若復無根。如種焦穀。豈有芽出。如世間弈棋小事。有無知賤流。頓學頓精者。有智士習之。終身居末品者。即知是因。小技無因確然。尚不得入。何況大法。是故若有信是希有難信之法者。是人即是大心菩薩故。

淨土法門。即最下賤人。決定墮落。

十惡五逆。若信此淨土法門。即不思議人。決得成佛。自負大徹大悟。若謗此



九疑城胎生者。唐譯曰。若有眾生未悟。墮於疑悔。而積集善根以此善根。

· 希求佛智。普徧智。不思議智。無等智。威德智。廣大智。

於自善根以未悟故。不能生真實之信。由聞佛名。起求生淨土之信心故。以此因緣。於五百歲處華胎中。猶如園苑宮殿之想。不見佛。不聞法。是名胎生。魏譯曰。不了佛智。然猶信罪福。修習善本。願生其國。是故胎生。宋譯曰。眾生所種善根。不能離相。不求佛慧。妄生分別。深著世樂人間福報。是故胎生。王氏本曰。若有眾生修諸功德。願生彼剎。後復疑悔不信有彼佛剎。不信作善得福。其人雖爾續有念心。暫信暫不信。臨命終時。佛乃化現其身。令彼目見。以心悔故。其過差少。亦生彼剎。是謂胎生。今按前二譯。但不信自性。不了佛智。名胎生故。宋譯則直言修善求生人天者為胎生。極樂國中無胎生故。若王氏。則又以不信佛剎。不信罪福。暫信暫不信。為胎生。異前譯中聞名起信及修習善本二



種往生。大約淨土中略言九品。廣言千萬品亦不能盡。如今生人中者。種種福報。種種罪業。各各不同。是故諸譯雖互異。皆為實語。就中唐譯。旨趣尤奧。以不信自善根故。依他起信。即是疑城。信自善果者。即頓了自心。不從他得。以入悟方能脫疑。是故未悟而修。終隔疑胎。胎以裹蔽為義。未悟之人。諸障未徹。合得是報。此等當在中下下上品攝。何故。下品後二種。經歷六劫十二劫。方得華開。此但五百歲故。若如王本。則信佛猛利。未若最後二種。又所生在其剎邊地。不應五百歲得見佛故。

十五逆往生者。大經曰。唯除造五無間惡業。誹謗正法。及諸聖人。觀經。則五逆十惡。臨終十念。皆得往生。當知大經揀五逆者。以誹謗故。何故。入淨土以信為導師。誹謗是信之賊。如水無所不容。但不容火。以火自不能容故。如風無所不入。但不入石。以石自不堪入故。誹謗之人。燒正法如猛燄。障佛智如鐵壁。




· 是故法海慧風· 無因得受· 觀經揀誹謗不揀五逆者· 義同文異
· 以五逆雖至惡· 尚無決定不信之見· 不應揀故。然有大心之人
· 始或不信· 後因啟發· 猛省前失· 如韓昌黎始斥佛骨· 後皈依
大顛。張無盡初詆佛書· 欲著無佛論· 後觀淨名經· 大有省發·
卒為宗門龍象· 尤是法中希有之事· 是故儒林英特· 或有謬聽先
入· 誤謗佛法· 但速圖改悔· 即是盛事· 不應以謗為障難故。

西方合論



舊跋

淨土玄門· 失闡久矣· 雲棲大師重揭義天· 海內共仰· 而曹魯
川輩· 猶謬執方山合論· 謬爭權實· 蓋由未透圓宗· 徒取圓融
廣大語聲故也。西方合論一出· 判之為圓實墮。然後知淨土諸



經·的與華嚴法華不分優劣。可破千古群疑矣。伏願見聞此論者·廣破邪疑·直開正信·揭淨土之心燈·照塵劫而無盡。辛卯秋淨業弟子明善謹跋。



附紀夢

(出珂雪齋外集)



公安晁隱衷中道紀

萬曆甲寅^{四十二年}十月十五日·課畢趺坐·形神靜爽·忽瞑去·如得定·

俄魂出屋上·月正明·不覺飄然輕舉·疾如飛鳥·雲中二童子駛呼予曰·逐我來·蓋西行也。下視山澤平疇·城邑村落·若堙土杯水·蜂衙蟻穴·少墜·穢不可聞·極力上振·乃否·俄二童子下至地曰·住·予隨下·見坦道如繩·平如掌·視其地·非沙石·光耀滑膩·逐路有渠·文石為砌·寬十餘丈許·中五色蓮·芬香非常·渠上樹枝葉晃耀·好鳥和鳴·間有金橋界渠·欄楯交羅·樹內樓閣·整麗無比·樓中人清美妍好·宛若仙·皆睨予笑·



童子行。予追不及。大呼曰。可於金橋少待。童子如言。始及之。共倚橋上寶欄。少息。予揖問。卿何人。此何處。幸為我言。曰。予靈和先生侍者也。先生與卿有所晤言。予曰。先生何人。曰。即令兄中郎先生。相見自為卿言。可疾往。復取道至一處。樹千餘株。葉翠羽。花金瓣。樹下池水汨汨。池上白玉扉。一童先入。一童導過樓閣二十餘重。金色晃耀。靈華異草拂檐楹。至一樓下。一人下迎。神似中郎。而顏如玉。衣若雲霞。長丈餘。見而喜曰。弟至矣。攜上樓。設拜。有四五天人來共坐。中郎曰。此西方邊地也。晤言者此也信解未成。戒寶未全者。多生此。亦名懈慢國。上方有化佛樓臺。前有大池。可百由旬。中有妙蓮。眾生託體。滿則散處樓臺。與有緣淨友相聚。以無淫聲美色。可見信解戒寶不是二事勝解易成。不久進為淨土中人。予私念如此。尚是邊地耶。問。兄生何處。中郎曰。我淨願雖深。情染未除。初生此少時。今居淨域矣。馬太昭謂戒終以乘急



戒緩多。僅地居。三途此必後知改悔余謂其乘急者必能猛悔。不得與大士升虛空寶閣。尚需進修耳。幸宿生智

慧猛利。又曾作西方論。讚歎如來不可思議度生之力。感得飛行

自在。游諸剎土。諸佛說法。皆得往聽。此實為勝。拉予行。冉

冉上升。倏忽千萬里。至一處。隨中郎下。無日月。無晝夜。光

耀無障蔽。皆以琉璃為地。內外映徹。以黃金繩。雜廁間錯。界

以七寶。分劑分明。樹皆栴檀吉祥。行行相值。莖莖相望。數萬

千重。一一葉出眾妙華。作異寶色。下為寶池。波揚無量自然妙

聲。其底沙。純以金剛。池中眾寶蓮。葉五色光。池上隱隱危樓

迴帶。閣道傍出。棟宇相承。窗闥交映。階墀軒楹。種種滿足。

皆有無量樂器。演諸法音。大小彌陀經所載。十不得其秒忽耳。

仰而睇之。空中樓閣。皆如雲氣。中郎曰。汝所見四土非定異非不。淨土地行眾

生光景也。過此為法身大士住處。甚美妙。千倍萬倍於此。神通

亦百倍千倍於此。吾以慧力游其間。不得住也。過此為十地等覺



所居。吾亦不得而知。過此為妙覺所居。唯佛與佛乃能知之。語罷。復至一處。無牆垣。有欄楯。院宇光耀非常。不知何物為之。覺黃金白玉皆如土色。共坐於一樓下少談。中郎曰。吾不圖樂之至此極也。使吾生時嚴持戒律。尚不止此。大都乘戒俱急。生品最高。次戒急。生最穩。若有乘無戒。多為業力所牽。流入八部鬼神眾去。予親見同人矣。弟般若氣分頗深。戒定力甚少。夫悟理不能生戒定。頂門針亦狂慧也。歸五濁。趁強健。實悟實修兼淨願。勤行方便。憐憫一切。不久自有良晤。一入他途。晤言公案歸結于此可怖可畏。如不能持戒。有龍樹六齋法現存。遵而行之。殺戒尤急。寄語同晤言者。此也未有日啟鸞刀。口貪滋味。而能生清泰者也。雖說法如雲如雨。何益於事。我與汝空王劫時。世為兄弟。乃至六道。莫不皆然。幸我已得善地。恐汝墮落。方便神力。攝汝至此。淨穢相隔。不得久留。予更問伯修諸人生處。曰。生處皆佳。汝後自知。



忽陵空而逝。予起步池上。如墮。一駭而醒。通身汗下。時殘燈在篝。明月照窗。更四漏矣。

❧

舊跋

成時曰。此金陵馬太昭居士錄出。余為評點附入。試觀其中。字字與教乘相合。至警策處。尤非施設言辭者所能。如親觸寒威。身毛起粟。尚何有疑於咏齋發。歌栗烈者乎。且世世生生於六道中為兄弟。此豈人情所欲自道者耶。真語實語。允可流通。甲午夏成時識。

❧

附袁中郎傳

袁中郎。名宏道。號石頭居士。湖北公安人也。兄伯修。名宗道。號香光居士。弟小修。名中道。號上生居士。三人同母生。少



以文名。長而皆好禪宗。萬曆中。先後舉進士。伯修官至右庶子。中郎為吳江知縣。聽斷敏決。公庭鮮事。輒喜遊山水。後為禮部主事。謝病歸。築園城南。植柳萬枝。號曰柳浪。與諸禪人遊處其中。初學禪於李卓吾。信解通利。才辯無礙。已而自驗曰。此空談。非實際也。遂回向淨土。晨夕禮誦。兼持禁戒。伯修小修亦同時發願。中郎因博采經教。作西方合論。圓融性相。入不二門。書成。伯修序之。已而中郎起故官。再遷至稽勳司郎中。移病歸。抵家不數日。入荊州城。宿於僧寺。無疾而卒。小修官南禮部郎中。乞休。老於家。居常勤於禮誦。一夕課畢。神遊淨土。如上所紀。



徹悟禪師語錄（附錄）



重刻徹悟禪師語錄序

語錄二字
原作遺稿

余輯徹師遺稿成。或問念佛往生之道。有要術乎。余曰。有。確信而已矣。淨土三資糧。曰信。曰願。曰行。確信而願行在其中矣。憶昔從學單華藏夫子。請益當世諸大德。即耳都中徹悟老人名。蓋淹貫宗教。而宏揚淨土者。慕之。丙寅遊燕。竊幸獲禮座矣。至則師已移居紅螺。相距信宿程。以俗羈不果行。悵緣慳者久之。戊寅之春。真益子自京攜師集來。余獲讀焉。歎其示眾之語語悲激。往生之種種確鑿。密授北濟宗風。曠游南台教海。不覺涕泗悔憤。何當年之阻於咫尺。遽交臂而失之耶。嗟夫。娑婆忍土。境苦而壽促。稍知發大心者。孰不警惕無常。思出生死。



然終以不得其門而止。即有多生善根。皈敬三寶。且知有最上往生之捷徑。又或以一己之見聞未確。反疑傳載或過其實。卒至懷疑自悞。甘忍以待死。吁。確信之難生有如是耶。今徹師之西歸也。數月前辭囑外護。次第諸務。則預知時至之確也。幢幡盈空而來。諸大菩薩繼至。臨終之頃。彌陀親接。則報終境現。佛菩薩接引之確也。然猶師一人之獨見也。若夫異香浮空。七日如生。髮白變黑。舍利鱗砌。此則當時眾見眾知。往生之確瑞徧布支那。而無所用其纖疑者也。人若聞此而仍不知確然猛省。步武後塵。努力今身。以了當生死。是誰之過歟。余嘗考震旦自遠公開淨土法門為初祖。其後可登祖位者。殆不乏人。而自古沿傳。以善導·承遠·法照·少康·永明·省常·蓮池·思齊·諸師。為淨宗九祖。余維徹師行履。盡未來際。足以聞風興起。後有繼列祖位者。殆不可遺也。適胥城貝寶巖先生。續以師念佛伽陀相贈



· 而松濤開士· 謂宜重合梓以廣其傳· 首捐刻資若干· 遂擇兩集之精談宗教淨者刊之· 其餘雜著· 備體而已· 蓋以資天下後世會宗教而同歸淨土· 尤當於三資糧中· 決以確信往生為先務故也· 松師勸人念佛僧· 西天目淨文長老之戒子也· 清嘉慶二十四年· 歲次己卯· 夏六月既望· 虎林三寶弟子錢伊庵謹序·

徹悟語錄· 洵為淨宗最要開示· 倘在蕩益老人前· 決定選入十要· 然具法眼者· 肯令此書湮沒不傳乎· 以故錢伊庵居士· 於嘉慶二十四年· 擇要節略· 名徹悟禪師遺稿· 刊布南方· 同治七年· 杭州諡西師依伊庵本重刻于杭州· 同治十年· 楊仁山居士又稍節之· 改名語錄· 刻於金陵· 光緒十六年· 揚州貫通和尚· 刻淨土十要· 依仁山本· 附於十要後以行· 今排十要原文· 特附于十要第十之後· 仍依仁山本· 但加錢序於首· 俾閱者· 咸知此書之源委云· 所願見者聞者· 同皆深入淨宗法界· 直




登上品蓮臺。庶不負徹悟老人一番大慈悲心也。
民國十九年庚午仲冬釋印光識

◎
原序

世之稱淨業者。自晉遠法師始。仰體佛慈。大啟度門。鑿池植蓮。建堂立誓。於時十八賢眾。百二十三人。得自在力。念而無念。無生而生。心印遞傳。迄至於今不墜。有徹悟禪師者。法門之元嗣也。夙具定慧。參契淵微。始則悟圓覺一經要義。繼則了解三藏十乘妙旨。盡棄舊習。專注淨業。虛其衷。平其氣。歷廿載如一日。無退轉心。克遂西生之願。是以圓信圓解饒益眾生者。即以之證彌陀法界。遺集具存。讀之而益信師之所言。曰願。曰信。曰行。曰罪業懺除。曰善根成熟。要惟兢兢於一心之生者。橫徧十方。豎窮三際。心之廣也。慮墜偏小。發大菩提。心之宏



也。任運感業。合道轉業。心之權也。清珠濁水之投。種瓜種豆之獲。鑄金成麩之具。心之源也。經所稱是心作佛。是心是佛二語。尤反覆求詳。三致意焉。又謂一寸時光。一寸命光。欲後之學者。於恒河沙數中。履捷行簡。速出生死之關。共證安樂之境。拯拔群迷。胥登彼岸。其意亦何厚乎。師平昔於語言文字。不欲究心。然偶一拈吟。大之總攝無餘。細之圓融無礙。對機立教。真理兼包。如阿伽陀藥。無病不療。如如意珠。無願不滿者。其如斯乎。余竊念宗教兩門語錄。浩如煙海。疏經注義。法旨昭明。而淨業之修。為入道之正軌。自龍舒大佑諸集外。言者闕如。宜師言之不可湮沒也。師之高弟松泉。以是集付刊。問序於余。余即師文之奧衍者申言之。是為序。三寶弟子誠安謹識。



◎ 自序

余自乾隆癸巳^{三十八年}·住持京都廣通寺·領眾參禪·間有東語西話·筆以記之。至丁酉歲^{四十二年}·以宿業深重·多諸病緣。因思教乘五停心觀·多障有情·以念佛治。且此一門·文殊普賢等諸大菩薩·馬鳴龍樹等諸大祖師·智者永明楚石蓮池等諸大善知識·皆悉歸心。我何人斯·敢不歸命。於是朝暮課佛·而禪者願隨者頗夥。因順時機·且便自行·遂輟參念佛。時門牆見重者·謗敝四起·余以深信佛言不顧也。十餘年來·所有積稿·一旦付之丙丁。不意為多事禪者·於灰燼中撥出若干則·然百不存一矣。嗣後為業風所吹·歷主覺生·資福兩剎·為虛名所誤·往往有請開示索題跋者·迫不得已而應之·日久歲深·復積成卷。戊辰夏·李居士逢春·在山聽講·聞法有悟·遂欲付之剞劂。余曰不可·身既隱矣·



焉用文為。此世間隱者之言尚然。余已栖心淨土。復何文字可留。
居士堅請不已。爰弁數語用示。皆不得已之言也。嘉慶歲次庚^{十五}
午。九月重陽後三日。訥堂道人。書於資福二有丈室。

念佛伽陀序

訥堂老人。率眾精修持名法門。備極誠懇。於廣通覺生兩蘭若。
歷有年所。茲乙卯冬。復以教義宗乘。各詠偈百首。闡其要妙。
舉以示眾。如輩當時一聞。心蕩神怡。若深有領會焉。因仰體老
人為眾苦心。諄諄如是。若不刊布。久必湮沒。遂壽之梨棗。以
期修淨業者。共為參味云爾。嘉慶元年。歲次丙辰。佛歡喜日。
受業弟子心雨稽首謹題。



徹悟禪師語錄卷上

嗣法門人了亮集

示衆

一切法門。以明心為要。一切行門。以淨心為要。然則明心之要。無如念佛。憶佛念佛。現前當來。必定見佛。不假方便。自得心開。如此。念佛非明心之要乎。復次淨心之要。亦無如念佛。一念相應一念佛。念念相應念念佛。清珠下於濁水。濁水不得不清。佛號投於亂心。亂心不得不佛。如此。念佛非淨心之要乎。一句佛號。俱攝悟修兩門之要。舉悟則信在其中。舉修則證在其中。信解修證俱攝。大小諸乘一切諸經之要罄無不盡。然則一句彌陀。非至要之道乎。



吾人現前一念之心。全真成妄。全妄即真。終日不變。終日隨緣。夫不隨佛界之緣而念佛界。便念九界。不念三乘。便念六凡。不念人天。便念三途。不念鬼畜。便念地獄。以凡在有心。不能無念。以無念心體。唯佛獨證。自等覺已還。皆悉有念。凡起一念。必落十界。更無有念出十界外。以十法界。更無外故。每起一念。為一受生之緣。果知此理而不念佛者。未之有也。若此心能與平等大慈大悲。依正功德。以及萬德洪名相應。即念佛法界也。能與菩提心六度萬行相應。即念菩薩法界也。以無我心。與十二因緣相應。即念緣覺法界也。以無我心。觀察四諦。即念聲聞法界也。或與四禪八定。以及上品十善相應。即念天法界也。若與五戒相應。即念人法界也。若修戒善等法。兼懷瞋慢勝負之心。即落修羅法界。若以緩輒心。念下品十惡。即墮畜生法界。或以緩急相半心。與中品十惡相應。便墮餓鬼法界。若以猛熾心



·與上品十惡相應·即墮地獄法界也。十惡者·即殺·盜·淫·妄言·綺語·惡口·兩舌·貪·瞋·邪見·是。反此·則為十善。當密自檢點日用所起之念·與何界相應者多·與何界相應者猛。則他日安身立命之處·不勞更問人矣。

一切境界·唯業所感·唯心所現。即其現處·當體即心。凡在有
心·不能無境。不現佛境·便現九界之境。不現三乘之境·便現
六凡之境。不現天人鬼畜之境·便現地獄境界。佛及三乘所現境
界·雖有優降不同·要皆受享法樂而已。三界諸天所現之境·但
唯受用禪定五欲之樂。人道之境·苦樂相間·各隨其業·多少不
同。鬼畜之境·苦多樂少。至於地獄·則純一極苦。如人夢中所
見山川人物·皆依夢心所現。若無夢心·必無夢境。設無夢境·
亦無夢心。故知心外無境·境外無心。全境即心·全心即境。若
於因中察果·當須觀心。設於果處驗因·當須觀境。故曰·未有



無心境。曾無無境心。果必從因。因必克果。苟真知此心境因果一如不二之理。而猶不念佛求生淨土者。吾不信也。

真為生死。發菩提心。以深信願。持佛名號。十六字。為念佛法門一大綱宗。若真為生死之心不發。一切開示。皆為戲論。世間一切重苦。無過生死。生死不了。生死死生。生生死死。出一胞胎。入一胞胎。捨一皮袋。取一皮袋。苦已不堪。況輪回未出。難免墮落。豬胞胎。狗胞胎。何所不鑽。驢皮袋。馬皮袋。何所不取。此箇人身。最為難得。最易打失。一念之差。便入惡趣。三途易入而難出。地獄時長而苦重。七佛以來。猶為蟻子。八萬劫後。未脫鴿身。畜道時長已極。鬼獄時長尤倍。久經長劫。何了何休。萬苦交煎。無歸無救。每一言之。衣毛卓豎。時一念及。五內如焚。是故即今痛念生死。如喪考妣。如救頭然也。然我有生死。我求出離。而一切眾生皆有生死。皆應出離。彼等與我




· 本同一體· 皆是多生父母· 未來諸佛· 若不念普度· 唯求自利
· 則於理有所虧· 心有未安· 況大心不發· 則外不能感通諸佛·
內不能契合本性· 上不能圓成佛道· 下不能廣利群生· 無始恩愛
· 何以解脫· 無始怨愆· 何以解釋· 積劫罪業· 難以懺除· 積劫
善根· 難以成熟· 隨所修行· 多諸障緣· 縱有所成· 終墮偏小·
故須稱性發大菩提心也· 然大心既發· 應修大行· 而於一切行門
之中· 求其最易下手· 最易成就· 至極穩當· 至極圓頓者· 則無
如以深信願· 持佛名號矣· 所謂深信者· 釋迦如來梵音聲相· 決
無誑語· 彌陀世尊大慈悲心· 決無虛願· 且以念佛求生之因· 必
感見佛往生之果· 如種瓜得瓜· 種豆得豆· 響必應聲· 影必隨形
· 因不虛棄· 果無浪得· 此可不待問佛而能自信者也· 況吾人現
前一念心性· 全真成妄· 全妄即真· 終日隨緣· 終日不變· 橫徧
豎窮· 當體無外· 彌陀淨土· 總在其中· 以我具佛之心· 念我心



具之佛。豈我心具之佛。而不應我具佛之心耶。往生傳載臨終瑞相。班班列列。豈欺我哉。如此信已。願樂自切。以彼土之樂。回觀娑婆之苦。厭離自深。如離廁院。如出牢獄。以娑婆之苦。遙觀彼土之樂。欣樂自切。如歸故鄉。如奔寶所。總之如渴思飲。如饑思食。如病苦之思良藥。如嬰兒之思慈母。如避怨家之持刀相迫。如墮水火而急求救援。果能如此懇切。一切境緣。莫能引轉矣。然後以此信願之心。執持名號。持一聲是一九蓮種子。念一句是一往生正因。直須心心相續。念念無差。唯專唯勤。無雜無間。愈久愈堅。轉持轉切。久之久之。自成片段。入一心不亂矣。誠然如此。若不往生者。釋迦如來便為誑語。彌陀世尊便為虛願。有是理乎哉。

觀經是心作佛。是心是佛二語。較之禪宗直指人心。見性成佛。尤為直截痛快。何也。以見性難而作佛易故。何為見性。離心意




識。靈光迸露。始為見性。故難。何為作佛。持佛名號。觀佛依正。即為作佛。故易。經云。汝等心想佛時。是心即是三十二相。八十種好。豈非以想念於佛。即為作佛耶。夫成佛是佛。理無二致。而見性作佛。難易相懸若是。豈非念佛較之參禪。尤為直截痛快也哉。一是祖語。一是佛言。何重何輕。何取何捨。學者但當盡捨舊習。虛其心。平其氣。試一玩味而檢點之。當必首肯是說為不謬矣。

石霜遷化。眾舉泰首座繼席住持。時九峯虔為侍者。乃曰。若繼住持。須明先師意。泰曰。先師有甚麼意。我會不得。虔曰。先師尋常教人。休去歇去。冷湫湫地去。古廟香鑪去。一條白練去。萬年一念去。其餘則不問。如何是一條白練去。泰云。此但明一色邊事。虔曰。原來未會先師意。泰云。裝香來。香煙盡處。我若去不得。即不會先師意。左右即裝香。香煙未盡。泰即化去。



。虔撫其背曰。坐脫立亡即不無。先師意未夢見在。曹山堂上坐。
。紙衣道者從堂下過。山曰。莫是紙衣道者麼。衣曰。不敢。山
曰。如何是紙衣下事。衣曰。一裘纔挂體。萬法悉皆如。山曰。
如何是紙衣下用。衣曰。諾。便化去。山曰。汝祇解怎麼去。不
解怎麼來。衣復開目問曰。一靈真性。不假胞胎時。如何。山曰
。未是妙。夫坐脫立亡。未明大法。固非了事。然其造詣工夫。
殊非易易。果能回此一段精神。專心念佛。求生淨土。當必穩得
上品上生。豈更遭人檢點哉。如紙衣進問。如何是妙。山答云。
不借借。衣便珍重化去。噫。與其不借而借臭穢胞胎。何如不借
而借香潔蓮華。直以胞胎臭穢。蓮華香潔而論。已自勝劣懸殊。
況出胎隔陰。作主大難。而蓮胞一敷。勝緣具足。此則日劫相懸
。天地不足以喻其否泰矣。無怪乎永明大師。謂有禪無淨土。十
人九蹉路。無禪有淨土。萬修萬人去。此真語也。實語也。大慈



悲心淚出痛腸之語也。學者幸勿忽諸。

最初迷真起妄。則曰一念妄動。末後返妄歸真。則曰一念相應。是則起妄之後。歸真之前。更有何法。能外此一念乎。是故一念悟。隨淨緣。即佛法界。迷。隨染緣。即九法界。十方虛空。是此一念迷昧。一切國土。是此一念澄凝。四生正報。是此一念情想合離。四大依報。是此一念動靜違順。惟依此念。變現諸法。離此念外。無法可得。原此一念。本是法界。從緣而起。緣無自性。全體法界。故得橫徧十方。豎窮三際。離過絕非。不可思議。法爾具此威神。法爾具此功用。今以此念。念於西方阿彌陀佛。求生極樂淨土。正當念時。西方依正。在我心中。而我此心。已在西方依正之內。如兩鏡交光。相含互照此橫徧十方之相也。若約豎窮三際。則念佛時。即見佛時。亦即成佛時。求生時。即往生時。亦即度生時。三際同時。更無前後。帝網珠光。難齊全



體。南柯夢事。略類一班。此理悟之最難。信之最易。但能直下承當。終必全身受用。可謂參學事畢。所作已辦矣。如或未能。但當任便觀察。隨分受用焉耳。

心能造業。心能轉業。業由心造。業隨心轉。心不能轉業。即為業縛。業不隨心轉。即能縛心。心何以能轉業。心與道合。心與佛合。即能轉業。業何以能縛心。心依常分。任運作受。即為業縛。一切現前境界。一切當來果報。皆唯業所感。唯心所現。唯業所感故。前境來報。皆有一定。以業能縛心故。唯心所現故。前境來報。皆無一定。以心能轉業故。若人正當業能縛心。前境來報一定之時。而忽發廣大心。修真實行。心與佛合。心與道合。則心能轉業。前境來報。定而不定。又心能轉業。前境來報不定之時。而大心忽退。實行有虧。則業能縛心。即前境來報。不定而定。然業乃造於已往。此則無可奈何。所幸而發心與否。其



機在我。造業轉業。不由別人。如吾人即今發心念佛。求生極樂。或觀依正。或持名號。念念相續。觀念之極。則心與佛合。合之又合。合之其極。則心能轉業。而前境之娑婆。轉為極樂。胎獄之來報。轉為蓮胞。便是樂邦自在人矣。若正恁麼時。其心或偶然失照。或忽生退悔。不與佛合。則業能縛心。而前境仍舊。來報依然。還是忍土苦眾生也。然則我輩有志出離。求生淨土者。可弗惕然而警。奮然而發也哉。

淨土門中。以願為最。凡有願者。終必能滿。如鬱頭藍弗。習非非想定於水邊林下。每定將成。多為魚鳥所驚。因發惡願曰。吾他日後。當作飛狸。入林食鳥。入水食魚。後非想定成。遂生天上。壽八萬大劫。天報既終。遂墮為飛狸。入林水以食魚鳥。此惡願也。與性相違。尚有大力用。八萬劫後能滿。況稱性之善願乎。神僧傳。載一僧於石佛前。戲發願曰。如今生生死不了。願



來生作威武大臣。後果作大將軍。此戲發之願也。尚終得遂。況至誠所發之願乎。復載一僧。博通經論。所至無所遇。乃咨嗟歎息。傍一僧曰。汝學佛法。獨不聞未成佛果。先結人緣。汝雖明佛法。其如無緣何。其僧曰。我即終於此乎。傍僧曰。吾代汝為之。問其僧有何所畜。曰。無他。僅餘一衣料耳。曰。此亦足矣。遂變價置買食物。引其僧至一深林。禽鳥昆蟲甚多之處。置食於地。復教以發願。乃囑曰。汝二十年後。方可開法。其僧如所囑。至二十年後始開法。受化者多少年。蓋皆受食之禽鳥昆蟲也。此願力之不可思議也。尚能以他人之願。攝彼蟲鳥。脫異類而入人道。豈自願不能自度耶。佛以四十八願。自致成佛。而我所發之願。正合佛攝生之願。此則直以發願。便可往生。而況佛有不思議大慈大悲。如瑩珂。酒肉無擇之人。後閱往生傳。每讀一傳。為一首肯。遂斷食念佛。至七日。感佛現身慰之曰。汝陽壽



尚有十年。當好念佛。吾十年後來接汝。珂曰。娑婆濁惡。易失正念。願早生淨土。承事諸聖。佛曰。汝志如此。我三日後來接汝。三日後果得往生。又懷玉禪師。精修淨業。一日見佛菩薩滿虛空中。一人執銀臺而入。玉念曰。吾一生精進。志在金臺。今胡不然。銀臺遂隱。玉彌加精進。二十一日後。復見佛菩薩徧滿虛空。前持銀臺者易金臺而至。玉遂泊然而逝。劉遺民。依東林。結社念佛。一日想念佛次。見佛現身。劉念曰。安得如來手摩我頭乎。佛即手摩其頭。復念曰。安得如來衣覆我體乎。佛即以衣覆其體。嗚呼。佛之於眾生。無所不至。真可謂大慈悲父母矣。欲速生即令速生。欲金臺即易金臺。欲手摩頭即摩頭。欲衣覆體即覆體。佛既慈悲一切眾生。豈獨不慈悲我乎。佛既滿一切眾生之願。豈獨不滿我之願乎。大慈悲心。無有揀擇。安有此理。是以真能發願。則信在其中。信願既真。行不期起而自起。是故



信願行三種資糧。唯一願字盡之矣。

世之最可珍重者。莫過精神。世之最可愛惜者。莫過光陰。一念淨。即佛界緣起。一念染。即九界生因。凡動一念。即十界種子。可不珍重乎。是日已過。命亦隨滅。一寸時光。即一寸命光。可不愛惜乎。苟知精神之可珍重。則不浪用。則念念執持佛名。光陰不虛度。則刻刻熏修淨業。倘置佛名而別修三乘聖行。亦是浪用精神。亦是千鈞之弩。為鼯鼠而發機。況造六凡生死之業乎。倘置淨業而別取權乘小果。亦是虛度光陰。亦是以如意寶珠。而買一衣一食。況取人天有漏之果乎。如是珍重。如是愛惜。則心專而佛易感。行動而業易精。果得真生淨土。親見彌陀。時承開示。面奉慈音。妙悟自心。深證法界。延一念為長劫。促長劫為一念。念劫圓融。得大自在。得非自食其珍重愛惜之報乎。夫見道而後修道。修道而後證道。此千聖同途。千古不易之定論。



也。然見道豈易言哉。若依教乘。必大開圓解。若依宗門。必直透重關。然後得論修道。否則便為盲修瞎鍊。不免撞牆磕壁。墮坑落塹矣。唯淨土一門則不然。從是西方過十萬億佛土。有世界名曰極樂。其土有佛。號阿彌陀。今現在說法。但發願持名。即得往生。此乃佛心佛眼。親知親見之境界。非彼三乘賢聖所能知見也。但當深信佛言。依此而發願持名。即是以佛知見為知見。不必別求悟門也。餘門修道。必悟後依法修習。攝心成定。因定發慧。因慧斷惑。所發之慧有勝劣。所斷之惑有淺深。然後方可論其退與不退。唯此淨土門中。唯以信願之心。專持名號。持至一心不亂。淨業即為大成。身後決定往生。一得往生。便永不退轉。又餘門修道。先須懺其現業。若現業不懺。即能障道。則進修無路矣。修淨業者。乃帶業往生。不須懺業。以至心念佛一聲。能滅八十億劫生死重罪故。又餘門修道。須斷煩惱。若見思煩



惱分毫未盡。則分段生死不盡。不能出離同居國土。唯修淨業。乃橫出三界。不斷煩惱。從此同居。生彼同居。一生彼土。則生死根株便永斷矣。既生彼土。則常見佛。時時聞法。衣食居處。出於自然。水鳥樹林。皆悉說法。同居土中。橫見上三淨土。諸上善人俱會一處。圓證三種不退。一生便補佛位。然則淨土一門。最初省求悟門。末後不待發慧。不須懺業。不斷煩惱。至極省要。至極徑捷。及其證入。至極廣大。至極究竟。學者當細心玩味而詳擇之。毋以一時貢高。失此殊勝最大利益也。

一窮人遙望。見錢一串。就而取之。乃蛇也。遂瞠立於其傍。復一人至。得錢一串攜去。夫錢非蛇也。而蛇現者。唯業所感。唯心所現也。錢上之蛇。固是業感心現。而蛇上之錢。獨非業感心現乎。錢上之蛇。一人之別業妄見也。蛇上之錢。多人之同分妄見也。一人之妄見。其妄易知。多人之妄見。其妄難知。以易知



例難知。難知亦易知矣。然則蛇固蛇也。錢亦蛇也。推此而往。內而根身。外而境界。由一方而至十方。以及四大部洲。三千大千世界。皆此錢上之蛇也。但唯心之蛇既現。便能螫人。唯心之錢既現。便得享用。非謂唯心。便無外境。且娑婆之穢苦。安養之淨樂。皆唯心現。唯心之穢苦既現。則遭大逼迫。唯心之淨樂既現。則得大受用。既穢苦淨樂皆唯心現。何不捨唯心之穢苦。以取唯心之淨樂。而乃久經長劫。甘為八苦之所交煎也哉。

吾人生死關頭。唯二種力。一者心緒多端。重處偏墜。此心力也。二者如人負債。強者先牽。此業力也。業力最大。心力尤大。以業無自性。全依於心。心能造業。心能轉業。故心力唯重。業力唯強。乃能牽生。若以重心而修淨業。淨業則強。心重業強。唯西方是趨。則他日報終命盡。定往西方。不生餘處矣。如大樹大牆。尋常向西而歪。他日若倒。決不向餘處也。何為重心。我



輩修習淨業。信貴於深。願貴於切。以信深願切故。一切邪說莫能搖惑。一切境緣莫能引轉。若正修淨業時。倘達摩大師。忽現在前。乃曰。吾有直指人心見性成佛之禪。汝但捨置念佛。吾即以此禪授汝。但當向祖師作禮。謂我先已受釋迦如來念佛法門。發願受持。終身不易。祖師雖有深妙禪道。吾則不敢自違本誓也。縱或釋迦如來。忽爾現身。謂曰。吾先說念佛法門。特一時方便耳。今更有殊勝法門。超於彼者。汝當且置念佛。吾即為說勝法。亦祇可向佛稽首陳白。我先稟受世尊淨業法門。發願一息尚存。決不更張。如來雖有勝法。吾則不敢自違本願也。雖佛祖現身。尚不改其所信。況魔王外道。虛妄邪說。豈足以搖惑之耶。能如是信。其信可謂深矣。若赤熱鐵輪。旋轉頂上。不以此苦。退失往生之願。若輪王勝妙五欲現前。亦不以此樂。退失往生之願。此逆順至極。尚不改所願。況世間小小逆順境界。豈能引轉。




哉。能如是願。其願可謂切矣。信深願切。是謂重心。而修淨業。淨業必強。心重故則易純。業強故則易熟。極樂淨業若熟。娑婆染緣便盡。果得染緣已盡。則臨終時。雖欲輪回境界再現在前。亦不可得。果得淨業已熟。則臨終時。雖欲彌陀淨土不現在前。亦不可得。然此信願。要在操之有素。臨時自不入於歧路。如古德臨欲命終。六欲天童次第接引。皆不去。唯專心待佛。後佛現。乃曰佛來也。遂合掌而逝。夫臨欲命終。四大分張。此何時也。六欲天童。次第接引。此何境也。苟素常信願不到十分堅固。當此時。對此境。而能強作主宰乎。如古德真可謂千古修淨業者之標榜矣。

有禪者問曰。一切諸法。悉皆如夢。娑婆固夢也。極樂亦夢也。既同是一夢。修之何益。余曰。不然。七地以前。夢中修道。無明大夢。雖等覺猶眠。唯佛一人。始稱大覺。當夢眼未開之時。



苦樂宛然。與其夢受娑婆之極苦。何若夢受極樂之妙樂。況娑婆之夢。從夢入夢。夢之又夢。展轉沉迷者也。極樂之夢。從夢入覺。覺之又覺。漸至於大覺者也。夢雖同。所以夢者未嘗同也。可概論乎。

佛法大海。信為能入。淨土一門。信尤為要。以持名念佛。乃諸佛甚深行處。唯除一生所繫菩薩。可知少分。自餘一切賢聖。但當遵信而已。非其智分之所能知。況下劣凡夫乎。然十一善法。以信居初。信心之前。更無善法。五十五位。以信為始。信位之前。別無聖位。故菩薩造起信論。祖師作信心銘。以信心一法。為入道要門也。昔王仲回問於楊無為曰。念佛如何得不間斷去。楊曰。一信之後。更不再疑。王欣然而去。未久。楊夢仲回致謝。謂因蒙指示。得大利益。今已生淨土矣。楊後見仲回之子。問及仲回去時光景。及去之時節。正楊得夢之日。噫。信之時義大




矣哉。

法藏比丘。對世自在王佛。發稱性四十八種大願。依願久經無量長劫。修習大行。至於因圓果滿。自致成佛。法藏轉名彌陀。世界轉名極樂。彌陀之所以為彌陀者。深證其唯心自性也。然此彌陀極樂。非自性彌陀。唯心極樂乎。但此心性。乃生佛平等共有。不偏屬佛。亦不偏屬眾生。若以心屬彌陀。則眾生乃彌陀心中之眾生。若以心屬眾生。則彌陀乃眾生心中之彌陀。以彌陀心中之眾生。念眾生心中之彌陀。豈眾生心中之彌陀。不應彌陀心中之眾生耶。但佛悟此心。如醒時人。眾生迷此心。如夢中人。離醒時人。無別夢中之人。豈離夢中之人。別有醒時之人耶。但夢中之人。當不自認為真。亦不離夢中之人。別求醒時之人。唯應當憶醒時之人。憶之又憶。則將見大夢漸醒。而夢眼大開。即夢中能憶之人。便是所憶醒時之人。而醒時之人。非夢中人也。夢



中人眾多。醒時人唯一。十方諸如來。同共一法身。一心一智慧。力無畏亦然。此乃即一即多。常同常別。法爾自妙之法也。念佛之意。大略如此。

生則決定生。去則實不去。二語。上句說事。下句說理。事是即理之事。謂生即不生。非直以生為生也。理是即事之理。謂不去而去。非直以不去為不去也。兩句作一句看。則事理圓融。所謂合之則雙美也。若兩句作兩句看。則事理分張。所謂離之則兩傷也。若不合此兩句作一句。便當演此兩句作四句。謂生則決定生。生而無生。去則實不去。不去而去。雖為四句。義亦無增。合為一句。義亦無減。總一事理圓融耳。與其執去則實不去之理。不如執生則決定生之事為得。何也。以執事昧理。猶不虛入品之功。若執理廢事。便不免落空之誚。以事有偕理之功。理無獨立之能故也。以有生為生。則墮常見。以不去為不去。則墮斷見。



斷常雖同一邪見。而斷見之過患深重。故不若執事之為得。然總不如圓會二句為佳耳。

吾人現前一念。緣生無性。無性緣生。不生佛界。便生九界。若約緣生無性。則生佛平等一空。若約無性緣生。則十界勝劣懸殊。阿祈達王臨終。為驅蠅人以拂拂面。一念瞋心。遂墮為毒蛇。一婦人渡河失手。其子墮水。因撈子故。與之俱沒。以慈心故。得生天上。夫一念慈瞋。天畜遂分。則此臨終之緣生一念。可不慎乎。苟以此心緣念彌陀。求生淨土。得不見佛往生乎。但此一念。不可僥倖而致。必須存之以誠。操之有素。是故吾輩於此一句彌陀。千念萬念。以至終日終年念者。無非為熟此一念而已。果得一念純熟。則臨命終時。唯此一念。更無異念。智者大師云。臨終在定之心。即淨土受生之心。然唯此一念。更無異念。非在定之心乎。念果如是。不見彌陀。更見何人。不生淨土。更生



何處。只恐吾人自信不及耳。

觀經是心作佛。是心是佛。二語既舉。則言外之心不作佛。心不是佛。心作九界。心是九界。心不作九界。心不是九界。等義俱彰矣。噫。果明此理。而猶不念佛者。則吾末如之何也已矣。

觀經是心作佛。是心是佛二語。不唯是觀經一經綱宗法要。實是釋迦如來一代時教大法綱宗。不唯釋迦一佛法藏綱宗。實是十方三世一切諸佛法藏綱宗。此宗既透。何宗不透。此法既明。何法不明。所謂學雖不多。可齊上賢也。

真法無性。染淨從緣。一真既舉。體成十界。則十界全體即一真。是故善談心性者。必不棄離於因果。而深信因果者。終必大明乎心性。此理勢所必然也。

吾人現前一念能念之心。全真成妄。全妄即真。終日隨緣。終日不變。一句所念之佛。全德立名。德外無名。以名召德。名外無



德。能念心外。無別所念之佛。所念佛外。無別能念之心。能所不二。生佛宛然。本離四句。本絕百非。本徧一切。本含一切。絕待圓融。不可思議。蓮宗行者。當從者裏信入。

殺生一事。過患至為深重。一切眾生皆有佛性。生可殺乎。造重業。縱殺心。結深怨。感苦果。皆由一殺所致。是以殺心漸猛。殺業漸深。漸以殺人。以及殺其六親。甚而積為刀兵大劫。可悲也矣。蓋皆由不知戒殺之所致。苟知戒殺。牲且不忍殺。況殺人乎。況殺六親乎。牲不忍殺。刀兵大劫。何所從來。殺人之父者。人亦殺其父。殺人之兄者。人亦殺其兄。知人之父兄不可殺。亦戒殺之漸。但不知殺父兄者。由於不戒殺始也。

人之所以不戒殺者。由於不達因果之理。因果者。感應也。我以惡心感之。人亦以惡心應。我以善心感之。人亦以善心應。人但知感應見於現生。而不知感應通於三世也。人但知感應見於人道



·而不知感應通於六道也。果知感應通於三世六道。六道中皆多生之父兄。殺可不戒乎。縱知感應通於六道。亦不知感應通於世出世間也。以無我心感。則聲聞緣覺之果應之。以菩提心六度萬行感。則菩薩法界果應之。以平等大慈。同體大悲感。則佛法界果應之。噫。感應之道。可盡言哉。

須知一句阿彌陀佛。以唯心為宗。此唯心之義。須以三量楷定。三量者。現量。比量。聖言量也。現量者。謂親證其理也。如羅什大師。七歲隨母入佛寺。見佛鉢。喜而頂戴之。俄而念曰。我年甚幼。佛鉢甚重。何能頂戴。是念纔動。忽失聲置鉢。遂悟萬法唯心。高麗惟曉法師。來此土參學。夜宿塚間。渴甚。明月之下。見清水一汪。以手掬而飲之。殊覺香美。至次日清晨。乃見其水為墓中控出。遂惡心大吐。乃悟萬法唯心。便回本國著述。此皆現量親證也。比量者。借眾相而觀於義。比喻而知也。諸喻



之中。夢喻最切。如夢中所見山川人物。萬別千差。皆不離我能夢之心。離夢心外。別無一法可得。即此可以比喻。而知現前一切萬法。但唯心現也。聖言量者。三界唯心。萬法唯識。千經萬論。皆如是說。已約現等三量。楷定唯心。更約事理二門。辨明具造。謂由有理具。方有事造。理若不具。事何所造。所以理具。但具事造。離事造外。無別所具。由有事造。方顯理具。事若不造。爭知理具。所以事造。祇造理具。離理具外。別無所造。祇此一念心中。本具十界萬法。即此一念隨緣。能造十界萬法。理具。如金中本具可成餅盤釵釧之理。事造。如隨工匠鑪鎚之緣。造成餅盤釵釧之器。又理具。如麪中本具可成種種食物之理。事造。如水火人工之緣。造成種種食品也。已辨事理。復約名體同異。揀定真妄。佛法中有名同而體異者。有名異而體同者。名同體異。如心之一名。有肉團心。有緣慮心。有集起心。有堅實



心。肉團心。同外四大。無所知識。緣慮心。通於八識。以八種識皆能緣慮自分境故。此則是妄。集起心。唯約第八。以能集諸法種子。能起諸法現行故。此則真妄和合。堅實心者。即堅固真實之性。乃離念靈知。純真心體也。今言唯心者。乃堅實純真之心也。名異體同者。如諸經中所說真如。佛性。實相。法界等。種種極則之名。皆此堅實純真心也。已揀真妄。還約本有現前。折衷指點。以諸經皆言無始本有真心。夫既曰本有。即今豈無。而今現有。即本有也。若無無始。則無現前。若離現前。豈有無始。是故不必高尊本有。遠推無始。但現前一念心之自性。即本有真心也。以現前一念。全真成妄。全妄即真。終日隨緣。終日不變。離此現前一念之外。豈別有真心自性哉。古德云。威音那畔。不離今世門頭。眾生現行無明。即是諸佛不動智體。其庶幾乎。由上四義。以顯唯心。故一以唯心為宗也。又一句阿彌陀。



以唯佛為宗。以一切萬法。既唯心現。全體唯心。心無彼此。心無分際。於十界萬法。若依若正。假名實法。隨拈一法。皆即心之全體。皆具心之大用。如心橫徧。如心豎窮。以唯心義成。唯色唯聲唯香唯味唯觸唯法。乃至唯微塵。唯芥子。一切唯義俱成。一切唯義俱成。方成真唯心義。若一切唯義不成。但有唯心之虛名。而無唯心之實義。以一切唯義俱成。故曰法無定相。遇緣即宗。唯微塵。唯芥子。尚可為宗。八萬相好莊嚴之果地彌陀。反不可以為宗耶。故以唯佛為宗。又以絕待圓融為宗。於十界萬法。隨拈一法。無非即心全體。具心大用。橫徧十方。豎窮三際。離於四句。絕於百非。獨體全真。更無有外。彌滿清淨。中不容他。一法既爾。萬法皆然。各約諸法當體。絕待無外。是為絕待。又以十界萬法。各各互徧。各各互含。一一交羅。一一該徹。彼彼無障無礙。各各無壞無雜。如當臺古鏡。影現重重。如帝



網千珠。回環交攝。此約諸法迭互相望。是為圓融。今合絕待圓融為一宗。正絕待時即圓融。正圓融時便絕待。非離絕待別有圓融。絕待。絕待其圓融。非離圓融別有絕待。圓融。圓融其絕待。絕待圓融。各皆不可思議。今共合為一宗。則不思議中不思議也。又超情離見為宗。以但約諸法絕待。離過絕非。已超一切眾生情妄執著。三乘賢聖所見差別。若約諸法圓融。圓該四句。融會百非。尤非凡情聖見之所能及。故總立超情離見為宗。初以唯心為宗。次以唯佛為宗。三以絕待圓融為宗。末以超情離見為宗。總此四重宗旨。方是一句彌陀正宗宗旨。豈易言哉。

此一念佛法門。如天普蓋。似地普擎。無有一人一法。能出其外。不在其中者。如華嚴全經。雖有五周四分之殊。以因果二字。該盡無餘。四十一位因心。無一心而不趨向果覺。四十一位所修種種法行。豈非皆念佛法行也。而末後普賢以十大願王。導歸極



樂。為全經一大結穴。不其然乎。又華嚴者。以萬行因華。莊嚴一乘佛果。此萬行非念佛行耶。華嚴。具婆須蜜女。無厭足王。勝熱婆羅門等無量門。然皆顯示毗盧境界。此無量門。非即念佛門耶。法華一經。從始至終。無非開示悟入佛知佛見。此非始終唯一念佛法門耶。楞嚴最初顯示藏性。明成佛之真因也。其次揀選圓通。示成佛之妙行也。後歷六十聖位。圓滿菩提。歸無所得。證佛地之極果也。背此則成七趣沉淪。向此則明五魔擾亂。末後云。有人身具四重。十波羅夷。瞬息即經此方他方阿鼻地獄。乃至窮盡十方無間。靡不經歷。若能一念將此法門。於末劫中開示未學。是人罪障應念消滅。變其地獄所受苦因。為安樂國。此則徹始徹終。唯一念佛法門也。總佛一代時教。三藏十二部。半。滿。權。實。偏。圓。頓。漸。種種法門。無非顯示唯心自性。圓成無上妙覺而已。得非總一大念佛法門耶。至如禪宗。達摩



大師西來。但當曰。直指人心見性便了。而云成佛者。非宗門亦念佛門耶。故合二派五宗千七百則公案。不過指點當人本源性。顯示本有清淨法身。法身橫徧豎窮。無所不徧。而參禪人。要須時時現前。頭頭相應。此何在而非念佛法門哉。至如佛之一字。吾不喜聞。一棒打殺。與狗子喫等語。皆顯示法身上勝妙方便。是真念佛也。往往無知之輩。謂宗門中人。不宜念佛。此不唯不知念佛。豈真知宗哉。不唯宗教兩門如是。即普天之下。士農工商。諸子百家。縱不欲念佛。不知佛者。亦不能出於念佛法門之外。以彼去來動靜。咸率此道。百姓日用而不知也。所謂一氣不言含有象。萬靈何處謝無私。夾路桃華風雨後。馬蹄無地避殘紅。

一真為生死。發菩提心。是學道通途。二以深信願。持佛名號。為淨土正宗。三以攝心專注而念。為下手方便。四以折伏現行煩



惱。為修心要務。五以堅持四重戒法。為入道根本。六以種種苦行。為修道助緣。七以一心不亂。為淨行歸宿。八以種種靈瑞。為往生證驗。此八種事。各宜痛講。修淨業者。不可不知矣。

眾生所以輪回者。六道也。餘趣眾生。為驚瞋苦樂所障。無暇向道。可以整心慮。趨菩提。唯人道為能耳。但失人身者。如大地土。得人身者。如爪上土。人身豈易得乎。人道眾生。從生至壯。以及老死。眼之所見。耳之所聞。無非世間塵勞生死業緣耳。佛法豈易聞乎。得人身已難。況得男子身。六根具足尤難。聞佛法已難。況聞彌陀名號。淨土法門尤難。何幸而得難得之人身。何幸而聞難聞之佛法。聞之而猶不肯信。不深為可惜也哉。不信姑置。即如信者。信而不願。猶不信也。願而無行。猶弗願也。行而不猛。猶弗行也。行之所以不猛。由願不切。願之所以不切。由信不真。總之生真信難。信果真矣。願自能切。願果切矣。



行自能猛。真切信願。加以勇猛行力。決定得生淨土。決定得見彌陀。決定證三不退。決定一生補佛。既得生淨土矣。曠大劫來生死業根。則從此永斷。既一生補佛矣。至極尊貴無上妙覺。則便得圓成。此一念真信所關係者。豈淺淺哉。苟非障道緣薄。生死業輕。久種善根。宿因深厚者。何以能爾。然吾人無量劫來。業力輕重。善根深淺。皆莫得而知。但業力由心轉變。善根在人栽培。是故宏法者。不得不善巧方便。懇切開示。而學道者。不可不竭力奮勉。勇往直前。但一言入耳。一念動心。皆可轉變業力。皆能栽培善根。雖聞種種緊要開示。都無一言所入。雖遭種種逆順境界。曾無一念奮發。是為真業力深重。真善根輕鮮。則亦莫可如何也矣。

現前一念心性。本與佛同體。佛已久悟。而我猶迷。佛雖已悟。亦無所增。我雖猶迷。亦無所減。佛雖無增。以順性故。受大法



樂。我雖無減。以背性故。遭極重苦。佛於同體心性之中。雖受法樂。以同體大悲。無緣大慈。念念憶念於我。念念攝化於我。我於同體心性之中。雖遭眾苦。不知仰求於佛。不知憶念於佛。但唯逐境生心。循情造業。曠大劫來。五逆十惡。種種重業。何所不造。三途八難。種種大苦。何所不受。言之可慚。思之可怖。設今更不念佛。依舊埋頭造種種業。依舊從頭受種種苦。可不愧乎。可不懼乎。今且知佛以大慈大悲。於念念中憶念攝化於我。則我今者深感佛恩。故應念佛。一向長劫枉受眾苦。欲求脫苦。故應念佛。已造之業。無可如何。未來之業。可更造乎。生慚愧心。故應念佛。同體心性。既曰本有。即今豈無。祇欠悟證耳。求悟心性。故應念佛。以求悟心念佛。念佛必切。以慚愧心念佛。念佛必切。以畏苦心念佛。念佛必切。以感恩心念佛。念佛必切。我不念佛。佛尚念我。我今懇切念佛。佛必轉更念我矣。



大勢至菩薩云。十方諸佛憐念眾生。如母憶子。子若逃逝。雖憶何為。若子憶母。如母憶時。母子歷生。不相違遠。若眾生心。憶佛念佛。現前當來。必定見佛。去佛不遠。不假方便。自得心開。此大士親證實到境界。吐心吐膽相告語也。我今念佛。必得見佛。一得見佛。便脫眾苦。即開悟有期。果得開悟。便可一痛洗已往之慚愧矣。佛尚可不念乎。

一切眾生本來是佛。真心本有。妄性元空。一切善法。性本自具。但以久隨迷染之緣。未斷元空之妄。未證本有之真。善本具而未修。佛本是而未成。今欲斷元空之妄。證本有之真。修本具之善。成本是之佛。而隨悟淨之緣者。求其直捷痛快。至頓至圓者。無如持名念佛之一行矣。以能念之心。本是全真成妄。全妄即真。所念之佛。亦本全德立名。全名即德。能念心外。無別所念之佛。所念佛外。無別能念之心。能所兩忘。心佛一如。於念念



中·圓伏圓斷五住煩惱·圓轉圓滅三雜染障·圓破五陰·圓超五濁·圓淨四土·圓念三身·圓修萬行·圓證本真·而圓成無上妙覺也。一念如是·念念皆然。但能念念相續·其伏斷修證·有不可得而思議者矣。以是全佛之心·念全心之佛。實有自心果佛·全分威德神力·冥熏加被耳。一句佛號·不雜異緣·十念功成·頓超多劫。於此不信·真同木石。捨此別修·非狂即癡·復何言哉。復何言哉。

問·諸方皆有淨土·何專讚西方·求願往生耶。答·此非人師意也。乃金口誠言·分明指示故。大乘顯密諸經·同指歸故。令初心人專注一境·三昧易成故。四十八願為緣·緣強故。十念為因·因勝故。佛與眾生·偏有緣故。此土眾生·無論僧俗男女老幼·善惡之人·當其處極順逆苦樂境緣之時·多必由中而發·衝口而出·念佛一聲。然不念佛則已·凡念佛必念阿彌陀佛。此誰使之



然。蓋眾生久蒙佛化。久受佛恩。與佛緣深故也。且此彌陀一經。羅什最初譯成。東林遠祖。即與一百二十三人。結社念佛。其一百二十三人。以次漸化。臨終皆留瑞應。雖鸚鵡。八八兒念佛。化時皆有瑞相。此非眾生與佛緣深。謂之何哉。又無量壽經云。當來經道滅盡。我以願力。特留此經。更住百年。廣度含識。夫不留他經。而獨留此經者。豈非以此法門。下手易而攝機普。入道穩而獲益速耶。以是而知。其時愈後。此法愈當機矣。世間眾生。當處急難痛苦之時。嗥叫父母。呼天喚地。不知父母人天王等。不能救我生死。盡我輪回。以其同在生死輪回故耳。三乘聖人。雖出生死。無大悲心。無益於我。諸菩薩等。雖有大慈悲心。以其心證各有分限。未能普利眾生。滿一切願。十方諸佛。雖皆證窮法界。然我感之不易。縱感極而見。不過暫時離苦。終非究竟。唯阿彌陀佛。但得一見。即頓脫生死。永斷苦根矣。



。唯此一句阿彌陀佛。是所當盡心竭力者。予曾有偈云。世間出世思惟徧。不念彌陀更念誰。然而念佛不難。難於堅久。果能堅持一念。如生鐵鑄成。渾鋼打就。如一人與萬人敵。千聖遮攔不住。萬牛挽不回頭。如是久之。必能感通相應。若其未能如此用心。便謂佛言無驗。佛心難感者。夫豈可哉。但得一念感通。便頓出生死。直登不退。穩成佛果。豈易事也哉。

知小而不知大。見近而不見遠者。此眾生之常分也。如阿彌陀佛。於諸眾生。有大恩德。眾生不知也。佛於無量劫前。對世自在王佛。普為惡世界苦眾生。發四十八種大願。復依願久經長劫。修菩薩行。捨金輪王位。國城妻子。頭目腦髓。不知其幾千萬億。此但萬行中內外財布施一行也。如是忍人所不能忍。行人所不能行。圓修萬行。力極功純。嚴成淨土。自致成佛。分身無量。接引眾生。方便攝化。令生彼國。然則如為一人。眾多亦然。如



為眾多。一人亦然。若以眾多觀之。佛則普為一切眾生也。若以一人觀之。佛則專為我一人也。稱性大願。為我發也。長劫大行。為我修也。四土為我嚴淨也。三身為我圓滿也。以至頭頭現身接引。處處顯示瑞應。總皆為我也。我造業時。佛則警覺我。我受苦時。佛則拔濟我。我歸命時。佛則攝受我。我修行時。佛則加被我。佛之所以種種為我者。不過欲我念佛也。欲我往生也。欲我永脫眾苦。廣受法樂也。欲我展轉化度一切眾生。直至一生補佛而後已也。噫。佛之深恩重德。非父母所可比。雖天地不足以喻其高厚矣。非聞開示。安知此意。不讀佛經。安曉此理。今而後。已知之矣。唯有竭力精修。盡報歸誠。拌命念佛而已。復何言哉。

一切眾生。為利鈍十使所使。久經長劫。流轉生死。受大苦惱。不能出離。可悲也。十使者何。即身。邊。邪。見。戒。此五為



利使。以發動輕便故。貪。瞋。癡。慢。疑。此五為鈍使。由利使所生。對利說鈍故。此之十使。眾生或多或少。各有偏重。若帶之修道。但唯增長邪見煩惱。決無相應分。如欲斷之實難。以此十使。於四諦下歷三界九地。有八十八使見惑。八十一品思惑。但斷見惑。如斷四十里流。況思惑乎。若見思二惑。毫髮未盡。分段生死。不能出離。此所謂豎出三界也。甚難甚難。然此十使。總名眾生知見。古德謂眾生知見。須以佛知見治之。佛知見者。即現前離念靈知也。然此靈知。不能孑然自立。必隨緣起。不隨佛界之緣。便隨九界緣起。離十界外。無別緣起故。欲隨佛界緣起。無如以信願心。持佛名號。但信貴深。願貴切。持名貴專勤。果以深切專勤之心。信願持名。即是以佛知見而為知見。亦即是念念中。以佛知見。治眾生知見也。熾然十使心中。但置一信願持名之心。即轉生界緣起為佛界緣起。此於修道門中。乃



點鐵成金極妙之法。只須赤體擔當。久久勿替。管取金臺可以坐待。寶蓮不日來迎。是為從此同居。生彼同居。橫出三界。較之豎出者。不亦省力也哉。

一句阿彌陀佛。是阿伽陀藥。無病不療。是如意珠王。無願不滿。是生死苦海之慈航。無苦不度。是無明長夜之慧燈。無暗不破。但得一歷耳根。便為有緣。但能一念信心。便可相應。信心果真。願不期發而自發。只將此信願二法。常存在心。如忠臣之奉聖君密旨。孝子之受慈父嚴命。憶念不忘。作為第一件要事。不論所處境界。靜鬧閒忙。多念少念。總皆為往生正因。只恐介在勤怠間耳。吾人曠大劫來。久在輪回。豈永不發求出離之心。修向道之行耶。蓋皆廢於因循。敗於怠惰。所以常在生死。受大苦惱。今聞持名簡要法門。若仍循故轍。安於覆敗。可謂第一等無血性漢子矣。



所謂執持名號者。即拳拳服膺之謂。謂牢持於心而不暫忘也。稍或一念間斷。則非執持也。稍或一念夾雜。則非執持也。念念相續。無雜無間。是真精進。精進不已。則漸入一心不亂。圓成淨業。若到一心不亂。仍復精進不輟。將見開智慧。發辯才。得神通。成念佛三昧。以至種種靈異瑞相。皆現前矣。如蠟人向火。薄處先穿。但不可豫存期效之心。唯當致力於一心不亂耳。一心不亂。乃淨業之歸宿。淨土之大門。若未入此門。終非穩妥。學者可不勉哉。

修習一切法門。貴乎明宗得旨。今人但知萬法唯心。不知心唯萬法。但知心外無佛。不知佛外無心。但知無量為一。不知一為無量。但知轉山河大地歸自己。不知轉自己歸山河大地。然既不知心唯萬法。豈真知萬法唯心。既不知佛外無心。豈真知心外無佛。所謂一箇圓球。劈作兩半。離之則兩傷。合之則雙美也。是故



念佛者。必以唯佛唯土為宗。若唯佛唯土之宗不明。則真唯心義不成。果透真唯心義。則唯佛唯土之宗自成。既成此宗。則一句所念之佛。所生之上。全體大用。橫徧豎窮。獨體全真。包羅無外。所念既爾。能念亦然。是謂以實相心。念實相佛。以法界心。念法界佛。念念絕待。念念圓融。以絕待故。全超一切法門。無與等者。以圓融故。全收一切法門。無出其外者。此之謂法無定相。遇緣即宗。繁興大用。舉必全真。一句阿彌陀佛。須恁麼信。恁麼念。方是不思議中不思議也。

生佛不二。平等共有者。唯此現前離念靈知耳。諸佛以隨悟淨因緣。悟之又悟。淨之又淨。悟淨之極。故其靈知橫徧豎窮。廣大無外也。眾生以隨迷染因緣。迷之又迷。染之又染。故其靈知局然促然。介爾微劣也。然即此介爾靈知。與諸佛廣大靈知。覲體不二。毫髮無差。使其得隨悟淨之緣。業盡情空。則此介爾之知



·當下轉為廣大無外之靈知矣。如一星之火。能燒萬頃荒田。然此現前一念靈知。若約所知之境。固有廣狹勝劣之不同。若約能知之知。則全體無異。如同一火也。燒檀則香。燒糞則臭。所燒雖殊。能燒之火無二。又如同一水也。清濁不同。同一鏡也。昏明有異。清濁雖殊。溼性不二。昏明雖異。光體是同。水同一溼也。濁者可使澄之而清。鏡同一光也。昏者可使磨之而明。光昏者為帶垢耳。垢非光。光者鏡之本體也。水濁者為雜塵耳。塵非溼。溼者水之本性也。此一念靈知。如水之溼。如鏡之光。如火之燒。舉體無異者也。唯其舉體無異。故於修道方便門中。便有多門。有但仰慕諸聖者。有但尊重己靈者。有外慕諸聖內重己靈者。有不慕諸聖不重己靈者。若但仰慕諸聖者。如本分念佛之人。以知諸聖皆已先證我之己靈。語默動靜。皆堪垂範。我曹若不仰慕諸聖。則進修無路矣。故或專持名號。或觀想音容。三業虔



誠·六時敬禮·傾心歸命·盡報遵承。及乎時至緣熟·感應道交·心地大開·靈光獨露·乃知我之己靈·原與諸聖平等無異·亦不可不自尊重也。又但尊重己靈者·如宗門參禪者·以直指人心·見性成佛·故唯欲十二時中·四威儀內·獨露當人面目·受用本地風光·離心性外·毫無取著·所謂任他千聖現·我有天真佛也。及乎造詣功深·悟證已極·乃知一切諸聖·皆久已先證我之己靈者·尤不可不仰慕也。又外慕諸聖·內重己靈者·夫欲尊重己靈·必須仰慕諸聖·唯其仰慕諸聖·正是尊重己靈。又仰慕諸聖·必須尊重己靈·若不尊重己靈·豈能仰慕諸聖。此則內外交修·心佛等重。既無偏執·進道彌速。至於力極功純·全體相應·乃知諸聖·但不過先證我之己靈而已·無庸仰慕。而我己靈者·亦不過平等齊於諸聖而已·何勞尊重。又不慕諸聖·不重己靈者·此謂寸絲不挂·心佛兩忘·徹底撇開·迴無依倚·外遺世界



· 內脫身心。一念不生。萬緣坐斷。至於久久功熟。圓滿證入。
· 本靈獨露。諸聖頓齊。雖不仰慕諸聖。乃善仰慕。雖不尊重己靈。
· 卻真尊重。此之四路。學者自諒根性。各隨好樂。但當一門深入。
· 久之必皆有相應。切不可妄生執著。輕發議論。出奴入主。
· 是一非餘。不唯背妙道而成障礙。將恐謗大法而招愆尤也矣。
· 楞伽經云。諸聖所知。轉相傳授。妄想無性。二祖云。覓心了不可得。
· 起信論云。若有能觀無念者。即為向佛智故。華嚴合論云。
· 頓悟一念緣起無生。超彼三乘權學等見。此佛經祖語。菩薩知識造論。
· 皆就現前一念指點。顯妄性本空也。夫妄本空而真本有。非佛而何。
· 但眾生久隨汙染之緣。未能頓復其本空耳。須以清淨緣起。
· 漸而轉之。以吾即佛之因心。念吾即心之果佛。因果從來交徹。
· 心佛法爾一如。而吾即心之果佛。無緣大慈。同體大悲。本自不可思議。
· 且吾即佛之因心。深信切願。專懇持名。亦復



不可思議。能於念念中。齊澄眾染。圓顯本空。頓契靈源。直趣果海。然則清淨之緣。無過此者。但於念時。當萬緣放下。一念單提。如救頭然。如喪考妣。如雞抱卵。如龍養珠。不期小效。不求速成。但只一心常恁麼念。是名無上深妙禪門。此則根身世界。密隨其心。念念轉變。殆非凡心肉眼。所能知見者也。及乎報終命盡。彌陀聖眾。忽現在前。或現異香天樂。諸靈瑞相。世人方謂淨業成就。然淨業之成。豈此時乎。

念佛當生四種心。云何為四。一無始以來造業至此。當生慚愧心。二得聞此法門。當生忻慶心。三無始業障。此法難遭難遇。當生悲痛心。四佛如是慈悲。當生感激心。此四種心中有一。淨業即能成就。念佛當長久。不可間斷。間斷。淨業亦不能有成。長久當勇猛。不可倦怠。倦怠。淨業亦不能成。長久不勇猛。即有退。勇猛不長久。即無進。



當念佛時。不可有別想。無有別想。即是止。當念佛時。須了了分明。能了了分明。即是觀。一念中止觀具足。非別有止觀。止即定因。定即止果。觀即慧因。慧即觀果。一念不生。了了分明。即寂而照。了了分明。一念不生。即照而寂。能如是者。淨業必無不成。如此成者。皆是上品。一人乃至百千萬億人。如是修。皆如是成就。念佛者可不慎乎。



徹悟禪師語錄卷下

嗣法門人了梅集

◎

雜著

般若淨土兩門大義

般若·乃即緣起而明性空·雖性空而不壞緣起。淨土·乃即性空而明緣起·雖緣起而不礙性空。此則空有兩門·互不相礙也。不特於此·正以緣起故性空·若非緣起·說誰性空·此則緣起為性空之所以。又以性空故緣起·若非性空·何從緣起·此則性空為緣起之所以。若然者·空有兩門·不但不相礙·且復迭互相成矣。如古所謂萬象參天·觀之而無色·群音揭地·聽之而無聲·愈有愈空·愈空愈有者矣。夫緣起性空·既在同時。任運便有雙泯



雙存之面目。雙泯雙存。同時無礙。即是向上圓融不思議第一義諦。圓融第一義諦。即是當人本源心性之異名。是知佛說種種般若門。無非顯示此本源心性。佛說種種淨土門。亦無非顯示此本源心性。從本源心性。流出種種般若淨土法門。而種種般若淨土法門。皆悉指歸本源心性。所謂無不從此法界流。無不還歸此法界也。昔有人問雲棲大師云。參禪念佛。如何得融通去。大師答云。若然是兩物。用得融通著。噫。旨哉言乎。夫禪者淨土之禪。淨土者禪之淨土。本非兩物。用融通作麼。然則般若淨土兩門。既唯一本源心性。不唯分無可分。亦且合無可合。分合尚著不得。況可更論其相成相礙也哉。

西有解

西有者。謂西方的的是有。但含事理空有等種種義相耳。若謂定



方實有。不可移易。此凡情執著之常有也。若謂一切境界。循業發現。即其現處。當體全空。此則非有而有。有即非有。真空妙有二諦交徹之有也。若互奪雙亡。二諦俱泯。則非空非有之有也。若相成兩立。二諦俱存。則即空即有之有也。若正雙泯時。便雙存。正雙存時。便雙泯。雙泯雙存。同時無礙之有也。又此有緣起性空。不墮有句。性空緣起。不墮空句。二義只成一法。不墮亦有亦空句。一法宛具二義。不墮非有非空句。此則四句全超之有也。又此有性空緣起。該得有句。緣起性空。該得空句。二諦雙存。該得亦有亦空句。二諦俱泯。該得非有非空句。此則四句全該之有也。又唯全超故全該。設有一句不超。亦不能全該四句。唯全該故全超。設有一句不該。亦不能全超四句也。此則圓教有門之有也。又西方依正莊嚴。皆一切眾生性所本具。特借彌陀大願為增上緣因。一顯發耳。曾何片法之新得哉。此則西有者



·乃自性本具真善妙有之有也。又有句固是有句。有句亦是空句。有句亦是亦有亦空句。有句亦是非有非空句。一句即四句也。一句既即四句。四句亦即一句。有句固是有句。空句亦是有句。亦有亦空句。亦是有句。非有非空句。亦是有句。全一即四。全四即一。一四圓融。不可思議。又此有空等四句。執之則成四種邪見。通之則為四方便門。執成邪見網。永墮外道種族。通為方便門。便入聖賢階位。故曰。般若如大火聚。觸著便燒。此謂四邊不容執著也。又曰。般若如清涼池。隨方可入。此謂四門皆堪入道也。然全大火聚是清涼池。非離火聚別有涼池。全清涼池是大火聚。非離涼池別有火聚。所謂毫釐有差。天地懸隔。毫釐無差。天地懸隔也。




華嚴經節略要旨

大方廣佛華嚴經者。乃毗盧遮那如來。於菩提場。初成正覺。七處九會。一音頓演。稱性法門也。案西域記。此經有三本。上中二本。其偈品以世界微塵論。下本猶有十萬偈。四十八品。結集之後。收入龍宮。以上中二本。非閻浮提人心力能持。故龍樹大士。但於龍宮記出此本。流布人間。而經來此土。有晉唐兩譯。佛陀跋陀羅所譯。六十卷。三十四品。唐實叉難陀所譯。八十卷。三十九品。即今經也。然文雖未備。義已周圓。神而會之。存乎其人。文中前後。共有七處九會。古德判為五周四分。曲盡精詳。今古同遵。第一會。說毗盧遮那如來依正因果法門。經文凡十一卷。六品。即四分中舉果勸樂生信分。五周中所信因果周也。

此中因果。乃聖位中修證之圓因妙果。非善惡因果之謂也。後皆做此。

其次六會。以次說十信十住十行十回向



十地等妙二覺法門。共四十一卷。三十一品。即四分中修因契果生解分。五周中差別因果。平等因果二周也。第八一會。說離世間法門。普慧雲興二百問。普賢鏘瀉二千酬。重明因果行相。共七卷。一品。即四分中託法進修成行分。五周中成行因果周也。第九一會。有本有末。初如來現相放光。具答諸菩薩心念所請果海中事三十問。令其現證。為本會。後文殊於福城東際大塔廟前。令六千比丘頓證十信滿心。指善財童子南參諸善知識。為末會。共二十一卷。一品。即四分中依人證入成德分。五周中證入因果周也。以前三十八品。雖廣談法界因果。但令生信開解起行進修。至此方始證入。苟無此證。前之信解行俱為虛設。故以證終焉。詳夫全經之大旨。統唯一真法界。蓋圓該萬有。唯是一心。觀體全真。融通交攝。是為諸佛極證之果海。亦即眾生本有之心源也。然法界勢含四重

謂理法界。事法界。理事無礙法界。事事無礙法界也。

• 重重無盡。因果緣起六



位即前信住行向地
等妙二覺也。

· 位位圓融。圓融不礙行布。行布於圓融。差別非離

平等。平等其差別。初則舉法界而全成因果。萬德萬行昭然。後

乃融因果而混同法界。一毫一塵廓爾。雖四重六位有殊。隱顯開

合無定。而原始要終。究不離乎一真法界。故曰無不從此法界流

· 無不還歸此法界也。是以一心萬法。舒卷自由。三際十方。縱

橫無礙。十世古今互現。無邊剎境交羅。猶帝網之千珠。光含眾

影。類天池之一滴。味具百川。故界標華藏。具見染淨之融通。

而佛號毗盧。直示應真之不二。五周四分之金文。瀾翻於口海。


六相十玄之妙旨。星燦於義天。可謂教啟無上圓宗。法窮甚深理

窟者矣。故得若聞若見。圓文殊智鑑於自心。或誦或持。啟普賢

行門於徧界。人人入金剛之藏。塵塵樹功德之林。直得一生事辦

· 則我即善財。但使法界願周。而誰非淨滿。經云。此經不入一

切餘眾生手。論云。唯付囑最上大心凡夫。斯言豈無謂哉。故知



排斥久修開士。聾瞽上德聲聞。是皆所以融權執。引大心之深意也。然則食金剛之少許。固已植乎聖因。剖大經於微塵。終有待夫智者。況一字法門。海墨書而不盡。千重樓閣。指聲彈而頓開。非貝葉之所能詮。豈管窺可得而測。勉述大端。聊備采覽云爾。

如欲詳明者。藏中有清涼觀國師疏鈔。棗柏李長者合論。其疏盡精微。沖深包博。而論得大體。痛快直截。二者參而觀之。則華嚴大旨。無餘蘊矣。

楞嚴二決定義

初義蓋示根中之湛性為真因。真因得而後果證可期。二義蓋指根中之結相為惑本。惑本明而後斷修有要。湛性者。六根之性也。不變之真也。結相者。六根之相也。隨緣之妄也。斯則唯一六根。特相妄性真之別耳。惟其相妄。故須解之令盡。惟其性真。故



可依而為因。然真既不變。則妄即本空。而妄既緣起。則真必全隱。約妄緣起而真全隱。修德固不可缺。且真不變而妄元空。性德尤所當明。性德固資修德而顯。修德全依性德而成。合二門之義觀之。真妄交融。性修雙妙之旨。無餘蘊矣。然則推此而往。根身世界。物物頭頭。真也妄也。圓陀陀。活潑潑。渾無定相。云為動作。心心念念。性也修也。淨灑灑。赤裸裸。了無定執。如是則何惑不斷。何果不成。而實亦無斷無不斷。無成無不成。特對迷心倒見者強分別耳。

楞嚴頓歇漸修說

前云汝但不隨分別三種相續。狂性自歇。歇即菩提。何藉劬勞肯綮修證。似令一念頓歇也。此云菩提涅槃。尚在遙遠。非汝歷劫辛勤修證。雖復多聞。祇益戲論。似令歷劫漸修也。阿難之根。



不劣於滿慈。而滿慈之位。差勝於阿難。何其修證難易之相懸若是耶。此蓋世尊據念劫圓融之理。頓漸不二之宗。顯妄空以奪法執。斥徒聞而策真修。即所謂看孔著楔。應病與藥也。試論之。一念歇狂。頓也。不了則流為長劫。歷劫勤修。漸也。究亦不離於一念。此念劫頓漸。似相懸而實不離也。況乃念性元空。時節無體。迷時似有隔異。悟後本自圓融。一念本不殊長劫。而長劫原祇是一念。復何念劫頓漸之可疑哉。向使滿慈不索妄因而執實有。阿難不溺多聞而廢進修。則世尊頓歇漸修之說。亦不容拈出矣。

金剛經實無有法發菩提心說

金剛經圓明五眼。洞徹三心一段。乃解上文實無有法發菩提心者之義。謂眾生所以為眾生者。為有妄心故也。三心既不可得。眾



生豈復可得。眾生不可得。誰為能發之人。三心不可得。何為所發之心。故曰實無有法。發菩提心者。又妄心不可得。則全妄即真。眾生不可得。則全生即佛。果見到全妄即真。全生即佛。是為不發而發。稱性開發阿耨多羅三藐三菩提心。如此發心。何更有法可得。故曰實無有法。發菩提心者。

楞嚴經知見無見說

楞嚴經知見無見一語。至為要妙。總攝一切諸要妙句。以其即是見猶離見也。華屋之門也。狂心頓歇也。不取無非幻也。聞復翳根除也。歸無所得也。滅妄名真也。全修在性也。覓心了不可得也。心空及第歸也。子轉身而就父也。臣退位以朝君也。父子投機也。君臣道合也。以少方便疾得成佛也。緣起無生也。知之一字眾妙之門也。剎那而登正覺也。體得無心道也。休也。諸聖所



知·轉相傳授·妄想無性也。一超直入如來地·回頭慚愧好兒孫也。自是不歸歸便得·故鄉風月有誰爭也。撒手到家何所似·更無一物獻尊堂也。知而無知·不是無知而說無知也。即此見聞非見聞·無餘聲色可呈君也。根既不立·塵無所緣·根塵兩亡·靈光獨耀也。類此句義·不能盡舉。唯此四句·攝盡無餘。所謂緊要處佛法無多子也。果能一念相應·是為真轉全經。古德如慈明圓·權大道·棲賢舜·廣道者等諸人·於大見道後·皆作此功夫。謂之無心體道·以其是還鄉要路。歸真祕訣也。

一乘決疑論說


欲得不招無間業·莫謗如來正法輪。此古德大慈悲心·淚出痛腸語也。良以我釋迦如來·為眾生故·修證此法·無央數劫·行諸一切難行法行。捨所愛之國城妻子·頭目腦髓·不知其幾千萬億



。至於道成。仍以平等大悲。順悉檀義而敷衍之。故凡一句一字。皆無明長夜之寶炬。生死苦海之慈航。凡在有情。孰不蒙益。而諸子以依通之見。肆口詆訶。障正法明。瞎將來眼。疑誤眾生。殊非小小。謂其無罪。寧有是處。茲以一乘之理。剖決群疑。正大光明。直截痛快。蕩迷雲而淨盡。耀佛日以重光。誠為法門一大金湯矣。當是時也。諸子天眼法執。果得已通已忘。自能深生隨喜。正使未忘未通。定當頓獲勝益。故知此論之作。非特有益於法門。實則有益於諸子。不唯有益於諸子。且深有益於天下後世之學者。請即流通。以廣法施。

相相離相心印心略解

原夫境逐念生。念泯則相相離相。妄依真起。達真則心心印心。惟其離也。有相皆歸實相。即斯印矣。無心不屬真心。是以滯相



迷真·頭頭障礙。背塵合覺·法法圓通。心相大端·略申管見。
精微詳釋·以俟多聞。

淨土津梁跋

乙巳仲秋·衍法志公和尚·會刻淨土經論文集·囑跋數語。余因歷觀三經·明因舉果·大開淨土之門。三論·顯理破迷·的示唯心之要。龍舒文·導初機而精詳曲盡。指歸集·采眾善於事理圓通。或問數紙·搜抉禪者孤陋之疑。法語一章·力振行人因循之弊。雲棲願文·自注戒殺放生等篇·莫非往生急務·助行要門。至若蓮華世界詩·雖文出遊戲·而理實圓常·況寫境傳神·引心入觀·攝化門中為不可少。善哉念佛一門·得此諸說·無機不被·無路不通·統萬流而歸淨土·誠為一大津梁矣。爰為題名曰淨土津梁。然而津梁雖設·履踐在人。撩起便行·阿誰無分。所



貴賈勇先登。占寶蓮之上品。玄關直躡。獲法忍於無生。佛記早承。願輪速轉。徧剎網而縱橫應化。盡劫波以展轉津梁。則苦海勞生。由是而蒙利濟者。可復量哉。如其逐世波而忘返。趨險道以苟安。或則玩津梁而不進。守津梁以自足。不驚汨沒矜嶻之苦。卒致問橋戀筏之譏。其何以慰集者之苦心。且深昧夫命名者之大義也矣。或曰。和尚秉單傳之宗。以祖道自任。當依本分直截示人。夫唯心淨土。當處現成。自性彌陀。覲體不隔。乃為是津梁之說。以起人心外有法。去來取捨之見乎。噫。通玄峯頂。不是人間。心外無法。滿目青山。本分直截耶。去來取捨耶。於此縑素分明。許汝會唯心自性。如或未然。莫寐語好。

跋德全禪人血書蓮華經

無我而靈者。佛知見也。有我而昧者。眾生知見也。生佛知見無




殊·特一妄我間之耳。夫大迷之本存乎我·而我之最愛者莫過身。苟眾生之身見不亡·我執不破·則生死輪回·曷能自己。德禪人密發九品淨願·書成七軸蓮經。以無情之霜刀·刺難出之身血。十指瀝乾·一心不動。偉矣哉·真無邊苦海中頓空我見·直出生死之勇猛丈夫也。噫·禪人初發是念·蓮華種植時也。日漸刺書·蓮華增長時也。七卷功圓·蓮華光香具足時也。如是則禪人之淨因已成矣。但當莫忘本願·繫心念佛·直待此方報謝·彼土華開。即見佛聞法·因圓果滿時也。雖然·即今試問禪人·方金刀裂肉·血筆縱橫時·其知疼痛而成點畫者·靈耶昧耶·我耶非我耶·佛知見耶·眾生知見耶。於此了然·則佛國非遙·寶蓮正放。或猶未也·請分明記取·以質諸彌陀老子。

跋明初禪人血書蓮華經



金刀未舉。斑管未拈。盡十方是部血淋淋的妙法華經。於斯見徹。謂靈山一會未散可也。謂靈山一會本不曾會亦可也。向當時喝散可也。於今日再會亦可也。大用現前。不存軌則。如王寶劍。殺活臨時。如是刺血。如是書經。是真精進。是名真法供養如來。可以暢本師出世之懷。可以來古佛泥洹之塔。直令十二類生。迎刃而命根頓斷。無邊法藏。點筆而文采全彰。莫不滴滴歸源。言言得髓。奚止刺無能刺。書無所書。鋪好華於錦上。指明月於天邊也哉。明禪人年齒尚少。向道唯誠。刺血書經。歸心樂土。果能聞是說而不生驚怖。是為解第一義。上品生因。如其未然。直須十二時中。四威儀內。以書經之念。念念忘緣。刺血之心。心心憶佛。管取金臺可以坐待。妙諦不日親聞。否則必見我為能書。經為所書。彼是刺血時。彼是書經處。以生滅心。取實相法。轉不輕行。為我慢幢。不特全迷妙法。遠背佛心。且深負此一



點百劫千生不易發起之勇猛淨信。為可惜矣。禪人其勉之。

書蓮華經普門品後

題標妙法。何法也。品號普門。何門也。說者謂一光東照。十界圓彰。隨類現身。應念脫苦。未為非是。特其末耳。直須未舉以前。向世尊開口不得處。大士回避不及時。親見法法此法。門門此門。正與麼時。不與麼會。始具看經眼。否則入海算沙。執指為月。不唯埋沒己靈。見惜明眼。將恐普門漸閉。而妙法終隱矣。默超居士有見於此。得是經而裝帙之。囑綴數語。普為見聞隨喜者。震塗毒鼓。食少金剛。其意豈淺淺哉。

二有室跋

經云。從是西方過十萬億佛土。有世界名曰極樂。其土有佛。號阿彌陀。今現在說法。此金口誠言。分明指示。而世之昧者。猶



謬執唯心。橫生異議。可悲也。因特書此以名余室。用警省焉。余以二有名室。或者淺之。吁。是尚不知即空之有。有而非有。況復雙泯雙存。超四句。該四句。圓教有門之有。與夫性具本有之有耶。其謂之淺也宜矣。無庸辯。

跋禪人勇建血書楞嚴經莊嚴淨土

首楞嚴者。稱性大定之名也。以如來藏心而為體性。以耳根圓通而為入門。以窮極聖位而為究竟。此依藏性之理。起稱性之行。還復證入藏性全體。一經大旨。義盡於斯。故文殊於是請結經名。此後復明昧此難免七趣沉淪。修此須防五魔擾亂者。但反襯正宗。以補足其間要務耳。經中兼明淨土。其處有四。第一大勢至法王子。親稟念佛法門於超日月光佛。其所陳念法。至為切要。而大士修因契果。自利利他。唯以念佛。皆悉具足。第二乾慧地



中云。現前殘質。不復續生。夫乾慧地。雖圓伏五住。見思尚猶未斷。何以便不續生。蓋超同居穢土。生同居淨土矣。智者大師是其明證。第三情想升沉中云。純想即飛。必生天上。若飛心中兼福兼慧。及與淨願。自然心開。見十方佛。清淨國土。隨願往生。前乾慧地。猶屬聖位。此則博地凡夫。純想之心。便往生有分。此蓋我釋迦如來。大慈悲心。熾然輪迴之中。特地拈出此橫出三界之要道耳。古今未入聖位之人。臨終往生者。是其證也。第四流通分中。若有一人身具重罪。將招極惡。一念宏法。變其所受地獄苦因。為安樂國。重罪尚然。況輕罪乎。況無罪乎。無福尚然。況有福乎。況多福乎。一念尚然。況多念乎。況終年終身乎。其往生不在中下品矣。古今宏法諸師。現相往生者。皆其證也。夫念佛法門。普逗十方之機。三根齊被。耳根圓通。專逗此方之機。唯利上根。且示阿難以就路還家。故文殊大士曲為揀



選。非謂耳根獨勝。念佛便劣也。讀經者不可不知。禪人血書此經。流通大法。實為希有難能之行。其於往生。當必有分焉。

覆香嚴居士書

月內廿九日得尊札。備悉一切。欣慰無量。讀札內有念佛期過三七。尚未見相好云云。觀此用心之切。立行之猛。此百日內。當必有大不思議之成就。但此時不可預存期效之心。存之則增躁動。而翻為障礙矣。此係修行門中微細心病。不可不知。直須深信諦了。心外無佛。佛外無心。全心即佛。全佛即心。一念現前。即一念相應。念念現前。即念念相應。但使此念常現在前。便是真實效驗。離此念外。別求效驗。便是間斷。便不親切。便入歧路矣。經云。是心作佛。是心是佛。正此之謂也。鄙見如此。不識居士於意云何。至如長水之問。琅琊之答。鍼鋒直截明白。不



可更為蛇足。果能於此正眼洞開。覷破琅琊。捉敗長水。楞嚴大旨。思過半矣。然雖如此。正好擲向他方世界。且自一心念佛。若曰開少解路。則更不勞拈出矣。柴紫錄。久聞其名。第未親見其書。未可懸斷。寺中近日。唯嘉園居士兼旬或一至。此外別無客迹。不慧逐日與諸衲子揮麈談經。罷即焚香宴坐。或讎校華嚴。或檢閱津梁。別亦無事。楞嚴已講竟六卷。約於後七月間。可圓全部。因思半載之內。兩終此經。亦閻浮提人生一大快事也。然唯循行數墨而已。絕無一字之新得。并書以博一笑。

答江南彭二林居士書

仰惟居士。深入淨宗。廣陳法施。自他並利。解行俱圓。可謂現居士身。修菩薩行。不違本願。不忘佛囑者矣。向得三經新論。妄為評題。不見罪責。已出分外。茲復寄示種種新刻。囑令論定。



· 益覺赧顏。山野唯教乘大旨。粗知向方。而幼失問學。語不成文。故兩處住持二十餘年。檀護之門。未投隻字。今感居士。虛懷遠問。為法之誠。逐頓忘固陋。罄己所知。直詞以告。其當否去取。唯高明以自裁焉。念佛決疑兩論。皆發前人所未發。一以見慧解之超卓。一以彰衛道之真切。並沒量大人。出格作用。可續入藏。永永流通。序跋皆精當。間有可商之處。簽辯於後。

與瑞一李居士書

屢有書來。曾未覆答。師資心契。諒不我疑。聞在南中竭力辦公。盡心護法。修持不輟。勸導維殷。此則自行化他。二利並舉。世法佛法。一道齊行。或雁信時通。或口碑傳誦。每一聞見。且慰且欣。因思道無不在。豈分朝野。而修證之際。實有易難。的論修道。出家尚不易。況在家耶。居家已難。況居官耶。故知即



塵勞為佛事。化熱惱作清涼。苟非忍證無生。位登不退。深入如來之室。權現宰官之身者。恐終不免塵緣漸染。而道念日微也。今賢契信向此道未久。便能於衝繁官署。猛切乃爾。非宿善根力。謂之何哉。雖然。猶須痛念三界無安。肉身苦惱。生死路險。人命無常。幸聞佛法。幸生信心。幻境幻緣。隻眼覷破。佛心佛行。赤體擔當。淨業得修且修。宦場可下便下。無少生留戀。無虛棄光陰。務期事辦一生。華開上品。庶幾不負自己多生熏習之善願。我佛長劫護念之慈恩。而成一世出世間之勇猛丈夫焉。

念佛伽陀（附）／嗣法門人了如錄

教義百偈

一句彌陀。我佛心要。豎徹五時。橫該八教。
一句彌陀。意旨如何。知音常少。木耳偏多。



- 一句彌陀。大意分明。蛇生弓影。藥出金瓶。
- 一句彌陀。名異方便。普攝群機。旁通一綫。
- 一句彌陀。開往生門。是多福德。非少善根。
- 一句彌陀。臨終佛現。四辯親宣。六方共讚。
- 一句彌陀。成佛標準。以念佛心。入無生忍。
- 一句彌陀。證三不退。祇此一生。便補佛位。
- 一句彌陀。滿十大願。豈得普賢。錯教了辦。
- 一句彌陀。白牛駕勁。其疾如風。行步平正。
- 一句彌陀。如來藏心。水外無浪。器原是金。
- 一句彌陀。妙真如性。春在華枝。像含古鏡。
- 一句彌陀。清淨實相。絕議絕思。難名難狀。
- 一句彌陀。圓融法界。覲體全真。交羅無礙。
- 一句彌陀。大圓智鏡。身土影含。重重掩映。



一句彌陀·空如來藏·萬法未形·一真絕相。
一句彌陀·圓滿菩提·天更無上·雲不與齊。
一句彌陀·大般涅槃·一輪明月·萬里空寒。
一句彌陀·開般若門·十虛萬法·一口平吞。
一句彌陀·華屋門開·從者裏入·快隨我來。
一句彌陀·入王三昧·似地均擎·如天普蓋。
一句彌陀·得大總持·轉一切物·使十二時。
一句彌陀·性本自空·星皆拱北·水盡朝東。
一句彌陀·法界緣起·淨業正因·菩提種子。
一句彌陀·如鏡照鏡·宛轉互含·重疊交映。
一句彌陀·似空合空·了無痕縫·卻有西東。
一句彌陀·一大藏經·縱橫交彩·絕待幽靈。
一句彌陀·一大藏律·警爾淨心·戒波羅蜜。



一句彌陀。一大藏論。當念心開。慧光如噴。
一句彌陀。一藏祕密。發本神通。具大威力。
一句彌陀。渾全大藏。戒定慧光。流出無量。
一句彌陀。繩本是麻。奈何不會。翻疑作蛇。
一句彌陀。罕聞罕睹。影現鏡林。響宣天鼓。
一句彌陀。無可譬喻。古鏡當臺。水銀墮地。
一句彌陀。老婆心苦。運萬斛舟。發千鈞弩。
一句彌陀。明明是有。四辯八音。婆心苦口。
一句彌陀。的的是無。鎔他萬像。入我洪鑪。
一句彌陀。亦無亦有。夢裏山川。鏡中華柳。
一句彌陀。非有非無。捺著便轉。水上壺盧。
一句彌陀。第一義諦。尚超百非。豈落四句。
一句彌陀。妙圓三諦。最清涼池。大猛火聚。



一句彌陀·得大自在·轉變聖凡·融通世界。
一句彌陀·有功者賞·王膳盈前·髻珠在掌。
一句彌陀·里仁為美·居卜來歸·枯椿非鬼。
一句彌陀·非難非易·九品蓮華·一生心力。
一句彌陀·就路還家·可惜癡人·棄金擔麻。
一句彌陀·橫出娑婆·汝信不及·吾末如何。
一句彌陀·歸元捷徑·緊要資糧·唯信願行。
一句彌陀·要在信深·蓮芽九品·抽自此心。
一句彌陀·要在願切·寸心欲焚·雙目流血。
一句彌陀·要在行專·單提一念·斬斷萬緣。
一句彌陀·誓成片段·拌此一生·作箇閒漢。
一句彌陀·只恁麼念·百八輪珠·綫斷重換。
一句彌陀·不急不緩·心口一如·歷歷而轉。




- 一句彌陀·愈多愈好·如人學射·久習則巧。
一句彌陀·攝心密持·如人飲水·冷暖自知。
一句彌陀·譬猶掘井·就下近泥·價廉工省。
一句彌陀·類如鑽火·木煖煙生·暫停不可。
一句彌陀·全身頂戴·人命無常·光陰不再。
一句彌陀·如救頭然·盡十分力·期上品蓮。
一句彌陀·妙圓止觀·寂寂惺惺·無雜無間。
一句彌陀·險路砥平·直抵寶所·不住化城。
一句彌陀·如水晶珠·紛紜雜念·不斷自無。
一句彌陀·頓入此門·金翅擘海·直取龍吞。
一句彌陀·塵緣自斷·師子遊行·驚散野干。
一句彌陀·驀直念過·一蹋到底·香象渡河。
一句彌陀·無相心佛·國土莊嚴·更非他物。



一句彌陀·無為大法·日用單提·劍離寶匣。
一句彌陀·無漏真僧·雪山藥樹·險道明燈。
一句彌陀·滿檀那度·裂破慳囊·掀翻寶聚。
一句彌陀·滿尸羅度·都攝六根·圓淨三聚。
一句彌陀·滿羸提度·二我相空·無生忍悟。
一句彌陀·滿毗梨度·不染纖塵·直躡玄路。
一句彌陀·滿禪那度·現諸威儀·藏甚枯樹。
一句彌陀·滿般若度·境寂心空·雲開月露。
一句彌陀·想寂思專·未離忍土·已坐寶蓮。
一句彌陀·一朵寶蓮·唯心之妙·法爾如然。
一句彌陀·一朵寶蓮·凡情不信·亦宜其然。
一句彌陀·一朵寶蓮·決定不信·真箇可憐。
一句彌陀·一朵寶蓮·直饒不信·已染識田。



- 一句彌陀·宏通敢情·入大悲室·坐法空座。
一句彌陀·無盡寶藏·八字打開·普同供養。
一句彌陀·斷諸煩惱·全佛全心·一了百了。
一句彌陀·滅除定業·赫日輕霜·洪鑪片雪。
一句彌陀·能空苦報·世界根身·即粗而妙。
一句彌陀·圓轉三障·即惑業苦·成祕密藏。
一句彌陀·解難解怨·慈光共仰·法喜均霑。
一句彌陀·報未報恩·裂纏絲網·入解脫門。
一句彌陀·空諸惡趣·萬德洪名·那容思議。
一句彌陀·機逗人天·參差三輩·掩映九蓮。
一句彌陀·化兼小聖·回狹劣心·向無上乘。
一句彌陀·超然無礙·文殊普賢·大人境界。
一句彌陀·微妙難思·唯佛與佛·乃能知之。



一句彌陀·列祖奉行·馬鳴造論·龍樹往生。
一句彌陀·因緣時節·異香常聞·蓮社創結。
一句彌陀·利大象龍·永明禪伯·智者教宗。
一句彌陀·感應非輕·少康化佛·善導光明。
一句彌陀·有教無類·雄俊入冥·惟恭減罪。
一句彌陀·是無上禪·一生事辦·曠劫功圓。
一句彌陀·理非易會·百偈俄成·三尊加被。

宗乘百偈

一句彌陀·五宗公案·八裂七華·不勞判斷。
一句彌陀·指向上路·不可言傳·直須神悟。
一句彌陀·切忌莽鹵·瓜徹蒂甜·瓠連根苦。
一句彌陀·何敢相嘲·合取狗口·打折驢腰。



一句彌陀。現成公案。但辦肯心。必不相賺。
一句彌陀。正好活埋。拗折竹杖。燒卻草鞋。
一句彌陀。死了未燒。佛曾有約。天不須招。
一句彌陀。莫問宗教。未擲藤條。先焚疏鈔。
一句彌陀。計甚易難。三條竹篾。七箇蒲團。
一句彌陀。拳拳牢執。捏鐵稱錘。出黃金汁。
一句彌陀。親切受持。一牛飲水。五馬不嘶。
一句彌陀。念來便好。不用分疏。顯蒙合道。
一句彌陀。悟機尤妙。念極情忘。寒灰豆爆。
一句彌陀。誰知如此。百丈鼻頭。雲門足指。
一句彌陀。正好轉身。山盡無路。谿回有邨。
一句彌陀。蹋上頭關。水不是水。山依舊山。
一句彌陀。萬重關透。佛手驢腳。面皮多厚。



一句彌陀·格外宗通·泥牛吼月·木馬嘶風。
一句彌陀·三玄三要·除卻楊修·阿誰知妙。
一句彌陀·天然五位·只為分明·卻難領會。
一句彌陀·全賓全主·師子咬人·鵝王擇乳。
一句彌陀·四重料揀·收放卷舒·門頂有眼。
一句彌陀·四種藏鋒·巖頭去後·誰善斯宗。
一句彌陀·藏身無迹·此意誰知·華亭空憶。
一句彌陀·本分禪宗·橫擔柳栗·直入千峰。
一句彌陀·密轉不已·自己山河·山河自己。
一句彌陀·大有來由·暗中書字·窗裏出牛。
一句彌陀·誰善舉揚·龜毛拂短·兔角杖長。
一句彌陀·六八宏願·冷便穿衣·饑來喫飯。
一句彌陀·是何宗旨·雪峰鞦韆·天龍豎指。



- 一句彌陀·得要明宗·攬草成藥·破壁飛龍。
一句彌陀·全機勘破·勝金剛王·超木上座。
一句彌陀·舊案全翻·喝退臨濟·棒走德山。
一句彌陀·法身向上·如何若何·徒勞讚謗。
一句彌陀·一點靈明·無星稱上·兩頭恰平。
一句彌陀·一箇主翁·若然兩物·用著融通。
一句彌陀·坐鎮寰宇·燒返魂香·擊塗毒鼓。
一句彌陀·切莫顛預·月圓當戶·日出連山。
一句彌陀·重新指點·拽下禪牀·未是正眼。
一句彌陀·成群合夥·覷井覷驢·是渠是我。
一句彌陀·居不待卜·盜入賊家·僧投寺宿。
一句彌陀·父子投機·慈顏咫尺·愧疚背違。
一句彌陀·君臣道合·聖德天淵·慚難報答。



一句彌陀。且淺商量。薰風南來。殿閣微涼。
一句彌陀。仔細商量。心外無法。東土西方。
一句彌陀。的當商量。店中焚被。庫下賣薑。
一句彌陀。含靈普育。日麗山川。春榮草木。
一句彌陀。九品蓮華。種豆得豆。種瓜得瓜。
一句彌陀。九品蓮華。布帛非儉。錦繡非奢。
一句彌陀。九品蓮華。故鄉作客。別國為家。
一句彌陀。九品蓮華。壺盧架上。卻結冬瓜。
一句彌陀。曾聞多觜。雁過長空。影沉寒水。
一句彌陀。今重告語。生實不生。去決定去。
一句彌陀。念者為誰。會得了也。猶欠鍼錘。
一句彌陀。撥塵見佛。佛亦是塵。塵是何物。
一句彌陀。於意云何。兩段不同。收歸上科。



- 一句彌陀·願樂欲聞·草木真香·山水清音。
一句彌陀·惟德是馨·山不在高·水不在深。
一句彌陀·別啟玄關·一般雲月·各自谿山。
一句彌陀·是殺人刀·當場拈起·鬼哭神嘯。
一句彌陀·是人活劍·略露鋒銚·龍騰豹變。
一句彌陀·轟雷掣電·法眼卷簾·三平斷案。
一句彌陀·臨機自由·芭蕉拄杖·黃龍拳頭。
一句彌陀·不用曉曉·但歸山去·自有柴燒。
一句彌陀·頗深意致·買石雲饒·移華蜨至。
一句彌陀·說山中話·六月松風·人間無價。
一句彌陀·安樂故土·胡不歸來·鬧市有虎。
一句彌陀·轉身就父·無計承歡·何敢背忤。
一句彌陀·法本常住·綠樹啼鶯·動便飛去。



- 一句彌陀·不勞融貫·心佛眾生·本來一串。
- 一句彌陀·佛眼難窮·通身絲密·八面玲瓏。
- 一句彌陀·△字三點·喚破沙盆·作正法眼。
- 一句彌陀·千車同軌·王庫寶刀·祖庭真髓。
- 一句彌陀·坐大寶蓮·彌勒非後·釋迦不前。
- 一句彌陀·全心相委·似金博金·如水投水。
- 一句彌陀·百千卷經·水中鹽味·色裏膠青。
- 一句彌陀·常寂滅相·時至華開·鶯啼柳上。
- 一句彌陀·是究竟道·下士聞之·呵呵大笑。
- 一句彌陀·殊非草草·救取丹霞·喚回趙老。
- 一句彌陀·萬古空平·當人面目·大地眾生。
- 一句彌陀·明珠走盤·看則有分·道即應難。
- 一句彌陀·豐儉隨家·香嚴錐子·真淨袈裟。



一句彌陀·建大法幢·寰中道契·化外魔降。
一句彌陀·震大法雷·臥龍奮迅·蟄戶洞開。
一句彌陀·吹大法螺·木童撫掌·石女高歌。
一句彌陀·擊大法鼓·日月停輪·山河起舞。
一句彌陀·無邊眾生·同時度竟·豈待更稱。
一句彌陀·無盡煩惱·輓成一團·全身靠倒。
一句彌陀·無量法門·慈氏樓閣·武陵桃源。
一句彌陀·無上佛道·不許夜行·投明須到。
一句彌陀·且不是佛·名本非名·物原無物。
一句彌陀·何止唯心·山自高高·水自深深。
一句彌陀·心佛雙彰·兩輪互照·一統無疆。
一句彌陀·心佛兩亡·水歸滄海·雲去帝鄉。
一句彌陀·離見超情·水清月現·印壞文成。



一句彌陀。恰有明證。趙州狗子。卻無佛性。

一句彌陀。宗提格外。劫火洞然。者箇也壞。

一句彌陀。道出大方。寂光有相。佛性無常。

一句彌陀。人人知有。從東過西。進前叉手。

一句彌陀。大家委悉。向下文長。付於來日。

一信生必有死。普天之下。從古至今。曾無一人逃得。

二信人命無常。出息雖存。入息難保。一息不來。即為後世。

三信輪回路險。一念之差。便墮惡趣。得人身如爪上土。失人身者如大地土。

四信苦趣時長。三途一報五千劫。再出頭來是幾時。

五信佛語不虛。此日月輪。可令墮落。妙高山王。可使傾動。諸佛所言。無有異也。

六信實有淨土。如今娑婆無異。的的現有。

七信願生即生。已今當願。已今當生。經有明文。豈欺我哉。

八信生即不退。境勝緣強。退心不起。



九信一生成佛。

壽命無量。
何事不辦。

十信法本唯心。

唯心有具造二義。如上諸法。
皆我心具。皆我心造。

信佛語故。則造後四。不信佛語。但造前四。故深信佛言。即深信自心也。修淨業者。能具此十種信心。其樂土之生。如操左券而取故物。夫何難之有。甲子七月。訥堂道人書。



徹悟禪師行略

師諱際醒·字徹悟·一字訥堂·又號夢東·京東豐潤縣人·俗姓馬·父諱萬璋·母高氏·師幼而穎異·長喜讀書·經史群籍·靡弗采覽·二十二歲·因大病·悟幻質無常·發出世志·病已·至房山縣·投三聖庵滎池老宿薙髮·越明年·詣岫雲寺恒實律師圓具·次年聞香界寺隆一法師開演圓覺·師預會焉·晨夕研詰·精求奧義·遂悟圓覺全經大旨·復依增壽寺慧岸法師·聽講相宗·妙得其要·後歷心華寺徧空法師座下·聽法華楞嚴金剛等經·圓解頓開·於性相二宗·三觀十乘之旨·了無滯礙·乾隆三十三年冬·參廣通粹如純翁·明向上事·師資道合·乃印心焉·是為臨濟三十六世·磬山七世也·三十八年·粹翁遷萬壽寺·師繼席廣通·率眾參禪·策勵後學·津津不倦·十四年如一日·聲馳南北



·宗風大振。每憶永明延壽禪師。乃禪門宗匠。尚歸心淨土。日課十萬彌陀。期生安養。況今末代。尤宜遵承。遂棲心淨土。主張蓮宗。日限尺香晤客。過此惟禮拜持念而已。五十七年。遷覺生寺。住持八年。百廢盡舉。於淨業堂外。別立三堂。曰涅槃。曰安養。曰學士。俾老病者有所依託。初學便於誦習。師於禪淨宗旨。皆深造其精奧。律已甚嚴。望人甚切。開導說法。如瓶瀉雲興。與眾精修。蓮風大扇。遐邇仰化。道俗歸心。當時法門為第一人。嘉慶五年。退居紅螺山資福寺。以期終歲。衲子依戀。追隨者甚眾。師為法為人。心終無厭。遂復留眾。俄成叢席。擔柴運水。泥壁補屋。一飲一餐。與眾共之。如是者又十年。十五年二月。詣萬壽寺埽粹祖塔。辭諸山外護。囑曰。幻緣不久。人世非常。虛生可惜。各宜努力念佛。他年淨土好相見也。三月還山。命預辦茶毗事物。十月十七日。集眾付院務。命弟子松泉領



眾住持。誠曰。念佛法門。三根普被。無機不收。吾數年來。與眾苦心建此道場。本為接待方來。同修淨業。凡吾所立規模。永宜遵守。不得改弦易轍。庶不負老僧與眾一片苦心也。臨示寂半月前。覺身微疾。命大眾助稱佛號。見虛空中幢幡無數。自西而來。乃告眾曰。淨土相現。吾將西歸矣。眾以住世相勸。師曰。百年如寄。終有所歸。吾得臻聖境。汝等當為師幸。何苦留耶。十二月十六日。命監院師貫一。設涅槃齋。十七日申刻。告眾曰。吾昨已見文殊觀音勢至三大士。今復蒙佛親垂接引。吾今去矣。眾稱佛號愈厲。師面西端坐合掌曰。稱一聲洪名。見一分相好。遂手結彌陀印。安詳而逝。眾聞異香浮空。供奉七日。面貌如生。慈和豐滿。髮白變黑。光潤異常。二七入龕。三七茶毗。獲舍利百餘粒。門弟子遵遺命。請靈骨葬於普同塔內。師生於乾隆六年十月十四日未時。終於嘉慶十五年十二月十七日申時。世壽



七十。僧臘四十九。法臘四十有三。所著有示禪教律念佛伽陀行於世。嘉慶十七年壬申九月既望。有師之弟子惺聰者。持師行實。請述於余。余與師相契有年。素蒙開誨。啟迪良多。師真過量人也。六根通利。解悟超常。既具辯才。兼持苦行。終始如一。余所目覩。故此述不容一字假飾。愧余不文。特質言之以傳信云爾。拈華寺慕蓮杜多。體寬通申敬述。

淨土十要第十

明·蕩益大師選定

蓮華世界詩

淨土十要
(附本)



蓮華世界詩序

明雲棲會下妙意庵廣貴撰

佛言諸佛如來。是法界身。則徧法界身是阿彌陀佛。何淨何穢。何樂何苦。然淨度三昧經有云。人生一念受一身。百念受百身。千念受千身。一日一夜種生死根。後當受八億五十萬雜類之身。百年中所造魂神。逐種受苦。徧大千剎土。體骨皮毛。亦徧大千剎土。當其皮毛齒角森然變現時。豈復能知徧法界異類身是阿彌陀佛。當其鞭笞雨下屠割奏刀時。豈復能知徧法界受苦異類身是阿彌陀佛。當其鼎烹刀鋸犁耕火炙時。豈復能知徧法界餓鬼地獄受苦身是阿彌陀佛。豈唯是。即儼然而人。當其苦難忽逢。刀兵乍逼。爾時即不能知我輩苦難身是阿彌陀佛。豈唯是。即快然而得意。五欲自娛。榮華滿志。爾時即不能知我輩受享身是阿彌陀



佛。夫人世間在順在逆。尚不能知此身是阿彌陀佛。何況風刀解體八苦交煎之際。何況改頭換面羽毛骨角之儔。何況焰口鍼喉鑊湯洋銅之日。然後不知我身是阿彌陀佛哉。金剛上味經。載文殊師利言。一切凡夫以自繫縛。故見地獄相。雖非實有。而令受者受苦。譬如夢中見身墮地獄。萬火所燒。擲入鑊湯。彼人夢中呌言極苦。若知是夢虛妄不實。身心得安。所以法苑云。觀罪性空者。罪從心生。心若可得。罪不可無。今塵世中心空者幾人。夢破者幾人。所以如來教人念一句阿彌陀佛。正攝其百念千念八億五千萬雜念於一念。念至一念不起。自然證見阿彌陀佛。然後知一念百念千念八億五千萬雜念皆阿彌陀佛之念。然後知一身百身千身八億五千萬雜類之身皆阿彌陀佛之身。然後知畜生餓鬼地獄皆阿彌陀佛之法界。然則經云。一聲阿彌陀佛。滅八十億劫生死重罪。豈不深切著明矣哉。故知一聲阿彌陀佛。正是證明無淨無



穢之淨土。證明無苦無樂之極樂。正是空其心之丹藥。正是大夢中之霹靂也。無奈我輩明知是夢。卻又尋夢。明知是夢引我入鐵圍山。卻又迷昧故鄉道路。豈可不用過來人語。招之。策之。掖之。涵濡之。孔子曰。興於詩。立於禮。成於樂。三者。唯立禮為堅定之力耳。而興詩成樂。則始終皆以韻事發其歡喜。鎔其扞格。所以淨土光中。不但如來所出音聲皆演妙法。其摩尼水流注華間。其聲皆演說苦空無常無我諸波羅蜜。讚歎諸佛相好。如意珠王湧出金光。化為百寶色鳥。和鳴哀雅。常讚念佛法念僧。樓閣中諸天作天技樂。又樂器懸空。不鼓自鳴。其眾音中皆說念佛念法念比丘僧。總之。水流光明。及諸寶樹。鳧雁鴛鴦。皆說妙法。所以行者出定入定皆聞妙法。夫坐蓮華上者。猶藉此音聲以增其進。況其未到蓮池者乎。小傳載張子房在漢軍中。項兵雖挫。猶自相持。子房乃教軍中作楚歌。使楚人懷鄉。而漢事遂成。



。可見聲音一道。可以補攻取之不及。昔賢淨土之詠。即子房之還鄉曲也。試看詠淨土者。多出于宗門之知識。其殆佛門之子房也哉。

蓮華世界詩目錄

如來弘願第一

一元三首

中峰二首

妙意三首

苦勸迴轡第二

跋陀羅一首

迦哩迦一首

半託迦一首

善導一首

龐公一首

貫休一首

慈受二首

沖默一首

北山二首

一元四首

中峰二十首

石屋一首

無名一首

優曇六首

廣製一首

白雲一首


楚石六首

度門一首

雪嶠一首

妙意五首

蓮隱二首
增入



翻然嚮往第三

謝靈運一首

長蘆一首

嵇愚三首

白香山一首

優曇三首

沈朗倩一首

李商隱一首

楚石一首

蓮隱一首
增入

蘇子瞻二首

雪嶠二首

一意西馳第四

大智一首

中峰九首

古溪二首

沈朗倩二首

檀庵二首

日觀九首

嵇愚一首

雪溪九首

楚石五首

晦夫一首

北山一首

笑巖四首

丁蓮侶一首

執持名號第五

白香山一首

中峰三首

雪嶠一首

北山七首

優曇八首

失名一首

一元二首

楚石一首

頂目二首

古音一首

蓮池三首

沈朗倩四首



妙意二首

蓮隱二首
增入

聖境現前第六

阿氏多一首

李青蓮一首

延壽一首

蘿月一首

北山六首

中峰二首

楚石十三首

古溪二首

博山三首

沈朗倩一首

妙意十四首

蓮隱一首
增入

發明心地第七

慈受一首

一元五首

草庵一首

中峰三十首

優曇二十首

楚石七首

達觀二首

雪嶠一首

博山十一首

耑愚十八首

晦夫二首

萍蹤一首

沈朗倩一首

妙意十三首

蓮隱一首
增入

華開見佛第八


仙潭二首

一行一首

北山五首

博山三首

妙意五首



廣度眾生第九

陳如如一首

丁注一首

優曇八首

楚石四首

博山一首

續刻蓮華世界詩

蕩益_{十六首}

附省庵勸修淨土詩_{百八首}



蓮華世界詩

明雲接會下妙意
庵廣貴輯

如來弘願第一

悲華經載。往昔因中。阿彌陀佛為轉輪王。釋迦佛為大臣。同於寶藏佛所發弘誓願。輪王願於清淨安樂世界。攝受眾生。大臣願於五濁苦惱世界。度脫眾生。以此君臣弘願無窮無盡。所以二如來為兄弟沙彌時。同以法華教度眾生。而三乘授道之外。有度未盡者。度在彌陀。故出此淨土一門。一推一挽。共成道化。以故釋迦佛四十九年說大乘經中。恆歸宿此一門。而會上單拈淨土一門者。尤諄諄不已。即如世間朝夕所誦一卷彌陀經。文句簡約。然一則曰。眾生聞者。應當發願。願生彼國。再則曰。眾生聞是說者。應當發願。生彼國土。而又曰。若有



信者。應當發願。生彼國土。其言極樂國土成就如是功德莊嚴者。一見。二見。三見。四見。其言汝等眾生。當信是不可思議功德一切諸佛所護念經。秦譯六見。至唐譯十方佛讚歎後。則十見之。而又曰。汝等皆當信受我語。及諸佛所說。味其語氣。恨不將此數語充滿一切眾生之耳。恨不將此數語鑽入眾生之肺腸。愛何其切。慮何其深。悲何其至。即父母於至愛之子。晨夕付囑。亦未必如此之惓切也。何以故。蓋世間父母付囑子孫。不過望其成家立業已耳。至於如來見眾生不入此門。必墮鑊湯鼎沸之中。得失匪細。則眾生不念佛。悲安得不深。眾生念佛。自然攝取不舍。論云。譬如魚子。母若不念。子則爛壞。佛若不念眾生。善根亦壞。所以無量壽經言。當來之世。經道滅盡。我以慈愍。特留此經。更住百歲。又云。此經滅後。佛法全無。但留阿彌陀佛四字名號。救苦眾生。世上君臣兄



弟·能以淨土相成·設化眾生·皆是從彌陀釋迦弘願中流出。

西方詠

明一元

西方化主度迷情·佛力加持道易成·撒手便行無異路·
最初一步要分明·西方只要辦心堅·努力勤修速向前·
順水行船加艣棹·導師接引願繩牽·西方今古鎮長存·
慈父哀憐度子孫·八萬四千門路別·彌陀一句眾稱尊。

懷淨土


元中峰

蕩池無日不華開·四色光明映寶臺·金臂遙伸垂念切·
眾生何事不思來·動地驚天勤念佛·搥門打戶勸修行·
問渠因甚忙如此·只怕眾生入火坑。

頌以無緣慈攝受眾生

明妙意

梅花落盡杏花開·豈是春風著意吹·一氣不言含有象·



萬靈何處謝無私。

頌一一光明徧照十方世界念佛眾生攝取不捨

寂光影裏現全身。徧界光明迴出倫。浪煖桃花魚憶子。
無緣慈度有緣人。一點悲心擘不開。鑊湯滾處笑盈腮。
希奇之事朕深信。現與君王說法來。

❖

苦勸迴轡第一

佛言。得人身者如指上土。失人身者如地上土。雖信佛語。未
知其故。至讀楞嚴經言。一切眾生六識造業。所招惡報從六根
出。惡業圓造者。入阿鼻。六根各造。兼境兼根者。入無間。
身口意三。作殺盜淫。入十八獄。三業不兼者。入三十六獄。
一根單犯者。入一百八獄。地獄中歷劫燒然。罪畢方受鬼形。



鬼業既盡。方與世間元負人怨對相值。為畜生以酬宿債。三途絲遠如此。至較量壽命經。所載地獄壽命。活地獄一晝夜。比較人間算數一萬六千二百俱胝年。獄愈進。時愈久。地獄一道。壽命之長又如此。則善知識所言。一失人身萬劫難。與出得頭來是幾時之語。豈非剝心剖腸痛哭流涕之言也哉。今世上人。求其六根清淨。不犯一業者幾人。則茫茫塵世。大抵皆地獄之因耳。求其為餓鬼畜生尚不能得。豈可不寒心哉。楞嚴中載。畜生中業報。用錢役力。償足自停。若殺身命。或食其肉。經微塵劫。相食相誅。互為高下。無有休息。食肉之轉徙又如此。然則我輩此一副面孔。一旦失之。復在何年。凡此等之苦。我輩凡眼不能自見。唯如來悉知悉見。安得不惓惓切切。千言萬語。苦口向人。可憐平日不念佛之人。在地獄苦難之中。亦不能念佛。近有活閻羅王教地獄人念佛。但能念一句阿彌陀



佛·即與出獄。而口噤不能吐一佛字·不信心之障重如此。大
智度論云·有諸菩薩·自念謗大般若·身墮惡道·歷無量劫·
雖修餘行·不能滅罪。後遇善知識·教令念阿彌陀佛·乃得滅
障·超生淨土。然則吾輩業海中眾生·除卻一句阿彌陀佛·更
從何處覓生活。

警世

晉跋陀羅

不結良因與善緣·苦貪名利日憂煎。豈知住世金銀寶·
借汝權看數十年。

警世

晉迦哩迦

愛欲牽纏沒了期·日生煩惱鎮相隨。官中囹圄猶存赦·
家業拘牽沒赦時。

警世

晉半託迦



地水火風化此身。身滅四大各歸真。諸魔六賊皆消散。
苦樂前程祇主人。

勸念佛偈

唐善導

漸漸雞皮鶴髮。看看行步龍鍾。假饒金玉滿堂。難免衰殘老病。
任汝千般快樂。無常終是到來。唯有徑路修行。但念阿彌陀佛。

古詩

唐龐公

一年復一年。務在且遷延。皮皺顏色減。髮白髓枯乾。
毛孔通風過。骨消椽栳寬。水微不耐熱。火少不忍寒。
幻身如聚沫。四大亦非堅。更被癡狼使。無明曉夜煎。
唯知念水草。心神被物纏。云何不懺悔。便道捨財錢。
外頭遮曲語。望得免前愆。地獄應無事。準擬得生天。
世間有這屬。冥道不如然。除非不作業。當拔罪根源。



根空塵不實·內外絕因緣·積罪如山嶽·慧火一時燃。
須臾變灰燼·永劫更無烟。

觀地獄圖

唐 賈 休

峨峨非劍閣·有樹豈堪攀·佛手遮不得·人心似等閒。
周王應未雪·白起作何顏·盡日空彈指·忙忙塵世間。

警世

宋 慈 受

漁者不能獵·獵者不能漁·貴人錢為網·水陸皆可圖。
畜生肉嘗徧·諸佛心轉疎·黃泉途路滑·失腳恐難扶。

又

美食意生貪·粗食心起怒·喃喃嗜飽滿·殊不知來處。
人生一飯間·貪瞋癡悉具·智者善思惟·莫為舖啜誤。



警下品

愚流習惡久成風。平昔那知黑白蹤。直待垂終諸業現。
方驚已困四蛇攻。自非夙善熏聞力。安得稱名勇猛功。
陡覺涼風吹業火。玉毫光裏面金容。

宋 沖 默

讚淨土


四色蓮華間綠荷。一蓮華載一彌陀。莫疑淨土程途遠。
日日人生兩點多。暮鼓晨鐘不住催。逡巡容貌變衰頹。
莫言白髮渾閒事。總是無常信息來。

宋 北 山

西方詠

西方諦信莫生疑。念佛修行要及時。有限光陰宜早辦。
骷髏著地幾人知。西方有路少人登。一句彌陀最上乘。

明 一 元



把手牽他行不得。但當自肯乃相應。西方故國早回還。
人命無常呼吸間。有限光陰當愛惜。今生蹉過出頭難。
西方急急早修持。生死無常不可期。窗外日光彈指過。
為人能有幾多時。

淨土詩

元中峰

塵沙劫又塵沙劫。數盡塵沙劫未休。當念只因情未撇。
無邊生死自羈留。四大聚成玄兔角。六根縛住白龜毛。
漚花影裏翻筋斗。出沒閻浮是幾遭。東海一丸紅彈子。
流光日日射西林。世間多少奇男子。誰向窗前惜寸陰。
血池乾處滿池清。劍樹枯時寶樹榮。苦樂本來無住相。
於無住處自圓成。佛與眾生夙有緣。眾生與佛性無偏。
奈何甘受娑婆苦。不肯回頭著痛鞭。人間天上與泥犁。



勞我升沈是幾時。白蕩有根如不種。塵沙生死自羈縻。
*自家一箇彌陀佛。論劫何曾著眼看。今日更隨聲色轉。
這回欲要見還難。*人間五欲事無涯。利鎖名韉割不開。
若把利名心念佛。何須辛苦待當來。*深思地獄發菩提。
父母家鄉勿再迷。痛策歸鞭宜早到。莫教重待日移西。
*七月人間暑漸衰。晚風池上更相宜。遙觀落日如懸鼓。
便策歸鞭已較遲。*臘盡時窮事可憐。東村王老夜燒錢。
即心自性彌陀佛。滿面塵埃又一年。*寄語娑婆世上人。
要尋歸路莫因循。銀山鐵壁如挨透。千葉蓮華別是春。
*念佛不曾妨日用。人於日用自相妨。百年幻影誰能保。
莫負西天老願王。*富貴之人宜念佛。黃金滿庫穀盈倉。
世間受用無虧缺。只欠臨終見願王。*貧乏之人念佛時。
且無家事涉思惟。赤條條地空雙手。直上蓮臺占一枝。



老來念佛正相當。去日無多莫暫忘。南無阿彌陀六字。
是名越苦海慈航。盡道少年難念佛。我云年少正相當。
看她八歲龍王女。掌上神珠放寶光。身膺宰輔與朝廊。
蓋世功名世莫量。自性彌陀如不念。未知何以敵無常。
一等師家每勸人。自心三昧不精勤。身居淨白蓮華土。
空把彌陀播口脣。一般平等唯心上。貴賤賢愚沒兩途。
漆桶要教連底脫。大家齊用著工夫。便就今朝成佛去。
樂邦化主已嫌遲。那堪更欲之乎者。管取輪迴沒了期。

警世

茶傾三奠復三奠。一箇骷髏燒未乾。業識又鑽皮袋去。
鐵人聞也骨毛寒。



警世

元石 屋

茅簷雨過日頭紅。瞬息陰晴便不同。況是死生呼吸事。
黃昏難保聽朝鐘。

勸世念佛頌

宋無名

殺業怨家漸債多。將何詞理見閻羅。教君一路超生法。
不如知悔念彌陀。

勸念佛

元優 曇

生死茫茫古渡頭。彌陀撥動度人舟。夙生有分今生遇。
快上船來歸去休。一念心迷有萬端。塵勞業識輒成團。
若非猛烈英靈漢。透出頭來也是難。我念彌陀不問禪。
只圖口快要爭先。幸然有箇遼天鼻。卻被無明業子穿。



老來死至怎生醫。樂土風光誰得知。到者同名無量壽。
因從此界念阿彌。法身清淨本無塵。無奈眾生造業因。
地獄三途甘受苦。分明有理不曾伸。

警悟

委駭回視積如山。別淚翻成四海瀾。世界到頭終有壞。
人生彈指有何歡。成男作女經千徧。戴角披毛歷萬端。
不向此生淨土。投胎一錯悔時難。

念佛偈

明廣製

佛在心中須著眼。莫拋腦後不相看。此時蹉過真成錯。
欲似今朝恐大難。

望江南

元白雲

娑婆苦。身世一浮萍。蚊蚋睫中爭小利。蝸牛角上竊虛名。一點



氣難平。人我盛。日夜長無明。地獄盡頭成隊入。西方無箇肯
修行。空死復空生。
娑婆苦。光影急如流。寵辱悲歡何日了。是非人我幾時休。生死
路悠悠。三界裏。水面一浮漚。縱使英雄功蓋世。祇留白骨掩
荒丘。何似早回頭。

懷淨土

明楚石

少年頃刻老還衰。須信無常日夜催。九十六家邪智慧。
百千萬劫受輪迴。不存寶界華池想。爭得刀山劍樹摧。
但自淨心生極樂。此中賢聖許追陪。
佛袈裟下失人身。重得人身有幾人。萬行不如修白業。
一心何苦戀紅塵。法王立誓丘山重。迷子思歸涕淚頻。
若解反觀觀自性。拋來擲去總家珍。



娑婆生者極愚癡。眾苦縈纏不解思。在世更無清淨業。
臨終那有出離時。百千經裏慇懃勸。萬億人中一二知。
珍重大仙金色臂。早來攜我入蓮池。
忙裏偷閒亦在人。人生誰滿百年春。送迎畢竟無時了。
悲喜交煎逐日新。休念功名唯念佛。但憂道業勿憂貧。
忽然鐵樹開花也。妙轉如來正法輪。
大患明明為有身。須知疾病不饒人。但關妄想無非妄。
縱得真仙未是真。眾熱聚來風扇火。一期拋去骨纏筋。
唯餘念佛離生死。只戀閻浮化作塵。
罪重無如殺盜淫。身囚犴獄口呻吟。敲枷打鎖能稱佛。
覆地翻天莫變心。夜半從教神鬼嘯。空中自有聖賢臨。
收因結果蓮臺上。自性彌陀不外尋。



淨土詩

明度門

高才弘略氣非常。那箇臨時不著忙。打雨敲風閒計較。
驚天動地漫文章。愛河如未乾枯竭。淺浪還須作主張。
六字彌陀無註腳。歸依即是大慈航。

勸修淨土

明雲橋

行船分付把梢婆。須識長河逆順波。只怕順風吹過火。
轉來不得逆風多。

頌下品中下生

明妙意

下品中生者。命欲終時。地獄眾火一時俱至。遇善知識開示。念佛生西。
六劫華開。菩薩說法。下生者。命終應歷劫受苦。遇善知識開示。十念往
生。十二大劫華開。菩薩說法。

知識相逢豈易求。危哉浪海此浮漚。斜陽欲落未落處。



盡是離人今古愁。

稱佛名故·於念念中·除八十億劫生死之罪·

鐵狗銅蛇正奮瞋·風刀火鋸肉成塵·一聲佛號翻身去·
回首何曾見舊人·雞聲茅店月華明·客夢沈迷尚未醒·
開得眼來天大曉·蓬頭垢面奔前程·

即此心識造地獄·即此心識見佛成佛·

因地而倒因地起·離地求起無是理·不離濁水與汙泥·
出頭仍是蓮華地·

總頌下品三生

多生結得善根由·幸免無邊苦海愁·早知大劫都盧坐·
悔不娑婆勇猛修·



懷淨土詩

清蓮隱

攝心快向樂邦來·莫待無常老病催·若使此生重蹉過·
難逃永劫墮輪迴·天邊落日勤修觀·世上空花不用栽·
念念直前無退怯·寶池坐看一蓮開·
殘月鐘聲欲曉天·如何高枕尚安眠·請看竹馬風鳶日·
忽到頭童齒豁年·休逐世波沈黑業·快稱佛號育青蓮·
樂邦歸去須歸去·莫待他人把手牽·

翻然嚮往第三

古德云·眾生處五濁惡世·如囚處獄·雖罪有輕重·然無有一
人不苦者·夫地獄餓鬼之苦·猶云隔世而未知也·畜生之苦·
猶云隔胎而未知也·生·老·病·死·愛別離·怨憎會苦·猶



云人生變態·未必時時然也。只如安常處順·在家庭之間·有何趣味。法苑舉婆沙所言家居之可厭惡甚詳·姑撮其一二。有云家是難滿·如海吞流。家是無足·如火焚薪。家是苦性·如怨詐親。家是鬪亂·共相違諍。家是多瞋·呵責好醜。家是伎人·種種妄飾。家如眠夢·富貴則失。家如朝露·須臾變滅。家如棘叢·欲刺傷人。此世間有身家者所共嘗之滋味也·然乎不然乎。故要集舉涅槃云·在家迫迮·猶如牢獄·一切煩惱因之而生。無已·則削髮披緇·可以無累歟。古德云·為僧心了總輸僧。若其心了·豈不超然大丈夫也哉。如其不了·與俗何異·而罪過尤細。罪福決疑經·論錢穀因果之事·如施主擬作釋迦·改作彌陀·擬作大本·改充涅槃之類·即計錢多寡論罪。莊椿云·盜用常住一文錢·一日一夜長三分七釐利。第二日夜利又長利·蓋共三分七釐之利·又起利也。來世作牛馬償之



·牛日還八文·馬日還七文。所以云·作一生之容易·為萬劫之艱難。由此推之·為僧者可不惕然畏乎。以此左推右測·唯有淨土一門·任意早晚·終無再住閻浮之法。

瑞應經·佛言·吾無數劫時·本為凡人。初求佛道以來·受形五道·生死無量。計吾故身·不能以數。夫釋迦佛學佛之後·尚不免五道·況學他道者乎。唯生淨土者·決不退轉。但受持彌陀經者·發願欲生阿彌陀佛國者·釋迦佛皆許以不退轉。則此法門之利益·於佛道中又為最勝。故古德云·修淨土者·宜發願云·吾自從無始以來·不曾知此法門·以故輪迴六道·不得出離。今日知之·豈肯不即時下手乎。

淨土詩

劉宋 謝靈運

法藏長王宮·懷道出國城。願言四十八·弘誓拯群生。



淨土一何妙。來者皆菁英。頽年欲安寄。乘化好晨征。

病中畫西方變相頌

唐白香山

極樂世界清淨土。無諸惡道及眾苦。願如我身病苦者。同生無量壽佛所。

送臻師

唐李商隱

苦海迷途去未因。東方過此幾微塵。何當百億蓮華上。一一蓮華見佛身。

畫阿彌陀佛像讚

宋蘇子瞻

錢塘元照律師。普勸道俗歸誠。西方極樂世界。眉山蘇軾。敬捨亡母蜀郡太君程氏簪珥遺物。命匠胡錫畫阿彌陀佛像。追薦冥福。以偈頌曰。



佛以大圓覺·充滿十方界。我以顛倒想·出沒生死中。
云何以一念·得往生淨土。我造無始業·一念便有餘。
既從一念生·還從一念滅。生滅滅盡處·則我與佛同。
如投水海中·如風中鼓橐·雖有大聖智·亦不能分別。
願我先父母·及一切眾生·在處為西方·所遇皆極樂。
人人無量壽·無去亦無來。

弔天竺寶月大師

生死猶如臂屈伸·情鍾我輩一酸辛。樂天不是蓬萊客·
憑仗西方作主人。

勸修淨土頌

宋長蘆

三界炎炎如火聚·道人未是安身處。蓮池勝友待多時·
收拾身心好歸去。目想心存望聖儀·直須念念勿生疑。



他年淨土華開處·記取娑婆念佛時。

勸念佛

元優曇

人間四相難逃死·天上何曾免五衰·寧可九蓮居下品·
不來塵世受胞胎·長生不用神仙訣·救急還須海上方·
靠著主人無量壽·算來都勝別思量·幾多失腳走閻浮·
世事如麻日轉稠·故國田園埋草裏·野牛放蕩幾時休·

懷淨土

明楚石

一自飄蓬瞻部南·倚樓長歎月纖纖·遙知法會諸天繞·
正想華臺百寶嚴·此界猶如魚少水·微生只似燕巢簷·
同居善友應懷我·已築浮屠欠合尖·

淨土詩

明雪橋

林下長開佛面花·子規叫血數珠斜·耳邊多少閒題目·



賺殺春風不到家。溪上行歌杖紫籐。落花沒膝叫黃鶯。
春池無月空撈漉。早叩蓮邦題姓名。

淨土詩

明帝 愚

南北東西求所知。怖頭認影總成迷。直饒悟得聲前事。
也要彌陀作導師。寂光未異莊嚴土。向上不為斷滅禪。
細細蟲音宣法界。佛聲豈背未生前。十方諸佛讚西方。
不是無端出廣長。只恐癡禪耽寂滅。錯將斷滅作真常。

懷淨土詩

明沈朗情

生無生法不須疑。苦向嚴陵掌上推。收拾金錢提篋子。
六爻皆吉是阿彌。

懷淨土詩

清蓮 隱

漸看鬢髮著霜痕。自省己非自討論。一世竟成何事業。



百年還有幾朝昏。便須立志求安宅。休更甘心赴死門。
樂國不遙歸有路。蓮臺好去覲慈尊。

一 一意西馳第四

世間念佛者多。見佛者少。知有淨土者多。生淨土者少。何也。意不一故也。蓋意為第六識。本宜為五識之主。而耳目口鼻爭以嗜好誘之。意反為五識之奴。奴之既熟。雖五識無感之時。不來役意。而紛紛擾擾。無有寧晷。所以全不知念佛者。自然隨六根而受地獄之報。其知有佛法。福罪兼行者。縱得人身。亦仍來此樊然不淨之世界而已。唯一意西馳者。純是一心為主。故能感果于西方。君王即是如來作。以心為君者。以佛為君。此孟子所謂先立其大。小不能奪。觀經所謂是心作佛。是心是佛。雖正解不盡如是。亦可旁通於此矣。雲棲云。一心不亂



者。心王心所無所不一。夫心王心所雖有八與五十一之紛雜。然遡流窮源。不出一心。今念佛人。初以耳識聞彼佛名。次以意識專注憶念。以專念故。總攝六根。眼鼻舌身之識皆悉不行。念之不已。念極而忘。所謂恆審思量者。其思寂焉。忘之不已。忘極而化。所謂真妄和合者。其妄消焉。則七識八識亦悉不行。主既不行。從者焉附。其五十一又何論也。當爾之時。巨浪微波咸成止水。濃雲薄霧盡作澄空。豈非現在之西方乎。

無量壽佛讚

宋大智

八萬四千之妙相。得非本性之彌陀。十萬億剎之遐方。的是唯心之淨土。淨穢雖隔。豈越自心。生佛乃殊。寧乖己性。心體虛曠。不礙往來。性本包容。何妨取捨。是以舉念即登于寶界。還歸地產之家鄉。彈指仰對於慈容。實會天真之父子。幾生負德。枉



受沈淪。今日投誠。必蒙拯濟。三心圓發。一志西馳。盡來際以
依承。歷塵劫而稱讚。

懷安養故鄉詩

宋 權 庵

幾年衣袂惹京塵。志氣陵雲莫自伸。南鴈數聲鄉夢斷。
秋風終夕淚痕頻。此回若不懷歸計。向後從誰結善鄰。
請看路傍埋朽骨。其中多是未歸人。

昔年容易別瓊樓。本也無心作遠遊。豈意而今髮垂雪。
片懷常挂月西鉤。枕中忽聽思歸鳥。檻外頻驚落葉秋。
一炷檀烟一聲磬。等閒遙望淚橫流。

憶佛軒詩

宋 雪 溪

自古有言。人生百歲。七十者稀。予六十祝髮。叨預僧列。今
幸七十。處世非久。朝夕人耳。平居非不誦經課佛。猶恨未為




專注。遂取首楞嚴勢至章。若人憶佛念佛。現前當來必定見佛之語。命小軒曰憶佛。庶幾以為臨終見佛先容耳。且作山偈以繫於左。

隨波逐浪去翩翩。彈指聲中七十年。豈不向來知憶佛。
欲從老去更加鞭。掃除意地空空已。煥發心華燦燦然。
決定此身如許見。風埃蟬蛻笑談邊。

有盟晚景欲重尋。唯是拳拳憶佛心。數縷香消春塢冷。
一龕燈伴夜窗深。破畦蔬雨滋香積。落澗松風發妙音。
自恨不歸甘自棄。既歸安用越人吟。

三椽老去許安貧。佳處無如憶佛真。萬事了知猶墮甌。
百年唯此可書紳。巖間靜寄蒲團夜。松下聊供茗盃春。
閉戶不忘常憶佛。願常終似影隨身。
平日叢林見祖師。還如憶佛在今時。但安谷底三椽地。



不挂胸中一縷絲。幽徑落花浮澗水。小窗斜日下松枝。
寂然真境知誰見。唯佛嘗多入夢思。
早尋史漢學為文。自許平生在博聞。棄置寸陰隨逝水。
思量于我竟浮雲。閒中自識藏身穩。勝處誰知憶佛勤。
沈謝曹劉今底處。草萊三尺但荒墳。
我欲今身見佛來。佛今于我豈悠哉。但能一念心無倦。
不假三祇眼便開。紫燕黃鸝啼妙旨。清溪白石示珍臺。
要知成現還家路。誰道無人為挽回。
名利毛繩截骨仇。漆園猶自比蝸牛。浮生最是無雙處。
憶佛須知第一籌。母子但能同室住。風塵安用遠方遊。
前程罷問從今始。紙帳蒲團穩坐休。
* 多年逃逝鬢如絲。憶佛難忘十二時。咄咄自嗟為蕩子。
幾番花落路傍枝。自憐憶佛暮年深。除佛無能寫我心。



誰道萬金為客好。終非一飯在家村。

懷西方詩

宋北山

已知今是昔何非。深掩柴門到落暉。
竹尾輕搖新月上。簾腰半捲宿雲歸。
山林氣味盈懷抱。松柏香烟滿布衣。
一片蒲團常宴坐。寸心西趁落霞飛。

懷淨土

元中峯

朝參暮禮效精勤。金沼蓮胎入夢頻。
粉骨碎身千萬劫。未應容易報慈親。
六時叩問黃金父。赤子飄零幾日歸。
話到輪迴無盡處。相看不覺淚霑衣。
兄呼弟應念彌陀。要與渾家出愛河。
辦得此心常與麼。直教佛不奈伊何。
昔有士夫吳子才。扣棺日日喚歸來。
雖然迹未離三界。已送神棲白蕩胎。
船上西來憶故鄉。四華池上晚風涼。



飄零不奈歸心切。一片輕帆挂夕陽。念佛須期念到頭。
到頭和念一齊收。娑婆苦海風濤靜。穩汎樂邦紅蕩舟。
要結蓮華會上緣。是非人我盡傾捐。無時不作難遭想。
歡喜同登解脫船。為存愛見起貪瞋。埋沒黃金丈六身。
今日幸然歸淨社。不應仍舊惹風塵。要將穢土三千界。
盡種西方九品蓮。仔細思量無別術。只消一箇念頭堅。

懷安養

元日觀

夢中哭向佛。願早死便得。小小蓮華開。永超生死窟。
夢中哭向老金仙。願賜冥熏助著鞭。金沼蓮華無數有。
定生一朵免垂涎。聞道西方事宛然。此行須藉好因緣。
磨教一念明如鏡。不怕彌陀不現前。長把身心看夕陽。
夕陽收處蕩華香。水禽風樹知予意。惆悵人間夢未忘。



三十六策走為上。一二萬卷死為期。浮世光陰能幾在。
晚香燒罷憶金池。直上高樓望故鄉。金烏落處暮雲蒼。
懸知父母哀憐久。腸斷飄萍在遠方。生死循環那可逃。
此心未了漫徒勞。如今不做輪迴夢。只走人間這一遭。
生人要結死人緣。活者須參亡者禪。莫把泥團穿一串。
黑糊塗地入黃泉。

淨土詩

落日西方散紫霞。心池澄淨現蓮華。擡頭便是家鄉路。
不信生疑隔海涯。

懷淨土

明楚石

日夜思歸未得歸。天涯客子夢魂飛。覺來何處雁聲過。
望斷故鄉書信稀。幾度開窗看落月。一生倚檻送斜暉。



黃金沼內如船蕩。想見華開數十圍。
曾聞白鶴是仙禽。日日飛來送好音。便欲寄書諸善友。
定應知我一生心。長思樂土終歸去。肯執蓮臺遠訪臨。
百歲真成彈指頃。娑婆只恐世緣深。
琉璃地列紫金幢。翡翠樓開白玉窗。文字可誇才不稱。
肉身未到意先降。能言孔雀知多少。善語頻伽定幾雙。
清夢正貪歸路直。夜闌無奈鼓逢逢。
人生百歲七旬稀。往事回觀盡覺非。每哭同流何處去。
閒拋淨土不思歸。香雲瑪瑙階前結。靈鳥珊瑚樹裏飛。
從證法身無病惱。況餐禪悅永忘饑。
莫將胎獄比華池。早向池中占一枝。卻坐大華成佛子。
何煩慈母浴嬰兒。口餐法喜真饒餚。心得明門妙總持。
般若臺前定回日。令人長憶鴈門師。



淨土詩

明笑巖

蓮土醫王妙藥多。而今盡付在娑婆。昨宵親入病夫口。
受用如何說似他。欲作西方極樂人。如遭大病纔將好。
緣思伎倆不能生。稱體蓮華香杲杲。竭誠一念力全提。
似夢全身墮水泥。拽開念頭忙眨眼。桃花笑入武陵溪。
紅輪沒處是吾家。只恐當機一念差。導者未來忘去著。
乾坤是箇黑蓮華。

懷淨土

明古溪

自南自北走風塵。回首西方入夢頻。念佛每依芳草渡。
歸心常到蕩華濱。可憐杜宇千聲切。怎似彌陀一句親。
不學為山行異類。寧棲淨土且為民。



淨土詩

追思父母未生前·痛徹心頭得幾年·
面目昨來遭毒手·一腔熱血葬青蓮·

淨土詩

明
僧
愚

貧室多為兒女苦·家饒又慮子孫稀·
道人飯罷無餘事·西望白雲片片飛·

淨土詩

明
晦
夫

樓閣重重鸚鵡洲·幾人到此自悠悠·
清江一曲離情調·汝若無心我也休·

淨土詩

明
丁
蓮
侶

千劫升沈事可嗟·須彌散骨亂如麻·
於今自覺知慚愧·



淚眼晨昏只憶家。

淨土詩

明沈朗傳

蓮華不裹六塵胎。日月籠中自翦裁。拌此一堆窮骨子。
這場春夢要親推。放步須尋百尺竿。男兒特地斬樓闌。
等閒蹋徧唯心土。未許華前立馬看。



執持名號第五

執持名號。本一心不亂中出。非是易事。子思之擇善固執。顏子之拳拳服膺。虞舜之允執厥中。皆言執也。夫三月不違。而後可以言服膺。惟精惟一。而後可以言允執。所以執持名號。不同於少福德因緣。蓋生西是心上事。福德因緣猶有在事上做者。故相去懸絕。所以觀經云。至心念阿彌陀佛一聲。滅八十



億劫生死重罪。古德謂一心既朗。積妄頓空。喻如千年闇室。一燈頓照。此理執持之效也。然人不可自謂理性未明。事持無益。雖是事持。而持者亦心也。大勢至圓通章云。不假方便。自得心開。純一念去。自有悟日。孔子言。困而學之。及其知之則一。夫孔子說生說學。皆落一知字。至困學之人。不下知字。則胸中之不明了可知。謂之曰困。則學時散亂昏沈無可奈何之狀可以想見。然及其知之。則同一大圓鏡智矣。昔佛世一老人求出家。舍利弗等諸大弟子俱不肯度。謂彼多劫無善根。佛言。此人無量劫前為採薪人。猛虎逼極。大怖上樹。稱南無佛。以是善根。遇我得度。獲羅漢果。夫散心念佛一句。尚永劫不磨。況專志持名。豈有不往生者哉。

念佛偈

唐白香山



余年七十一。不復事吟哦。看經費眼力。作福畏奔波。
何以度心眼。一聲阿彌陀。行也阿彌陀。坐也阿彌陀。
縱饒忙似箭。不廢阿彌陀。日暮而途遠。吾生已蹉跎。
旦夕清淨心。但念阿彌陀。達人應笑我。多卻阿彌陀。
達又作麼生。不達又如何。普勸法界眾。同念阿彌陀。

懷淨土

宋北山

西望樂邦雲杳隔。一鉤新月灣灣白。意欲往生何計策。
彌陀一念聲千百。文墨尖新無處用。已將名利渾如夢。
一串數珠隨手弄。唯聞念佛心歡勇。覽徧經文與律儀。
頻頻唯勸念阿彌。一聲消盡千生業。何況嘮嘮久誦持。
紛紛世態盡空華。講外無餘挂齒牙。一串數珠新換線。
阿彌陀佛做怨家。菊腦薑芽一飯餘。其他安敢費工夫。



從今十指無閒暇。且盡平生弄數珠。唯將焚誦足平生。
夜夜嘵嘵一二更。隻影自憐塵世外。風前月下恣經行。
善導可嗟今已往。化來老少皆歸嚮。佛念一聲分一鎊。
一聲一佛虛空上。

淨土詩

明一元

西方極樂眾稱尊。普勸諸人入此門。有口不須閒講論。
單提佛號度朝昏。西方弘誓廣流通。一句彌陀好用功。
歷歷分明無間斷。聲聲喚醒主人翁。

念佛偈

宋古音

行住坐臥之中。一句彌陀莫斷。須信因深果深。
直教不念自念。若能念念不空。管取念成一片。
當念認得念人。彌陀與我同現。



淨土詩


元中峯

一串數珠烏律律。百千諸佛影團團。循環淨念常相繼。
放去拈來總一般。現成公案絕商量。曉磬頻敲蠟炬長。
晝夜六時聲不斷。滿門風遞白蓮香。心中有佛將心念。
念到心空佛亦忘。撒手歸來重檢點。華開赤白間青黃。

念佛詩

元優曇

彌陀教我念彌陀。我又如何離得他。我不識他他是我。
相逢覲面笑呵呵。一句彌陀容易持。朝昏記念勿相離。
念來念去心花綻。便是彌陀出世時。自性彌陀見也麼。
問他面目是如何。祇知開口茫茫念。言下誰知蹉過多。
自家一箇彌陀佛。不假修持已現成。莫謂目前全不見。
一聲喚著一聲應。我念彌陀不暫離。一阿彌了又阿彌。



阿彌自喚阿彌問。汝是阿彌我是誰。我念阿彌不在聲。
高山流水是知音。更深人靜月明夜。廣舌宣流白蕩馨。
聲聲念佛意何長。恰似嬌兒喚阿娘。直得一聲相應處。
天真母子喜非常。好將金字寄金蓮。一句彌陀猛著鞭。
從頭颺下閒家具。車軸華中占一單。

懷淨土

明楚石

咫尺金容白玉毫。單稱名號豈徒勞。晨持萬徧烏輪上。
夜課千聲免魄高。歲閱炎涼終不倦。天真母子會相遭。
如何說得娑婆苦。苦事紛紛等蝟毛。
閒中獨坐面西方。手把輪珠念不忘。佛號能令心地淨。
舌根便作蕩華香。暉暉日到銜山處。閃閃金浮滿室光。
此境此時無別想。許君親見鼓音王。



除夕上堂有出多婆婆三韻

明蓮池

六字真經攝義多。總持一似唱也姿。自從薦直西方去。
閒殺臺山指路婆。

示大璋

有生必有死。長短安足論。今得圓僧相。平生願已滿。
當生大歡喜。切勿懷憂惱。萬緣俱放下。但一心念佛。
注想極樂國。上品蓮華生。見佛悟無生。還來度一切。

答慈聖皇太后問法

尊榮豪貴者。由宿植善因。因勝果必隆。今成大福聚。
深達罪福相。果中更植因。喻如錦上花。重重美無盡。
如是修福已。復應慎觀察。修福不修慧。終非解脫因。



福慧二俱修。世出世第一。眾生真慧性。皆以雜念昏。
修慧之要門。但一心念佛。念極心清淨。心淨土亦淨。
蓮臺最上品。於中而受生。見佛悟無生。究竟成佛道。
三界無倫匹。是名大尊貴。

淨土詩

明雪晴

一二三四五六七。一心不亂往生西。佛言說得雖容易。
動步通身入淤泥。

淨土詩

佚名

繫心一句阿彌陀。日用閒忙任寡多。如是盡終不妙悟。
也教帶業出娑婆。

念佛偈

明頂目

念無念念古彌陀。念到無心壽轉多。不動尊王全體現。



腳跟隨處湧金波。念無念念永無遮。念到無心始出家。
任運騰騰隨腳轉。去來步步蹋蓮華。

懷淨土

明沈朗信

四十九年脣口債。千七百則葛藤窠。老僧怕事都推卻。
閒把光陰送曩謨。猛把屠刀砍愛窠。手中殺活肯饒他。
洪名六字刀刀血。不似風飄驢耳過。亂搭伽黎挈領頭。
持名不是任情擲。一聲直去無消息。最似蒼鷹始脫鞵。

念佛偈

十千聲佛日為規。聽得雞鳴便起持。枕上有橋通極樂。
此身已坐碧蓮池。

頌執持名號一心不亂

明妙意

昏沈散亂如雲霧。萬劫從教今日破。大地乾坤通一句。



聲聲截斷千差路。自從夜半安心後。直至從頭更不疑。
兩眼爍開天地闊。太平無象到今時。

懷淨土詩

清蓮隱

一句彌陀火裏蓮。五宗諸教莫能詮。聲聲不斷魔難近。
念念無差佛現前。多劫沈迷根盡拔。一生精進果堪圓。
含靈抱識皆同體。但辦肯心誰不然。
凡夫羸劣觀難成。但事持名即往生。到底若能心不異。
臨終自有佛來迎。世緣易染刀頭蜜。道念難堅水上萍。
樂國風光殊不惡。歸歟早賦徹宵征。

聖境現前第六


諸佛如來入一切眾生心想中。如白日升天。影現百川。然假使



川中水濁·日雖在天·亦無由見。故必以觀門念佛·方能澄清濁水·心眼開發·廣見依報。無常經有云·人將命終·身心痛苦。應令病人觀佛相好·心心相續·使發菩提之心。復為廣說三界難居·三途苦難·唯佛菩提·是真歸依。嗚呼·此如來悲憫眾生·拔濟於臨命終時之苦心也。佛言垂終之心·其力甚大。故臨終之念·能消重業。然予見平生念佛人·至臨命終時·容有痛苦逼身·舌根短硬·不能念佛者有之。何況平時觀想不熟·至八苦交煎四山相逼之時·欲其隨知識之口·念佛聲聲不絕·作觀心不散亂·此必夙世因中善根深遠乃能得之·豈可望于悠悠之眾生哉。必如觀經云·惟除睡時·恆憶此事。又云·出定入定·恆聞妙法·方是穩著。

淨土詩

善阿氏多



自然音樂樂無涯。七寶樓臺麗日霞。上妙眾香常不散。
繽紛雲裏雨天華。

淨土詠

唐李青蓮

向西日入處。遙瞻大悲顏。目淨四海水。身光紫金山。
勤念必往生。是故稱極樂。珠網珍寶樹。天華散香閣。
圖畫了在眼。願託彼道場。以此功德海。冥祐為津梁。
八十億劫罪。如風掃輕霜。庶觀無量壽。長願玉毫光。

臨終生西偈

宋延壽

彌陀口口稱。白毫念念想。持此不退心。決定生安養。

西歸軒

宋羅月

君言樂國是吾家。自笑飄零客路賒。一點歸心懸落日。
百年幻事寄空華。臍輪不鼓經簾卷。鼻觀常清篆縷斜。




正念相成無外物。小窗行樹綠交加。

懷西方

宋北山

西指西瞿更向西。向西西去有招提。華開菡萏光無夜。
地布琉璃瑩絕泥。風動法音強八詠。池流德水勝雙溪。
臨終但得超生去。九品從教低處低。從是西方十萬億。
山長水遠誰人識。唯有觀門歸路直。坐澄劫水琉璃碧。
兀坐初修水觀成。微風不動翠波平。幽深境界誰人見。
一片琉璃照眼明。為厭娑婆求淨土。馳情送想存朝暮。
誰信不勞移一步。樓臺隱隱雲深處。誰知端坐卻能遊。
頃刻心飛到玉樓。竹影月移來戶牖。更疑行樹在簷頭。
九品蓮華次第排。也應荷葉翠相挨。未知何日生蓮界。
無奈朝昏甚挂懷。



懷淨土

元中 筆

勢至曾參日月光·教令存想念西方。自從親證三摩地·
不離慈尊左右旁。觀經一卷是家書·日落之方有故居。
多辦資糧期早到·免教慈父日嗟吁。

淨土詩

明楚 石

儒者之詩云·伐柯伐柯·其則不遠。說者曰·執柯以伐柯·睨而視之·猶以為遠。信斯言也·吾宗念佛·唯我自心。心欲見佛·佛從心現。阿彌陀佛三十二相·八十種好·性本具足·不假外求。神通光明·極未來際·名無量壽。至於華池寶座·瓊樓玉宇·一一淨境·皆自我心發之。妙喜有云·若見自性之彌陀·即了唯心之淨土。如楞嚴會上·佛勅阿難。一切浮塵諸幻化相·當處出生·隨處滅盡。因緣和合·虛妄有生。因緣別離



· 虛妄名滅。殊不知生滅去來。本如來藏常住妙明。性真常中。求於去來迷悟生死。了無所得。既無所得。但是一心。若淨土緣生。穢土緣滅。則娑婆印壞。壞亦幻也。若穢土行絕。淨土行興。則極樂文成。成亦幻也。然此生滅淨穢。不離自心。心不見心。無相可得。雖終日取捨。未嘗取捨。終日想念。未嘗想念。在彼不妨幻證。在此不妨幻修。一發心時。已成正覺。何礙幻除結習。幻坐道場。幻化有情。幻臻極果。豈不了世出世間之幻法。調御丈夫之事乎。昔天衣懷禪師親見明覺。盡佛祖不傳之妙。嘗修淨土。垂問學者曰。若言捨穢取淨。厭此欣彼。則是捨取之情。眾生妄想。若言無淨土。又違佛語。修淨土者。當云何修。乃自答云。生則決定生。去則實不去。無過此語也。有心者。悉當念佛。前所謂唯心淨土。自性彌陀。不出戶庭。夫何遠之有。



要觀無量壽慈容。只在而今心想中。坐斷死生來去路。
包含地水火風空。頂分肉髻光千道。座壓蓮華錦一叢。
處處登臨寶樓閣。真珠璀璨玉玲瓏。
放下身心佛現前。尋常盈耳法音宣。風柯但奏無生曲。
日觀長開不夜天。行趁玉階雲冉冉。坐依珠樹月娟娟。
凡夫到此皆成聖。不歷僧祇道果圓。
未歸極樂尚閻浮。漂泊風塵更幾秋。殘夢頻驚蕉葉雨。
故鄉只在蕩華洲。屈伸臂頃無多地。高占人群最上頭。
二大士心憐老病。何妨攜手上瓊樓。
法王治化寶蓮宮。菩薩聲聞滿國中。普覆猶如天在上。
大明勝似日生東。青螺髻接浮雲嶺。白玉毫輝跨海虹。
世出世間無比者。當知體性本來空。
天人莫不證神通。一一黃金色相同。散眾妙華為佛事。



盡塵沙界起香風。身光觸體成柔輭。樂具流音說苦空。
卻倚雕欄看寶樹。無邊佛國在其中。
幾回夢到法王家。來去分明路不差。出水珠幢如日月。
排空寶蓋似雲霞。鴛鴦對浴金池水。鸚鵡雙銜玉樹華。
睡美不知誰喚醒。一鑪香散夕陽斜。
蓮臺得坐最高層。我許凡夫願力能。頃刻人心翻作佛。
斯須水觀化為冰。玉抽瑪瑙階前樹。金叩瑠璃地上繩。
無限天華滿衣裊。十方佛國任飛騰。
衣不傷蠶食不耕。水邊林下好經行。身心快樂無諸苦。
依正莊嚴在一生。念念佛光從口發。時時天樂徧空鳴。
卻嫌鞋襪露泥滓。千葉蓮華向足擎。
多言極樂向西尋。究竟不離清淨心。空影入池皆碧玉。
日光穿樹盡黃金。事如夢幻雖非實。理到圓常卻甚深。



八萬四千真相好。請君危坐扣靈襟。
家在西頭白玉京。老來難遣故鄉情。每瞻雲際初三月。
先注華間第一名。密密疎疎琪樹影。來來往往水禽聲。
紅樓紫殿春長好。縱有丹青畫不成。
吾身念佛又修禪。自喜方袍頂相圓。曾向多生修福果。
始依九品結香緣。名書某甲深華裏。夢在長庚落月邊。
濁惡凡夫清淨佛。雙珠黑白共絲穿。
無邊大士與聲聞。海眾何妨逐品分。一會聖賢長在定。
十方來去總乘雲。談玄樹上摩尼水。念佛林間共命群。
坐臥經行無罣礙。天華隨處落繽紛。
西望紅霞白日輪。仰觀寶座紫金身。一方土淨方方淨。
當念心真念念真。生極樂城終不退。盡虛空界了無塵。
向來苦海浮還沒。何幸今為彼岸人。



淨土詩

明古溪

彼無惡道絕聞名。群籟都為念佛聲。細溜通渠調錦瑟。
微風吹樹奏瑤笙。鶴從翡翠簾前下。人在琉璃地上行。
行者悠然心不亂。琅琅天樂自來迎。
修途十萬一毫端。何謂西方路渺漫。佛境不從心外見。
真容多在定中觀。寶華叢裏巢鸚鵡。玉樹枝頭宿鳳鸞。
清泰故家迎海眾。風雲際會一聲歡。

淨土詩

明博山

淨心即是西方土。錦繡乾坤淨業成。一句彌陀纔吐出。
昂藏皮袋廓然清。淨心即是西方土。一句彌陀一佛成。
大地都來銀世界。更於何處覩明星。淨心即是西方土。
口說無憑步最親。爛壞木魚輕輕擊著。幾多華雨亂繽紛。



淨土詩

明沈朗僧

珍羅垂網引香臺。口滑迦陵幾喚回。
林下笑逢金色侶。共攜華袂候如來。

詠日觀

明妙意

一輪明鏡劫塵封。咫尺彌陀路不通。
萬法唯心初約日。從知大覺即心翁。

詠水觀

冰結琉璃

俄然成水忽成冰。冰結琉璃寶地成。
妙性圓明無住相。隨渠建立自心生。

寶幢光明



七寶金幢百寶成。寶珠八面寶光擎。一光八萬四千色。
億日輝煌映眼明。

華幢演法

華幢臺邊樂器盈。清風八種自然生。樂音風鼓傳空諦。
跌坐瑠璃傾耳聽。

詠八功德池水觀

八功德池。純一珠王所成。成池水者。寶也。而成寶者。珠也。蓮華生於
池中。而水之流於華間。演說妙法者。亦珠之所為也。金色光化為寶鳥。
讚歎三寶。而涌出金光者。亦珠之所為也。

池開寶蓮

珠成七寶寶成池。池作金渠十四支。蓮華詎止車輪大。
觀佛成時某在斯。



水流說法

珠水涓涓繞勝蓮。迴環上下法輪圓。苦空無我聲聲出。
又寫如來相好篇。

鳥聲說法

珠光化鳥鳥和鳴。鳥語嚶嚶佛法僧。功德水中無盡藏。
相看總是性珠明。

詠樓閣總觀

琉璃寶地黃金界。樓閣空中天樂清。音中共奏無生曲。
觀聽明時定往生。

水觀別詠

碧波深處釣魚翁。拋餌牽絲力已窮。一棹清風明月下。



不知身在水晶宮。

烏鳴說法別詠

拂拂山香滿路飛。百華俯仰鬪芳奇。春風無限深深意。
未審黃鶯說向誰。

樹說法別詠

貝葉收不盡。一句無私萬法印。千聖滿口不能宣。嶺梅漏泄春光
信。

總詠

也大奇也大奇。無情說法不思議。若將耳聽終難會。
眼處聞聲方得知。

頌起自心生於西方極樂世界。於蓮華中結跏趺坐。



茫茫不識火中蓮。滿面塵埃又幾年。簸土揚沙無避處。
翻身直到御樓前。堯舜垂衣萬國賓。撥雲見日意休陳。
東方來者東方坐。徧界通霑雨露新。

懷淨土詩

清蓮隱

淨邦遠近沒途程。只貴專心持佛名。一念斷時忘計較。
六門隨處放光明。寶池菡萏華爭吐。珍樹頻伽鳥共鳴。
來往娑婆知幾徧。者回始不負生平。

發明心地第七

觀無量壽經云。上品中生者。不必受持讀誦方等經典。善解義
趣。於第一義心不驚動。深信因果。不謗大乘。妙宗云。是義
持人不樂讀誦。但於經中取一句偈。深窮旨趣。於絕言思深廣



之理。心不驚動。又復其心安住中道。不為二邊之所驚動。了達因果皆是實相。名為深信。雖不徧習。或聞大教赴機異說。知顯一理。不生疑謗。此即宗門所謂參無意味語。發明心地者也。因其行大乘解第一義。以故千佛授手。純說甚深第一義諦。然七日得不退轉。修小劫得無生忍。若夫上品上生者。一往即悟無生法忍。須臾即徧十方。歷事諸佛。而究其往生之因。則具戒行。讀誦大乘。修行六念之人。可見如來重戒重學與重悟之意。似不欲偏廢者也。至龍樹菩薩。如來謂其於世間中顯我無上大乘法。非悟明心地乎。曰得初歡喜地。非入地菩薩乎。而繼之曰往生安樂國。此又與上品三生皆以大心迴向往生之左券。若合符節者也。故雲棲云。普賢為華嚴長子。雖塵塵華藏。在在蓮邦。而行願品必拳拳乎以往生安樂為言。已悟尚然。未悟可知。至言悟自己佛不必求生。此為十地菩薩以上說。



若云悟第一義。結使未斷者。皆不求生。則自悞悞人。古德言之詳矣。

念佛頌

宋慈受

樹林水鳥各宣揚。寶網金臺盡道場。會得鐘鳴并鼓響。彌陀觸處放毫光。

西方詠

明一元

西方不用學多端。一句彌陀在反觀。見得本來真面目。始知生死即泥洹。西方佛號我同名。直下承當了不驚。若得一聲親喚醒。何勞十萬億途程。西方公案早行持。寂寂惺惺著意疑。疑到情忘心絕處。元來自己是阿彌。西方一句是單傳。不假修持已現前。諸上善人如見性。阿彌陀佛便同肩。西方眾苦不能侵。先要當人了自心。



會得目前真極樂。拈來赤土是黃金。

念佛心要頌

宋 草庵

釋迦如來說。阿彌陀佛是法界身。天台智者又言。實相為體。
憑茲二說以為心要。則十萬億剎。若臨明鏡矣。

無邊剎海海涵空。海空全是蓮華宮。蓮宮周徧徧空海。
空海獨露彌陀容。阿彌陀佛不生滅。難覓難拈水中月。
絕非離句如是身。如是感通如是說。我與彌陀本不異。
背覺潛生忽成異。從今掃盡空有塵。父子天然兩相值。
誓修三福勤六念。身口意業無瑕玷。我今以此念彌陀。
不見彌陀終不厭。

懷淨土

元 中峰

捏目橫生空裏花。妄將三界認為家。大千常寂光明土。



不隔纖塵總是遮。愛繩牽入苦娑婆。哭到黃泉淚轉多。
誰謂別離窮劫恨。通身渾是古彌陀。迷時無悟悟無迷。
究竟迷時即悟時。迷悟兩頭俱拽脫。鑊湯原是蕩花池。
四十八願水投水。千百萬億空合空。法藏慈尊無面目。
不須重覓紫金容。正念阿彌陀佛時。寶池樹影日遲遲。
更馳心欲歸清泰。又是重栽眼上眉。萬劫死生如重病。
一聲佛號是良醫。到頭藥病俱忘卻。不用重宣母憶兒。
成住壞空真淨土。見聞知覺古彌陀。但於當處忘生滅。
父子相牽出愛河。禪外不曾談淨土。須知淨土外無禪。
兩重公案都拈卻。熊耳峯開五葉蓮。大夢宅中無一法。
於無法處有千差。回觀自性離分別。念念純開白蕩華。
閻室中藏大黑虻。未曾驅盡莫貪眠。觸體壓碎須彌枕。
巾地香風綻白蓮。故鄉易到路無差。白日青天被物遮。



別起兩莖眉自看。火坑都是白蓮華。十萬餘程不隔塵。
 休將迷悟自疎親。剎那念盡恆沙佛。共是蓮華國裏人。
 念佛只須圖作佛。不圖作佛念何為。但當抱識含靈者。
 白蕩均同有一枝。示入泥洹記仲春。風前歌舞恨波旬。
 誰知自性黃金佛。常共千華轉法輪。寒食荒郊盡哭天。
 有誰遙念老金仙。劫初埋向蓮華土。不要人來化紙錢。
 初夏清和四月時。九龍噴水沐嬰兒。樂邦化主無生滅。
 只把黃金鑄面皮。清泰故鄉無六月。從教火傘自張空。
 金沙地上經行處。陣陣吹來白蕩風。誰知九月東籬菊。
 便是西方四色華。一箇觸體乾得盡。百千聞見自無差。
 念根是一串輪珠。痛策歸鞭莫遠圖。念到念空和念脫。
 不知身在白芙蕖。蕩絲縛住金烏足。業火燒開車軸華。
 更有一般難信法。腳尖踢出佛如麻。纔要歸家即到家。



何須特地起咨嗟。門前大路如弦直。擬涉思惟路便差。
一鈎蘿月照松龕。門外無人宿草庵。萬億紫金身化主。
不離當念是同參。自性彌陀絕證修。只消扣己便相投。
瞥於當念存能所。又被空華翳兩眸。長鯨一吸四溟乾。
自性彌陀眼界寬。眉裏玉毫遮不得。珊瑚枝上月團圓。
蓮華國土無金鎖。聞見堆中有鐵圍。透得目前聲與色。
百千賢聖合同歸。活計唯撐一隻船。流中坎止只隨緣。
古帆幾度張明月。滿目純開佛海蓮。船居念佛佛隨船。
常寂光搖水底天。兩岸中流如不觸。枝枝紅蕩發心田。
破曉移船直過東。滿帆披拂蕩華風。一尊自性彌陀佛。
出現扶桑照眼紅。念心如影每隨形。靜鬧閒忙不暫停。
打破形軀和影滅。西天此土絕途程。彌陀西住祖西來。
念佛參禪共體裁。積劫疑團如打破。心華同是一般開。



講座平分性相宗。相成相破不相同。竭來講到華池上。
菡萏何曾兩樣紅。船往東西南北了。依然不離古灘頭。
等閒撥轉虛空舵。香氣滿船華滿洲。

念佛詩

元儂 墨

一句彌陀無妄想。聲聲流出自心來。便從這裏覷破去。
鐵樹無根華自開。一句彌陀息萬機。碧潭風靜湛如如。
夜深月向波心現。湧出銀盤一顆珠。一句彌陀吼怒雷。
十方剎海眼睛開。法王法令親提起。凡也歸依聖也來。
一句彌陀上上機。氣虛神朗洞玄微。全身拶入常光界。
實實無言說向誰。一句彌陀正信深。曇華早現一枝春。
分明好箇到家句。自性西方舊主人。一句彌陀心自明。
信知一步不虛行。腳頭腳底彌陀現。萬朵蓮華足下生。



一句彌陀便是經。受持須要自惺惺。百千萬億龍宮藏。
只在當人一念成。一念心開薦得渠。看時似有覓還無。
雖然伎倆不多子。展放威光塞太虛。自家一箇彌陀佛。
舉念之時不見他。認得依然成兩箇。與君說破笑呵呵。
真常寂處絕思量。般若開華正覺場。箇裏恆沙諸佛住。
一枝優鉢火中香。寂照光中顯大機。彌陀覲面露金軀。
通身是手通身眼。夜半三更木鳥啼。寂照雙亡也大奇。
照天照地不思議。石人撫掌呵呵笑。箇段風光說向誰。
禪非智照難窮寂。智若無禪照不深。禪智圓通無罣礙。
碧天朗月徹清風。我念彌陀幾許年。常思撇了別參禪。
自從覲面相逢後。始信長空便是天。我念彌陀會得禪。
聲聲流出未生前。木人撫掌呵呵笑。獨角泥牛海底眠。
我念彌陀震法雷。勞生夢眼一時開。千年老藕新華綻。



無限香風動九垓。我念彌陀徹十方。十方唯我法中王。
目前穢淨俱無礙。拉扱堆頭也放光。我念彌陀著相多。
眾生都喚作彌陀。雖然他未承當得。且得彌陀授記他。
我念彌陀信有緣。尋幽直到虎溪邊。孤峯頂上開雙目。
徹見心華滿大千。我念彌陀得趣多。眼前都不問如何。
閒拖拄杖登山望。萬疊峯巒積翠螺。一念心平法界平。
大千沙界絕丘坑。腳頭腳底皆方便。大道堂堂任意行。
一卷真經不外求。無邊妙義眼睛頭。未曾舉起先知得。
一剎那間一藏周。一卷真經妙義深。幾多人念少知音。
聲聲突出金剛眼。覷破從前古佛心。一卷真經念出新。
不知念者是何人。若非格外明宗旨。爭識衣中無價珍。
佛是有聲禪。禪是無聲佛。有聲與無聲。畢竟是何物。
金剛正眼頂門開。白蓮香散塵沙國。念佛參禪共體裁。



彌陀西住祖西來。但能打得疑團破。紅蕩花無兩樣開。
諸佛眾生同這箇。四生六道阿誰無。頂天立地知多少。
試問誰人識得渠。信心念佛到西方。性地蓮開世界香。
塞破虛空全是我。不須洗面著衣裳。

懷淨土詩

明楚石

有箇彌陀在自心。纔生一念隔千岑。于中豈得回光照。
直下翻為向外尋。綠水青山皆妙體。黃鶯紫燕總玄音。
凡夫只為貪瞋重。不覺身棲寶樹林。
無常無我法全該。水鳥風林豈異哉。不動一塵常在定。
徧遊諸刹又歸來。凡夫本自同彌勒。知識何嘗離善財。
堪忍便為清淨界。覺華還向妄心開。
山雲靄靄水泠泠。共說西方一卷經。石虎卻來巖下嘯。



泥人先往樹間聽。風飄陽焰隨波散。雨浥空華逐蒂零。
極樂此時堪駐足。彌陀何處不流形。
麤境現前猶未識。法身向上幾曾知。可憐轉腦回頭處。
錯認拈香擇火時。口耳相傳六箇字。聖凡不隔一條絲。
堂堂日用天真佛。火急回光也是遲。
幽居悄悄柏森森。不遣紅塵染素襟。一佛號收無量佛。
後心功在最初心。雲開白月毫光滿。雨過青山髻色深。
當念休生差別解。風聲鶴唳盡玄音。
若非念佛便參禪。參得禪時佛現前。萬丈碧潭從此淨。
一輪秋月向空懸。直教表裏光明透。盡見高低物象全。
只箇法王無去住。方知不落斷常邊。

勸禪者



參禪只是自明心。作佛何須向外尋。動靜去來真極樂。
見聞知覺古觀音。高懸慧日三千界。普現慈光百萬尋。
把本修行須念佛。神仙也要用功深。

示某念佛偈

明達觀

五十八歲前。汝果年多少。於此痛觀之。多少年便了。
了得好念佛。未了念佛早。生死從身有。離身何處討。

生日偈

自知今日出娘胎。今日如何娘不來。
來去覓娘無所得。蓮華國裏一枝開。

淨土詩

明雪橋

珊瑚枝挂弱犀牛。苦海揚波難盡頭。




咬碎一團空界月。與君把手入層樓。

淨土詩

明博山

淨心即是西方土。倒跨崑崙入海門。行到水窮山盡處。
灼然別是一乾坤。淨心即是西方土。官不容鍼車馬通。
古木鴉聲纔歇得。一輪明月出烟籠。淨心即是西方土。
木馬嘶風過漢秦。蹋破羶髓誰是主。多年故舊一時新。
淨心即是西方土。無相光中有相身。心境牽纏成鬼戲。
誰為我也孰為人。淨心即是西方土。露柱燈籠笑未休。
喫盡世間酸苦味。蒲團剩有暗香浮。淨心即是西方土。
教外須知別路行。若是祖師門下客。破顏端不論無生。
淨心即是西方土。皮袋還知痛癢無。掉轉乾坤何境界。
夜明簾外夜明珠。淨心即是西方土。相見揚眉落二三。



古道不存車馬迹。舌頭無骨定司南。淨心即是西方土。
魔界空時佛界空。世界閒雲收拾盡。一輪迸出海天紅。
淨心即是西方土。逐隊隨群粥飯僧。一飽饑瘡無別事。
殷勤祇奉佛前燈。淨心即是西方土。古寺清幽月到窗。
夜半捉來牀畔鼠。天明飛出繡鴛鴦。

淨土詩

明
尚
愚

遙想西方大導師。夜來月吐珊瑚枝。玉京吹徹無生曲。
正是蓮開上品時。雲有深山鶴有林。唯予安養是歸心。
夜來月照長廊下。一句彌陀劫外音。秋山無伴獨幽尋。
古殿寒巖步步深。一句彌陀傳遠谷。空林頑石似知音。
呼浪呼波都是水。分禪分土豈殊途。不知佛法無多子。
空逐名言墮有無。跏趺夜半一聲鐘。打破西方不見蹤。



方識彌陀原是我。開簾月照萬層峯。有時獨上孤峯頂。
遙望西方是我家。幾朵白雲出遠岫。一行疎鴈過天涯。

觀世音圓通頌

為尋紫竹林中主。誤入圓通不等閒。幾片白雲飲綠水。
一輪紅日吐青山。雨裏榴花新浴出。雲中鳥語帶潮來。
獨憐消息無人識。幾度披簑移竹栽。蘆葦冥冥秋水陰。
行人無伴轉蕭森。試看念念驚懷處。便是尋聲觀世音。
背上癡花堪擬鉢。面前目癩可如桃。但思就裏誰知痛。
莫問圓通白玉毫。死死生生復死死。來來去去去還來。
普門隊裏無來去。生死叢中見善財。春鶯啼徧柳烟城。
秋鴈鳴時蘆白聲。百鳥百聲聽不盡。何須更問海潮音。
手觸手時各有知。箇中消息莫狐疑。大悲八萬四千臂。



試看何人少一支。刺蝟※鍼錐能覆體。蜒蚰※宮殿自隨身。
青階白壁皆安樂。花雨香風都是春。螢火※腹間燈燭火。
飛蚊翼上管絃長。隨身樂事堪行樂。不必逢人問故鄉。
四蹄※躅地何其妙。兩角撐天亦洒然。出沒自由無罣礙。
倒騎驢子上雲巔。枝頭※羽族結臺殿。地裏群毛作洞房。
莫謂幽居有上下。長天虛谷一秋光。蟻穴※玲瓏若鬼工。
層層疊疊密相通。微塵身入微塵土。識取光明藏一同。

淨土詩

明晦 夫

紅輪※決定沈西去。未審魂靈在那方。盤山悟處非他物。
孝子原來是大郎。月印※蓮池池印空。風鳴竹樹樹鳴風。
世間多少奇男子。錯認彌陀在別峯。

淨土詩

明萍 蹤



源頭歷歷記分明。靜裏休教雜念生。劃斷去來生死路。
故鄉田地不須爭。

淨土偈

明沈朗偈

人情末法險波瀾。莫把彌陀白眼看。念到驀頭親撞著。
含元殿裏話長安。

頌諸佛如來是法界身。入一切眾生心想中

明妙意

乾坤盡是黃金國。萬有全彰淨妙身。
玉女背風無向背。靈苗化秀不知春。

頌心想佛時。是心即是三十二相。八十隨形好。

四維上下絕遮攔。湧出冰壺即碧天。無孔笛中藏六律。
一聲欵乃過前川。劫外相逢那畔行。靈苗叢裏鐵牛耕。
東風吹散千巖雪。空際無雲孤月明。



頌是心是佛

平實商量見題目。和盤傾出不寒酸。只今夜夜明星見。
露出胸襟仔細看。佛與眾生原不異。特言成佛誘迷津。
止啼黃葉渾無奈。夢覺初迴識故人。幾片白雲橫谷口。
簾前花雨不知春。拈匙把箸如明了。掃地焚香不倩人。

頌諸佛正徧知海從心想生

鶴巢露滴夢初回。新月半鉤升萬戶。一片白雲何處起。
白雲兒倚青山父。纖雲不露烟波闊。白鳥去盡青天還。
蹋破草鞋跟子斷。巍然端坐大雄山。

頌見眉間白毫相者。八萬四千相好自然當現。

一毫端內通消息。徧界明明不覆藏。靜極爍開頂上眼。
塵勞門內盡金光。自家透脫自家知。八萬光明更問誰。



全體承當全體現。須彌頂上戴須彌。

頌上品中生

不必受持讀誦方等經典。善解義趣。於第一義心不驚動。佛菩薩接引。紫金臺如大寶華。普聞眾聲。純說第一義諦。

不向經題識本真。紙堆討甚法王身。未開梵筴承當去。
免作循行數墨人。癡兒刻意止啼錢。良駟追風顧影鞭。
雲掃長空巢月鶴。寒清入骨不成眠。向來面壁成何事。
爭得心開見本源。空劫以來諸佛子。話頭不舉自然圓。

懷淨土詩

清蓮隱

乾坤總是我茅庵。日日常懸燈一龕。融盡千差無異趣。
會教萬象作同參。穢邦由業應離棄。淨土唯心好荷擔。
四字彌陀窮徹底。劫前華放古優曇。



華開見佛第八

佛相八萬四千。相中之好亦八萬四千。好中之光亦八萬四千。皆云八萬四千者。蓋佛居凡地。具於八萬四千塵勞。於此塵勞皆見實相。理智既合。故能示現相好光明皆八萬四千也。行人若知心即是佛。能於塵勞皆見實相。經云。佛觀一切眾生煩惱心中。有如來身結跏趺坐。儼然不動。德相具足。天台云。諸佛法身與己同體。觀佛時心中現者。即是諸佛法身之體。所謂是心是佛也。佛由觀而生。所謂是心作佛也。行者應以是佛作佛義。一念圓照。由觀見佛。觀之既熟。經云。無量壽佛。觀音勢至。常來至此行人之所。妙宗云。當念即是來際。故能預想將來之事。復由佛與眾生體不別故。故令三聖不來而來。如此則臨命終時。華開見佛。亦是尋常慣事矣。○王龍舒云。有



人疑此間人念佛。如何西方七寶池中便生蓮華一朵。答云。大明鏡中。物來自現。阿彌陀佛國中。清淨明潔。豈不照見十方世界。又有疑十方世界人念佛。臨終之際。佛與菩薩烏能知而來迎。答云。天上一日。普照天下。況佛威神乎。華嚴經云。若能念佛心不動。則常覩見無量佛。若常覩見無量佛。則見如來體常住。夫眾生念佛。能見如來。豈有如來不能見眾生乎。眾生惡業。能見地獄。豈有淨念不見如來乎。

臨終生淨土詩

宋仙潭

本自無家可得歸。雲邊有路許誰知。溪光遙落西山月。正是仙潭夢斷時。

臨終半月前偈

空裏千華羅網。夢中七寶蓮池。蹋得西歸路穩。



更無一點狐疑。

生淨土偈

宋一行

吾年九十頭雪白。世間應無百年客。一行道人歸去來。
金臺坐斷乾坤窄。

懷淨土

宋北山

滉漾空中仙樂動。笙簫聲細天風送。接引凡夫歸聖眾。
男兒此日方崇重。西土※文成東印壞。星飛一點千華界。
勿訝神魂生去快。樂邦只在同居內。八德池深華又大。
跏趺端坐蓮華載。耳聽法音心悟解。從今跳出胞胎外。
十八大賢居會下。功成五色雲西駕。諸上善人都在那。
聚頭只說無生話。池邊※行樹不全遮。裊裊金橋露半斜。
忽見化生新佛子。紅蓮開處噪頻伽。



淨土詩


明
博
山

淨心即是西方土。親到方能辨祖宗。吸盡澄江高著眼。
鏡清水底日頭紅。淨心即是西方土。肉髻明珠不用親。
萬八程途彈指到。莫教孤負好時辰。淨心即是西方土。
狹路逢人話短長。兩耳聾時聽愈好。鄉音誰與辨宮商。

頌是心作佛

明
妙
意

水入水時無別味。空投空處沒參差。漚花影裏千尋浪。
即是蓮華般若池。斷絕千巖路未窮。誰知鐵壁自能通。
渾身是病渾身藥。夢跨青鸞入絳宮。山長水遠空相憶。
黃葉風吹夢裏疑。直見爺娘親面目。相逢豈是螟蛉兒。
犁牛耕出古黃金。照地光天山嶽寒。文叔雖為天子貴。
子陵元作故人看。



頌上品上生

具諸戒行·讀誦大乘·修行六念·迴向往生·阿彌陀佛放大光明·與諸菩薩授手迎接·彈指往生·即悟無生·十方諸佛授記·得陀羅尼門·

精金百鍊現全功·解行相應佛佛同·怪道十方俱歷事·
不勞彈指看飛龍·

廣度衆生第九

阿彌陀佛為比丘時·發四十八願已·乃託生一切眾生中·同其形體·通其語言·以設教化故·上自天帝·下至微細蟲蟻·皆託生其中·設化無量劫·是阿彌陀佛成佛之因·一度生而已·釋迦佛為善慧仙人時·以五百銀錢顧瞿夷五莖華·供然燈佛·瞿夷問以華供佛·欲何所為·答言·為欲成就一切種智·度脫眾生·是釋迦佛發願之始·一度生而已·華嚴經載普賢菩薩勸



進善財童子有云。虛空界盡。眾生界盡。眾生業盡。眾生煩惱盡。我願乃盡。而虛空界乃至眾生業煩惱不可盡故。我願王無有窮盡。念念相續。無有間斷。身語意業。無有疲厭。至臨命終時。最後剎那。一切諸根等悉皆散壞。惟此願王不相捨離。願王導引往生極樂世界。見阿彌陀佛。生蓮華中。蒙佛授記。於煩惱大苦海中。拔濟眾生。令皆得往生極樂世界。是華嚴經大願。一拔濟眾生皆往生極樂世界而已。華嚴經迴向品云。我當於彼地獄畜生閻羅王等險難之處。以身為質。救贖一切惡道眾生。令得解脫。此煩惱大苦海中拔濟眾生之事也。則是求成佛與求生淨土。總是為度眾生故。故未生淨土者。雖度生之舟楫未具。不能隨諸眾生出入生死。而以彌陀之舟楫為舟楫。亦可行度人之事。彌陀願云。十方眾生稱我名號。必生我國。地獄餓鬼亦生我剎。雲棲云。念佛一門。普逗六道眾生之機。佛



以無緣慈攝眾生者。入眾生性為內熏。或現身說法為外熏。則勸人念佛。即是如來外熏之義。華嚴經云。即以利益諸眾生。而為自行清淨業。

頌文潞公念阿彌陀佛結十萬緣會

宋陳如如

知君膽氣大如天。願結西方十萬緣。不為一身求活計。大家齊上渡頭船。

讚喻彌陀偈

宋丁注

淨師捨妻孥為如來徒。募萬人結淨土會。鄉人丁注。以偈讚之。心淨佛土淨。法王非妄言。拔身出塵垢。已現火中蓮。一念不起滅。極樂即現前。大千同此境。豈止萬人緣。

普勸念佛

元優曇



念佛門深入者知。窮玄極寂妙難思。萬絲竅裏開珍藏。
濟物利生無盡期。念佛門如大渡船。渡人渾不擇愚賢。
若知這畔風波險。便好登舟過那邊。道人來到道人家。
一炷清香一盞茶。不說世間塵俗事。聲聲只讚白蓮華。
一卷真經念了時。無邊功德不思議。天龍八部皆回向。
大地含靈得路歸。一切眾生無殺業。十方何處起刀砧。
家家戶戶皆修善。勸念彌陀報四恩。一藏靈文不覆藏。
星輝月朗顯堂堂。目前不昧親提起。普請知音共讚揚。
一句彌陀開化門。豈拘城市與鄉村。直饒邪見人聞得。
也落音聲入耳根。一句彌陀多善根。蜎飛螻動也沾恩。
三途地獄纔聞得。捨苦皆歸解脫門。

懷淨土

明楚石



讚佛言詞貴直陳。攢花簇錦枉尖新。自然潤澤盈身器。
無數光明湧舌輪。稱性莊嚴依報土。隨機勸發信心人。
願求功德池中水。盡滌娑婆界上塵。

勸琴者

由來學道似彈琴。清濁高低自在心。聲太促時弦又斷。
指纔停處韻還沈。一塵不到山當戶。萬籟俱消月滿林。
拋卻絲桐勤念佛。子期未必是知音。

勸樵夫

瞥然撒手向懸崖。樹倒籐枯是爛柴。盡轉山河歸自己。
都將風月付平懷。擔頭自有千鈞重。腳下曾無一綫乖。
樵者如斯真念佛。蓮臺不必預安排。

勸山居人



山棲念佛最幽深。魚躍澄潭鳥轉林。如此樂邦真境界。
自然終日好身心。雪梅競吐枝頭玉。霜橘爭垂葉底金。
無量壽隨塵剎現。眾生多只向西尋。

淨土詩

明博山

淨心即是西方土。雨灑雲蒸分外奇。一具骨頭明歷歷。
振聲也要大家知。

續刻蓮華世界詩

海內善知識。懷淨土者無量。見聞所及。前已授梓。求而續得。
· 或他書偶觸者。擬人自為快。頻至頻增。源源無盡。共作一
蓮池海會也。以此供養十方修淨土人。同為蓮海之遊耳。雲棲
會下妙意庵廣貴識。

淨土偈（有引）

明溥益



博山禪師拈淨土偈。每云淨心即是西方土。蓋欲以因攝果也。而讀者不達。遂至以理奪事。予觸耳感懷。更拈西方即是唯心土。俾以事扶理。而理不墜偏空。非敢駕軼先達。聊附于補偏救弊之職云爾。

西方即是唯心土。一串明珠萬行圓。掐到斷時頻換綫。
蓮邦左券更無愆。西方即是唯心土。離土談心實倒顛。
念念總皆歸佛海。何須重覓祖師禪。西方即是唯心土。
緣具方能了正因。忍慧互資成戒品。明珠護惜不宜輕。
西方即是唯心土。未到西方深可危。夙障已如波浪湧。
那堪新業又相隨。西方即是唯心土。淨戒堅持莫使疎。
人世總皆跼躄境。不須旅邸覓安居。西方即是唯心土。
不識西方豈識心。何事謬希圓頓解。卻將落葉作黃金。
西方即是唯心土。理事相應始有功。日用未能違現行。



如何妄欲擬真宗。西方即是唯心土。土淨心空病亦忘。
良藥不勞從外覓。阿伽一味有餘香。西方即是唯心土。
篤信西方即信心。念念若開圓頓解。不須離教自玄深。
西方即是唯心土。擬撥西方理便乖。極樂一塵同剎海。
假饒天眼未知涯。西方即是唯心土。土淨方知心體空。
一切境風猶罣念。云何妄說任西東。西方即是唯心土。
悲智相應始克生。莫謂大悲應愍濁。化他須是自功成。
西方即是唯心土。像季尤為法海梁。信念剎那能甫具。
珍池已覺寶華香。西方即是唯心土。功行應教日日鮮。
一息不存誰努力。豈將精進遜先賢。西方即是唯心土。
三昧中王道最微。瞥爾生疑千古隔。咬釘嚼鐵莫依違。

佛會偈



已信彌陀大願舟。共修三昧度迷流。六時行道無餘想。
一句洪名似救頭。應痛盲龜常在溺。獨忻孔木只今浮。

殷勤拶入無生理。七寶池邊握手遊。

禪土相譏。幾於水火。然斯二門。苟實用工夫。分合俱妙。參
禪果一念不生。前後際斷。雖不言淨土。而土已淨矣。念佛果
都攝六根。淨念相繼。亦未有不心開者也。博山蕩益二師。雖
各有所主。原是水乳之合。假饒悠悠念佛。豈但心地未明。正
憂其土之不穩。口頭禪者。輕抹淨土。豈但失土。正惜其心之
未了也。二者各有得失。而就中入門下手。諸佛諸大菩薩諸大
禪宗惓惓勸人念佛。料必不悞後人矣。妙意庵廣貴評。



附錄



勸修淨土詩

(并序)

清
省
庵

實賢譎劣庸僧。褊卑陋器。本無大力。仰承前輩宗風。時有好懷。獨結西方淨願。雖躬行不逮。原無實得於自心。而兼濟未忘。乃有愚衷於此世。原夫淨土一門。理極頓圓。事誠簡易。在因強而得果疾。用力少而成功多。淺之則夫婦與知。深之則聖賢莫測。三根普被。萬類均收。撈漉苦海之魚。信為巨網。挽回末法之證。的是奇方。離斯捷徑。出生死以奚從。捨此法門。脫輪回而何日。但今時泛念者多。深信者少。或有訶為著相。貶作小乘。並由不讀教文。祇是任憑胸臆。豈知中天調御



·開金色口以丁寧。十方如來。出廣長舌而讚歎。文殊普賢。尚有求生之偈。馬鳴龍樹。亦有願往之文。至於智者永明之輩。·中峰天如之流。·並是教祖禪宗。莫不垂文著論。闡明至理。·深勸後人。奈何末代凡夫。鈍根淺識。乃欲遠勝古人。置之弗屑耶。實賢因此感慨。嘗欲發揮論議。解釋疑情。於乙未秋。著詩三十首。一時草草付工刊版。惜乎理未周圓。事多疏漏。每欲從事添削。不遑下手。戊戌夏。依紹曇老人於隆興精舍。學律安居。聽經坐臘。自恣既竟。同學攝兄。踊躍讚歎。慙慙卒業。由是芟其繁糝。補其闕略。理隨事廣。語逐文多。不覺信筆任心。盈編成冊。於中鋪陳依正。描寫莊嚴。廣破群疑。·深彰一理。指示工夫。以知操守。分張品類。以勸修行。于是總陳三教。別派眾流。所謂仕隱工商。漁樵耕讀。乃至苦樂閒忙之輩。生老病死之人。莫不皆導以念佛。示其往生。凡一日



二六時中。每年十二月內。無時非念佛之時。無月不思歸之月。所以一其念。專其志也。夫信是道原。故首標依正以起信。疑為信障。故次釋人情以破疑。疑障既除。信心堪發。信心既發。正行斯遵。故授之以工夫途路。非徒自善。尤宜利他。語貴隨機。事須逗巧。故分之以品第人倫。然有行無願。終不往生。有念無觀。亦難見佛。故授之以恆時運想。頻月致懷。末則總歎娑婆之苦。同歸淨土之樂。伸明信願。結勸往生。蓋淨土法門。不出信行願三。故為次第如此。詩成。新舊共得一百八首。雖非法海之全珠。亦是義山之片石。文誠粗疏。語頗切實。伏乞觀者。知我苦心。鑑茲不逮。略其詞而察其意。行其事以踐其途。庶幾同脫苦輪。盡超樂土。幸勿因人廢言。徇名棄實。是所至望。

我教原開無量門。就中念佛最為尊。都融妄念歸真念。總攝諸根



在一根。不用三祇修福慧。但將六字出乾坤。如來金口無虛語。
歷歷明文尚具存。

一入西方境自融。雙眸頓覺翳銷鎔。無邊剎土光中現。徧界真身
象外逢。華襯玉欄紅隱隱。樹含金殿碧重重。色空泯合渾無寄。
鏡像分明絕點蹤。

境勝由來道易修。多生習氣一朝休。盤中甘露珠圓轉。樹上摩尼
水倒流。碧玉蓮臺承足穩。真金華瓣襯身柔。三車已息馳求念。
露地安然坐白牛。

瑠璃地上絕塵埃。宴坐經行亦快哉。錦繡織成行樹葉。丹青畫出
眾樓臺。漫空華雨諸天下。徧界香雲大士來。何處忽生新佛子。
芙蓉又見一枝開。

土淨能令心自空。無邊妙色現其中。千燈互照身光映。十鏡交輝
佛土融。珠網重重懸寶樹。天童歷歷在華宮。龜齡鶴算渾閒事。



直得虛空壽量同。

稱性莊嚴非外得。天然果報自無窮。一塵徧入諸塵裏。萬法全收一法中。華映玉池人倒影。身遊佛國地俱空。色心依正原無礙。但得情忘境自融。

瓊枝瑤草色長新。別有乾坤世外春。紅蕩華藏金砌鴨。綠珠簾映玉樓人。塵沙莫計聲聞輩。海水難量大士倫。博地亦能容入會。何時得與聖賢親。

寂靜身心自偶諧。尋常歷覽興無涯。金幢倒映瑠璃地。玉砌平鋪瑪瑙階。自有好華堪供佛。更無塵事可干懷。何時得遂平生志。坐對鴛鴦水上排。

我佛慈悲相好身。隨機應現不同倫。盡虛空界元同體。極一微塵總是真。疊疊髻螺山頂綠。彎彎眉相月鉤新。七重樹下金蓮上。處處追陪二大人。



相好凡夫皆具足。六通無礙異常倫。直將果用為吾用。不改凡身作佛身。淨土一生成佛。更無中陰入胎之事。唯除願力欲往他方世界度眾生者。周顧十方同指掌。徧遊諸國似比鄰。回觀此土修行者。齷齪生涯太苦人。

彼方殊勝事無窮。依正由來總不同。剗盡青山鋪碧玉。收乾滄海出虛空。法音自演風柯裏。妙義頻宣水鳥中。諸佛眾生同一體。互相周徧盡圓融。

淨土因何獨指西。要令心念有歸栖。一門入後門門入。初步迷時步步迷。直就下凡階上聖。不離煩惱證菩提。蓮華勝友應相待。何日歸來手共攜。

如來本願非虛誑。稱我名皆到此中。

大彌陀經云。設我得佛。十方眾生。志心信樂。欲生我國。乃至十念。若不生者。不取正覺。

。莫患棘牆

界三

無客住。

只愁枷鎖

貪

幾時空。

或曰。若世間人皆往西方。則此方誰住。故以此喻曉之。

。百川

歸海水寧溢。萬國朝王地豈窮。

或曰。若世間人皆往生。則眾生甚多。彼國如何容受。故以此釋之。

。易往無人真

可惜。不知何事戀樊籠。



人傳天竺是西方

世傳西方去此十萬八千里。是錯認五天竺國為西方也。

天竺支那在足傍

天竺人呼東土為支那。天竺支那同在南瞻

部洲。足迹可到。

莫向泥塗分淨穢

同居五濁。寧分淨穢。

休從火宅辨炎涼

同居三界。奚別苦樂。

三千世

界非吾土

四大部洲。須彌山。六欲天。各滿一千。名小千世界。千箇小千世界。名大千世界。千箇大千世界。名大千世界。總此三千大千世界。名為娑婆世界。皆釋迦牟尼一佛所化之境也。

萬億乾坤是故鄉

極樂去此十萬億三千大千世界。

去去莫愁途路遠。不勞彈指見空王

天台云。臨終在定之心。即淨土受生之心。動念即是生淨土時。

莫說西方為譬喻

有人云。西方是譬喻之說。乃誘引凡愚為善。非實事也。

須知名與實相應。譬甜似蜜

非無蜜。喻冷如冰卻有冰。槐國阿誰招客去。蜃樓何處勸人登。

如來大聖成虛妄。謗法愆尤懺未曾。

人言肅殺是西方。

死後身空墮渺茫

有人云。西方是肅殺之氣。人死歸空。生氣殄滅。即是西方。豈真有西方可生平。

身

毒應無生博望

身毒。即天竺國。漢博望侯張騫。曾至其地。

岐山那有活文王

岐山在西夷。文王所生之地。

眾諸侯

各朝天子

問。何故極樂在西。答。極樂非定在西。但對東言西。譬如天子所都。名曰長安。諸侯朝天。四方來者不一。東方來者。則曰長安在西。西方來者。則曰長安在東。長安定有東西乎。

彌陀所都。名為極樂。十方菩薩。皆願往生。東方生者。即言極樂在西。西方生者。即言極樂在東。極樂定有東西乎。

四大洲殊觀日光

四大洲。謂東勝身洲。南瞻

部洲。西牛貨洲。北俱盧洲。殊觀者。日月環繞須彌山。照四大洲。東洲日沒。南洲日中。西洲日出。北洲半夜。四洲人並指日出處為東。日沒處為西。則南洲西方。即是西洲之南。北洲之東。東洲之北矣。方位寧



有定乎。但得往生休恐怖。應知壽命實難量。大彌陀經云。我刹中人。壽命皆無央數劫。

都言念佛是愚夫。得作愚夫亦已夫。龍樹辯才還拙否。龍樹菩薩。造毗婆沙論。發願往生。

· 文殊智慧是虛無。文殊菩薩往生偈云。願我命終時。盡除諸障礙。面見阿彌陀。往生安樂國。主人底事憑居易。東坡詩云。樂

天不是蓬萊客。憑仗西方作主人。· 公據何人問大蘇。東坡南行。唯帶阿彌陀佛一軸。曰。此賦西方公據也。· 寄語聰明宜佛念

· 閻君應不愛之乎。

六字真經堪讀誦。誰言名字假非因。有人言。名字屬假。非成佛因。豈有念假名而成真佛。· 即名顯體方

稱妙。託境觀心易入真。六字洪名為境。四性巨得為觀。· 螺贏祝兒終肖父。螺贏銜桑蟲千穴中。呼祝七日。則還肖其

父。眾生念彌陀於心內。持名一世。安得不肖佛。· 蛞蝓丸糞亦遺塵。勸君早發西歸願。臭穢何容

戀此身。

娑婆魔外事縱橫。寂滅無如安養城。苦樂雙忘名極樂。或謂求生西方。是自貪快樂。非為了

道。不知言極樂者。苦樂兩忘。方名極樂。若對苦說樂。是人天之樂。不名為極。· 死生俱盡說無生。問。既說往生。即有生。云何言無生。答。謂達生體本空。故生即

無生。又接引初機。權說往生。生已親證。始知無生。· 佛無彼此皆同體。又問。何不念釋迦。而反念彌陀。不念十方諸佛

· 即念十方諸佛。以佛佛道同故。順本師教故。· 地有東西是假名。何事勸人生彼



國。只緣此土道難成。

若執往生為妄想

或謂念佛是攝妄想一法。若求生西方。翻成妄想。

。豈言住此便成真

若言生西是妄想。則住著娑婆。妄想尤甚。

。東西不著尤非理

若言我今不求生彼。亦不住此。二俱不著。隨意受生。此尤非理。何者。既非法身大士。又非應化聖人。欲愛未除。業緣未斷。若不生西方。定生此土。既

生此土。則仍在輪回。業力所牽。三途有分。安能隨意受生。

。淨穢雙忘亦是塵

只此淨穢雙忘一念。亦是情計。尚屬法塵所攝。若真雙忘。則何礙求生。

生

本無生生四土。見猶離見見三身。須知真妄原同體。迷悟由來總

在人。

纔勸往生言著相。儘思貪戀卻迷蒙。無生畢竟有生在

有執斷見者言。死後永滅。都無生處

。不知業牽識走。畢竟復入胞胎。除卻念佛往生。更無有脫離處。

。離相依然住相中

若言死後永滅。不求往生。名不著相。是則離緣起相。生斷滅相。斷滅相者。是邪

見法。

。念與佛融方是即

荊溪云。體不二故。方名為即。近世聰明之士。皆言即心即佛。及勸念佛。便言著相。不知念佛念心。本來一體。但執念心。不信念佛。則心

佛是二。何名為即。

。心將境異不知空

即事顯理。名為真空。撥事求理。名惡取空。近世聰明之士。亦知心淨土淨。語以淨土。便言著相。不知心外無土。土外無心。

但執唯心。不信淨土。則心與土劃而為二。此惡取空。非真空也。

。會須心佛雙忘後。日照山川處處通。

都言淨土唯心是。十萬餘程是外求。但執妄心居在內

若言十萬億佛國之西方是外求者。則

認方寸妄心居內。便同阿難所計七處之一。

。不知真性體全收

楞嚴經云。當知虛空。生汝心內。猶如片雲。點太清裏。沉諸世界在虛空耶。

。彌陀諸



佛鏡中影。極樂娑婆水上漚。取捨厭欣無罣礙。自家屋裏任優游。

欣自心之淨故取。厭自心之穢故捨。一取一捨。不礙唯心。何外之有。

盡說厭欣為障道。誰知淨業善資成。厭離未切終難去。欣愛非深豈易生。何處安居能徙宅。誰人無事肯登程。鐵圍山外蓮華國。掣斷情韁始放行。

人疑念佛恐成魔。魔佛相爭不較多。了境唯心無罣礙。

但了佛從心現。外境本空。則雖魔即

佛。將心取境便清訛。

不知境自心生。取著為有。則雖佛即魔。

國君憤憤民方擾。室主惺惺盜

敢過。

一念取著。則魔得其便。妄心不起。則鬼不奈何。

須信佛心常護念。

彌陀經云。念佛之人。一切諸佛之所護念。

波旬束手

更誰何。

都言處處是西方。平地高山總不妨。

古云高山平地總西方。此是真實到家之語。若未到家。便成戲論。

入廁豈

宜還塞鼻。衝泥何事尚褰裳。

塞鼻褰裳。即是穢相未空。處處西方。豈非妄語。

病來那得心無苦。

夢裏焉知身在牀。莫話空言違實行。好憑落日望還鄉。

盡說西方是小乘。小乘原自不相應。

法華經信解品。迦葉等四大弟子白佛言。但念空無相無作。於菩薩法。游戲神通。淨佛國土。成就眾



生。心不喜樂。故知淨土法門。是菩薩所行。非小乘事。蓋如來在小乘教中。不說有他方佛土。唯大乘方等經中。廣談十方佛國。而諄諄唯指歸西方淨土一門。故西域菓小乘教者。都不信有彌陀佛國往生之事。學大乘者。多修此法。今人反謂淨土是小乘法。大乘所不為。豈不大顛倒耶。須知念佛還成佛。雲栖云。念佛成佛。是親種子。故華嚴十地文。地地不離念佛。

勝為僧又作僧。大智律師云。近見禪講宗師。有發願來生童真出家者。嘗試語言。汝今。白社已得男子出家。合求出離。何乃復求男子。再願出家。略無勝進乎。

遠公咸願往。晉慧遠法師。於廬山集眾念佛。刻木為蓮。具十二葉。引流泉入池。每度一時。水激蓮開一葉。晝夜六時。禪誦不輟。與會諸賢。往生甚眾。華嚴大

士亦求登。華嚴行願品。普賢菩薩偈云。願我臨欲命終時。盡除一切諸障礙。面見彼佛阿彌陀。即得往生安樂剎。攀龍附鳳知何限。底

事吾儕不願升。

餘教修行政路曲。此門直入坦途平。三祇行遠終難就。十念功成

便往生。藏教修行。要經三祇百劫。方成佛道。圓教念佛。但憑十念一念。便得往生。此則教門頓漸不同。自他功力有異。蓋餘法修行。多憑自力。念佛一門。兼藉他力。他力易就。故十念即生。自力


難成。故三祇尚滯。有謂西方極樂。非一生可到。須經多世展轉修行。方得往生。此不知教門殊勝。佛力難思也。大石載舟還不沒。那先經云。如持百

因船力故。石不沒水。若無其船。小石亦沒。大石。喻重罪。船。喻佛力。不沒。喻不墮三途。無船。喻無佛力。小石。喻輕罪。蒼蠅附驥始堪行。揚帆

順水因風便。何憚迢迢十萬程。

休言極樂苦難生。纔說難生是障門。障門有三。一疑業力深重。二疑福力輕微。三疑修行日淺。有此三疑。不得往生。佛

力自能除業力。信根端可拔疑根。須信彌陀願力深重。尚不棄五逆十惡。何況善人。尚收功於十念一念。況復多念。深逃



私債藏王府

一入西方。怨業不能違害。

現受官刑遇聖恩

親蒙佛力。冥府不得勾牽。

早晚相從裏糧去

· 此生終不負慈尊。

莫執壇經排淨土

壇經云。東方人造罪。念佛求生西方。西方人造罪。念佛求生何土。此意正勸人修善。不言無淨土。亦非謂西方實有造罪之人。當以意逆志。不可以辭害意。

· 祖機佛語並圓融。因言薦理彰吾教。得意忘言顯本宗。十善齊

修焉造罪。群賢共會豈還蒙。他方此土何來去。法界明明在眼

中。

念佛若言真漱口

趙州云。念佛一聲。漱口三日。今人便謂不必念佛。莫錯會好。

· 誦經應不用開脣。藥能醫病

還成病。火本溫身反炙身

天台云。般若如大火聚。四邊不可觸。觸則被燒。不觸則溫身。熟食。古人一時遺著之語。今人執之作實法會。豈非被燒乎。

佛見未生除甚麼

趙州云。佛之一字。吾不喜聞。古人真實證到這箇田地。方開大口。今人口談禪理。心輕實行。尚未除惡見。何況善見。尚未起三乘見。何況佛見。尚未起佛見。

云何而除佛見。

· 凡情尚在斷何因。勸君莫漫閒言語。只要今生出苦輪。

念佛圓通攝六根。耳根誰謂獨超倫

人知楞嚴圓通。耳根殊勝。不知念佛。即攝耳根。

· 音聞既是圓

常體。名字元非生滅因

問曰。經言。諸行是無常。念性元生滅。念性尚是生滅。況名字耶。答曰。經文為順此方機。於諸門揀擇一門。令初心入道。故有抑揚。

實則二十五聖。皆具圓通常義。故曰聖性無不通。順逆皆方便。言無不通。則知無不圓常。豈名字獨成生滅。又問。聖性雖無不通。初心入道。豈無遲速優劣。答。別論雖爾。通論不然。念佛既攝耳根。則同是一門。



·何分優劣·又念佛主意根·徧攝五根·耳根唯屬耳·不兼餘根·耳根從一門深入·以念念名名

固切·將聞聞佛佛還親。由來二聖皆昆仲·同作彌陀輔弼臣。

不信西方不願生·都由執計未能清。持冰喚水須融水或謂即心是佛·何須更見彌陀·今釋

日·言即心是佛者·如持冰喚水·冰雖是水·結滯未融·須假太陽·方能和解·

心雖是佛·全體在迷·須假佛日·方能開悟·豈可固執迷心·而不願見佛乎·

楹或謂即心淨土·何以更生淨土·今釋曰·言即心淨土者·如指木為楹·木雖可以為楹·而不即是楹·心雖能造淨土·而非即是淨土·今試自問·十二時中·於一切境緣上·還起一毫雜念染汗心否·若有一毫

因明·殷勤苦口緣何事·只為娑婆是火坑。

悟後莫言休見佛·應知悟後正求生天如云·汝若悟心·則淨土往生·萬牛不能挽矣·童蒙未可離

師學·稚子猶宜傍母行。詰老後身体更蹈宋詰老·住京師大剎·四十年不睡·坐禪精苦·坐化後·紙襖亦燒出舍利·後

生大富貴處·一生多受憂苦·青公覆轍豈堪成宋青草堂·後身作曾魯公·會須親證無生後·回入娑

婆度有情。

借問往生何計策·須憑信行願俱全。信根先向心田種·行足還加

願力堅。路乏資糧終不到有信願無行·馬無韁御孰能前有信行無願·但將三事



為符契。攜手同登九品蓮。

念佛休嫌妄想多。試觀妄想起於何。無心收攝固成病。著意遣除亦是魔。救火抱薪添烈焰。開隄引水作長河。直須字字分明念。念極情忘有甚麼。

佛聲易可除昏散。出口還收入耳來。驀地亂茅隨火盡。蔽天濃霧逐風開。通身是佛誰為念。徧界生蓮不用栽。何待臨終生極樂。即今端坐玉樓臺。

彌陀四字絕商量。只貴專持不暫忘。若厭平常終隔斷。纔求玄妙便乖張。粗嘗橄欖寧知味。細嚼鹽齏始見香。念到身心空寂處。不勞開口問西方。

念彌陀佛貴專精。念到功深念自純。念念圓明真性體。聲聲喚醒本來人。嬰兒墮水頻呼母。蕩子還家始見親。卻話從前離別事。翻令嗚咽淚沾巾。




欲得工夫無間斷。直須精進始相應。暫時失念雲霾日。瞥爾生心蛾掩燈。小水長流終貫石。沸湯停火亦成冰。往生作佛渾閒事。只在當人念力能。

念佛欲知端的處。箇中殊不計功程。塵消古鏡光逾遠。風定寒潭水自平。四性本空心歷歷。三身亘得佛明明。一門具足諸方便。止觀匪從漸次成。

行時正好念彌陀。一步還隨一佛過。足下時時游淨土。心頭念念絕娑婆。傍華隨柳須回顧。臨水登山勿放他。等得阿儂生極樂。十方來去任如何。

住時念佛好觀身。四大之中那一真。我與彌陀非兩箇。影兼明月恰三人。空房漸朽應難住。腐棟將頽豈易蹲。何日如蟬新脫殼。蓮華胎裏獨栖神。

坐時觀佛足趺跏。身在蓮臺華正敷。毫相分明隨念見。金容映現



與心符。事如夢幻元空寂。理到圓融非有無。何日池頭捧雙足。
親蒙頂上灌醍醐。

臥時念佛莫開聲。鼻息之中好繫名。一枕清風秋萬里。半牀明月
夜三更。更無塵累心難斷。唯有蓮華夢易成。睡眠朦朧諸佛現。
覺來追記尚分明。

僧宜念佛痛加鞭。得預蓮池清淨緣。親聽法非徒對本。頓明心不
用參禪。明師豈若彌陀好。善友誰居補處前。一念徧遊諸佛國。
笑他行腳困山川。(僧)

此方正教在儒宗。但盡今形後世空。仁義躬行雖切實。死生纔話
卻朦朧。好尋歸路思安養。莫認郵亭作故宮。淨土原從忠孝得。
金臺上品奏元功。(儒)

道家煉運為延齡。用力徧多功少成。要識神仙非不死。
楞嚴經云。復有從人。不依正覺。修
三摩地。別修妄念。存想固形。遊于山林人不及處。有十種。
仙。壽千萬歲。斯亦輪回。妄想流轉。報盡還來散入諸趣。
須知淨土始長生。
後魏曇鸞法師。初受陶隱居仙經。



十卷·專事修鍊·後遇菩提流支·問曰·佛道有長生乎·支曰·長生不死·我佛道也·遂以十六觀經·與之·曰·學此·則三界無復生·六道無復往·其為壽·不可窮也·鸞於是遂焚仙經·而專修觀經·

持

金作釧終無變·弄泡成珠但有名

或問·我學仙·則現世便得長生·汝念佛·則現身便死·長生何在·答曰·汝執幻身為堅固·如弄泡成珠

·有名無實·我知心性為真常·如持金作釧·終無變易·又神仙壽命·千年易盡·如弄泡成珠·西方壽命·劫石難量·如持金作釧·

寄語學仙宜念佛·蓮池

端的勝蓬瀛·(道)

求官常恨做官卑·官愈高時勢愈危·太璞不完慚美玉·泥塗曳尾羨靈龜·已知仕宦空無味·試看彌陀念是誰·案牘雖忙姑少置·

朝朝十念不宜虧·

十念者·每日清晨·向西正立合掌·連聲稱阿彌陀佛·盡一氣為一念·如是十氣·名為十念·盡此一生·不得一日暫廢·若能如是·決定往生·△(仕)

處士逃名遠市闌·此身清隱翠微間·平分嶺上半邊月·高枕牀頭一片山·白屋安貧終暫計·夕陽歸路豈知還·蓮華佛國深深處·出世芳蹤不可攀·(隱)

百工居肆易成功·業有專門各不同·旋轉化工歸手內·挽回造物在胸中·從來命不由人做·只有心堪自己攻·隨分妻孥且安樂·團圓頭念佛叢叢·(工)



商客經年道路行。舟車迅速每兼程。利深不覺風濤險。物重翻將性命輕。長恨貨多難長價。焉知身死不重生。勸君念佛歸西去。利比娑婆萬倍贏。(商)

漁人活計在扁舟。南北東西任去留。劈破月華沉棹底。移來山色上船頭。常教妻子張羅網。誰識閻翁下釣鉤。苦海無邊休陷溺。早憑佛力懺深尤。(漁)

樵夫家住碧山垠。斤斧聲中倒亂薪。斫斷雲根穿地脈。鑿開石齒露峰脣。但看舊冢埋枯骨。不見新墳起死人。及早回頭尋出路。蓮華胎裏好藏身。(樵)

農人念佛好殷勤。旋種新秧手自分。片笠衝開楊柳雨。一犁耕破杏華雲。曲肱飽飯欣秋熟。回首思鄉望夕曛。一片瑠璃田地美。天然殊不用耕耘。(耕)

世間萬事總浮塵。只有詩書差可人。千卷西窗殘月夜。數編東閣



亂山春。吟聲未若佛聲好。書味何如道味真。識得自心清淨土。

文章糟粕不堪陳。(讀)

一等世人修福業。希圖來世作公卿。假饒位極五侯貴。何似身居

下品生。施水但滋貪種子

因貪富貴而行布施。

善芽翻長業根莖

因布施而招富貴。因富貴而造業。因造業而復

墮三途。

願回有漏成無漏

以此福業。回向西方。即成無漏。

早注華間第一名

此方念佛。西方七寶池中。即生蓮華一朵。標

名其上。身後託生其中。

△(營福)

一心差處路歧逢。自造經書立本宗

即今五部六冊之類。皆偷竊佛經。雜以鄙語。以成己典。

兩扇門邊

傳祕訣。三家村裏聚群蒙。樂邦有路元平直。佛法無私本至公。

奉勸回頭歸正教。彌陀念念見真空。(外道)

尼師念佛好隨緣。莫向深閨處處穿。自守清貧為服藥。休營癡福

更招愆

古人云。有為之功。多諸過咎。天堂未就。地獄先成。

情根斷似枯絲蕩。戒體芬如出水蓮。他

日神栖安養國。七珍池上禮金仙。(尼師)

貧人念佛莫躊躇。寒餓腸中愛易除。竈腳日斜煙未起。屋頭露落



被還虛。深知此界為囚檻。極厭殘骸是潰疽。無限天衣諸化食。
他年極樂任安居。(貧)

家道休誇堪敵國。從來貴德賤金銅。無雙富莫如原憲。第一貧唯
是石崇。徒有千箱遺子息。難將一物見閻翁。何如念佛生安養。
自性財源用不窮。(富)

貴人雖貴未為欣。死後還他一箇墳。三謝園亭空燕子。五侯門戶
但寒雲。身登上品方為貴。心悟真如始立勳。卻到蓮池更回首。
世間螻蟻盡紛紛。(貴)

宿業今招下賤身。從來眉眼未曾伸。頻年辛苦恆隨主。畢世勤勞
敢怨人。好向己躬勤念佛。偏宜淨土獨栖神。他時得預蓮池會。
入聖超凡貴絕倫。(賤)

智人業識每彎環。好把從前念盡刪。六箇字中無計較。一聲佛外
絕機關。物情料破寧知死。世事多能只欠閒。畢竟往生為上策。



早尋歸路自知還。(智)

慧業文人道易成。休誇才思負聰明。數篇未足充飢餓。半字何曾敵死生。綺語化為真實語。吟聲翻作苦空聲。樂邦大有佳章在。水鳥風枝盡會賡。(慧)

愚夫造罪恣貪瞋。肯信從來果與因。祇道現生無後世。可知今日

有明晨

或問曰。明晨可見。後世何人能見。答曰。天眼能見。汝既無天眼。又不信佛語。是以不見後世。又問。天眼能見。其相云何。答曰。如見人從一房出。復入一房。死此生彼亦復如是。

。新移宅舍猶迷向。纔換衣裳不識人。生死關頭真痛切。勸君念

佛莫辭頻。(愚)

癡人垂老不知休。喚殺朦朧未轉頭。毒病偏將醫作惡。沉疴翻與藥為讎。愛繩易縛禽投檻。欲餌能牽魚上鉤。奉勸世緣宜早悟。蓮池種子尚堪投。(癡)

世間唯有苦人多。自造新殃可奈何。滿地蓬蒿春不到。一身枷鎖夜難過。稱怨莫更呼天地。叫痛應須念佛陀。三界從來是牢獄。



勸君及早出娑婆。(苦)

莫道人間樂事稠。由來樂極轉生憂。滿城華柳攜佳客。徹夜笙歌醉畫樓。但覺酒來人面上。那知死在腳跟頭。西方淨土真為樂。但念彌陀便往遊。(樂)

閒人念佛正優游。莫把光陰空裏投。老有音書頭漸白。死無官帖命難留。身前預把資糧辦。眼底休為兒女愁。家在樂邦歸去好。自然衣食不須謀。(閒)

勸君念佛未能閒。等得閒來病現前。心到亂時須著眼。念從忙處要加鞭。千軍隊裏單刀入。百沸湯中勺水傳。佛不礙忙忙自礙。便從今日奉金仙。(忙)

少年念佛正精神。莫待衰遲始問津。青草半埋紅粉骨。黃泉多見黑頭人。獻珠龍女疾成佛。訪道善財還證真。一旦無常音信至。此時追悔欲何因。(少)



暮年光景苦無多。電影滙華一剎那。黃葉漸凋真老矣。秋風將至奈愁何。無心不用貪浮世。有口唯應念佛陀。珍重臨行須努力。莫教萬劫自蹉跎。(老)

疾病由來即藥方。深知生死是無常。重刑受過悲牢獄。劇苦嘗來厭革囊。念念彌陀休背覺。心心極樂願還鄉。何時得受清虛體。壽極河沙不可量。(病)

死時莫漫自驚惶

念佛人。第一切忌怕死。怕死則不得往生。多有一生念佛。臨終唯務服藥求醫。都不說著往生之事。此怕死之過也。

。繫念殷勤

向彼方。膿血漸拋皮袋子。腥臊將脫垢衣裳。多生煩惱真疴瘵。一句彌陀是藥王。苦海深沉但求出。莫愁佛不駕慈航。(死)

平旦寅時天氣清。東方曉色已初生。法身未顯仍居暗。慧眼纔開始見明。安得樂邦今日去。都將妄習一時平。遙思供佛諸賢輩。衣袂盛華手自擎。(寅時)

卯時日出氣蒼茫。萬象明明不覆藏。香霧叢中華影亂。紅塵隊裏



馬蹄忙。想成處處青蓮萼。念熟時時大覺王。直待無生生淨土。
徧周沙界是毫光。(卯時)

食時萬戶起炊煙。貧富由來事太懸。茅屋糟糠猶不繼。朱門酒肉
尚憎嫌。夢中苦樂原無實。覺後身心始不遷。安養此時應坐食。
遙知百味現其前。(辰時)

巳時日影在禺中。恰恰還差分寸工。正念覺來猶有覺。妄心空處
未忘空。邊邪那箇非中正。徧曲何人不至公。攝受三根歸淨土。
直教萬派盡朝宗。(巳時)

日輪當午正中天。普見高低物像全。阿鼻獄中真淨土。蛄蜣身裏
紫金仙。迷家蕩子殊堪愍。背父癡兒信可憐。今日始知歸故里。
劫初田地尚依然。(午時)

未時窗外日初斜。華影闌珊上碧紗。三分光陰還過二。百年身世
豈無涯。暫居此地非吾土。遙憶西方是我家。極樂人民無量壽。



不將日月計年華。(未時)

晡時薄晚正逢申。業識茫茫喪本真。瞻部洲中多苦事。娑婆界內少閒人。食中置毒焉知避。癢後搔瘡豈厭頻。日暮飄零不歸去。空勞望斷倚門親。(申時)

酉時憶佛甚懸懸。獨倚樓頭聳兩肩。眼逐浮雲凝碧落。心隨白日下青天。更無人去乾坤外。那有書來鴻鴈邊。坐久不知天已暮。卻疑身在玉池蓮。(酉時)

戌時萬事且休論。要把無常念念存。大限忽來真黑夜。幽關不曉是黃昏。持珠易念生前佛。翦紙難招死後魂。預辦資糧早歸去。莫教前路悔無門。(戌時)

亥時人定絕喧囂。痛策身心莫漫憍。斬斷妄心青草死。推開昏暗黑山高。淚因憶佛渾難制。愁為思鄉不易消。遙想白蓮華萼上。定知名字已曾標。(亥時)



夜半子時群動息·陰陽往復互回旋·一輪孤月千家夢·幾點殘星
萬里天·土自想成寧有外·佛從心現本無邊·何時永滅遷流苦·
華裏藏身出蓋纏·(子時)

丑時後夜曉雞鳴·起坐披衣憶想清·一念未生真佛現·萬緣纔動
假名成·知緣不實名何礙·達妄無依念自平·安得身心歸極樂·
真空幻有總無生·(丑時)

春王正月是新年·賀歲家家設酒筵·萬戶笙歌行樂地·滿街華月
上燈天·目前景物難長好·劫外風光自不遷·安養故鄉無蠟燭·
枝枝相照玉池蓮·(正月)

時當二月景堪誇·好念彌陀玩物華·淺白梨花初破朵·淡黃楊柳
乍抽芽·輕煙薄霧鶯兒店·細雨微風燕子家·爭似故鄉佳麗地·
七重行樹語頻伽·(二月)

三月清明瞥眼過·傷心無那是愁何·滿城風雨歌聲少·十里山墳



哭響多。早趁在生修淨業。莫教臨死怨閻羅。故鄉春色還長在。
想見芙蓉出綠波。(三月)

山林四月少塵埃。自念彌陀不用陪。新脫素衣摧粉籜。亂拋金彈
落黃梅。窮途作客真為苦。蕩子思鄉最可哀。料得慈尊應念我。
朝朝垂手望歸來。(四月)

五月端陽景物偏。龍舟競渡古今傳。數莖蒲葉劍刻礪。一樹榴花
火欲然。苦海無邊何日出。樂邦有路幾時還。玉池流水洄漩處。

陣陣香風泛白蓮。(五月)

六月人間暑氣高。炎炎火宅被焚燒。一林樹影藏高閣。十里荷華
映畫橋。念佛聲悲頻有淚。思鄉心切更無聊。清涼池上何時返。
滌盡煩襟水自饒。(六月)

新秋七月氣初涼。溽暑將收夜漸長。四壁暗風鳴蟋蟀。一池衰草
語寒螿。深宵倚檻窺殘月。薄暮推窗望夕陽。客路吟屐久漂泊。



苦求佛力早還鄉。(七月)

中秋八月有微寒·零露濃濃被草菅·一樹桂華香漏洩·萬家明月影團圓·長思故國無音信·幾欲高飛少羽翰·行樹重重含佛土·何時親倚玉欄看。(八月)

重陽九日景偏賒·自採茱萸且泛茶·紅錦妝成千樹葉·黃金開盡一籬華·每登山頂瞻鄉國·卻上樓頭望故家·想見七珍池沼內·枝枝菡萏大如車。(九月)

十月由來是小春·桃紅初破一枝新·長看舊冢添新冢·每見新人送舊人·萬劫死生誰動念·百年身世獨傷神·回頭便是西方路·只要當人願力真。(十月)

天涯又見一陽生·六管飛灰氣乍更·粒粒寒椒梅漸破·尖尖嫩玉柳將萌·夜長易得還鄉夢·歲暮難為作客情·十萬餘程安養國·寸心耿耿挂長庚。(十一月)



歲盡時窮最可愁。陰雲慘慘日悠悠。風刺萬木皆枯骨。雪覆千山盡白頭。但見過年忙似箭。有誰離苦急如讎。那堪尚滯娑婆國。夢裏光陰又一周。(十二月)

一自娑婆繫業因。多生流轉實酸辛。須臾出屋又投屋。迅速捨身還受身。曾作王侯爭國邑。幾為螻蟻喪埃塵。這回若不思歸去。依舊從前受苦輪。

彌陀慈父願門開。攝受群生等一孩。膿血團中離臭穢。蓮華香裏受胞胎。但憑淨願為良導。只有狐疑是棄材。濁惡娑婆難久住。早同善友賦歸來。

業風吹識入胞胎。獄戶深藏實可哀。每遇飢虛倒懸下。頻驚粗食壓山來。聲聞到此心猶昧。菩薩於中慧未開。誓割愛緣生極樂。華中產取玉嬰孩。(生苦)

萬事輸人已退藏。形骸自愧少康莊。朱顏一去杳無迹。華髮新來



漸有霜。流淚暗思童稚樂。見人空話壯年強。寧知淨土春長在。
不使身心晝夜忙。(老苦)

四大因時偶暫乖。此身無計可安排。殘燈留影不成夢。夜雨滴愁
空滿街。自昔歡娛何處去。只今苦痛有誰懷。豈知極樂清虛體。
自在遊行白玉階。(病苦)

識神將盡忽無常。四大分離難主張。脫殼生龜真痛絕。落湯螃蟹
漫惶惶。甘心獄戶為囚侶。束手幽關事鬼王。何似華開親見佛。
無生無滅壽難量。(死苦)

生離死別最堪傷。每話令人欲斷腸。虞氏帳中辭項羽。明妃馬上
謝君王。淚深江海猶嫌淺。恨遠乾坤未是長。諸上善人俱會處。
願教曠劫莫分張。(愛別離苦)

苦事人情皆欲避。誰知夙業自相招。有錢難買閻翁赦。無計能求
獄卒饒。兵敗張巡思作鬼。身亡蕭氏願為貓。何時得預蓮池會。



積劫怨讎好共消。（怨憎會苦）


窮達由來有夙因。轉生希望轉因循。揚帆屢見沉舟客。挂榜偏傷落第人。畢世耕耘難果腹。頻年紡織尚懸鶉。樂邦衣食天然好。不用區區更苦辛。（求不得苦）

逼迫身心苦事多。哀聲無地可號呼。肝腸斷處情難斷。血淚枯時恨未枯。臨海廿年持使節。過關一夜白頭顱。何當淨土修禪觀。

寂照同時離有無。（五陰熾盛苦）

△色受想行識。為五陰。色陰是身。四陰是心。熾盛者。熾然增盛也。

稽首釋迦文。娑婆說法主。皈依無量壽。淨土之導師。我今承佛力。闡揚淨土教。詩成百八章。章各有八句。為順此方機。故以詩演說。若我所說話。違背於諸佛。欺罔世人者。應受地獄苦。百千萬億劫。猶故不能盡。如其不然者。幸各生諦信。慎勿懷疑惑。而生增上慢。及以卑劣慢。由斯二種心。自致失善利。伏願見聞者。展轉遞相勸。若有勸一人。乃至於多人。功德不思議。



譬喻莫能盡。願以此功德。普及於一切。我等與眾生。同生極樂國。
（發願偈）

不淨觀頌（并序）

○佛為貪欲眾生。說不淨觀。觀之既久。貪欲即除。可以越愛河而超苦海。余閒居閱大智度論。因取意而為之頌。以此自警。並以警世云。

有愛皆歸盡。此身寧久長。替他空墮淚。誰解返思量。

死想○先作此想。為下九想

·張本

記得穠華態。俄成臃脹軀。眼前年少者。容貌竟何如。
（脹想）

紅白分明相。青黃瘵爛身。請君開眼看。不是兩般人。
（青瘵想）

皮肉既墮落。五藏於中現。憑君徹底看。何處堪留戀。
（壞想）

無復朱顏在。空餘殷血塗。欲尋妍醜相。形質漸模糊。
（血塗想）



腐爛應難覩。腥臊不可聞。豈知膿潰處。蘭麝昔曾熏。
(膿爛想)

羊犬食人肉。人曾食犬羊。不知人與畜。誰臭復誰香。
(噉想)

形骸一已散。手足漸移置。諦觀斌媚姿。畢竟歸何處。
(散想)

本是骷髏骨。曾將誑惑人。昔時看是假。今日覩方真。
(骨想)

火勢既猛烈。殘骸忽無有。試看煙燄中。著得貪心否。
(燒想)

前詩粗示端緒。尚未諦審觀察。復作五言律以廣之。

所愛竟長別。淒涼不忍看。識才離故體。尸已下空棺。

夜火虛堂冷。秋風素幔寒。勸君身在日。先作死時觀。
(死想)

風大鼓其內。須臾脢脹加。身如盛水袋。腹似斷藤瓜。

垢膩深塗炭。蠅蛆亂聚沙。曾因薄皮誑。翻悔昔年差。
(脹想)

風日久吹炙。青黃殊可憐。皮乾初爛橘。骨朽半枯椽。

耳鼻缺還在。筋骸斷復連。石人雖不語。對此亦潸然。
(青瘀想)

肌膚纔脫落。形質便遭傷。瓜裂半開肉。蛇鑽欲出腸。



枯藤纏亂髮。溼蘚爛衣裳。寄語嬋娟子。休將畫糞囊。
(壞想)

一片無情血。千秋不起人。淋漓塗宿草。狼藉汙埃塵。

莫辨妍媸相。安知男女身。哀哉癡肉眼。錯認假為真。
(血塗想)

薄皮糊破紙。爛肉棄陳羹。膿血從中潰。蠅蛆自外爭。

食豬腸易嘔。洗狗水難清。不是深憎惡。何由斷妄情。
(膿爛想)

尸骸遭噉食。方寸少完全。不飽飢烏腹。難乾饞狗涎。

當年空自愛。此日有誰憐。不若豬羊肉。猶堪值幾錢。
(噉想)

四體忽分散。一身何所從。豈唯姿態失。兼亦姓名空。

長短看秋草。穠纖問晚風。請君高著眼。此事細推窮。
(散想)

皮肉已銷鑠。唯餘骨尚存。雨添苔蘚色。水浸土沙痕。

牽挽多蟲蟻。收藏少子孫。風流何處去。愁殺未歸魂。
(骨想)

烈焰憑枯骨。須臾方熾然。紅飛天際火。黑透樹頭煙。

妄念同灰盡。真心並日懸。欲超生死路。此觀要精研。
(燒想)



四念處頌（并序）

○佛垂涅槃·囑諸比丘·依四念處住·如佛無異·今時丁未法·正念者少·顧此法門·何人修學·豈唯不思其義·抑亦未識其名·可勝歎耶·余山居無事·讀涅槃遺教品·因取其意·以入聲律·俾歌詠者正念增長·妄心息滅·置諸座隅·日以自警·并不忘遺誠云。

一興顛倒想·遂有幻緣身·膿血常交湊·腥臊每具陳·紙黏皮裹肉·藤絆骨纏筋·毛覆叢叢草·蟲居比比鄰·內藏惟臭穢·外飾但衣巾·四大元無實·諸根豈有真·語言風自響·動轉氣相循·強號為男女·虛名立主賓·百年三尺土·萬古一堆塵·貴賤空回首·賢愚共愴神·徒生復徒死·誰識本來人·（觀身不淨）
眾苦從何起·深知受者情·順違才領納·取捨便縱橫·有盛衰還



至。無榮辱不成。怨從親裏出。哀是樂中生。王謝家何在。曹劉國已傾。悲歡幾場夢。勝敗一棋枰。事與心違背。貧將病合并。錢神呼不至。窮鬼送難行。戚戚終何益。悻悻漫不平。無求卑亦貴。知足欠還盈。若悟真空理。憂欣何處萌。（觀受是苦）

妄心無住處。體相竟如何。閃閃風中燭。搖搖水上波。一家門戶

別六。六箇弟兄多六。擾擾各馳競如眼逐色。耳逐聲等。。紛紛總不和如眼不與聲和。耳不與色和等。。

青黃俄改換眼識無常。動靜屢遷訛耳識無常。臭別香隨到鼻識無常。甜來淡又過舌識無常。

。炎涼翻易覆身識無常。好惡每偏頗意識無常。境滅心安寄。情忘智亦孤。掀

翻五欲窟。搗盡六根窩。劫賊歸王化。飛禽出網羅。何當悟常住

。諸妄盡消磨。（觀心無常）

諸法從緣起。初無我主張。因緣有生滅。念慮遂低昂。欲得翻成失。求閒反遇忙。畏寒冬不輟。苦熱夏偏長。貧憶富時樂。老追年壯強。有誰憎順適。若箇好危亡得失閒忙冷熱等。皆從緣生。不因我有。。自在方為主。遷




流豈是常。離根念何起。無識境還忘。內外無些子。中間有底藏。
。六窗虛寂寂。一室露堂堂。但得塵勞盡。居然大覺王。
（觀法無我）

蓮華世界詩 淨土十要附本

附錄 證通法師師友西資社同誓文

維隆興元年。歲次癸未。四月八日。釋師友。洎闔會大眾。歸命
極樂世界阿彌陀佛。菩薩海眾。願運洪慈。俯察微志。某等惟念
宿福深厚。生處中華。恭覩大藏七經。純談淨土。依正莊嚴。功
德勝妙。返觀此處。三惡八難。多不善聚。生老病死。壽命短促
。自力修行。難進易退。先聖憫我等故。立此念佛法門。深談易
往。激勸求生。古今聖賢。弘此道者。其書山積。湖海縑素。結



此社者。代不乏人。十方眾生。往彼國者。多如駛雨。我等是以
亮情天發。不約而同。秉志有歸。僉心西境。既念念不忘。期終
此報。決取往生。我等尚慮性習不同。世務縈絆。口談極樂。意
戀娑婆。理事不明。行願有闕。旦祈云同。夕歸攸隔。於是謹涓
吉日。聚會投誠。稽首梵容。立茲弘誓。仰願慈尊。舒紫金手。
撫摩我頂。啟紅蓮舌。密授我記。庶我此生已去。諸惡不作。眾
善奉行。不值邪師。不失正念。命終之日。無病無苦。身心悅樂
。隨從如來。同歸安養。蓮華早開。悟無生忍。游歷十方界。奉
事諸佛身。濟拔苦眾生。同成無上道。虛空有盡。我願無窮。若
見若聞。俱霑利樂。


淨土十要



明・蕩益大師選定

往生論註

淨土十要
(附本)



往生論註序

生死·吾人第一大事也。淨土法門·了生死無上妙法也。一代時教·浩若淵海。其究竟暢佛普度眾生之本懷者·唯淨土一法而已。以下凡信願念佛·即可帶業往生。上聖若肯回向·速得圓成覺道。仗佛慈力·與唯仗自力·其難易固日劫相倍。天親菩薩廣造諸論·宏闡佛乘。復宗無量壽經·作願生偈論。示五門修法。令畢竟得生。具顯禮拜·讚歎·作願·觀察·回向之法。於觀察門·詳示淨土莊嚴·如來法力·菩薩功德。凡見聞者·悉願往生。曇鸞法師撰註詳釋。直將彌陀誓願·天親衷懷·徹底圓彰·和盤托出。若非深得佛心·具無礙辯·何克臻此。夫淨土一法·為一切諸法之所歸趣。以故華嚴證齊諸佛之等覺菩薩·尚須以十大願



王回向往生。則文殊·普賢·馬鳴·龍樹·智者·慈恩·清涼·永明等·自行化他·同歸淨土者·有由來矣。知此則唯執自力·不仗佛力者·可以悚然驚·憬然悟·以期現生即得出此娑婆·生彼極樂·與觀音勢至等諸上善人俱會一處·常時親炙阿彌陀佛·以冀證無生忍·圓滿菩提而後已也。吾言不足信·請質之普賢菩薩·自可無疑矣。民國十一年壬戌·五月望日·常慚愧僧釋印光謹撰。

蕩益大師所選淨土十要·實為淨宗最要之妙典。成時大師欲為廣布·特節略之·致使有文義隱晦·稍拂初機之處。因搜羅原本·特為排印·仍作四冊。以卷有薄者·遂取古德宏揚淨土之要文附之。如帝網珠·互相輝映·誠為淨宗一大快事。竊以天親菩薩往生論·淨宗之要典也·世罕流通。曇鸞法師之註·文暢達而義深邃·洵足開人正智·起人正信·乃淨業學人之大導



師。惜中國久已失傳。清末。楊仁山居士請於東瀛。刻以流通。因論註相聯。初機殊難分判。乃逐段標出。令徐蔚如居士刻於北京。今擬將此書。并蓮華世界詩。合作一冊。以作淨土十要之附本。冀與十要并傳於世。庶可燧焯火宅。常被焚燒之同倫。知此宅之外。原有最極清淨安隱之家鄉。從茲當仁不讓。賈勇先登。同出五濁。同登九品。同預蓮池海會。同侍無量壽佛。以漸證夫無生法忍。與無上菩提。得以上不孤於佛化。下不負於己靈。方可名為真大丈夫也已。

民國二十一年壬申季春。釋印光識



無量壽經優婆提舍願生偈

此卷依東瀛本
與藏內稍別

婆藪槃頭菩薩造

元魏菩提留支譯

世尊我一心。歸命盡十方。無礙光如來。願生安樂國。
我依修多羅。真實功德相。說願偈總持。與佛教相應。
觀彼世界相。勝過三界道。究竟如虛空。廣大無邊際。
正道大慈悲。出世善根生。淨光明滿足。如鏡日月輪。
備諸珍寶性。具足妙莊嚴。無垢光燄熾。明淨曜世間。
寶性功德草。柔輓左右旋。觸者生勝樂。過迦旃鄰陀。
寶華千萬種。彌覆池流泉。微風動華葉。交錯光亂轉。
宮殿諸樓閣。觀十方無礙。雜樹異光色。寶欄徧圍繞。
無量寶交絡。羅網徧虛空。種種鈴發響。宣吐妙法音。
兩華衣莊嚴。無量香普熏。佛慧明淨日。除世癡闇冥。




梵聲悟深遠。微妙聞十方。正覺阿彌陀。法王善住持。
如來淨華眾。正覺華化生。愛樂佛法味。禪三昧為食。
永離身心惱。受樂常無間。大乘善根界。等無譏嫌名。
女人及根缺。二乘種不生。眾生所願樂。一切能滿足。
是故願生彼。阿彌陀佛國。無量大寶王。微妙淨華臺。
相好光一尋。色像超群生。如來微妙聲。梵響聞十方。
同地水火風。虛空無分別。天人不動眾。清淨智海生。
如須彌山王。勝妙無過者。天人丈夫眾。恭敬繞瞻仰。
觀佛本願力。遇無空過者。能令速滿足。功德大寶海。
安樂國清淨。常轉無垢輪。化佛菩薩日。如須彌住持。
無垢莊嚴光。一念及一時。普照諸佛會。利益諸群生。
雨天樂華衣。妙香等供養。讚諸佛功德。無有分別心。
何等世界無。佛法功德寶。我願皆往生。示佛法如佛。



我作論說偈。願見彌陀佛。普共諸眾生。往生安樂國。

無量壽修多羅章句。我以偈頌總說竟。

論曰。此願偈明何義。示現觀彼安樂世界。見阿彌陀佛。願生彼國故。云何觀。云何生信心。若善男子善女人。修五念門行成就。畢竟得生安樂國土。見彼阿彌陀佛。何等五念門。一者禮拜門。二者讚歎門。三者作願門。四者觀察門。五者迴向門。云何禮拜。身業禮拜阿彌陀如來應正徧知。為生彼國意故。云何讚歎。口業讚歎。稱彼如來名。如彼如來光明智相。如彼名義。欲如實修行相應故。云何作願。心常作願。一心專念。畢竟往生安樂國土。欲如實修行奢摩他故。云何觀察。智慧觀察。正念觀彼。欲如實修行毘婆舍那故。彼觀察有三種。何等三種。一者觀察彼佛國土莊嚴功德。二者觀察阿彌陀佛莊嚴功德。三者觀察彼諸菩薩莊嚴功德。云何迴向。不捨一切苦惱眾生。心常作願迴向為首。



得成就大悲心故。

云何觀察彼佛國土莊嚴功德。彼佛國土莊嚴功德者。成就不可思議力故。如彼摩尼如意寶性。相似相對法故。觀察彼佛國土莊嚴功德成就者。有十七種應知。何等十七。一者莊嚴清淨功德成就。二者莊嚴量功德成就。三者莊嚴性功德成就。四者莊嚴形相功德成就。五者莊嚴種種事功德成就。六者莊嚴妙色功德成就。七者莊嚴觸功德成就。八者莊嚴三種功德成就。九者莊嚴兩功德成就。十者莊嚴光明功德成就。十一者莊嚴妙聲功德成就。十二者莊嚴主功德成就。十三者莊嚴眷屬功德成就。十四者莊嚴受用功德成就。十五者莊嚴無諸難功德成就。十六者莊嚴大義門功德成就。十七者莊嚴一切所求滿足功德成就。莊嚴清淨功德成就者。偈言。觀彼世界相。勝過三界道故。莊嚴量功德成就者。偈言。究竟如虛空。廣大無邊際故。莊嚴性功德成就者。偈言。正道大



慈悲。出世善根生故。莊嚴形相功德成就者。偈言。淨光明滿足。如鏡日月輪故。莊嚴種種事功德成就者。偈言。備諸珍寶性。具足妙莊嚴故。莊嚴妙色功德成就者。偈言。無垢光燄熾。明淨曜世間故。莊嚴觸功德成就者。偈言。寶性功德草。柔輓左右旋。觸者生勝樂。過迦旃鄰陀故。莊嚴三種功德成就者。有三種事。應知。何等三種。一者水。二者地。三者虛空。莊嚴水功德成就者。偈言。寶華千萬種。彌覆池流泉。微風動華葉。交錯光亂轉故。莊嚴地功德成就者。偈言。宮殿諸樓閣。觀十方無礙。雜樹異光色。寶欄徧圍繞故。莊嚴虛空功德成就者。偈言。無量寶交絡。羅網徧虛空。種種鈴發響。宣吐妙法音故。莊嚴雨功德成就者。偈言。雨華衣莊嚴。無量香普熏故。莊嚴光明功德成就者。偈言。佛慧明淨日。除世癡闇冥故。莊嚴妙聲功德成就者。偈言。梵聲悟深遠。微妙聞十方故。莊嚴主功德成就者。偈言。正



覺阿彌陀。法王善住持故。莊嚴眷屬功德成就者。偈言。如來淨華眾。正覺華化生故。莊嚴受用功德成就者。偈言。愛樂佛法味。禪三昧為食故。莊嚴無諸難功德成就者。偈言。永離身心惱。受樂常無間故。莊嚴大義門功德成就者。偈言。大乘善根界。等無譏嫌名。女人及根缺。二乘種不生故。淨土果報。離二種譏嫌過。應知。一者體。二者名。體有三種。一者二乘人。二者女人。三者諸根不具人。無此三過故。名離體譏嫌。名亦三種。非但無三體。乃至不聞二乘女人諸根不具三種名故。名離名譏嫌。等者。平等一相故。莊嚴一切所求滿足功德成就者。偈言。眾生所願樂。一切能滿足故。略說彼阿彌陀佛國土十七種莊嚴功德成就。示現如來自身利益大功德力成就。利益他功德成就故。彼無量壽佛國土莊嚴。第一義諦妙境界相。十六句及一句。次第說。應知。



云何觀佛莊嚴功德成就。觀佛莊嚴功德成就者。有八種相。應知。何等八種。一者莊嚴座功德成就。二者莊嚴身業功德成就。三者莊嚴口業功德成就。四者莊嚴心業功德成就。五者莊嚴大眾功德成就。六者莊嚴上首功德成就。七者莊嚴主功德成就。八者莊嚴不虛作住持功德成就。何者莊嚴座功德成就。偈言。無量大寶王。微妙淨華臺故。何者莊嚴身業功德成就。偈言。相好光一尋。色像超群生故。何者莊嚴口業功德成就。偈言。如來微妙聲。梵響聞十方故。何者莊嚴心業功德成就。偈言。同地水火風。虛空無分別故。無分別者。無分別心故。何者莊嚴大眾功德成就。偈言。天人不動眾。清淨智海生故。何者莊嚴上首功德成就。偈言。如須彌山王。勝妙無過者故。何者莊嚴主功德成就。偈言。天人丈夫眾。恭敬繞瞻仰故。何者莊嚴不虛作住持功德成就。偈言。觀佛本願力。遇無空過者。能令速滿足。功德大寶海故。即



見彼佛。未證淨心菩薩。畢竟得證平等法身。與淨心菩薩。與上地諸菩薩。畢竟同得寂滅平等故。略說八句示現如來自利利他功德莊嚴次第成就。應知。

云何觀察菩薩莊嚴功德成就。觀察菩薩莊嚴功德成就者。觀彼菩薩有四種正修行功德成就。應知。何者為四。一者於一佛土身不動搖。而徧十方種種應化。如實修行。常作佛事。偈言。安樂國清淨。常轉無垢輪。化佛菩薩日。如須彌住持故。開諸眾生淤泥華故。二者彼應化身。一切時不前不後。一心一念。放大光明。悉能徧至十方世界。教化眾生。種種方便。修行所作。滅除一切眾生苦故。偈言。無垢莊嚴光。一念及一時。普照諸佛會。利益諸群生故。三者彼於一切世界。無餘照諸佛會大眾。無餘廣大無量供養恭敬讚歎諸佛如來功德。偈言。雨天樂華衣。妙香等供養。讚諸佛功德。無有分別心故。四者彼於十方一切世界無三寶處



· 住持莊嚴佛法僧寶功德大海。徧示令解如實修行。偈言·何等世界無·佛法功德寶·我願皆往生·示佛法如佛故。

又向說觀察莊嚴佛土功德成就。莊嚴佛功德成就。莊嚴菩薩功德成就。此三種成就願心莊嚴。應知。略說入一法句故。一法句者·謂清淨句。清淨句者·謂真實智慧無為法身故。此清淨有二種·應知。何等二種。一者器世間清淨。二者眾生世間清淨。器世間清淨者·如向說十七種莊嚴佛土功德成就。是名器世間清淨。眾生世間清淨者·如向說八種莊嚴佛功德成就。四種莊嚴菩薩功德成就。是名眾生世間清淨。如是一法句·攝二種清淨義·應知。

如是菩薩·奢摩他·毗婆舍那·廣略修行·成就柔軟心。如實知廣略諸法。如是成就巧方便迴向。何者菩薩巧方便迴向。菩薩巧方便迴向者·謂說禮拜等五種修行·所集一切功德善根·不求自



身住持之樂。欲拔一切眾生苦故。作願攝取一切眾生。共同生彼安樂佛國。是名菩薩巧方便迴向成就。菩薩如是善知迴向成就。即能遠離三種菩提門相違法。何等三種。一者依智慧門。不求自樂。遠離我心貪著自身故。二者依慈悲門。拔一切眾生苦。遠離無安眾生心故。三者依方便門。憐愍一切眾生心。遠離供養恭敬自身心故。是名遠離三種菩提門相違法。菩薩遠離如是三種菩提門相違法。得三種隨順菩提門法滿足故。何等三種。一者無染清淨心。以不為自身求諸樂故。二者安清淨心。以拔一切眾生苦故。三者樂清淨心。以令一切眾生得大菩提故。以攝取眾生生彼國土故。是名三種隨順菩提門法滿足。應知。向說智慧慈悲方便三種門。攝取般若。般若攝取方便。應知。向說遠離我心不貪著自身。遠離無安眾生心。遠離供養恭敬自身心。此三種法。遠離障菩提心。應知。向說無染清淨心。安清淨心。樂清淨心。此三種



心。略一處成就妙樂勝真心。應知。如是菩薩智慧心。方便心。無障心。勝真心。能生清淨佛國土。應知。是名菩薩摩訶薩隨順五種法門。所作隨意自在成就。如向所說身業。口業。意業。智業。方便智業。隨順法門故。

復有五種門。漸次成就五種功德。應知。何者五門。一者近門。二者大會眾門。三者宅門。四者屋門。五者園林遊戲地門。此五種門。初四種門。成就入功德。第五門。成就出功德。入第一門者。以禮拜阿彌陀佛。為生彼國故。得生安樂世界。是名入第一門。入第二門者。以讚歎阿彌陀佛。隨順名義稱如來名。依如來光明智相修行故。得入大會眾數。是名入第二門。入第三門者。以一心專念作願生彼。修奢摩他寂靜三昧行故。得入蓮華藏世界。是名入第三門。入第四門者。以專念觀察彼妙莊嚴。修毗婆舍那故。得到彼處。受用種種法味樂。是名入第四門。出第五門者



· 以大慈悲· 觀察一切苦惱眾生· 示應化身· 迴入生死園煩惱林中· 遊戲神通· 至教化地· 以本願力迴向故。是名出第五門。菩薩入四種門· 自利行成就· 應知。菩薩出第五門· 迴向利益他行成就· 應知。菩薩如是修五門行· 自利利他· 速得成就阿耨多羅三藐三菩提故。

無量壽修多羅優婆提舍願生偈略解義竟。

無量壽經優婆提舍願生偈




無量壽經優婆提舍願生偈註卷上

婆藪槃頭菩薩造

魏永寧寺北天竺沙門菩提流支譯論
魏西河石壁谷玄中寺沙門曇鸞註解

謹案龍樹菩薩十住毗婆沙云。菩薩求阿毗跋致。有二種道。一者難行道。二者易行道。難行道者。謂於五濁之世。於無佛時。求阿毗跋致為難。此難乃有多途。麤言五三。以示義意。一者外道相修譬反。善。亂菩薩法。二者聲聞自利。障大慈悲。三者無賴惡人。破他勝德。四者顛倒善果。能壞梵行。五者唯是自力。無他力持。如斯等事。觸目皆是。譬如陸路。步行則苦。易行道者。謂但以信佛因緣。願生淨土。乘佛願力。便得往生彼清淨土。佛力住持。即入大乘正定之聚。正定。即是阿毗跋致。譬如水路。乘船則樂。此無量壽經優婆提舍。蓋上行之極致。



·不退之風航者也。無量壽。是安樂淨土如來別號。釋迦牟尼佛在王舍城。及舍衛國。於大眾之中。說無量壽佛莊嚴功德。即以佛名號為經體。後聖者婆藪槃頭菩薩。服膺反一升如來大悲之教。傍經作願生偈。復造長行重釋。梵言優婆提舍。此間無正名相譯。若舉一隅。可名為論。所以無正名譯者。以此間本無佛故。如此間書。就孔子而稱經。餘人製作。皆名為子。國史國紀之徒。各別體例。然佛所說十二部經中。有論議經。名優婆提舍。若復佛諸弟子解佛經教。與佛義相應者。佛亦許名優婆提舍。以入佛法相故。此間云論。直是論議而已。豈得正譯彼名耶。又如女人。於子稱母。於兄云妹。如是等事。皆隨義各別。若但以女名。汎談母妹。乃不失女之大體。豈含尊卑之義乎。此所云論。亦復如是。是以仍因。如存梵音。曰優婆提舍。此論始終凡有二重。一是總說分。二是解義分。總說分者。



前五言偈盡是。解義分者。論曰已下長行盡是。所以為二重者。有二義。偈以頌經。為總攝故。論以釋偈。為解義故。無量壽者。言無量壽如來。壽命長遠不可思量也。經者。常也。言安樂國土。佛及菩薩清淨莊嚴功德。國土清淨莊嚴功德。能與眾生作大饒益。可常行於世。故名曰經。優婆提舍。是佛論議經名。願。是欲樂義。生者。天親菩薩願生彼安樂淨土如來淨華中生。故曰願生。偈。是句數義。以五言句略頌佛經。故名為偈。譯婆藪云天。譯槃頭言親。此人字天親。事在付法藏經。菩薩者。若具存梵音。應言菩提薩埵。菩提者。是佛道名。薩埵。或云眾生。或云勇健。求佛道眾生。有勇猛健志。故名菩提薩埵。今但言菩薩。譯者略耳。造。亦作也。庶因人重法。故云某造。是故言無量壽經優婆提舍願生偈。婆藪槃頭菩薩造。解論名目竟。



△偈中分為五念門。如下長行所釋。第一行四句偈。含有三念門。上三句是禮拜讚歎門。下一句是作願門。第二行論主自述。我依佛經造論。與佛教相應。所服有宗。何故云此。為成優婆提舍名故。亦是成上三門。起下二門。所以次之說。從第三行。盡二十三行。是觀察門。末後一行。是迴向門。分偈章門竟。

世尊我一心。歸命盡十方。無礙光如來。願生安樂國。

世尊者。諸佛通號。論智。則義無不達。語斷。則習氣無餘。智斷具足。能利世間。為世尊重。故曰世尊。此言意歸釋迦如來。何以得知。下句言我依修多羅。天親菩薩在釋迦如來像法之中。願釋迦如來經教。所以願生。願生有宗。故知此言歸於釋迦。若謂此意徧告諸佛。亦復無嫌。夫菩薩歸佛。如孝子之



歸父母。忠臣之歸君后。動靜非己。出沒必由。知恩報德。理宜先啟。又所願不輕。若如來不加威神。將何以達。乞加神力。所以仰告。我一心者。天親菩薩自督之詞。言念無礙光如來。願生安樂。心心相續。無他想間雜。問曰。佛法中無我。此中何以稱我。答曰。言我有三根本。一是邪見語。二是自大語。三是流布語。今言我者。天親菩薩自指之言。用流布語。非邪見自大也。歸命盡十方無礙光如來者。歸命。即是禮拜門。盡十方無礙光如來。即是讚歎門。何以知歸命是禮拜。龍樹菩薩造阿彌陀如來讚中。或言稽首禮。或言我歸命。或言歸命禮。此論長行中。亦言修五念門。五念門中。禮拜是一。天親菩薩既願往生。豈容不禮。故知歸命即是禮拜。然禮拜但是恭敬。不必歸命。歸命必是禮拜。若以此推。歸命為重。偈申己心。宜言歸命。論解偈義。汎談禮拜。彼此相成。於義彌顯。何



以知盡十方無礙光如來是讚歎門。下長行中言。云何讚歎門。謂稱彼如來名。如彼如來光明智相。如彼名義。欲如實修行相應故。依舍衛國所說無量壽經。佛解阿彌陀如來名號。何故號阿彌陀。彼佛光明無量。照十方國無所障礙。是故號阿彌陀。又彼佛壽命及其人民。無量無邊阿僧祇劫。故名阿彌陀。問曰。若言無礙光如來光明無量照十方國土無所障礙者。此間眾生。何以不蒙光照。光有所不照。豈非有礙耶。答曰。礙屬眾生。非光礙也。譬如日光周四天下。而盲者不見。非日光不周也。亦如密雲洪霖灌之。而頑石不潤。非雨不洽洽下也。若言一佛主領三千大千世界。是聲聞論中說。若言諸佛徧領十方無量無邊世界。是大乘論中說。天親菩薩今言盡十方無礙光如來。即是依彼如來名。如彼如來光明智相讚歎。故知此句是讚歎門。願生安樂國者。此一句是作願門。天親菩薩歸命之意也。其



安樂義。具在下觀察門中。問曰。大乘經論中。處處說眾生畢竟無生如虛空。云何天親菩薩言願生耶。答曰。說眾生無生如虛空。有二種。一者如凡夫所謂實眾生。如凡夫所見實生死。此所見事。畢竟無所有。如龜毛。如虛空。二者謂諸法因緣生故。即是不生。無所有如虛空。天親菩薩所願生者。是因緣義。因緣義故假名生。非如凡夫謂有實眾生實生死也。問曰。依何義說往生。答曰。於此間假名人中。修五念門。前念與後念作因。穢土假名人。淨土假名人。不得決定一。不得決定異。前心後心。亦復如是。何以故。若一則無因果。若異則非相續。是義觀一異門論中委曲釋。第一行三念門竟。

△次成優婆提舍名。又成上起下偈。

我依修多羅。真實功德相。
說願偈總持。與佛教相應。



此一行。云何成優婆提舍名。云何成上三門。起下二門。偈言
· 我依修多羅。與佛教相應。修多羅。是佛經名。我論佛經義
· 與經相應。以入佛法相故。得名優婆提舍。名成竟。成上三
門。起下二門。何所依。何故依。云何依。何所依者。依修多
羅。何故依者。以如來即真實功德相故。云何依者。修五念門
相應故。成上起下竟。修多羅者。十二部經中直說者名修多羅
。謂四阿含三藏等。三藏外大乘諸經。亦名修多羅。此中言依
修多羅者。是三藏外大乘修多羅。非阿含等經也。真實功德相
者。有二種功德。一者從有漏心生。不順法性。所謂凡夫人天
諸善。人天果報。若因若果。皆是顛倒。皆是虛偽。是故名不
實功德。二者從菩薩智慧清淨業起莊嚴佛事。依法性入清淨相
。是法不顛倒。不虛偽。名為真實功德。云何不顛倒。依法性
· 順二諦故。云何不虛偽。攝眾生入畢竟淨故。說願偈總持。



與佛教相應者。持。名不散不失。總。名以少攝多。偈。言五言句數。願。名欲樂往生。說。謂說諸偈論。總而言之。說所願生偈。總持佛經。與佛教相應。相應者。譬如函蓋相稱也。

觀彼世界相。 勝過三界道。

此已下。是第四觀察門。此門中分為二別。一者觀察器世間莊嚴成就。二者觀察眾生世間莊嚴成就。此句已下。至願生彼阿彌陀佛國。是觀器世間莊嚴成就。觀器世間中。復分為十七別。至文當目。此二句。即是第一事。名為觀察莊嚴清淨功德成就。此清淨是總相。佛本所以起此莊嚴清淨功德者。見三界是虛偽相。是輪轉相。是無窮相。如蚊尺音蠖屈伸音。循環。如蠶才音繭含反。不虛偽處。於不輪轉處。於不無窮處。得畢竟安樂大清淨處。

蠶衣。公殄反。

自縛。哀哉眾生。

締。

結不解。帝音。

此三界。

顛倒不淨。

欲置眾生於

不虛偽處。

於不輪轉處。

於不無窮處。

得畢竟安樂大清淨處。



是故起此清淨莊嚴功德也。成就者。言此清淨不可破壞。不可污染。非如三界。是污染相。是破壞相也。觀者。觀察也。彼者。彼安樂國也。世界相者。彼安樂世界清淨相也。其相別在下。勝過三界道。道者。通也。以如此因。得如此果。以如此果。酬如此因。通因至果。通果酬因。故名為道。三界者。一是欲界。所謂六欲天。四天下人。畜生。餓鬼。地獄等是也。二是色界。所謂初禪。二禪。三禪。四禪天等是也。三是無色界。所謂空處。識處。無所有處。非想非非想處天等是也。此三界。蓋是生死凡夫流轉之閻宅。雖復苦樂小殊。修短暫異。統而觀之。莫非有漏。倚伏相乘。循環無際。雜生觸受。四倒長拘。且因且果。虛偽相襲。安樂。是菩薩慈悲正觀之由生。如來神力本願之所建。胎卵溼生。緣茲高揖。業繫長維。從此永斷。續括之權。不待勸而彎弓。勞謙善讓。齊普賢而同德。



勝過三界。抑是近言。

究竟如虛空。廣大無邊際。

此二句。名莊嚴量功德成就。佛本所以起此莊嚴量功德者。見

三界狹

戶甲反

小。

墮

敗城阜。或垂反

陁

山絕坎。形音

陪

重土。一曰

階

如渚者。階丘。之與反

。或宮觀迫

迫

子格反

。或土田逼隘

陋。己賣反

。或志求路促。

或山河隔

塞。公危反

障。

或國界

分部。有如此等種種拘局事。是故菩薩興此莊嚴量功德願。願

我國土如虛空廣大無際。如虛空者。言來生者雖眾。猶若無也

。廣大無際者。成上如虛空義。何故如虛空。以廣大無際故。

成就者。言十方眾生往生者。若已生。若今生。若當生。雖無

量無邊。畢竟常如虛空。廣大無際。終無滿時。是故言究竟如

虛空。廣大無邊際。問曰。如維摩方丈。苞容有餘。何必國界

無貲

子支反

。乃稱廣大。

答曰。

所言廣大。

非必以畦

五十畝。下圭反

畹

三十畝。一遠一萬

。



反為喻。但言如空。亦何累方丈。又方丈之所苞容。在狹而廣。
。覈實_下論果報。豈若在廣而廣耶。
華反

正道大慈悲。出世善根生。

此二句。名莊嚴性功德成就。佛本何故起此莊嚴。見有國土。以愛欲故。則有欲界。以攀厭禪定故。則有色無色界。此三界皆是有漏邪道所生。長寢大夢。莫知怖出。是故興大悲心。願我成佛。以無上正見道。起清淨土。出於三界。性是本義。言此淨土。隨順法性。不非法本。事同華嚴經寶王如來性起義。又言積習成性。指法藏菩薩集諸波羅蜜積習所成。亦言性者。是聖種性。序法藏菩薩於世自在王佛所。悟無生法忍。爾時位名聖種性。於是性中。發四十八大願。修起此土。即曰安樂淨土。是彼因所得。果中說因。故名為性。又言性是必然義。不



改義。如海性一味。眾流入者必為一味。海味不隨彼改也。又如人身性不淨故。種種妙好色香美味。入身皆為不淨。安樂淨土諸往生者。無不淨色。無不淨心。畢竟皆得清淨平等無為法身。以安樂國土清淨性成就故。正道大慈悲出世善根生者。平等大道也。平等道所以名為正道者。平等是諸法體相。以諸法平等。故發心等。發心等。故道等。道等。故大慈悲等。大慈悲是佛道正因。故言正道大慈悲。慈悲有三緣。一者眾生緣。是小悲。二者法緣。是中悲。三者無緣。是大悲。大悲即出世善也。安樂淨土。從此大悲生故。故謂此大悲為淨土之根。故曰出世善根生。

淨光明滿足。如鏡日月輪。

此二句。名莊嚴形相功德成就。佛本所以起此莊嚴功德者。見



日行四域。光不周三方。庭燎反力小在宅。明不滿十仞。以是故起滿淨光明願。如日月光輪。滿足自體。彼安樂淨土。雖復廣大無邊。清淨光明無不充塞。故曰淨光明滿足。如鏡日月輪。

備諸珍寶性。具足妙莊嚴。

此二句。名莊嚴種種事功德成就。佛本何故起此莊嚴。見有國土以泥土為宮飾。以木石為華觀。或雕金鏤玉。意願不充。或營備百千。具受辛苦。以此故興大悲心。願我成佛。必使珍寶具足。嚴麗自然。相忘於有餘。自得於佛道。此莊嚴事。縱使毗首羯磨。工稱妙絕。積思竭想。豈能取圖。性者。本義也。能生既淨。所生焉得不淨。故經言。隨其心淨則佛土淨。是故言。備諸珍寶性。具足妙莊嚴。

無垢光燄熾。明淨曜世間。



此二句。名莊嚴妙色功德成就。佛本何故起此莊嚴。見有國土優劣不同。以不同故。高下以形。高下既形。是非以起。是非既起。長淪沒三有。是故興大悲心。起平等願。願我國土光燄熾盛。第一無比。不如人天金色。能有奪者。若為相奪。如明鏡在金邊則不現。今日時中金。比佛在時金則不現。佛在時金。比閻浮那金則不現。閻浮那金。比大海中轉輪王道中金沙則不現。轉輪王道中金沙。比金山則不現。金山。比須彌山金則不現。須彌山金。比三十三天瓔珞金則不現。三十三天瓔珞金。比跋摩天金則不現。跋摩天金。比兜率陀天金則不現。兜率陀天金。比化自在天金則不現。化自在天金。比他化自在天金則不現。他化自在天金。比安樂國中光明則不現。所以者何。彼土金光。從絕垢業生故。清淨無不成就故。安樂淨土。是無生忍菩薩淨業所起。阿彌陀如來法王所領。阿彌陀如來為增上



緣故。是故言。無垢光燄熾。明淨曜世間。曜世間者。曜二種世間也。

寶性功德草。柔輓左右旋。觸者生勝樂。過迦旃鄰陀。

此四句。名莊嚴觸功德成就。佛本何故起此莊嚴。見有國土。雖寶重金玉。不得為衣服。珍玩明鏡。無議於數具。斯緣悅於目。不便於身也。身眼二情。豈弗矛盾乎。是故願言。使我國土。人天六情。和於水乳。卒去楚越之勞。所以七寶柔輓。悅目便身。迦旃鄰陀者。天竺柔輓草名也。觸之者能生樂受。故以為喻。註者言。此間土石草木。各有定體。譯者何緣目彼寶為草耶。當以其葦。草得風貌。父蟲反。葦葦旋貌。一覽反。蔞。細草曰蔞。亡小反。故以草目之耳。余若參譯。當別有途。生勝樂者。觸迦旃鄰陀。生染著樂。觸彼輓寶。生法喜樂。二事相懸。非勝如何。是故言。寶性功德草



· 柔輓左右旋· 觸者生勝樂· 過迦旃鄰陀·

寶華千萬種· 彌覆池流泉· 微風動華葉· 交錯光亂轉·

此四句· 名莊嚴水功德成就。佛本何故起此願。見有國土· 或

澗云音· 溺江水大波· 謂之澗溺·· 洪濤大海波· 大率反·· 滓沫驚人。或凝澌流冰· 上支反·· 夾古甲反·· 潔凍相著· 大甲

反· 蹙迫· 子六反·· 伽懷恹失常· 他則反·· 向無安悅之情。背有恐值之慮。菩薩見

此· 興大悲心。願我成佛· 所有流泉池沼池· 之小反·· 與宮殿相稱事出經中

· 種種寶華· 布為水飾。微風徐扇· 映發有序。開神悅體· 無

一不可。是故言· 寶華千萬種· 彌覆池流泉· 微風動華葉· 交

錯光亂轉·

宮殿諸樓閣· 觀十方無礙· 雜樹異光色· 寶欄徧圍繞·

此四句· 名莊嚴地功德成就。佛本何故起此莊嚴。見有國土·

嶠高貌· 才消反·· 嶢牛消反·· 峻高· 俊音·· 嶺· 枯木橫岑· 峯才白反·· 峒山不齊貌· 五百反·· 崕深山谷· 亦山形音·· 嶺深無



力人。
反。莠。惡草貌。道多草。不可消音。茅。道多草。不可消音。盈壑。茫茫滄海。為絕目之川。嵐嵐廣澤。為無蹤之所。菩薩見此。興大悲願。願我國土。地平如掌。宮殿樓閣。鏡納十方。的無所屬。亦非不屬。寶樹寶欄。互為映飾。是故言。宮殿諸樓閣。觀十方無礙。雜樹異光色。寶欄徧圍繞。

無量寶交絡。羅網徧虛空。種種鈴發響。宣吐妙法音。

此四句。名莊嚴虛空功德成就。佛本何故起此莊嚴。見有國土

。煙雲塵霧。蔽障太虛。震烈霽。雨聲。士林反。霍。大雨。下郭反。從上而墮。不祥

哉。天火。葬才反。霓。虹青赤。或白。色陰氣。五結反。每自空來。憂慮百端。為之毛豎。菩薩見

此。興大悲心。願我國土。寶網交絡。羅徧虛空。鈴鐸。大各鈴。大各反。宮

商。鳴宣道法。視之無厭。懷道見德。是故言。無量寶交絡。

羅網徧虛空。種種鈴發響。宣吐妙法音。



雨華衣莊嚴。無量香普熏。

此二句。名莊嚴雨功德成就。佛本何故興此莊嚴。見有國土。欲以服飾布地。延請所尊。或欲以香華名寶。用表恭敬。而業貧感薄。是事不果。是故興大悲願。願我國土。常雨此物。滿眾生意。何故以雨為言。恐取著云。若常雨華衣。亦應填塞虛空。何緣不妨。是故以雨為喻。雨適時則無洪滔水漫大。他高反。之患。安樂報豈有累情之物乎。經言。日夜六時。雨寶衣。雨寶華。寶質柔輦。履踐其上。則下四寸。隨舉足時。還復如故。用訖入寶地。如水入坎。是故言。雨華衣莊嚴。無量香普熏。

佛慧明淨日。除世癡闇冥。

此二句。名莊嚴光明功德成就。佛本何故興此莊嚴。見有國土。雖復頂背日光。而為愚癡所闇。是故願言。使我國土所有光



明。能除癡闇。入佛智慧。不為無記之事。亦云安樂國土光明。從如來智慧報起。故能除世闇冥。經言。或有佛土。以光明為佛事。即是此也。故言。佛慧明淨日。除世癡闇冥。

梵聲悟深遠。微妙聞十方。

此二句。名莊嚴妙聲功德成就。佛本何故興此願。見有國土。雖有善法。而名聲不遠。有名聲雖遠。復不微妙。有名聲妙遠。復不能悟物。是故起此莊嚴。天竺國稱淨行為梵行。稱妙辭為梵言。彼國貴重梵天。多以梵為讚。亦言中國法與梵天通故也。聲者名也。名謂安樂土名。經言。若人但聞安樂淨土之名。欲願往生。亦得如願。此名悟物之證也。釋論言。如斯淨土。非三界所攝。何以言之。無欲故。非欲界。地居故。非色界。有色故。非無色界。蓋菩薩別業所致耳。出有而有曰微。出有者謂出




三有·而有者·謂淨土有也·。名能開悟曰妙。妙·好也·以名能悟物·故稱妙·。是故言·梵聲悟深遠·微妙聞十方。

正覺阿彌陀·法王善住持。

此二句·名莊嚴主功德成就。佛本何故興此願。見有國土·羅剎為君·則率土相噉。寶輪駐止馬·長句反·殿·則四域無虞。譬之風靡·豈無本耶。是故興願·願我國土·常有法王。法王善力之所住持。住持者·如黃鵠持子安·千齡更起。魚母念持子·經衆夏有水冬無水曰衆·火岳反·不壞。安樂國為正覺善持·其國豈有非正覺事耶。是故言·正覺阿彌陀·法王善住持。

如來淨華眾·正覺華化生。

此二句·名莊嚴眷屬功德成就。佛本何故興此願。見有國土·或以胞血為身器。或以糞尿為生元。或槐棘高圻·出猜狂之子



。或豎子婢腹。出卓犖^{零角反}之才。譏誚^{才召反}由之懷火。恥辱緣以抱冰。所以願言。使我國土。悉於如來淨華中生。眷屬平等。與奪無路。故言。如來淨華眾。正覺華化生。

愛樂佛法味。禪三昧為食。

此二句。名莊嚴受用功德成就。佛本何故興此願。見有國土。或探巢破卵。為饑^{盛食滿貌。饒飽也。多也。亡公反。}之饑。或懸沙指帛。為相慰之方。嗚呼諸子。實可痛心。是故興大悲願。願我國土。以佛法。以禪定。以三昧為食。永絕他食之勞。愛樂佛法味者。如日月燈明佛說法華經。六十小劫。時會聽者。亦坐一處。六十小劫。謂如食頃。無有一人若身若心而生懈倦。以禪定為食者。謂諸大菩薩常在三昧。無他食也。三昧者。彼諸人天若須食時。百味嘉饈。羅列在前。眼見色。鼻聞香。身受適悅。自然飽。



足。訖已化去。若須復現。其事在經。是故言。愛樂佛法味。禪三昧為食。

永離身心惱。受樂常無間。

此二句。名莊嚴無諸難功德成就。佛本何故興此願。見有國土。或朝預袞寵。夕惶斧鉞。或幼舍蓬藜。長列方丈。或鳴笳道出。歷經催還。有如是等種種違奪。是故願言。使我國土。安樂相續。畢竟無間。身惱者。飢渴寒熱殺害等也。心惱者。是非得失三毒等也。是故言。永離身心惱。受樂常無間。

大乘善根界。等無譏嫌名。女人及根缺。二乘種不生。

此四句。名莊嚴大義門功德成就。門者。通大義之門也。大義者。大乘所以也。如人造城。得門則入。若人得生安樂者。是則成就大乘之門也。佛本何故興此願。見有國土。雖有佛如來



賢聖等眾。由國濁故。分一說三。或以拓反聽眉致誚。或緣指語招譏。是故願言。使我國土。皆是大乘一味。平等一味。根敗種子。畢竟不生。女人殘缺。名字亦斷。是故言。大乘善根界。等無譏嫌名。女人及根缺。二乘種不生。問曰。案王舍城所說無量壽經。法藏菩薩四十八願中言。設我得佛。國中聲聞。有能計量知其數者。不取正覺。是有聲聞一證也。又十住毗婆沙中。龍樹菩薩造阿彌陀讚云。超出三界獄。目如蓮華葉。聲聞眾無量。是故稽首禮。是有聲聞二證也。又摩訶衍論中言。佛土種種不同。或有佛土純是聲聞僧。或有佛土純是菩薩僧。或有佛土菩薩聲聞會為僧。如阿彌陀安樂國等是也。是有聲聞三證也。諸經中有說安樂國處。多言有聲聞。不言無聲聞。聲聞即是二乘之一。論言乃至無二乘名。此云何會。答曰。以理推之。安樂淨土。不應有二乘。何以言之。夫有病則有藥。理



數之常也。法華經言·釋迦牟尼如來·以出五濁世故·分一為三。淨土既非五濁·無三乘明矣。法華經導諸聲聞·是人於何而得解脫。但離虛妄·名為解脫。是人實未得一切解脫。以未得無上道故。覈推此理·阿羅漢既未得一切解脫·必應有生。此人更不生三界。三界外除淨土更無生處。是以唯應於淨土生。如言聲聞者·是他方聲聞來生·仍本名故·稱為聲聞。如天帝釋生人中時·姓憍尸迦。後雖為天主。佛欲使人知其由來。與帝釋語時·猶稱憍尸迦。其此類也。又此論但言二乘種不生。謂安樂國不生二乘種子。亦何妨二乘來生耶。譬如橘栽不生江北·河洛果肆亦見有橘。又言鸚鵡不渡隴西·趙魏架桁亦有鸚鵡。此二物但言其種不渡。彼有聲聞亦如是。作如是解·經論則會。問曰·名以召事·有事乃有名。安樂國既無二乘女人根缺之事·亦何須復言無此三名耶。答曰·如輒心菩薩·不甚



勇猛。譏言聲聞。如人諂曲。或復懦弱。譏言女人。又如眼雖明而不識事。譏言盲人。又如耳雖聰而聽義不解。譏言聾人。又如舌雖語而訥口嚙吃。譏言瘖人。有如是等根雖具足。而有譏嫌之名。是故須言乃至無名。明淨土無如是等與奪之名。問曰。尋法藏菩薩本願。及龍樹菩薩所讚。皆似以彼國聲聞眾多為奇。此有何義。答曰。聲聞以實際為證。計不應更能生佛道根芽。而佛以本願不可思議神力。攝令生彼。必當復以神力生其無上道心。譬如鳩鳥入水。魚蚌咸死。犀牛觸之。死者皆活。如此不應生而生。所以可奇。然五不思議中。佛法最不可思議。佛能使聲聞復生無上道心。真不可思議之至也。

眾生所願樂。一切能滿足。

此二句。名莊嚴一切所求滿足功德成就。佛本何故興此願。見



有國土。或名高位重。潛處無由。或人凡姓鄙。悒出靡路。或修短繫業。制不在己。如阿私陀仙人類也。有如是等為業風所吹。不得自在。是故願言。使我國土。各稱所求。滿足情願。是故言。眾生所願樂。一切能滿足。

是故願生彼。阿彌陀佛國。

此二句。結成上觀察十七種莊嚴國土成就。所以願生。釋器世間清淨。訖之於上。

△次觀眾生世間清淨。此門中分為二別。一者觀察阿彌陀如來莊嚴功德。二者觀察彼諸菩薩莊嚴功德。觀察如來莊嚴功德中有八種。至文當目。問曰。有論師汎解眾生名義。以其輪轉三有。受眾多生死。故名眾生。今名佛菩薩為眾生。是義云何。答曰。經言一法有無量名。一名有無量義。如以受眾多生死故名



為眾生者。此是小乘家釋三界中眾生名義。非大乘家眾生名義也。大乘家所言眾生者。如不增不減經言。言眾生者。即是不生不滅義。何以故。若有生。生已復生。有無窮過故。有不生而生過故。是故無生。若有生。可有滅。既無生。何得有滅。是故無生無滅是眾生義。如經中言。五受陰通達空無所有。是苦義。斯其類也。

無量大寶王。微妙淨華臺。

此二句。名莊嚴座功德成就。佛本何故莊嚴此座。見有菩薩。於末後身敷草而坐。成阿耨多羅三藐三菩提。人天見者。不生增上信。增上恭敬。增上愛樂。增上修行。是故願言。我成佛時。使無量大寶王微妙淨華臺以為佛座。無量者。如觀無量壽經言。七寶地上。有大寶蓮華王座。蓮華一一葉。作百寶色。



有八萬四千脈。猶如天畫。脈有八萬四千光。華葉小者。縱廣二百五十由旬。如是華有八萬四千葉。一一葉間。有百億摩尼珠王以為映飾。一一摩尼放千光明。其光如蓋。七寶合成。徧覆地上。釋迦毗楞伽寶以為其臺。此蓮華臺。八萬金剛甄叔迦寶。梵摩尼寶。妙真珠網。以為校飾。於其臺上。自然而有四柱寶幢。一一寶幢。如百千萬億須彌山。幢上寶幔。如夜摩天宮。有五百億微妙寶珠以為映飾。一一寶珠。有八萬四千光。一一光。作八萬四千異種金色。一一金色。徧安樂寶土。處處變化。各作異相。或為金剛臺。或作真珠網。或作雜華雲。於十方面。隨意變現。施作佛事。如是等事。出過數量。是故言。無量大寶王。微妙淨華臺。

相好光一尋。色像超群生。



此二句。名莊嚴身業功德成就。佛本何故莊嚴如此身業。見有佛身。受一丈光明。於人身光。不甚超絕。如轉輪王相好亦大同。提婆達多所滅唯二。致令阿闍世王以茲惑亂。刪闍耶等敢如螳螂。或如此類也。是故莊嚴如此身業。案此問詰訓。六尺曰尋。如觀無量壽經言。阿彌陀如來身高六十萬億那由他恆河沙由旬。佛圓光如百億三千大千世界。譯者以尋而言。何其晦呼內反乎。里舍間人。不簡縱橫長短。咸謂橫舒兩手臂為尋。若譯者或取此類。用準阿彌陀如來。舒臂為言。故稱一尋者。圓光亦應徑六十萬億那由他恆河沙由旬。是故言。相好光一尋。色像超群生。問曰。觀無量壽經言。諸佛如來是法界身。入一切眾生心想中。是故汝等心想佛時。是心即是三十二相。八十隨形好。是心作佛。是心是佛。諸佛正徧知海。從心想生。是義云何。答曰。身名集成。界名事別。如眼界緣根色空明作意五



因緣生。名為眼界。是眼但自行已緣。不行他緣。以事別故。耳鼻等界亦如是。言諸佛如來是法界身者。法界是眾生心法也。以心能生世間出世間一切諸法。故名心為法界。法界能生諸如來相好身。亦如色等能生眼識。是故佛身名法界身。是身不行他緣。是故入一切眾生心想中。心想佛時。是心即是三十二相八十隨形好者。當眾生心想佛時。佛身相好。顯現眾生心中也。譬如水清則色像現。水之與像。不一不異。故言佛相好身即是心想也。是心作佛者。言心能作佛也。是心是佛者。心外無佛也。譬如火從木出。火不能離木也。以不離木故。則能燒木。木為火燒。木即為火也。諸佛正徧知海從心想生者。正徧知者。真正如法界而知也。法界無相。故諸佛無知也。以無知。故無不知也。無知而知者。是正徧知也。是知深廣不可測量。故譬海也。



如來微妙聲。梵響聞十方。

此二句。名莊嚴口業功德成就。佛本何故興此莊嚴。見有如來。名似不尊。如外道推車人。稱瞿曇姓。成道日聲。唯徹梵天。是故願言。使我成佛。妙聲遐布。聞者悟忍。是故言。如來微妙聲。梵響聞十方。

同地水火風。虛空無分別。

此二句。名莊嚴心業功德成就。佛本何故興此莊嚴。見有如來說法云。此黑此白。此不黑不白。下法中法上法上上法。有如是等無量差別品。似有分別。是故願言。使我成佛。如地荷負。無輕重之殊。如水潤長。無菴草之異。如火成熟。無芳臭之別。如風起發。無眠寤之差。如空苞受。無開塞之念。得之於內。物安於外。虛往實歸。於是乎息。是故言。同地水火



風·虛空無分別。

於是乎息·疑
是功用皆息·

天人不動眾·清淨智海生。

此二句·名莊嚴大眾功德成就。佛本何故起此莊嚴。見有如來說法輪下·所有大眾·諸根性欲種種不同。於佛智慧·若退若沒·以不等故·眾不純淨。所以興願·願我成佛。所有天人·皆從如來智慧清淨海生。海者·言佛一切種智深廣無涯·不宿二乘雜善中下死屍。喻之如海。是故言·天人不動眾·清淨智海生。不動者·言彼天人成就大乘根·不可傾動也。

如須彌山王·勝妙無過者。

此二句·名莊嚴上首功德成就。佛本何故起此願。見有如來眾中·或有強梁者·如提婆達多流比。或有國王與佛並治·不知甚推佛。或有請佛·以他緣廢忘。有如是等·似上首力不成就



。是故願言。我為佛時。願一切大眾。無能生心敢與我等。唯
一法王。更無俗王。是故言。如須彌山王。勝妙無過者。

天人丈夫眾。恭敬繞瞻仰。

此二句。名莊嚴主功德成就。佛本何故起此莊嚴。見有佛如來
。雖有大眾。眾中亦有不甚恭敬。如一比丘語釋迦牟尼佛。若
不與我解十四難。我當更學餘道。亦如居迦離謗舍利弗。佛三
語而三不受。又如諸外道輩。假入佛眾。而常伺求佛短。又如
第六天魔。常於佛所作諸留難。有如是等種種不恭敬相。是故
願言。使我成佛。天人大眾恭敬無倦。所以但言天人者。淨土
無女人及八部鬼神故也。是故言。天人丈夫眾。恭敬繞瞻仰。

觀佛本願力。遇無空過者。能令速滿足。功德大寶海。

此四句。名莊嚴不虛作住持功德成就。佛本何故起此莊嚴。見



有如來。但以聲聞為僧。無求佛道者。或有值佛而不免三途。善星。提婆達多。居迦離等是也。又人聞佛名號。發無上道心。遇惡因緣。退入聲聞辟支佛地者。有如是等空過者。退沒者。是故願言。使我成佛時。值遇我者。皆速疾滿足無上大寶。是故言。觀佛本願力。遇無空過者。能令速滿足。功德大寶海。住持義如上。觀佛莊嚴八種功德。訖之於上。

△次觀安樂國諸大菩薩四種莊嚴功德成就。問曰。觀如來莊嚴功德。何所闕少。復須觀菩薩功德耶。答曰。如有明君。則有賢臣。堯舜之稱無為。是其比也。若使但有如來法王。而無大菩薩法臣。於翼贊道。豈足云滿。亦如薪積小。則火不大。如經言。阿彌陀佛國。有無量無邊諸大菩薩。如觀世音。大勢至等。皆當一生於他方次補佛處。若人稱名憶念者。歸依者。觀察者。如法華經普門品說。無願不滿。然菩薩愛樂功德。如海吞



流。無止足情。亦如釋迦牟尼如來。聞一目闍比丘呬言。誰愛功德。為我維鍼。爾時如來從禪定起。來到其所。語言。我愛福德。遂為其維鍼。爾時失明比丘暗聞佛語聲。驚喜交集。白佛言。世尊。世尊功德猶未滿耶。佛報言。我功德圓滿。無所復須。但我此身從功德生。知功德恩分故。是故言愛。如所問觀佛功德。實無願不充。所以復觀菩薩功德者。有如上種種義故耳。

安樂國清淨。常轉無垢輪。化佛菩薩日。如須彌住持。


佛本何故起此莊嚴。見有佛土。但是小菩薩。不能於十方世界廣作佛事。或但聲聞人天。所利狹小。是故興願。願我國中有無量大菩薩眾。不動本處。徧至十方。種種應化。如實修行。常作佛事。譬如日在天上。而影現百川。日豈來耶。豈不來



耶。如大集經言。譬如有人善治堤塘。量其所宜。及放水時。不加心力。菩薩亦如是。先治一切諸佛及眾生應供養應教化種種堤塘。及入三昧。身心不動。如實修行。常作佛事。如實修行者。雖常修行。實無所修行也。是故言。安樂國清淨。常轉無垢輪。化佛菩薩日。如須彌住持。

無垢莊嚴光。一念及一時。普照諸佛會。利益諸群生。

佛本何故起此莊嚴。見有如來眷屬。欲供養他方無量諸佛。或欲教化無量眾生。此沒彼出。先南後北。不能以一念一時。放光普照。徧至十方世界。教化眾生。有出沒前後相故。是故興願。願我佛土諸大菩薩。於一念時頃。徧至十方。作種種佛事。是故言。無垢莊嚴光。一念及一時。普照諸佛會。利益諸群生。問曰。上章云。身不動搖。而徧至十方。不動而至。豈非



是一時義耶。與此若為差別。答曰。上但言不動而至。或容有前後。此言無前無後。是為差別。亦是成上不動義。若不一時。則是往來。若有往來。則非不動。是故為成上不動義故。須觀一時。

雨天樂華衣。妙香等供養。讚諸佛功德。無有分別心。

佛本何故起此莊嚴。見有佛土。菩薩人天志趣不廣。不能徧至十方無窮世界。供養諸佛如來大眾。或以己土穢濁。不敢向詣淨鄉。或以所居清淨。鄙薄穢土。以如此等種種局分。於諸佛如來所。不能周徧供養。發起廣大善根。是故願言。我成佛時。願我國土一切菩薩聲聞天人大眾。徧至十方一切諸佛大會處所。雨天樂天華天衣天香。以巧妙辯辭。供養讚歎諸佛功德。雖歎穢土如來大慈謙忍。不見佛土有雜穢相。雖歎淨土如來無



量莊嚴。不見佛土有清淨相。何以故。以諸法等故。諸如來等。是故諸佛如來名為等覺。若於佛土起優劣心。假使供養如來。非法供養也。是故言。兩天樂華衣。妙香等供養。讚諸佛功德。無有分別心。

何等世界無。佛法功德寶。我願皆往生。示佛法如佛。

佛本何故起此願。見有輕心菩薩。但樂有佛國土修行。無慈悲堅牢心。是故興願。願我成佛時。我土菩薩。皆慈悲勇猛堅固志願。能捨清淨土。至他方無佛法僧處。住持莊嚴佛法僧寶。示如有佛。使佛種處處不斷。是故言。何等世界無。佛法功德寶。我願皆往生。示佛法如佛。觀菩薩四種莊嚴功德成就。訖之於上。

△次下四句。是迴向門。



我作論說偈。願見彌陀佛。善共諸眾生。往生安樂國。
此四句。是論主迴向門。迴向者。迴己功德。普施眾生。共見
阿彌陀如來。生安樂國。

無量壽修多羅章句。我以偈頌總說竟。

問曰。天親菩薩迴向章中。言普共諸眾生。往生安樂國。此指
共何等眾生耶。答曰。案王舍城所說無量壽經。佛告阿難。十
方恆河沙諸佛如來。皆共稱歎無量壽佛威神功德不可思議。諸
有眾生。聞其名號。信心歡喜。乃至一念至心迴向。願生彼國
。即得往生。住不退轉。唯除五逆誹謗正法。案此而言。一切
外凡夫人。皆得往生。又如觀無量壽經。有九品往生。下下品
生者。或有眾生作不善業。五逆十惡。具諸不善。如此愚人。
以惡業故。應墮惡道。經歷多劫。受苦無窮。如此愚人。臨命



終時。遇善知識種種安慰。為說妙法。教令念佛。此人苦逼。不違念佛。善友告言。汝若不能念者。應稱無量壽佛。如是至心令聲不絕。具足十念。稱南無阿彌陀佛。稱佛名故。於念念中除八十億劫生死之罪。命終之時。見金蓮華猶如日輪。住其人前。如一念頃即得往生極樂世界。於蓮華中。滿十二大劫。蓮華方開。當以此消五逆罪也。觀世音。大勢至。以大悲音聲。為其廣說諸法實相除滅罪法。聞已歡喜。應時即發菩提之心。是名下品下生者。以此經證。明知下品凡夫。但令不誹謗正法。信佛因緣。皆得往生。問曰。無量壽經言。願往生者。皆得往生。唯除五逆誹謗正法。觀無量壽經言。作五逆十惡具諸不善。亦得往生。此二經云何會。答曰。一經以具二種重罪。一者五逆。二者誹謗正法。以此二種罪故。所以不得往生。一經但言作十惡五逆等罪。不言誹謗正法。以不謗正法故。是故得生。問曰。



假使一人具五逆罪。而不誹謗正法。經許得生。復有一人但誹謗正法。而無五逆諸罪。願往生者。得生與否。答曰。但令誹謗正法。雖更無餘罪。必不得生。何以言之。經言。五逆罪人。墮阿鼻大地獄中。具受一劫重罪。誹謗正法人。墮阿鼻大地獄中。此劫若盡。復轉至他方阿鼻大地獄中。如是展轉經百千阿鼻大地獄。佛不記得出時節。以誹謗正法罪極重故。又正法者。即是佛法。此愚癡人既生誹謗。安有願生佛土之理。假使但貪彼土安樂而願生者。亦如求非水之冰。無煙之火。豈有得理。問曰。何等相是誹謗正法。答曰。若言無佛無佛法。無菩薩無菩薩法。如是等見。若心自解。若從他受。其心決定。皆名誹謗正法。問曰。如是等計。但是己事。於眾生有何苦惱。踰於五逆重罪耶。答曰。若無諸佛菩薩說世間出世間善道。教化眾生者。豈知有仁義禮智信耶。如是世間一切善法皆斷。出



世間一切賢聖皆滅。汝但知五逆罪為重。而不知五逆罪從無正法生。是故謗正法人其罪最重。問曰。業道經言。業道如稱。重者先牽。如觀無量壽經言。有人造五逆十惡。具諸不善。應墮惡道。經歷多劫。受無量苦。臨命終時。遇善知識。教稱南無阿彌陀佛。如是至心令聲不絕。具足十念。便得往生安樂淨土。即入大乘正定之聚。畢竟不退。與三途諸苦永隔。先牽之義。於理如何。又曠劫已來。備造諸行有漏之法。繫屬三界。但以十念念阿彌陀佛。便出三界。繫業之義。復欲云何。答曰。汝謂五逆十惡繫業等為重。以下下品人十念為輕。應為罪所牽。先墮地獄。繫在三界者。今當以義校量。輕重之義。在心。在緣。在決定。不在時節久近多少也。云何在心。彼造罪人。自依止虛妄顛倒見生。此十念者。依善知識方便安慰。聞實相法生。一實一虛。豈得相比。譬如千歲閻室。光若暫至。即



便明朗。聞豈得言在室千歲而不去耶。是名在心。云何在緣。彼造罪人。自依止妄想心。依煩惱虛妄果報眾生。此十念者。依止無上信心。依阿彌陀如來方便莊嚴真實清淨無量功德名號生。譬如有人被毒箭所中。截筋破骨。聞滅除藥鼓。即箭出毒除。首楞嚴經言。譬如有藥。名曰滅除。若鬪戰時。用以塗鼓。聞鼓聲者。箭出毒除。菩薩摩訶薩亦復如是。住首楞嚴三昧。聞其名者。三毒之箭。自然拔出。豈可得言彼箭深毒厲。聞鼓音聲不能拔箭去毒耶。是名在緣。云何在決定。彼造罪人。依止有後心。有心間生。此十念者。依止無後心。無間心生。是名決定。校量三義。十念者重。重者先牽。能出三有。兩經一義耳。問曰。幾時名為一念。答曰。百一生滅。名一剎那。六十剎那。名為一念。此中云念者。不取此時節也。但言憶念阿彌陀佛。若總相。若別相。隨所觀緣。心無他想。十念相續。名為十念。但稱名號。亦復如是。問曰。心若他緣。攝之令還。可知念之多少。但知多少。復非無間。若



凝心注想。復依何可得記念之多少。答曰。經言十念者。明業事成辦耳。不必須知頭數也。如言螻蛄不識春秋。伊蟲豈知朱陽之節乎。知者言之耳。十念業成者。是亦通神者言之耳。但積念相續。不緣他事便罷。復何暇須知念之頭數也。若必須知。亦有方便。必須口授。不得題之筆點。

無量壽經優婆提舍願生偈註卷上



無量壽經優婆提舍願生偈註卷下

論曰。

論曰已下。此是解義分。此分中義有十重。一者願偈大意。二者起觀生信。三者觀行體相。四者淨入願心。五者善巧攝化。六者離菩提障。七者順菩提門。八者名義攝對。九者願事成就。十者利行滿足。論者。議也。言議偈所以也。曰者。詞也。指下諸句。是議釋偈詞也。故言論曰。

△願偈大意者。

此願偈明何義。示現觀彼安樂世界。見阿彌陀如來。願生彼國故。

△起觀生信者。此分中又有二重。一者示五念力。二者出五念門



。示五念力者。

云何觀。云何生信心。若善男子善女人。修五念門行成就。畢竟得生安樂國土。見彼阿彌陀佛。

△出五念門者

何等五念門。一者禮拜門。二者讚歎門。三者作願門。四者觀察門。五者迴向門。

門者。入出義也。如人得門。則入出無礙。前四念。是入安樂淨土門。後一念。是出慈悲教化門。

云何禮拜。身業禮拜阿彌陀如來應正徧知。

諸佛如來德有無量。德無量故。德號亦無量。若欲具談。紙筆不能載也。是以諸經或舉十名。或騰三號。蓋存至宗而已。豈此盡耶。所言三號。即此如來應正徧知也。如來者。如法相解



。如法相說。如諸佛安隱道來。此佛亦如是來。更不去後有中。故名如來。應者。應供也。佛結使除盡。得一切智慧。應受一切天地眾生供養。故曰應也。正徧知者。知一切諸法實不壞相。不增不減。云何不壞。心行處滅。言語道過。諸法如涅槃相不動。故名正徧知。無礙光義。如前偈中解。

為生彼國意故。

何故言此。菩薩之法。常以晝三時。夜三時。禮十方一切諸佛。不必有願生意。今應常作願生意。故禮阿彌陀如來也。

云何讚歎。口業讚歎。

讚者。讚揚也。歎者。歌歎也。讚歎非口不宣。故曰口業也。

稱彼如來名。如彼如來光明智相。如彼名義。欲如實修行相應



故。

稱彼如來名者。謂稱無礙光如來名也。如彼如來光明智相者。佛光明是智慧相也。此光明照十方世界無有障礙。能除十方眾生無明黑闇。非如日月珠光。但破空穴中闇也。如彼名義。欲如實修行相應者。彼無礙光如來名號。能破眾生一切無明。能滿眾生一切志願。然有稱名憶念。而無明猶在。而不滿所願者。何者。由不如實修行。與名義不相應故也。云何為不如實修行。與名義不相應。謂不知如來是實相身。是為物身。又有三種不相應。一者信心不淳。若存若亡故。二者信心不一。無決定故。三者信心不相續。餘念間故。此三句。展轉相成。以信心不淳。故無決定。無決定。故念不相續。亦可念不相續。故不得決定信。不得決定信。故心不淳。與此相違。名與實修行相應。是故論主建言我一心。問曰。名為法指。如指指月。若



稱佛名號。便得滿願者。指月之指。應能破闇。若指月之指。不能破闇。稱佛名號。亦何能滿願耶。答曰。諸法萬差。不可一概。有名即法。有名異法。名即法者。諸佛菩薩名號。般若波羅蜜。及陀羅尼章句。禁呪音辭等是也。如禁腫辭云。日出東方。乍赤乍黃等句。假使酉亥行禁。不關日出。而腫得差。亦如行師對陣。但一切齒中誦臨兵鬪者皆陳列在前。行誦此九字。五兵之所不中。抱朴子謂之要道者也。又苦轉筋者。以木瓜對火熨之則愈。復有人但呼木瓜名亦愈。吾身得其效也。如斯近事。世間共知。況不可思議境界者乎。滅除藥塗鼓之喻。復是一事。此喻已彰於前。故不重引。有名異法者。如指指月等名也。

云何作願。心常作願。一心專念。畢竟往生安樂國土。欲如實修行奢摩他故。



譯奢摩他曰止。止者。止心一處。不作惡也。此譯名乃不乖大意。於義未滿。何以言之。如止心鼻端。亦名為止。不淨觀止貪。慈悲觀止瞋。因緣觀止癡。如是等亦名為止。如人將行不行。亦名為止。是知止語浮漫。不正得奢摩他名也。如椿柘榆柳。雖皆名木。若但云木。安得榆柳耶。奢摩他云止者。今有三義。一者一心專念阿彌陀如來。願生彼土。此如來名號。及彼國土名號。能止一切惡。二者彼安樂土。過三界道。若人生彼國。自然止身口意惡。三者阿彌陀如來正覺住持力。自然止求聲聞辟支佛心。此三種止。從如來如實功德生。是故言。欲如實修行奢摩他故。

云何觀察。智慧觀察。正念觀彼。欲如實修行毗婆舍那故。

譯毗婆舍那曰觀。但汎言觀。義亦未滿。何以言之。如觀身無



常苦空無我九相等。皆名為觀。亦如上木名。不得椿柘也。毗婆舍那云觀者。亦有二義。一者在此作想。觀彼三種莊嚴功德。此功德如實故。修行者亦得如實功德。如實功德者。決定得生彼土。二者一得生彼淨土。即見阿彌陀佛。未證淨心菩薩。畢竟得證平等法身。與淨心菩薩。與上地菩薩。畢竟同得寂滅平等。是故言。欲如實修行毗婆舍那故。

彼觀察有三種。何等三種。一者觀察彼佛國土莊嚴功德。二者觀察阿彌陀佛莊嚴功德。三者觀察彼諸菩薩莊嚴功德。

心緣其事曰觀。觀心分明曰察。

云何迴向。不捨一切苦惱眾生。心常作願迴向為首。得成就大悲心故。

迴向有二種相。一者往相。二者還相。往相者。以己功德迴施



一切眾生。作願共往生彼阿彌陀如來安樂淨土。還相者。生彼土已。得奢摩他毗婆舍那方便力成就。迴入生死稠林。教化一切眾生共向佛道。若往若還。皆為拔眾生渡生死海。是故言。迴向為首。得成就大悲心故。

△觀行體相者。此分中有二體。一者器體。二者眾生體。器分中又有三重。一者國土體相。二者示現自利利他。三者入第一義諦。國土體相者。

云何觀察彼佛國土莊嚴功德。彼佛國土莊嚴功德者。成就不可思議力故。如彼摩尼如意寶性。相似相對法故。

不可思議力者。總指彼佛國土十七種莊嚴功德力不可得思議也。諸經統言有五種不可思議。一者眾生多少不可思議。二者業力不可思議。三者龍力不可思議。四者禪定力不可思議。五者



佛法力不可思議。此中佛土不可思議。有二種力。一者業力。謂法藏菩薩出世善根大願業力所成。二者正覺阿彌陀法王善住持力所攝。此不可思議。如下十七種。一一相皆不可思議。至文當釋。如彼摩尼如意寶性相似相對者。借彼摩尼如意寶性。示安樂佛土不可思議性也。諸佛入涅槃時。以方便力。留碎身舍利。以福眾生。眾生福盡。此舍利變為摩尼如意寶珠。此珠多在大海中。大龍王以為首飾。若轉輪聖王出世。以慈悲方便。能得此珠。於閻浮提作大饒益。若須衣服飲食燈明樂具。隨意所欲種種物時。王便潔齋。置珠於長竿頭。發願言。若我實是轉輪王者。願寶珠雨如此之物。若徧一里。若十里。若百里。隨我心願。爾時即便於虛空中雨種種物。皆稱所須。滿足天下一切人願。以此寶性力故。彼安樂佛土亦如是。以安樂性種種成就故。相似相對者。彼寶珠力。求衣食者。能雨衣食等物。



·稱求者意·非是不求。彼佛土則不然。性滿足成就故·無所
乏少片取彼性為喻·故言相似相對。又彼寶但能與眾生衣食等
願·不能與眾生無上道願。又彼寶但能與眾生一身願·不能與
眾生無量身願。有如是等無量差別·故言相似。

觀察彼佛國土莊嚴功德成就者·有十七種應知。何等十七。一
者莊嚴清淨功德成就。二者莊嚴量功德成就。三者莊嚴性功德
成就。四者莊嚴形相功德成就。五者莊嚴種種事功德成就。六
者莊嚴妙色功德成就。七者莊嚴觸功德成就。八者莊嚴三種功
德成就。九者莊嚴雨功德成就。十者莊嚴光明功德成就。十一
者莊嚴妙聲功德成就。十二者莊嚴主功德成就。十三者莊嚴眷
屬功德成就。十四者莊嚴受用功德成就。十五者莊嚴無諸難功
德成就。十六者莊嚴大義門功德成就。十七者莊嚴一切所求滿



足功德成就。

先舉章門。次續提釋。

莊嚴清淨功德成就者。偈言。觀彼世界相。勝過三界道故。

此云何不思議。有凡夫人煩惱成就。亦得生彼淨土。三界繫業。畢竟不牽。則是不斷煩惱。得涅槃分。焉可思議。

莊嚴量功德成就者。偈言。究竟如虛空。廣大無邊際故。

此云何不思議。彼國人天。若意欲宮殿樓閣。若廣一由旬。若百由旬。若千由旬。千間萬間。隨心所成。人各如此。又十方世界眾生願往生者。若已生。若今生。若當生。一時一日之頃。算數所不能知其多少。而彼世界常若虛空。無迫迮相。彼中眾生。住如此量中。志願廣大。亦如虛空無有限量。彼國土量。能成眾生心行量。何可思議。



莊嚴性功德成就者。偈言。正道大慈悲。出世善根生故。

此云何不思議。譬如迦羅求羅蟲。其形微小。若得大風。身如大山。隨風大小。為己身相。生安樂眾生亦復如是。生彼正道世界。即成就出世善根。入正定聚。亦如彼蟲。非身而身。焉可思議。

莊嚴形相功德成就者。偈言。淨光明滿足。如鏡日月輪故。

此云何不思議。夫忍辱得端正。我心影響也。一得生彼。無瞋忍之殊。人天色像。平等妙絕。蓋淨光之力也。彼光非心行。而為心行之事。焉可思議。

莊嚴種種事功德成就者。偈言。備諸珍寶性。具足妙莊嚴故。

此云何不思議。彼種種事。或一寶。十寶。百千種寶。隨心稱



意。無不具足。若欲令無。倏焉化沒。心得自在。有踰神通。安可思議。

莊嚴妙色功德成就者。偈言。無垢光燄熾。明淨曜世間故。

此云何不思議。其光曜事。則映徹表裏。其光曜心。則終盡無明。光為佛事。焉可思議。

莊嚴觸功德成就者。偈言。寶性功德草。柔輒左右旋。觸者生勝樂。過迦旃鄰陀故。

此云何不思議。夫寶例堅強。而此柔輒。觸樂應著。而此增道。事同愛作。何可思議。有菩薩字愛作。形容端正。生人染著。經言。染之者。或生天上。或發菩提心。

莊嚴三種功德成就者。有三種事。應知。何等三種。一者水。



二者地。三者虛空。

此三種所以并言。以同類者故也。何以言之。一者六大類。所謂虛空識地水火風。二者無分別類。所謂地水火風虛空。但言三類者。識一大。屬眾生世間故。火一大。彼中無故。雖有風。風不可見故。無住處故。是以六大五類中。取有而可莊嚴三種并言之。

莊嚴水功德成就者。偈言。寶華千萬種。彌覆池流泉。微風動華葉。交錯光亂轉故。

此云何不思議。彼淨土人天。非水穀身。何須水耶。清淨成就。不須洗濯。復何用水耶。彼中無四時。常調適不煩熱。復何須水耶。不須而有。當有所以。經言。彼諸菩薩及聲聞。若入寶池。意欲令水沒足。水即沒足。欲令至膝。水即至膝。欲令



至腰。水即至腰。欲令至頸。水即至頸。欲令灌身。自然灌身。欲令還復。水輒還復。調和冷煖。自然隨意。開神悅體。蕩除心垢。清明澄潔。淨若無形。寶沙映徹。無深不照。微瀾迴流。轉相灌注。安詳徐逝。不遲不疾。波揚無量自然妙聲。隨其所應。莫不聞者。或聞佛聲。或聞法聲。或聞僧聲。或聞寂靜聲。空無我聲。大慈悲聲。波羅蜜聲。或聞十力無畏不共法聲。諸通慧聲。無所作聲。不起滅聲。無生忍聲。乃至甘露灌頂眾妙法聲。如是等聲。稱其所聞。歡喜無量。隨順清淨離欲寂滅真實之義。隨順三寶力無所畏不共之法。隨順通慧菩薩聲聞所行之道。無有三途苦難之名。但有自然快樂之音。是故其國名曰安樂。此水為佛事。安可思議。


莊嚴地功德成就者。偈言。宮殿諸樓閣。觀十方無礙。雜樹異光色。寶欄徧圍繞故。



此云何不思議。彼種種事。或一寶十寶百寶無量寶。隨心稱意。莊嚴具足。此莊嚴事。如淨明鏡。十方國土淨穢諸相。善惡業緣。一切悉現。彼中人天見斯事故。探湯不及之情。自然成就。亦如諸大菩薩。以照法性等寶為冠。此寶冠中。皆見諸佛。又了達一切諸法之性。又如佛說法華經時。放眉間光。照於東方萬八千土。皆如金色。從阿鼻獄。上至有頂。諸世界中六道眾生。生死所趣。善惡業緣。受報好醜。於此悉見。蓋斯類也。此影為佛事。安可思議。

莊嚴虛空功德成就者。偈言。無量寶交絡。羅網徧虛空。種種鈴發響。宣吐妙法音故。

此云何不思議。經言。無量寶網。彌覆佛土。皆以金縷真珠。百千雜寶。奇妙珍異。莊嚴校飾。周匝四面。垂以寶鈴。光色



晃耀。盡極嚴麗。自然德風。徐起微動。其風調和。不寒不暑。溫涼柔輒。不遲不疾。吹諸羅網及眾寶樹。演發無量微妙法音。流布萬種溫雅德香。其有聞者。塵勞垢習。自然不起。風觸其身。皆得快樂。此聲為佛事。焉可思議。

莊嚴雨功德成就者。偈言。雨華衣莊嚴。無量香普熏故。

此云何不思議。經言。風吹散華。徧滿佛土。隨色次第。而不雜亂。柔輒光澤。馨香芬烈。足履其上。陷下四寸。隨舉足已。還復如故。華用已訖。地輒開裂。以次化沒。清淨無遺。隨其時節。風吹散華。如是六返。又眾寶蓮華。周滿世界。一一寶華。百千億葉。其華光明。無量種色。青色青光。白色白光。玄黃朱紫。光色赫然。暉暉煥爛。明曜日月。一一華中。出三十六百千億光。一一光中。出三十六百千億佛。身色紫金。



相好殊特。一一諸佛。又放百千光明。普為十方說微妙法。如是諸佛。各各安立無量眾生於佛正道。華為佛事。安可思議。

莊嚴光明功德成就者。偈言。佛慧明淨日。除世癡闇冥故。

此云何不思議。彼土光明。從如來智慧報起。觸之者。無明黑闇。終必消除。光明非慧。能為慧用。焉可思議。

莊嚴妙聲功德成就者。偈言。梵聲悟深遠。微妙聞十方故。

此云何不思議。經言。若人但聞彼國土清淨安樂。剋念願生。亦得往生。即入正定聚。此是國土名字為佛事。安可思議。

莊嚴主功德成就者。偈言。正覺阿彌陀。法王善住持故。

此云何不思議。正覺阿彌陀不可思議。彼安樂淨土。為正覺阿彌陀善力住持。云何可得思議耶。住名不異不滅。持名不散不



失。如以不朽藥塗種子。在水不爛。在火不焦。得因緣則生。何以故。不朽藥力故。若人一生安樂淨土。後時意願生三界教化眾生。捨淨土命。隨願得生。雖生三界雜生水火中。無上菩提種子。畢竟不朽。何以故。以經正覺阿彌陀善住持故。

莊嚴眷屬功德成就者。偈言。如來淨華眾。正覺華化生故。

此云何不思議。凡是雜生世界。若胎若卵若濕若化。眷屬若干。苦樂萬品。以雜業故。彼安樂國土。莫非是阿彌陀如來正覺淨華之所化生。同一念佛。無別道故。遠通夫法界之內。皆為兄弟也。眷屬無量。焉可思議。

莊嚴受用功德成就者。偈言。愛樂佛法味。禪三昧為食故。

此云何不思議。不食而資命。蓋所資有以也。豈不是如來滿本願乎。乘佛願。為我命。焉可思議。



莊嚴無諸難功德成就者。偈言。永離身心惱。受樂常無間故。

此云何不思議。經言。身為苦器。心為惱端。而彼有身有心。而受樂無間。安可思議。

莊嚴大義門功德成就者。偈言。大乘善根界。等無譏嫌名。女人及根缺。二乘種不生故。淨土果報。離二種譏嫌過。應知。一者體。二者名。體有三種。一者二乘人。二者女人。三者諸根不具人。無此三過故。名離體譏嫌。名亦三種。非但無三種。乃至不聞二乘女人諸根不具三種名故。名離名譏嫌等者。平等一相故。

此云何不思議。夫諸天共器。飯有隨福之色。足指按地。乃詳金礫之旨。而願往生者。本則三三之品。今無一二之殊。亦如溜澠食陵反一味。焉可思議。



莊嚴一切所求滿足功德成就者。偈言。眾生所願樂。一切能滿足故。

此云何不思議。彼國人天。若欲願往他方世界無量佛刹。供養諸佛菩薩。及所須供養之具。無不稱願。又欲捨彼壽命。向餘國生。修短自在。隨願皆得。未階自在之位。而同自在之用。焉可思議。

△示現自利利他者。

略說彼阿彌陀佛國土十七種莊嚴功德成就。示現如來自身利益大功德力成就。利益他功德成就故。

言略者。彰彼淨土功德無量。非唯十七種也。夫須彌之入芥子。毛孔之納大海。豈山海之神乎。毛芥之力乎。能神者神之耳。是故十七種雖曰利他。自利之義。炳然可知。



△入第一義諦者。

彼無量壽佛國土莊嚴。第一義諦妙境界相。十六句及一句。次第說。應知。

第一義諦者。佛因緣法也。此諦是境義。是故莊嚴等十六句。稱為妙境界相。此義至入一法句文。當更解釋。詳下七十五六七。及一


句次第者。謂觀器淨等總別十七句觀行次第也。云何起次。建章言。歸命無礙光如來。願生安樂國。此中有疑。疑言。生為有本。眾累之元。棄生願生。生何可盡。為釋此疑。是故觀彼淨土莊嚴功德成就。明彼淨土。是阿彌陀如來清淨本願無生之生。非如三有虛妄生也。何以言之。夫法性清淨。畢竟無生。言生者。是得生者之情耳。生苟無生。生何所盡。盡夫生者。上失無為能為之身。下醜醉。亡善反。三空不空之瘡廢病也。工路反。。根敗永亡。



號振三千。無反無復。於斯招恥。體夫生理。謂之淨土。淨土之宅。所謂十七句是也。十七句中。總別為二。初句是總相。所謂是清淨佛土過三界道。彼過三界有何相。下十六種莊嚴功德成就相是也。一者量。究竟如虛空。廣大無邊際故。既知量。此量以何為本。是故觀性。性是本義。彼淨土。從正道大慈悲出世善根生。既言出世善根。此善根生何等相。是故次觀莊嚴形相。既知形相。宜知形相何等體。是故次觀種種事。既知種種事。宜知種種事妙色。是故次觀妙色。既知妙色。此色有何觸。是故次觀觸。既知身觸。應知眼觸。是故次觀水地虛空莊嚴三事。既知眼觸。應知鼻觸。是故次觀衣華香熏。既知眼鼻等觸。須知離染。是故次觀佛慧明照。既知慧光淨力。宜知聲名遠近。是故次觀梵聲遠聞。既知聲名。宜知誰為增上。是故次觀主。既知有主。誰為主眷屬。是故次觀眷屬。既知眷屬



·宜知此眷屬若為受用。是故次觀受用。既知受用。宜知此受用有難無難。是故次觀無諸難。既知無諸難。以何義故無諸難。是故次觀大義門。既知大義門。宜知大義門滿不滿。是故次觀所求滿足。復次此十七句。非但釋疑。觀此十七種莊嚴成就。能生真實淨信。必定得生彼安樂佛土。問曰。上言知生無生。當是上品生者。若下下品人。乘十念往生。豈非取實生耶。但取實生。即墮二執。一恐不得往生。二恐更生生惑。答。譬如淨摩尼珠。置之濁水。水即清淨。若人雖有無量生死之罪濁。聞彼阿彌陀如來至極無生清淨寶珠名號。投之濁心。念念之中。罪滅心淨。即得往生。又是摩尼珠。以玄黃幣裹。投之於水。水即玄黃。一如物色。彼清淨佛土。有阿彌陀如來無上寶珠。以無量莊嚴功德成就帛裹。投之於所往生者心水。豈不能轉生見為無生智乎。又加冰上燃火。火猛則冰解。冰解則火滅。



。彼下品人。雖不知法性無生。但以稱佛名力。作往生意。願生彼土。彼土是無生界。見生之火。自然而滅。

△眾生體者。此分中有二重。一者觀佛。二者觀菩薩。觀佛者。云何觀佛莊嚴功德成就。觀佛莊嚴功德成就者。有八種相。應知。

此觀義已彰前偈。

何等八種。一者莊嚴座功德成就。二者莊嚴身業功德成就。三者莊嚴口業功德成就。四者莊嚴心業功德成就。五者莊嚴大眾功德成就。六者莊嚴上首功德成就。七者莊嚴主功德成就。八者莊嚴不虛作住持功德成就。

何者莊嚴座功德成就。偈言。無量大寶王。微妙淨華臺故。
若欲觀座。當依觀無量壽經。



何者莊嚴身業功德成就。偈言。相好光一尋。色像超群生故。

若欲觀佛身。當依觀無量壽經。

何者莊嚴口業功德成就。偈言。如來微妙聲。梵響聞十方故。
何者莊嚴心業功德成就。偈言。同地水火風。虛空無分別故。
無分別者。無分別心故。

凡夫眾生身口意三業以造罪。輪轉三界。無有窮已。是故諸佛菩薩莊嚴身口意三業。用治眾生虛誑三業也。云何用治。眾生以身見故。受三途身。卑賤身。醜陋身。八難身。流轉身。如是等眾生。見阿彌陀如來相好光明身者。如上種種身業繫縛。皆得解脫。入如來家。畢竟得平等身業。眾生以憍慢故。誹謗正法。毀訾賢聖。捐擯尊長。尊者。君父師也。長者。有德之人。及兄黨也。。如是人應受拔舌苦。瘡痍苦。言教不行苦。無名聞苦。如是等種種諸苦眾生。



聞阿彌陀如來至德名號。說法音聲。如上種種口業繫縛。皆得解脫。入如來家。畢竟得平等口業。眾生以邪見故。心生分別。若有若無。若非若是。若好若醜。若善若惡。若彼若此。有如是等種種分別。以分別故。長淪三有。受種種分別苦。取捨苦。長寢大夜。無有出期。是眾生若遇阿彌陀如來平等光照。若聞阿彌陀如來平等意業。是等眾生。如上種種意業繫縛。皆得解脫。入如來家。畢竟得平等意業。問曰。心是覺知相。云何可得同地水火風無分別耶。答曰。心雖知相。入實相。則無知也。譬如蛇性雖曲。入竹筒則直。又如人身若鍼刺。若蜂螫式亦。則有覺知。若石蛭反之一。噉。若甘刀割。則無覺知。如是等有知無知。在於因緣。若在因緣。則非知非無知也。問曰。心入實相。可令無知。云何得有一切種智耶。答曰。凡心有知。則有所不知。聖心無知。故無所不知。無知而知。知即無知也。



問曰。既言無知故無所不知。若無所不知者。豈不是知種種法耶。既知種種之法。復云何言無所分別耶。答曰。諸法種種相。皆如幻化。然幻化象馬。非無長頸鼻首足異。而智者觀之。豈言定有象馬分別之耶。

何者莊嚴大眾功德成就。偈言。天人不動眾。清淨智海生故。

何者莊嚴上首功德成就。偈言。如須彌山王。勝妙無過者故。

何者莊嚴主功德成就。偈言。天人丈夫眾。恭敬繞瞻仰故。

何者莊嚴不虛作住持功德成就。偈言。觀佛本願力。遇無空過者。能令速滿足。功德大寶海故。

不虛作住持功德成就者。蓋是阿彌陀如來本願力也。今當略示虛作之相不能住持。用顯彼不虛作住持之義。人有輟止也。與劣反。餐養士。或繫起舟中。積金盈庫。而不免餓死。如斯之事。觸目皆



是。得非作得。在非守在。皆由虛妄業作。不能住持也。所言不虛作住持者。依法藏菩薩四十八願。今日阿彌陀如來自在神力。願以成力。力以就願。願不徒然。力不虛設。力願相符。畢竟不差。故曰成就。得非作得二句疑是持非能持住非常住

即見彼佛。未證淨心菩薩。畢竟得證平等法身。與淨心菩薩。與上地諸菩薩。畢竟同得寂滅平等故。

平等法身者。八地已上法性生身菩薩也。寂滅平等者。即此法身菩薩所證寂滅平等之法也。以得此寂滅平等法故。名為平等法身。以平等法身菩薩所得故。名為寂滅平等法也。此菩薩得報生三昧。以三昧神力。能一處一念一時。徧十方世界。種種供養一切諸佛。及諸佛大會眾海。能於無量世界無佛法僧處。種種示現。種種教化。度脫一切眾生。常作佛事。初無往來想



· 供養想· 度脫想。是故此身名為平等法身。此法名為寂滅平等法也。未證淨心菩薩者。初地已上七地已還諸菩薩也。此菩薩亦能現身。若百若干若萬若億。若百千萬億。無佛國土施作佛事。要須作心入三昧乃能。非不作心。以作心故。名為未得淨心。此菩薩願生安樂淨土。即見阿彌陀佛。見阿彌陀佛時。與上地諸菩薩。畢竟身等法。龍樹菩薩。婆藪槃頭菩薩輩。願生彼者。當為此耳。問曰。案十地經。菩薩進趣階級。漸有無量功勳。經多劫數。然後乃得。此云何見阿彌陀佛時。畢竟與上地諸菩薩身等法耶。答曰。言畢竟者。未言即等也。畢竟不失此等。故言等耳。問曰。若不即等。復何待言。菩薩但登初地。以漸增進。自然當與佛等。何假言與上地菩薩等。答曰。菩薩於七地中。得大寂滅。上不見諸佛可求。下不見眾生可度。欲捨佛道。證於實際。爾時若不得十方諸佛神力加勸。



即便滅度。與二乘無異。菩薩若往生安樂。見阿彌陀佛。即無此難。是故須言畢竟平等。復次無量壽經中。阿彌陀如來本願言。設我得佛。他方佛土諸菩薩眾來生我國。究竟必至一生補處。除其本願自在所化。為眾生故被弘誓鎧。積累德本。度脫一切。遊諸佛國。修菩薩行。供養十方諸佛如來。開化恆沙無量眾生。使立無上正真之道。超出常倫諸地之行。現前修習普賢之德。若不爾者。不取正覺。案此經推。彼國菩薩。或可不從一地至一地。言十地階次者。是釋迦如來於閻浮提一應化道耳。他方淨土。何必如此。五種不思議中。佛法最不可思議。若言菩薩必從一地至一地。無超越之理。未敢詳也。譬如有樹。名曰好堅。是樹地生。百歲乃具。一日長高百丈。日日如此。計百歲之長。豈類修松耶。見松生長。日不過寸。聞彼好堅。何能不疑。即同有人聞釋迦如來。證羅漢於一聽。制無生於



終朝。謂是接誘之言。非稱實之說。聞此論事。亦當不信。夫非常之言。不入常人之耳。謂之不然。亦其宜也。

略說八句。示現如來自利利他功德莊嚴次第成就。應知。

此云何次第。前十七句。是莊嚴國土功德成就。既知國土相。應知國土之主。是故次觀佛莊嚴功德。彼佛若為莊嚴。於何處坐。是故先觀座。既知座已。宜知座主。是故次觀佛莊嚴身業。既知身業。應知有何聲名。是故次觀佛莊嚴口業。既知名聞。宜知得名所以。是故次觀莊嚴心業。既知三業具足。應為人天大師。堪受化者是誰。是故次觀大眾功德。既知大眾有無量功德。宜知上首者誰。是故次觀上首。上首是佛。既知上首。恐同長幼。是故次觀主。既知是主。主有何增上。是故次觀莊嚴不虛作住持。八句次第成已。



△觀菩薩者。

云何觀察菩薩莊嚴功德成就。觀察菩薩莊嚴功德成就者。觀彼菩薩有四種正修行功德成就。應知。

真如是諸法正體。體如而行。則是不行。不行而行。名如實修行。體唯一如。而義分為四。是故四行以一正統之。

何者為四。一者於一佛土身不動搖。而徧十方種種應化。如實修行。常作佛事。偈言。安樂國清淨。常轉無垢輪。化佛菩薩日。如須彌住持故。開諸眾生淤泥華故。

八地已上菩薩。常在三昧。以三昧力。身不動本處。而能徧至十方。供養諸佛。教化眾生。無垢輪者。佛地功德也。佛地功德。無習氣煩惱垢。佛為諸菩薩。常轉此法輪。諸大菩薩。亦能以此法輪開導一切。無暫時休息。故言常轉。法身如日。而



應化身光徧諸世界也。言日未足以明不動。復言如須彌住持也。淤泥華者。經言。高原陸地。不生蓮華。卑溼淤泥。乃生蓮華。此喻凡夫在煩惱泥中。為菩薩開導能生佛正覺華。諒夫。紹隆三寶。常使不絕。

二者彼應化身。一切時不前不後。一心一念。放大光明。悉能徧至十方世界。教化眾生。種種方便。修行所作。滅除一切眾生苦故。偈言。無垢莊嚴光。一念及一時。普照諸佛會。利益諸群生故。

上言不動而至。容或至有前後。是故復言一念一時無前後也。

三者彼於一切世界。無餘照諸佛會大眾。無餘廣大無量供養恭敬讚歎諸佛如來功德。偈言。雨天樂華衣。妙香等供養。讚諸佛功德。無有分別心故。



無餘者。明徧至一切世界一切諸佛大會。無有一世界一佛會不至也。肇公言。法身無像。而殊形並應。至韻無言。而玄籍彌布。冥權無謀。而動與事會。蓋斯意也。

四者彼於十方一切世界無三寶處。住持莊嚴佛法僧寶功德大海。徧示令解如實修行。偈言。何等世界無。佛法功德寶。我願皆往生。示佛法如佛故。

上三句雖言徧至。皆是有佛國土。若無此句。便是法身有所不法。上善有所不善。觀行體相竟。

△已下是解義中第四重。名為淨入願心。淨入願心者。

又向說觀察莊嚴佛土功德成就。莊嚴佛功德成就。莊嚴菩薩功德成就。此三種成就願心莊嚴。應知。



應知者。應知此三種莊嚴成就。由本四十八願等清淨願心之所莊嚴。因淨故果淨。非無因他因有也。

略說入一法句故。

上國土莊嚴十七句。如來莊嚴八句。菩薩莊嚴四句。為廣。入一法句。為略。何故示現廣略相入。諸佛菩薩有二種法身。一者法性法身。二者方便法身。由法性法身。生方便法身。由方便法身。出法性法身。此二法身。異而不可分。一而不可同。是故廣略相入。統以法名。菩薩若不知廣略相入。則不能自利他。

一法句者。謂清淨句。清淨句者。謂真實智慧無為法身故。

此三句展轉相入。依何義名之為法。以清淨故。依何義名為清淨。以真實智慧無為法身故。真實智慧者。實相智慧也。實相



無相。故真智無知也。無為法身者。法性身也。法性寂滅。故法身無相也。無相。故能無不相。是故相好莊嚴。即法身也。無知。故能無不知。是故一切種智。即真實智慧也。以真實而目智慧。明智慧非作非非作也。以無為而標法身。明法身非色非非色也。非於非者。豈非非之能是乎。蓋無非之曰是也。自是無待夫非是也。非是非非。百非之所不喻。是故言清淨句。清淨句者。謂真實智慧無為法身也。

此清淨有二種。應知。

上轉入句中。通一法入清淨。通清淨入法身。今將別清淨出二種故。故言應知。

何等二種。一者器世間清淨。二者眾生世間清淨。器世間清淨者。如向說十七種莊嚴佛土功德成就。是名器世間清淨。眾生



世間清淨者。如向說八種莊嚴佛功德成就。四種莊嚴菩薩功德成就。是名眾生世間清淨。如是一法句。攝二種清淨義。應知。

夫眾生為別報之體。國土為共報之用。體用不一。所以應知。然諸法心成。無餘境界。眾生及器。復不得異。不得一。不一則義分。不異同清淨。器者。用也。謂彼淨土。是彼清淨眾生之所受用。故名為器。如淨食用不淨器。以器不淨故。食亦不淨。不淨食用淨器。食不淨故。器亦不淨。要二俱潔。乃得稱淨。是以一清淨名。必攝二種。問曰。言眾生清淨。則是佛與菩薩。彼諸人天。得入此清淨數否。答曰。得名清淨。非實清淨。譬如出家聖人。以殺煩惱賊故。名為比丘。凡夫出家者。持戒破戒。皆名比丘。又如灌頂王子。初生之時。具三十二相。七寶即為所屬。雖未能為轉輪王事。亦名轉輪王。以其必為



轉輪王故。彼諸人天。亦復如是。皆入大乘正定之聚。畢竟當得清淨法身。以當得故。得名清淨。

△善巧攝化者。

如是菩薩。奢摩他。毗婆舍那。廣略修行。成就柔軟心。

柔軟心者。謂廣略止觀。相順修行。成不二心也。譬如以水取影。清淨相資而成就也。

如實知廣略諸法。

如實知者。如實相而知也。廣中二十九句。略中一句。莫非實相也。

如是成就巧方便迴向。


如是者。如前後廣略。皆實相也。以知實相故。則知三界眾生



虛妄相也。知眾生虛妄。則生真實慈悲也。知真實法身。則起真實歸依也。慈悲之與歸依。巧方便在下。

何者菩薩巧方便迴向。菩薩巧方便迴向者。謂說禮拜等五種修行。所集一切功德善根。不求自身住持之樂。欲拔一切眾生苦故。作願攝取一切眾生。共同生彼安樂佛國。是名菩薩巧方便迴向成就。

案王舍城所說無量壽經。三輩生中。雖行有優劣。莫不皆發無上菩提之心。此無上菩提心。即是願作佛心。願作佛心。即是度眾生成心。度眾生成心。即攝取眾生淨佛國土心。是故願生彼安樂淨土者。要發無上菩提心也。若人不發無上菩提心。但聞彼國土受樂無間。為樂故願生。亦當不得往生也。是故言不求自身住持之樂。欲拔一切眾生苦故。住持樂者。謂彼安樂淨土



· 為阿彌陀如來本願力之所住持。受樂無間也。凡釋迴向名義。
· 謂以己所集一切功德。施與一切眾生共向佛道。巧方便者。
謂菩薩願以己智慧火。燒一切眾生煩惱草木。若有一眾生不成
佛。我不作佛。而眾生未盡成佛。菩薩已自成佛。譬如火捺德念
反· 欲摘聽歷一切草木燒令使盡。草木未盡。火捺已盡。以後其
身而身先。故名巧方便。此中言方便者。謂作願攝取一切眾生
· 共同生彼安樂佛國。彼佛國即是畢竟成佛道路無上方便也。

△離菩提障者。

菩薩如是善知迴向成就。即能遠離三種菩提門相違法。何等三
種。一者依智慧門。不求自樂。遠離我心貪著自身故。

知進守退曰智。知空無我曰慧。依智故。不求自樂。依慧故。
遠離我心貪著自身。



二者依慈悲門。拔一切眾生苦。遠離無安眾生心故。

拔苦曰慈。與樂曰悲。依慈故。拔一切眾生苦。依悲故。遠離無安眾生心。

三者依方便門。憐愍一切眾生心。遠離供養恭敬自身心故。


正直曰方。外己曰便。依正直故。生憐愍一切眾生心。依外己故。遠離供養恭敬自身心。

是名遠離三種菩提門相違法。

△順菩提門者。

菩薩遠離如是三種菩提門相違法。得三種隨順菩提門法滿足故。何等三種。一者無染清淨心。以不為自身求諸樂故。

菩提是無染清淨處。若為身求樂。即違菩提。是故無染清淨心



• 是順菩提門。

二者安清淨心。以拔一切眾生苦故。

菩提是安隱一切眾生清淨處。若不作心拔一切眾生離生死苦。即便違菩提。是故拔一切眾生苦。是順菩提門。

三者樂清淨心。以令一切眾生得大菩提故。以攝取眾生生彼國土故。

菩提是畢竟常樂處。若不令一切眾生得畢竟常樂。則違菩提。此畢竟常樂依何而得。依大乘門。大乘門者。謂彼安樂佛國土是也。是故又言以攝取眾生生彼國土故。

是名三種隨順菩提門法滿足。應知。

△名義攝對者。



向說智慧慈悲方便三種門。攝取般若。般若攝取方便。應知。

般若者。達如之慧名。方便者。通權之智稱。達如則心行寂滅。通權則備省眾機。省機之智。備應而無知。寂滅之慧。亦無知而備省。然則智慧方便。相緣而動。相緣而靜。動不失靜。智慧之功也。靜不廢動。方便之力也。是故智慧慈悲方便。攝取般若。般若攝取方便。應知者。謂應知智慧方便。是菩薩父母。若不依智慧方便。菩薩法則不成就。何以故。若無智慧。為眾生時。則墮顛倒。若無方便。觀法性時。則證實際。是故應知。

向說遠離我心不貪著自身。遠離無安眾生心。遠離供養恭敬自身心。此三種法。遠離障菩提心。應知。

諸法各有障礙相。如風能障靜。土能障水。溼能障火。五黑十



惡障人天。四顛倒障聲聞果。此中三種不遠離。障菩提心。應知者。若欲得無障。當遠離此三種障礙也。

向說無染清淨心。安清淨心。樂清淨心。此三種心。略一處成就妙樂勝真心。應知。

樂有三種。一者外樂。謂五識所生樂。二者內樂。謂初禪二禪

三禪意識所生樂。三者法樂。五角反樂。魯各反謂智慧所生樂。此智慧所

生樂。從愛佛功德起。是遠離我心。遠離無安眾生心。遠離自

供養心。是三種心。清淨增進。略為妙樂勝真心。妙言其好。

以此樂緣佛生故。勝言勝出三界中樂。真言不虛偽。不顛倒。

△願事成就者。

如是菩薩智慧心。方便心。無障心。勝真心。能生清淨佛國土

。應知。



應知者。謂應知此四種清淨功德。能得生彼清淨佛國土。非是他緣而生也。

是名菩薩摩訶薩隨順五種法門。所作隨意自在成就。如向所說身業。口業。意業。智業。方便智業。隨順法門故。

隨意自在者。言此五種功德力。能生清淨佛土。出沒自在也。

身業者。禮拜也。口業者。讚歎也。意業者。作願也。智業者。觀察也。方便智業者。迴向也。言此五種業和合。則是隨順往生淨土法門自在業成就。

△利行滿足者。

復有五種門。漸次成就五種功德。應知。何者五門。一者近門。二者大會眾門。三者宅門。四者屋門。五者園林遊戲地門。



此五種示現入出次第相。入相中。初至淨土是近相。謂入大乘
正定聚。近阿耨多羅三藐三菩提。入淨土已。便入如來大會眾
數。入眾數已。當至修行安心之宅。入宅已。當至修行所居屋
宇^{尤舉}_反。修行成就已。當至教化地。教化地。即是菩薩自娛樂地
。是故出門。稱園林遊戲地門。

此五種門。初四種門。成就入功德。第五門。成就出功德。

此入出功德門。何者是。釋言。

入第一門者。以禮拜阿彌陀佛。為生彼國故。得生安樂世界。
是名入第一門。

禮佛願生佛國。是初功德相。

入第二門者。以讚歎阿彌陀佛。隨順名義稱如來名。依如來光



明智相修行故。得入大會眾數。是名入第二門。

依如來名義讚歎。是第二功德相。

入第三門者。以一心專念作願生彼。修奢摩他寂靜三昧行故。得入蓮華藏世界。是名入第三門。

為修寂靜止故。一心願生彼國。是第三功德相。

入第四門者。以專念觀察彼妙莊嚴。修毗婆舍那故。得到彼處。受用種種法味樂。是名入第四門。

種種法味樂者。毗婆舍那中。有觀佛國土清淨味。攝受眾生大乘味。畢竟住持不虛作味。類事起行願取佛土味。有如是等無量莊嚴佛道味。故言種種。是第四功德相。

出第五門者。以大慈悲。觀察一切苦惱眾生。示應化身。迴入



生死園煩惱林中。遊戲神通。至教化地。以本願力迴向故。是名出第五門。

示應化身者。如法華經普門示現之類也。遊戲有二義。一者在義。菩薩度眾生。譬如師子搏鹿。所為不難。如似遊戲。二者度無所度義。菩薩觀眾生。畢竟無所有。雖度無量眾生。而實無一眾生得滅度者。示度眾生。如似遊戲。言本願力者。示大菩薩於法身中。常在三昧。而現種種身。種種神通。種種說法。皆以本願力起。譬如阿修羅琴。雖無鼓者。而音曲自然。是名教化地第五功德相。

菩薩入四種門。自利行成就。應知。

成就者。謂自利滿足也。應知者。謂應知由自利故。則能利他。非是不能自利而能利他也。



菩薩出第五門。迴向利益他行成就。應知。

成就者。謂以迴向因。證教化地果。若因若果。無有一事不能利他。應知者。謂應知由利他故。則能自利。非是不能利他而能自利也。

菩薩如是修五念門行。自利利他。速得成就阿耨多羅三藐三菩提故。

佛所得法。名為阿耨多羅三藐三菩提。以得此菩提。故名為佛。今言速得阿耨多羅三藐三菩提。是得早作佛也。阿名無。耨多羅名上。三藐名正。三名徧。菩提名道。統而譯之。名為無上正徧道。無上者。言此道窮理盡性。更無過者。何以言之。以正故。正者。聖智也。如法相而知。故稱為正智。法性無相。故聖智無知也。徧有二種。一者聖心徧知一切法。二者法身



徧滿法界。若身若心。無不徧也。道者。無礙道也。經言。十方無礙人。一道出生死。一道者。一無礙道也。無礙者。謂知生死即是涅槃。如是等入不二法門無礙相也。問曰。有何因緣。言速得成就阿耨多羅三藐三菩提。答曰。論言修五門行。以自利利他成就故。然覈求其本。阿彌陀如來為增上緣。他利之與利他。談有左右。若自佛而言。宜言利他。自眾生而言。宜言他利。今將談佛力。是故以利他言之。當知此意也。凡是生彼淨土。及彼菩薩人天所起諸行。皆緣阿彌陀如來本願力故。何以言之。若非佛力。四十八願便是徒設。今的取三願。用證義意。願言。設我得佛。十方眾生至心信樂欲生我國。乃至十念。若不得生者。不取正覺。唯除五逆誹謗正法。緣佛願力故。十念念佛。便得往生。得往生故。即免三界輪轉之事。無輪轉故。所以得速。一證也。願言。設我得佛。國中人人。不住



正定聚。必至滅度者。不取正覺。緣佛願力故。住正定聚。住正定聚故。必至滅度。無諸迴復之難。所以得速。二證也。願言。設我得佛。他方佛土諸菩薩眾來生我國。究竟必至一生補處。除其本願自在所化。為眾生故。被弘誓鎧。積累德本。度脫一切。遊諸佛國。修菩薩行。供養十方諸佛如來。開化恆沙無量眾生。使立無上正真之道。超出常倫諸地之行。現前修習普賢之德。若不爾者。不取正覺。緣佛願力故。超出常倫諸地之行。現前修習普賢之德。以超出常倫諸地行故。所以得速。三證也。以斯而推他力為增上緣。得不然乎。當復引例示自力他力相。如人畏三途故。受持禁戒。受持禁戒故。能修禪定。以禪定故。修習神通。以神通故。能遊四天下。如是等名為自力。又如劣夫。跨驢不上。從轉輪王行。便乘虛空。遊四天下。無所障礙。如是等名為他力。愚哉。後之學者。聞他力可乘



· 當生信心 · 勿自局分也。

無量壽修多羅優婆提舍願生偈略解義竟。

經始稱如是 · 彰信為能入。末言奉行 · 表服膺事已。論初歸禮 · 明宗旨有由。終云義竟 · 示所詮理畢。述作人殊 · 於茲成例。

無量壽經優婆提舍願生偈註卷下



略論安樂淨土義

魏西河石壁谷玄中寺沙門曇鸞撰

問曰。安樂國於三界中何界所攝。答曰。如釋論言。如斯淨土。非三界所攝。何以故。無欲故非欲界。地居故非色界。有形色故非無色界。經曰。阿彌陀佛本行菩薩道時。作比丘名曰法藏。於世自在王佛所。請問諸佛淨土之行。時佛為說二百一十億諸佛剎土。天人善惡。國土精麤。悉現與之。於時法藏菩薩。即於佛前。發弘誓大願。取諸佛土。於無量阿僧祇劫。如所發願。行諸波羅蜜。萬善圓滿。成無上道。別業所得非三界也。

問曰。安樂國有幾種莊嚴。名為淨土。答曰。若依經據義。法藏菩薩四十八願。即是其事。尋讀可知。不復重敘。若依無量壽論。以二種清淨。攝二十九種莊嚴成就。二種清淨者。一器世間。



二是眾生世間清淨。器世間清淨。有十七種莊嚴成就。一者國土相。勝過三界道。二者其國廣大。量如虛空。無有齊限。三者從菩薩正道大慈悲出世善根所起。四者清淨光明圓滿莊嚴。五者備具第一珍寶性。出奇妙寶物。六者潔淨光明。常照世間。七者其國寶物柔軟。觸者適悅。生於勝樂。八者千萬寶華。莊嚴池沼。寶殿寶樓閣種種寶樹。雜色光明。影納世界。無量寶網。覆虛空。四面懸鈴。常吐法音。九者於虛空中自然常雨天華天衣天香。莊嚴普熏。十者佛慧光明。照除癡闇。十一者梵聲開悟。遠聞十方。十二者阿彌陀佛無上法王善力住持。十三者從如來淨華所化生。十四者愛樂佛法味禪三昧為食。十五者永離身心諸苦。受樂無間。十六者乃至不聞二乘女人根缺之名。十七者眾生有所欲樂。隨心稱意。無不滿足。如是等十七種。是名器世間清淨。眾生世間清淨。有十二種莊嚴成就。一者無量大珍寶王微妙華臺以為



佛座。二者無量相好無量光明莊嚴佛身。三者佛無量辯才。應機說法。具足清白。令人樂聞。聞者必悟解。言不虛說。四者佛真如智慧猶如虛空。照了諸法總相別相。心無分別。五者天人不動眾廣大莊嚴。譬如須彌山。映顯四大海。法王相具足。六者成就無上果。尚無能及。況復過者。七者為天人丈夫調御師。大眾恭敬圍繞。如師子王師子圍繞。八者佛本願力莊嚴住持諸功德。遇者無空過。能令速滿足一切功德海。未證淨心菩薩。畢竟得證平等法身。與淨心菩薩。與上地菩薩。畢竟同得寂滅平等。九者安樂國諸菩薩眾。身不動搖。而徧至十方。種種應化。如實修行。常作佛事。十者如是菩薩應化身。一切時不前不後。一心一念放大光明。悉能徧至十方世界。教化眾生。種種方便修行所作。滅除一切眾生苦惱。十一者是等菩薩於一切世界。無餘照諸佛大會。無餘廣大無量供養恭敬讚歎諸佛如來功德。十二者是諸菩薩於



十方一切世界無三寶處。住持莊嚴佛法僧寶功德大海。徧示令解如實修行。如是等法王八種莊嚴功德成就。如是菩薩四種莊嚴功德成就。是名眾生世間清淨。安樂國土。具如是等二十九種莊嚴功德成就。故名淨土。

問曰。生安樂土者。凡有幾輩。有幾因緣。答曰。無量壽經中。唯有三輩。上中下。無量壽觀經中。一品分為上中下。三三而九。合為九品。今依傍無量壽經為讚。且據此經作三品論之。上輩生者。有五因緣。一者捨家離欲而作沙門。二者發無上菩提心。三者一向專念無量壽佛。四者修諸功德。五者願生安樂國。具此因緣。臨命終時。無量壽佛與諸大眾現其人前。即便隨佛往生安樂。於七寶華中。自然化生。住不退轉。智慧勇猛。神通自在。中輩生者。有七因緣。一者發無上菩提心。二者一向專念無量壽佛。三者多少修善奉持齋戒。四者起立塔像。五者飯食沙門。六



者懸繒燃燈散華燒香。七者以此迴向願生安樂。臨命終時。無量壽佛化現其身。光明相好具如真佛。與諸大眾現其人前。即隨化佛往生安樂。住不退轉。功德智慧。次如上輩。下輩生者。有三因緣。一者假使不能作諸功德。當發無上菩提心。二者一向專意。乃至十念念無量壽佛。三者以至誠心願生安樂。臨命終時。夢見無量壽佛。亦得往生。功德智慧。次如中輩。

又有一種往生安樂。不入三輩中。謂以疑惑心修諸功德。願生安樂。不了佛智。不思議智。不可稱智。大乘廣智。無等無倫最上勝智。於此諸智。疑惑不信。然猶信罪福。修習善本。生安樂國七寶宮殿。或百由旬。或五百由旬。各於其中受諸快樂。如忉利天。亦皆自然。於五百歲中。常不見佛。不聞經法。不見菩薩聲聞聖眾。安樂國土。謂之邊地。亦曰胎生。邊地者。言其五百歲中不見聞三寶。義同邊地之難。或亦於安樂國土最在其邊。胎生



者。譬如胎生人。初生之時。人法未成。邊言其難。胎言其闇。此二名皆借此況彼耳。非是八難中邊地。亦非胞胎中胎生。何以知之。安樂國土一向化生故。故知非實胎生。五百年後。還得見聞三寶故。故知非八難中邊地也。

問曰。彼胎生者。處七寶宮殿中受快樂否。復何所憶念。答曰。經喻云。譬如轉輪王子。得罪於王。內於後宮。繫以金鎖。一切供具無所乏少。猶如王。王子於時雖有好妙種種自娛樂具。心不受樂。但念設諸方便。求免怖出。彼胎生者。亦復如是。雖處七寶宮殿。有好色香味觸。不以為樂。但不見三寶。不得供養修諸善本。以之為苦。識其本罪。深自責悔。求離彼處。即得如意。還同三輩生者。當是五百年末。方識罪悔耳。

問曰。以疑惑心往生安樂。名曰胎生者。云何起疑。答曰。經中但云疑惑不信。不出所以疑意。尋不了五句。敢以對治言之。不



了佛智者。謂不能信了佛一切種智。不了故。故起疑。此一句總辨所疑。下四句一一對治所疑。疑有四意。

一者疑但憶念阿彌陀佛。不必得往生安樂。何以故。經曰。業道如稱。重者先牽。云何一生。或百年。或十年。或一月。無惡不造。但以十念相續。便得往生。即入正定聚。畢竟不退。與三途諸苦永隔乎。若爾。先牽之義。何以可信。又曠劫已來。具造諸行有漏之法。繫屬三界。云何不斷三界結惑。直以少時念阿彌陀佛。便出三界乎。繫業之義。復欲云何。對治此疑。故言不思議智。不思議智者。謂佛智力。能以少作多。以多作少。以近為遠。以遠為近。以輕為重。以重為輕。以長為短。以短為長。如是等佛智無量無邊。不可思議。譬如百夫百年聚薪。積高千仞。豆許火焚。半日便盡。豈可得言百年之薪積。半日不盡乎。又如躡者寄載他船。因風帆勢。一日至千里。豈可得言躡者云何一日至



千里乎。又如下賤貧人。獲一瑞物。而以貢主。主慶所得。加諸重賞。斯須之頃。富貴盈溢。豈可得言以頗有數十年仕。備盡辛懃。上下尚不達歸者。言彼富貴無此事乎。又如劣夫。以己身力。擲驢不上。從轉輪王行。便乘虛空。飛騰自然。復可以擲驢之劣夫。言必不能乘空耶。又如十圍之索。千夫不制。童子揮劍。瞬頃兩分。豈可得言一小兒力不能斷索乎。又如鳩鳥入水。魚蚌斯斃。犀角觸泥。死者咸起。豈可得言性命一斷。無可生乎。又如黃鵠呼子安。子安還活。豈可得言墳下千歲靈。決無可甦乎。一切萬法。皆有自力他力。自攝他攝。千開萬閉。無量無邊。安得以有礙之識。疑彼無礙之法乎。又五不思議中。佛法最不可思議。而以百年之惡為重。疑十念念佛為輕。不得往生安樂入正定聚者。是事不然。

二者疑佛智於人不為懸絕。何以故。夫一切名字。從相待生。覺



智從不覺生。如人迷方。從記方生。若使迷絕不迷。迷卒不解。迷若可解。必迷者解。亦可云解者迷。迷解解迷。猶手反覆耳。乃可明昧為異。亦安得超然哉。起此疑故。於佛智慧生疑不信。對治此疑。故言不可稱智。不可稱智者。言佛智絕稱謂。非相形待。何以言之。法若是有。必應有知有之智。法若是無。亦應有知無之智。諸法離於有無。故佛冥諸法。則智絕相待。汝引解迷為喻。猶是一迷耳。不成迷解。亦如夢中與他解夢。雖云解夢。非是不夢。以知取佛。不曰知佛。以不知取佛。非知佛。以非知非不知取佛。亦非知佛。以非知非不知取佛。亦非知佛。以非非知非非不知取佛。亦非知佛。佛智離此四句。緣之者心行滅。指之者言語斷。以是義故。釋論云。若人見般若。是則為被縛。若不見般若。是亦為被縛。若人見般若。是則為解脫。若不見般若。是亦為解脫。此偈中說不離四句者為縛。離四句者為解脫。汝疑佛智與人不懸絕者。是事不然。



三者疑佛不能實度一切眾生。何以故。過去世有無量阿僧祇恆沙諸佛。現在十方世界亦有無量無邊阿僧祇恆沙諸佛。若使佛實能度一切眾生。則應久無三界。第二佛則不應復為眾生發菩提心。具修淨土攝受眾生。而實有第二佛攝受眾生。乃至實有三世十方無量諸佛攝受眾生。故知佛實不能度一切眾生。起此疑故。於阿彌陀佛作有量想。對治此疑。故言大乘廣智。大乘廣智者。言無法不知。無煩惱不斷。無善不備。無眾生不度。所以有三世十方者。有五義。一者若使無第二佛。乃至無阿僧祇恆沙諸佛者。佛便不能度一切眾生。以實能度一切眾生故。則有十方無量諸佛。無量諸佛。即是前佛所度眾生。二者若一佛度一切眾生盡者。後亦不應復有佛。何以故。無覺他義故。復依何義說有三世佛乎。依覺他義故。說佛佛皆度一切眾生。三者後佛能度。猶是前佛之能。何以故。由前佛有後佛故。譬如帝王之中。得相紹襲。後王



即是前王之能故。四者佛力雖能度一切眾生。要須有因緣。若眾生與前佛無因緣。復須後佛。如是無緣眾生。動經百千萬佛。不聞不見。非佛力劣也。譬如日月周四天下。破諸闇冥。而盲者不見。非日不明也。雷震裂耳。而聾者不聞。非聲不厲也。覺諸緣理。號之曰佛。若情強違緣理。非正覺也。是故眾生無量。佛亦無量。徵佛莫問有緣無緣。何不盡度一切眾生者。非理言也。五者眾生若盡。世間即墮有邊。以是義故。即有無量佛度一切眾生。問曰。若眾生不可盡。世間復須墮無邊。無邊故。佛則不能實度一切眾生。答曰。世間非有邊非無邊。亦絕四句。佛令眾生離此四句。名之為度。其實非度非不度。非盡非不盡。譬如夢渡大河。值濤波諸難。其人畏怖。叫聲徹外。外人喚覺。坦然無憂。但為渡夢。不為渡河。問曰。言度與不度。皆墮邊見。何以但說度一切眾生為大乘廣智。不說不度眾生為大乘廣智。答曰。眾生



莫不厭苦求樂。畏縛求解。聞度則歸向。聞不度。不知所以不度。便謂佛非大慈悲。則不歸向。故長寢久夢。無由可息。為是人故。多說度。不說不度。復次諸法無行經亦言。佛不得佛道。亦不度眾生。凡夫強分別。作佛度眾生。言度眾生。是對治悉檀。言不度眾生。是第一義悉檀。二言各有所以。不相違背。問曰。如夢得息。豈不是度耶。若一切眾生所夢皆息。世間豈不盡。答曰。說夢為世間。若夢息則無夢者。若無夢者。亦不說度者。如是知世間即是出世間。雖度無量眾生。則不墮顛倒。

四者疑佛不得一切種智。何以故。若能徧知諸法。諸法墮有邊故。若不能徧知。則非一切種智故。對治此疑。故言無等無倫最上勝智。無等無倫最上勝智者。凡夫智虛妄。佛智如實。虛實懸殊。理無得等。故言無等。聲聞辟支佛欲有所知。入定方知。出定不知。又知亦有限。佛得如實三昧。常在深定而徧知。照萬法二



與無二。深法非倫。故言無倫。八地已上菩薩。雖得報生三昧。用無出入。而習氣微熏。三昧不極明淨。形待佛智。猶為有上。佛智斷具足。如法而照。法無量故。照亦無量。譬如函大蓋亦大。故言最上。此三句亦可展轉相成。以佛智無與等者故。所以無倫。以無倫故。最上勝。亦可最上勝故無等。無等故無倫。但言無等便足。復何以須下二句者。如須陀洹智不與阿羅漢等。而是其類。初地至十地亦如是。智雖不等。非不其倫。何以故。非最上故。汝以知有邊為難。疑佛非一切智者。是事不然。

問曰。下輩生中云。十念相續。便得往生。云何名為十念相續。答曰。譬如有人。空曠迴處。值遇怨賊。拔刀奮勇。直來欲殺。其人勁走。視渡一河。若得渡河。首領可全。爾時但念渡河方便。我至河岸。為著衣渡。為脫衣渡。若著衣納。恐不得過。若脫衣納。恐無得暇。但有此念。更無他緣。唯念何當渡河。即是一



念。如是不雜心。名為十念相續。行者亦爾。念阿彌陀佛。如彼念渡。經於十念。若念佛名字。若念佛相好。若念佛光明。若念佛神力。若念佛功德。若念佛智慧。若念佛本願。無他心間雜。心心相次。乃至十念。名為十念相續。一往言十念相續。似若不難。然凡夫心猶野馬。識劇猿猴。馳騁六塵。不暫停息。宜至信心。預自剋念。使積習成性。善根堅固也。如佛告頻婆娑羅王。人積善行。死無惡念。如樹西傾。倒必隨西。若使風刀一至。百苦湊身。若前習不在懷。念何可辦。又宜同志五三。共結言要。垂命終時。迭相開曉。為稱阿彌陀佛名號。願生安樂。聲聲相次。使成十念也。譬如蠟印印泥。印壞文成。此命斷時。即是生安樂時。一入正定聚。更何所憂也。

略論安樂淨土義



婆藪槃頭法師傳

梁真諦譯節錄

婆藪槃頭法師者。北天竺富婁沙富羅國人也。富婁沙。譯為丈夫。富羅。譯為土。此土有國師婆羅門。姓憍尸迦。有三子。同名婆藪槃頭。婆藪。譯為天。槃頭。譯為親。天竺立兒名。有此體。雖同一名。復立別名以顯之。第三子婆藪槃頭。於薩婆多部出家。得阿羅漢果。別名比鄰持定乘反跋婆。比鄰持。是其母名。跋婆。譯為子。亦曰兒。長子婆藪槃頭。是菩薩根性人。亦於薩婆多部出家。得大乘空觀。因此為名。名阿僧伽。阿僧伽。譯為無著。數上兜率多天。諮問彌勒大乘經義。造大乘經優波提舍。解釋佛所說一切大教。第二婆藪槃頭。亦於薩婆多部出家。博學多聞。徧通墳籍。神才俊朗。無可為儔。戒行清高。難以相匹。兄弟既有別名。故法師但稱婆藪槃頭。造七十真實論。破外道所造僧法論。首尾瓦解。無一句得立。於阿踰闍國起三寺。一比丘尼寺。



。二薩婆多部寺。三大乘寺。法師爾後更成立正法。先學毗婆沙義已通。後為眾人講毗婆沙義。一日講。即造一偈。攝一日所說義。刻赤銅葉以書此偈。標置醉象頭上。擊鼓宣令。誰人能破此偈義。能破者當出。如此次第造六百餘偈。攝毗婆沙義盡。一一皆爾。遂無人能破。即是俱舍論偈也。偈訖後。即作長行解偈。立薩婆多義。隨有僻處。以經部義破之。名為阿毗達摩俱舍論。法師既徧通十八部義。妙解小乘。執小乘為是。不信大乘。謂摩訶衍。非佛所說。阿僧伽法師。住在丈夫國。既見此弟聰明過人。識解深廣。該通內外。遣使往阿踰闍國報云。我今疾篤。汝可急來。天親即隨使還本國。與兄相見。諮問疾源。兄答云。我今心有重病。由汝而生。汝不信大乘。恆生毀謗。以此惡業。必永淪惡道。我今愁苦。命將不全。天親聞此驚懼。即請兄為解說大乘。兄即為略說大乘要義。法師聰明。即於此時。悟知大乘理。



應過小乘。於是就兄徧學大乘義。後如兄所解。悉得通達。解意既明。思惟前後。悉與理相應。無有乖背。始驗小乘為失。大乘為得。若無大乘。則無三乘道果。昔既毀謗大乘。不生信樂。懼此罪業。必入惡道。深自咎責。欲悔先過。往至兄所。陳其過迷。今欲懺悔先愆。未知何方得免。云我昔由舌故生毀謗。今當割舌以謝此罪。兄云。汝設割千舌。亦不能滅此罪。汝若欲滅此罪。當更為方便。法師即請兄說滅罪方便。兄云。汝舌能毀謗大乘。汝若欲滅此罪。當善解說大乘。阿僧伽法師殞歿後。天親方造大乘論。解釋諸大乘經。華嚴。涅槃。法華。般若。維摩。勝鬘等諸大乘經論。悉是法師所造。又造唯識論。釋攝大乘。三寶性。甘露門等諸大乘論。凡是法師所造。文義精妙。有見聞者。靡不信求。故天竺及餘邊土。學大小乘人。悉以法師所造為學本。異部及外道論師。聞法師名。莫不畏伏。於阿踰闍國捨命。年終



八十。雖迹居凡地。理實難思議也。

北魏曇鸞法師傳 續高僧傳·樂邦文類·

曇鸞·雁門人。少遊五臺山。見神迹靈異。因發信心出家。讀大集經。以其詞義深密。因為註解。文言過半。便感氣疾。周行醫療。既而歎曰。人命危脆。旦夕無常。吾聞長年神仙。往往間出。得是法已。方崇佛教。不亦可乎。遂往江南陶隱居所。懇求仙術。隱居授以仙經十卷。欣然而還。至洛下。遇三藏菩提留支。驚問曰。佛法中頗有長生不死法。勝此仙經者乎。留支曰。此方何處有長生不死法。縱得長年。少時不死。卒歸輪轉。曷足貴乎。夫長生不死。吾佛道也。乃以十六觀經授之。曰。學此。則三界無復生。六道無復往。盈虛消息。禍福成敗。無得而至。其為壽也。河沙劫量。莫能比也。此吾金仙氏之長生也。鸞大喜。遂



焚仙經。而專修淨觀。自行化他。流布彌廣。魏主重之。號為神鸞。勅住并州大寺。晚移汾州玄中寺。興和四年。一夕室中見梵僧謂曰。吾龍樹也。久居淨土。以汝同志。故來相見。鸞自知時至。集眾教誡曰。勞生役役。其止無日。地獄諸苦。不可不懼。九品淨業。不可不修。因令弟子高聲唱佛。西向稽顙而終。在寺者。俱見幡華幢蓋。自西而來。天樂盈空。良久乃已。

案淨土宗。以三經一論為宗要。所謂論者。即天親菩薩所造往生論是也。元魏曇鸞法師為之註。中土久佚。近年得自日本。已由金陵刻經處刻行於世。唯古人稱註者。皆直註本文之下。絕域傳鈔。遂將註文與論文混而為一。今以註文低一格書之。較為醒目。復荷普陀印光法師合鸞師略論淨土義。及天親菩薩曇鸞法師二人傳。一再校訂。由本處重付剞劂。以餉當世。或亦足為讀斯論之一助歟。北京刻經處附識。



◎ 同音義字、古今字、本俗字、同義字對照參考表

- 「序、敘、敘」述
「纜、才」得往生
無「閒、間」一心
「毋、母」以持名
「需、須」捨至
文句「簡、簡」約
名「為」極樂、名「曰」極樂
「碑磔」、「車渠」
「郭、障」重
「檐、幡」蓋
戒行不「闕、缺」
夫「采、採」良藥者
「匙、鈔、鮮」有
-
- 非「麤、粗」妙
神「呪、咒」者
「回、廻、迴、迴」向「緜、綿」續
取「舍、捨」
千萬「刼、劫、劫、劫」後
周「帀、匝」
「玻璃」、「玻璃」、「頗黎」
「瑪瑙」、「馬瑙」、「碼瑙」
「脩、修」短願
「徧、遍」照十方
「已、以」前所造
商「摧、確」
「僑、驕」慢



- 說「箇、個」譬喻
「傲、仿」慈雲懺儀
心轉「疎、疏」
泥「犁、犁」
「遡、溯」流
茗「盃、碗」
慈音告「勅、敕」
「覩、睹」明星
「鬪、鬥」芳奇
優「鉢、鉢」
「喫、吃」盡
供「然、燃」燈佛
愆「憑、憑」
念有歸「栖、棲」
-
- 一事「挂、掛」心
作「技、妓、伎」樂
無「烟、煙」
「慇懃、殷勤」
南「鴈、雁」數聲
遭「毒、毒、毒」手
一「鑪、爐」香
「輝、輝」煌
自「悞悞、誤誤」人
無「柰、奈」
蹤「迹、跡」
「踊、踴」躍
「剗、剗」盡
任優「游、遊」



引「隄、堤」引水

舊「冢、塚」

「竈、灶」脚日斜煙未起

「尸、屍」骸

「展、輓」轉

不飽「飢、饑」烏腹

柔「輓、軟」

「煮、煮」砂為飯

「導、道」諸聲聞

可殺驚「慙、慚」

書「冊、冊」

「饋、肴」「饊、膳」

「凭、憑」高極目興無涯

念佛林間共命「羣、群」

露峯「脣、唇」

與藥為「鱗、仇」

合「并、併」

煙「燄、焰」中

「并、並」以警世

頻換「綫、線」

不「恪、吝」慈悲

「幸、倖」免

布帛菽粟之「譚、談」

冷「煖、暖」自知

「恒、恆」沙

夜課千聲「兔、兔」魄高


「衆、眾、眾」生

回首人間盡棘「鍼、針」



明月照「窗、窗」
作荒茅「聚、聚」
作能「埽、掃」愛河
「谿、溪」回有「邨、村」
馳「驟、驟」四方八極
雄其筆「劄、札」
則淆「譌、譌、訛」處
「虻蛇」「蠛蛇」「蜥蜴」
因果共四生「昇、升」墜
「噉、啖」人鬼想
當作飛「狸、狸」
豈足以「搖、謠」惑之
「餅、瓶」盤釵釧之理
一一明「了、瞭」

離染「污、汙」
「滾滾、滾滾」潮聲
從地「涌、湧」出
「祇、只」怕一念有
「毘、毗」盧遮那
庸「默、呆」下劣
淨功莫「克、尅、剋、剋」
如陷坑「穿、阱」
生大「忻、欣」樂
如離廁「阮、坑」
「傍、旁」一僧曰
「惡、噁」心大吐
是故「宏、弘」法音
鳴「乎、呼」



「嘸、擲」呻

貫徹「于、於」人心

「鸚鵡、八哥」者

日漸憔悴「頹、悴」

犬而「拏、拿」

大願「厲、礪」學者

「蹋、踏」上頭關

移華「蜨、蝶」至

為苦所「偏、逼」

曾聞多「觜、嘴」

月內「廿、廿」九

「付、咐」囑

有童羞「不、否」

觀「斌、嫵」媚姿

「歸、皈」依

「蝻、蠕」動蛎飛

病「愈、癒」

何「況、況」宿世親

其「華蘼、花花」芬馥

「膾、脍、吻」然契合

略露鋒「銚、芒」

「薙、剃」髮

「巖、岩」頭去後

鬼哭神「嗥、嗥」

「稽、稽」首謹題

「沈、沉」淪

自烏其「簫、龠」

「註、注」疏



如油入「麩、麵」

「扣、叩」棺

鑪「鎚、錘」之緣

不幸早「世、逝」

人命危「脆、脆」

刀「鎗、槍」

「陵、凌」空而逝

莫教「孤、辜」負

「矜嶸」「矜嶸」「矜嶸」「伶俜」「伶俜」

雪峯輓「毯、球」

「託、托」體

「瑠、琉」璃

無明黑「闇、暗」

「師、獅」子搏鹿

「汎、泛」慈舟

實為「希、稀」有

